

**Landesbibliothek Oldenburg**

**Digitalisierung von Drucken**


**Sigism. Iac. Baumgarten Theol. D. Et Prof. Ord.  
Programmata**

**Baumgarten, Siegmund Jakob**

**Halae Magdebvrgicae, MDCCXXXX**

**VD18 14392593-ddd**


**urn:nbn:de:gbv:45:1-17717**



Landesbibliothek Oldenburg

Theol T ①

X 86



SIGISM. IAC. BAVMGARTEN

THEOL. D. ET PROF. ORD.

# PROGRAMMATA

CVM

APPENDICE EPISTOLARVM

---

COLLEGIT ET DIGESSIT

GOTTHILF CHRISTOPH BAKIVS

PAEDAG. REG. COLLEGA.



---

HALAE MAGDEBURGICAE

IMPENSIS IOH. ANDR. BAVERI

MDCC XXXX.



ALPHABETUM  
ATGAMMAYEGORI

1609  
M. I. T. C. E. R. A. M.

EX BIBLIOTHECA  
OLDENBURGENSI



PERILLVSTRI EXCELLENTISSIMO  
ET GENEROSISSIMO VIRO

AC DOMINO

CAROLO FRIDERICO  
A DACHEROEDEN

DVCATVS MAGDEBURGICI REGIMINIS

ET SANCTIORIS SENATVS

PRAESIDI EMINENTISSIMO  
POTENTISSIMO REGI BORVSSIAE  
AB INTERIORIBVS CVBICVL

HAEREDITARIO IN BVRGORNER, SIERSLEBEN  
AVLEBEN, DALLEBEN CET.

22

AC



REVERENDISSIMO  
ILLVSTRI EXCELLENTISSIMO  
ET GENEROSISSIMO VIRO

AC DOMINO

CHRIST. GVILIELMO  
A MÜNCHHAVSEN

DYNASTAE OPPIDI ET PRAEFECTVRAE  
MOECKERENSIS, IN LEIZKAW  
PABSTORF, MARIENTHAL CET.

SHOLASTRO ET CAPITVLARI CATHE-  
DRALI HALBERSTADIENSI  
SPECTATISSIMO

DOMINIS MEIS PER CLE-  
MENTIBVS

FELICITATEM.

PER-



PERILLVSTRIS,  
REVERENDISSIME, GENEROSISSIMI  
DOMINI

Temeritatis suspicionem vix euitare  
videbor, qui ILLVSTRBVS VESTRIS  
NOMINIBVS opusculum, cuius vel  
nullae vel exiguae fuerunt partes meae,  
dicare audacissimo conatu suscepimus.  
Splendor NOMINVM VESTRORVM virtutum-  
que in alto positarum diu defixum atque  
dubitabundum me tenuit, an vos tanta  
decora atque ornamenta saeculi primitiis  
ingenii mei vix maturesceribus tamquam  
hederam quamdam praefigerem. Sed vi-  
cit tandem affectus affectum, pietas vere-  
cundiam, ac fulgor NOMINVM VESTRORVM,  
qui terrere aciemque oculorum praestrin-

gere videbatur, timorem ceterasque ani-  
mi perturbationes tamquam nebulas  
quasdam dispulit atque disiecit. Erexit  
summa me humanitas VESTRA, quam ce-  
teris virtutibus interlucere permittitis:  
optima in litterarum studium voluntas,  
quibus quasi condimentis grauiores curas  
et reip. administrationem adspergitis: fir-  
missimum patrocinii robur, et incredibilis  
in eruditos benevolentia, quae multos al-  
licit, vt ad vos MAECENATES tamquam  
ad iudices aequissimos ingenii fetum qua-  
lemcunque referant libellosque ILLVSTRI-  
BVS VESTRIS NOMINIBVS PALLADIS veluti  
clypeo munitos in lucem emittant.

Patiamini igitur, VIRI EXCELLENTISSIMI, vt  
fastigium VESTRVM venerabundus accedens  
VOBIS me vestrum totum consecrem, ac  
VESTRA huic opusculo NOMINA praescri-  
bam, quae omnibus litterarum cultori-  
bus sacra sunt atque auspicatissima. Leue  
est, quod offero, nec tamen ita compa-  
ratum, vt nulli plane in elegantiorum lit-  
terarum studia fructus exinde redundare  
possint. Purioris saltet latinitatis studiosi  
non sine voluptate, vt spero, obserua-  
bunt,



bunt, nouas res atque recens iuuentas pu-  
re, eleganter ac latine a celeb. auctore ipsa  
veterum ROMANORVM lingua esse expressas:  
quam vnicam barbarismis vti barbare vo-  
cantur obuiam eundi rationem tutissimam  
puto, quorum tantus sensim factus est  
prouentus, vt exstirpando luxurianti huic  
Iolio, ne sagacissimorum hominum suf-  
ficerit diligentia. Serena igitur fronte  
primos hos meos qualescunque conatus  
subleuate VIRI EXCELLENTISSIMI, qui tuen-  
dis euehendisque optimarum artium stu-  
diis omnes meae sortis homines honestis-  
simo VOBIS vinculo obstrinxistis. Sane  
vos estis, quorum incredibili clementia,  
cura atque contentione factum est, vt  
non vni cuidam regioni, sed toti GERMA-  
NIAE cultissimorum iuuenum coloniae  
subinde ex academiis submittantur. Per  
vos multi in academiis viuunt, per vos  
discunt, per vos dulcisimo sine fortunae  
discrimine otio perfruuntur. Tot tantis-  
que VESTRIS in rem litterariam meritis  
hunc vnum adiicite cumulum, vt libel-  
lum huncce indignorem, quam vt tan-  
tum tamque ILLVSTRE decus prae se ferre  
possit, benignissimo VESTRO adspectu dig-

a 4

nemini.

MOTULI



nemini. Quod mearum est partium,  
numquam desinam vota pro salute VESTRA  
nuncupare: supplex potius DEVUM immor-  
talem venerabor, ut felicitati VESTRAE tam-  
quam cumulum accedere iubeat, perpe-  
titatem. Valete ORNAMENTA germaniae.  
Scripsi HALAE magdeburgicae in paedago-  
gio regio vi. id. apr. an. CICCCXXXX.

PERILLVSTRI, REVERENDISSIMO,

GENEROSSIIMIS NOMINIBVS

VESTRIS

*deuotissimus*

GOTTHILF CHRISTOPH BAKIVS.

MAGDEBURG.

LECTORI



# LECTORI BENEVOLO

S. P. D.

GOTTHILF CHRISTOPH. BAKIVS.

**L**Atinae linguae, quae arctissimis antea finibus continebatur, tanta est amplitudo atque utilitas, ut quam ipsi ea in re non dicam anteponendam, sed comparandam arbitrer, nullam omnino ex tanta linguarum varietate inueniam. Contigit ipsi, quod nescio an vlli, ut praeter miram, qua cunctis se commendat, suavitatem, cultores quoque habeat per terrarum orbem doctissimos constanteque fama atque omnium sermone celebratissimos. Testantur illud historiarum oblectamenta, scientiarum optimarumque artium ambitus, monumenta antiquitatis, quae hac potissimum lingua ad nostram aetatem peruererunt nulla posteritatis obliuione deleta. Habemus igitur, quam iam dudum exceptarunt viri acutissimi, linguam paene vniuersalem: cuius fines tam longe lateque patent, ut cum absentibus mortuisque non minus, quam praesentibus atque viuis colloqui, animi sensa exprimere atque confociationem communem seruare possimus.

Culturam iccirco tam praeclarae linguae necessariam esse qui neget, credo fore neminem. Infinita paene sunt, quae a littera-

a 5 rum.



rum cultoribus requiruntur, ac longum esset accuratum scientiarum artiumque censum instituere, quibus studiosa iuuentus imbui virilisque aetas innutriri ac corroborari solet. Vnicus infinitarum linguarum campus spatio-sissimus ingenia satis vel exercere vel defatigare potest: ut vita vel longissima non sufficiat omnibus addiscendis. Optime igitur reipublicae litterariae, quae, discussa ignorantiae anilisque superstitionis caligine, ad pristinum suum splendorem rediit, consulitur, quod unam cuncti ciues linguam, vnum sermonem foedere quasi inito in condendis litterarum monumentis adhibeant, eosque omnes tamquam barbaros ex ciuitate eiificant, qui nondum tirocinia et documenta eruditionis in latine vel scribendo vel loquendo posuerunt. Et felix foret respublica, nisi indignissimi nonnumquam ciuitatem nacti tristissimas ipsi turbas excitarent.

Verum bilingues multi videntur paullatim a domestico et externo sermone degeneres. De debita nimirum linguae latinae cultura parum in scholis solliciti cruda adhuc studia in academias propellunt, illotis, quod aiunt, manibus sublimiorum scientiarum sacra conspurcant, et nouo genere audaciae prius formati esse volunt quam formari. Cuius quidem consilii quos fructus per omnem vitam percipient, si alia deessent huius rei documenta, ex ea ipsa, quam sectantur praepostera viuendi

## P R A E F A T I O.

di differendique ratione intelligitur. Ad altiora enim, vt sibi videntur euecti, pro libertate, quam crepant, academica, illud vnice per omnem diem agunt, vt in auditoriis rari in cathedris barbari, in disputationibus publicis et priuatis ridiculi atque elingues adpareant.

Nati inde sunt barbarismorum, vti vocantur sectatores, de honestamenta illa reipublicae litterariae, qui vel labra vix diducunt, quin sermonibus suis noua et inaudita vocabula eructent. *Imponenda quidem noua nouis rebus nomina*, vt princeps ille romanae eloquentiae CICERO, cuius res gestae maximaque in rem publicam atque litterariam merita nulla posteritatis obliuione extinguentur, non solum FIN. L. III. concessit, sed etiam variis adductis rationibus stabiluit. Sed quemadmodum multa recens inuenta videntur, quae veteribus cognita iam dudum atque perspecta suisque insignita nominibus fuerunt: ita nobis, quod CICERONI eiusque aetatis hominibus haudquam licet. Linguae, vti vocari solent, viuae variis mutationibus sunt obnoxiae, noua subinde vocabula excogitantur, alia non numquam construendi iungendique ratio obtinet: vt vestium instar, aliam saepius formam induisse videantur; quod vero in ceteris, quarum vulgaris usus iam dudum cessauit ferri non potest. Ludibrium sane deberet prudentioribus, qui togam commune illud veterum ROMANORVM vestimentum



## P R A E F A T I O.

tum immutare eiusque plicas alia ac lapides monstrant ratione adstringere temerario ausu fusciperet. Quis enim hac ratione barbarum a ciue, PARTHVM SCYTHAMQUE ab homine romano dignosceret? Nouorum vero vocabulorum fabricatores longe illis stultitia atque temeritate antecedunt. Aliorum enim cervicibus iugum intolerabile imponunt, dictatoria quadam auctoritate noua excogitant, barbara defendunt, ius ciuitatis sibi solis vindicant, clarissimis rebus tenebras offundunt, latebras obscuritatis seu potius ignorantiae quaerunt, et tamquam sempiterna reipublicae litterariae offusa nox esset, ita ruunt in caligine, omniaque miscent, ut mirum videatur, cur non SIGISMUNDI schismam potius quam somnia sua defendant atque in ciuitatem recipiant. Aequum itaque fuit, ut obuiam iretur eiusmodi hominibus, quorum inscitia atque oscitania antiqua illa latini sermonis integritas paene amissa foret. Laborat nunc eorum fides et conquisitis antiquitatis reliquiis vsu ipso edocemur latinam linguam non modo non inopem ut vulgo putant, sed locupletiorem etiam esse, quam graecam. C. I. C. FIN. L. I. Abundat verborum varietate, splendore atque ornamentis, ut nihil neque diuinum neque humanum cogitari possit, quod non proprie, commode, signate vel exprimat vel adiectis rerum circumstantiis declaret. Non ergo adparet, cur fortes malint, quam puri-



## PRAEFATIO.

puritatem atque elegantiam sermonis, qui in clarissima saepius academiae luce positi alto puluere in scholasticum supercilio contemnunt.

Sed felix est nostra academia, cui a primis quasi incunabulis numquam viri doctissimi defuerunt, qui de omni re litteraria, artibus scientiisque immortaliter meriti, integritatem quoque romanae linguae sartam tectamque ad posteritatem transmitterent. Paucorum tantummodo, ne praefatio in volumen excrescat mentionem iniiciam. Numquam de indefessa diligentissimi CELLARII cura, studio atque labore gratissimus sermo conticescat: posteritas ipsa celeberrimi SCHVLZI nostri memoriam, qui accerrimum se semper rei romanae totiusque antiquitatis vindicem praebuit venerabunda excipiet: et qui in primis nominandus fuisset, illustris HEINECIVS, fulgentissimum fridericianae nostrae iubar, et iucundum eruditis nomen, exemplo suo illustri satis monstrauit, grandibus etiam viris non turpe esse de ROMA antiqua bene mereri; cuius *fundamenta stili cultioris* multos eosque viros grauissimos, ut iunctis tam paeclaro operi viribus manus admouerent, excitarunt, ac ciuitatem latinam barbarorum impetu prope labascentem robore firmissimo suffulcirent: ut adeo academiam nostram, restauratricem, custodem, conseruatricem antiqui illius sermonis rectissime dixeris.

Quam



## P R A E F A T I O.

Quam praerogatiuam summo sibi iure pa-  
laestra fridericiana vindicat: quum et veri-  
tatum caelestium interpretes atque alumni  
cultores ac vindices viuae et antiquae Q V I R I-  
T V M linguae e medio eius extiterint. Quid-  
dam sane portenti simile esse videtur, de re-  
bus diuinis atque theologicis pure, perspicue,  
ornate, latine, lequi posse: quod VIR SVMME  
REVERENDVS, atque verum ordinis nostri the-  
ologici ornamentum D. BAVMGARTEN non so-  
lum facere instituit, sed pro ingenii, quo flo-  
ret, acumine, felicissime praestitit. Ne in  
re apertissima nimium longus esse videar:  
*programmata* tanti viri raptim quidem horis-  
que subsecuuis elegantissime tamen prescrip-  
ta oculis omnium atque iudicio expono, cer-  
tissime persuasus dictis illa fidem esse factura.  
Et quum teste COTTA ingenuo *romano* apud  
*CICERONEM ipsa collocatio conformatioque ver-  
borum perficiatur in scribendo, non poëtico sed  
quodam oratorio numero et modo, CIC. orat.  
lib. 1: numerum, illum, qui maxime ornat  
sermonem, vbiuis sollertiaffe esse seruatum  
deprehendimus cum mira quadam scitaque  
suavitate. Sufficere haec potuissent animum-  
que ab omni alia cogitatione ad illa publi-  
canda traducere: sed accesserunt aliae, quae  
opus maturarunt causae grauissimae.*

Iam dudum nimirum *programmata* illa,  
scholaistica potissimum, vbi ipso atque aesti-  
matione bonorum omnium vel distracta o-  
mnino,



## P R A E F A T I O.

mnino, vel ad tantam paucitatem redacta fu-  
erunt, vt ne precibus quidem cupide illa per  
litteras efflagitantium satisfieri potuerit: adeo  
vt propter argumenti dignitatem stilique ex-  
cellentiam maximum eorum desiderium con-  
sequutum atque collectio eiusmodi exopta-  
ri coepit fuerit. Quae animaduertens bi-  
bliopola, vir honestissimus, atque perquiri-  
tantium desideriis excitatus adiit VIRVM SVMME  
REVER. multisque precibus ab eo contendit, vt  
illa non singula ac separata, quod vix operaे  
preium esse, nec suis aliorumque rationibus  
conducere putabat, sed in certum ordinem  
redacta publici fieri iuris primo quoque tem-  
pore sustineret, veritus, ne quod HALBERSTA-  
DII iam tentatum foret, spes tam praeclari  
opusculi sibi prorsus eriperetur. Meritissi-  
mus nimirum scholae halberstadiensis modera-  
tor GEORG. VENZKY pro singulari, quam lon-  
go sibi vsu acquisiuit res eiusmodi dijudican-  
di peritia tantam nuper ex his programmati-  
bus passim circumvolitantibus cepit volu-  
ptatem, vt programma schola ast. V. de utilita-  
te pietatis in litteras redundante optimo suo  
lectuque omnino dignissimo libro, qui Un-  
terricht für Schuler inscribitur totum inse-  
ruerit. Debitae illi habentur gratiae, quod  
prouida sua atque sollerti cura effecerit, vt  
quae pulueri tenebrisque iam destinata vide-  
bantur in lucem demum producta nostram  
memo-



## P R A E F A T I O.

memoriam ad felicitatis neglectae cogitationem excitarent.

Ipse demum VIRO AMPLISSIMO auctor suasorumque extiti, ut quam primum posset nulla interposita dubitatione typis programmata quae saliuam iam multis mouissent exscribenda atque diuulganda curaret: qui tot demum precibus programmata exposcentium defatigatus, quamquam quae ab ipso parui, quae ab aliis proficiscuntur inusitato exemplo magni aestimare solet, facile tamen sese praebuit. Nec defuerunt vñquam exempla eiusmodi collectionum. Notissima sunt, ut demestica tantummodo leuiter perstringam, VIRORVM SVMME REVEREND. FRANCKII VTRIUSQUE, BREITHAVPTII, ANTONII atque ordinis nostri theologici SENIORIS D. LANGII, quorum, quum augere velim, vereor ne imminuam laudes, programma quae dispersa antea atque disiecta, vel conquisita, vel ceteris eorum operibus subiuncta sunt. Nota etiam sunt atque peruulgata INSPECT. nostri HONORATISSIMI FREYERI programmata scholastica, quae plurimis, vt facile intelligi potuit, pergrata perque iucunda fuerunt. Vnicum erat, quod rem prope iam explicatam perturbare atque impedire videbatur, grauissimorum nimirum negotiorum multitudo, quibus VIR SVMME REVER. nullo non tempore tam districtus tenetur, vt nec vlla hora a cogitationibus, meditationibus, laboribus publicis atque priuatis, vacua ipsi relinquatur.

Ne



## P R A E F A T I O.

Ne vero in cassum missae preces forent, studioque denegare, quod expectabatur, videatur, totam rem mihi demandare amantissime constituit: quam fiduciariam operam, eo facilius mihi permitti passus sum, quod tanto me fauore atque benevolentia, VIR SVMME REVER. quam primum ipsi innotui amplexus est, ut ingrati animi suspicione vix viderer absoluendus, nisi de agendis quidem atque habendis gratiis cogitarem, quas referendo adsequi non possem.

Quamquam igitur pietas in referenda gratia iucunda: parua tamen sunt, quae pro tot tantisque benevolentiae, quae VIR SVMME REVER. in me existare voluit documentis, reddere atque in adornando hoc opusculo praestare potui. Dispersa nimirum programmata, quorum argumenta mihi innotuerunt seruato temporis ordine collegi: collecta ab innumeris, quae irrepserant mendis erroribusque typographicis vindicaui: vindicatis hac ratione atque purgatis annotationes quasdam, quae rem ipsam illustrare videbantur, adieci, quibus ut eo facilius a ceteris, quae VIRO SVMME REVERENDO ipsi debentur, dignoscantur, stellulas praefigendas curaui. Constitueram antea programmata tantummodo in adspectum lucemque proferre: attamen ne opusculum, quod characteres *minusculi* breue iam

b

exi-



## P R A E F A T I O.

exiguumque reddiderant, mutilum plane et  
quasi decurtatum prodiret, mutato consilio  
epistolas quoque adieci: germanico program-  
mate, quod multi iam sitienter adpetunt, at-  
que a VIRO SVMME REVERENDO conscriptum est,  
quum docendi illi munus iussu POTENTISSIMI  
REGIS BORYSSIAE in florentissima nostra acade-  
mia demandaretur, in aliam occasionem re-  
iecto. Nec iis operam perdidisse videbor,  
qui recentiores cum veteribus coniungendos  
rectissime contra alios, quibus soli veteres  
placent, contendunt. Iam inde a QVINTILLI-  
ANI temporibus eruditi inter se dimicantes  
misciuerent certamina vtrum veteres recentio-  
ribus an recentiores veteribus anteponi vi-  
deantur QVINTILIANVS lib. X. c. 1. qui-  
dam solos veteres legendos putant, neque  
in ullis aliis esse naturalem eloquentiam  
et robur viris dignum, arbitrantur: alios re-  
cens haec lasciuia deliciaeque et omnia ad vo-  
luntatem multitudinis imperitae composita de-  
lestant. Facile largimur, consultius esse cer-  
tissimis veterum vestigiis insistere, quam  
per incerta multorum recentioris aetatis bre-  
via atque dumeta vagari: nihilominus, ut cum  
incomparabili D. WALCHIO ordinis theologici  
ienensis oraculo, praceptor omni pietate co-  
lendo loquamur: recentiores cum veteribus con-  
iungendos esse existimamus partim, ut cognosca-  
mus quomodo illi veteres sunt imitati, ut ex illo-  
rum



## P R A E F A T I O.

rum exemplis discamus applicare, et ad usum adderre, quae in ipsa latinitate profecimus, partim quia recentiores auctores viam ostendunt ad habitum de illis rebus dicendi, de quibus nostra aetate loquendum est, comparandum, quarum magna est copia, quae veteribus auctoribus fuerunt incognitae. Vbi adolescentes ad solos vetustiores scriptores accedunt, discunt quidem de rebus bellicis, ciuilibus similibusque latine loqui: sed quando dicendum est de argumentis aliis, quae aevi nostri propria sunt, nesciunt, quomodo eleganter, quae cogitant sint exprimenda. *histor. crit. latinae ling. lib. VI. §. III.*

Opusculum ipsum tripartitum procedit. Priorem partem programmata academica, funebria ceteraque ad festorum dierum solemnia conscripta sibi vindicant. Professoris eloquentiae quidem iam inde a primis academiae annis fuit, funerum solemnia indicere: nihilominus in consuetudinem quondam abierat, ut quandocunque quis reuerendi ordinis theologici supremum diem expleuisset, aut collega aliquis, aut cuicunque illud negotium traderetur exsequiarum solemnia tenatus academici nomine ediceret. Quare factum est, ut quum SVMME VENERABILIS BREITHAVPTVS atque SVMME REV. ZIMMERMMANNVS egregia morte defungerentur, NOSTROQUE prae ceteris prouincia illa demandaretur, priora programmata funebria eorum nomine, qui ad



## P R A E F A T I O.

semestria academiae gubernacula sedebant,  
conficeret. Quae illis subiuncta sunt feriis  
festisque diebus imperandis destinata, deca-  
ni quem vocant officia atque partes sustinens  
tamquam sua sibique propria elaborauit: si  
ab ultimo discesseris quod SVMME VENER. D.  
LANGII grauiissima atque inopinata valetudi-  
ne conflictati vices suscipiens condidit litte-  
rarumque monumentis consignauit. Alter-  
ram partem occupant programmata scholasti-  
ca argumentorum selectu, verborumque ni-  
tore atque elegantia maxime iucunda omni-  
busque numeris absoluta. Facile adparet  
condita illa esse a VIRO SVMME REVERENDO, quum  
numerose orphanotrophei inuentuti maxima  
cura summaque fide praeesset: quod adeo  
non infra dignitatem suam positum esse exi-  
stimauit, ut maximam potius ex iucunda  
animorum contentione atque innocentissi-  
morum suavitate morum ceperit voluptatem.  
Nihil intermisit, quod studium acuere, desi-  
deam actorporem discutere, ardoremque qui  
refederat nonnumquam excitare atque inno-  
uare videbatur. Quare anno MDCCXXVII.  
inspector scholae latinae constitutus, classem  
selectam eadem ac in paedagogio nostro re-  
gio obseruauerat, ratione ordinandam duxit,  
ut alumni nimirum qui integrum annum in  
classe illa suprema translegissent, cum program-  
mate tamquam publico quodam diligentiae,  
inge-



## P R A E F A T I O.

ingenii, profectuum documento atque incitamento dimitterentur. Litterae denique, quae ad disputationum solemnia conscriptae sunt atque *tertiam* libelli huius *partem* consti-  
tuunt, tantam tamque variam eodem argu-  
mento vbiuis spirant suavitatem, ut facile ad-  
pareat dissimilitudinem in rebus simillimis  
quam maxime ornare epistolam **VIROQVE MAXIME REVER.** neque rerum neque verborum  
copiam vñquam deesse posse. Vale LECTOR  
**OPTIME.** Dedi HALAE magdeburgicae in pae-  
dagogio regio VI, id. apr. an. **CIOCCXL.**



# INDEX

## PROGRAMMATA ACADEMICA

p. 1 - 172.

- |   |      |
|---|------|
| I. In funus viri summe venerabilis IOACH. IUSTI<br>BREITHAVPTI  | p. 1 |
| II. In funus summe reuer. IO. LIBORII ZIMMER-<br>MANNI  | 51   |
| III. De veterum temporibus memoriae CHRISTI<br>vitae restituti sacris ad solemnia pascha-<br>tos.               | 77   |
| IV. De tempore spiritus DEI in primos CHRISTI<br>discipulos effusi opportunissimo ad sole-<br>mnia pentecostes. | 101  |
| V. De solemnium CHRISTI sacrorum originibus ad<br>diem natalem DOMINI.  | 117  |
| VI. Ad difficiliora verba ROM. I. com. IIII. ad<br>paschae solemnia.  | 145  |

## PROGRAMMATA SCHOLASTICA

p. 173 - 250.

- |  |     |
|--|-----|
| I. Ad examen solemne.  | 175 |
| II. Ad examen classis selectae.                                    | 177 |
| III. De transitu ex scholis in academias feliciter<br>instituendo. | 181 |
| IV. De orationum scholasticarum argumentis<br>bene feligendis.     | 191 |
| V. De  |     |



## INDEX.

- |   |     |
|---|-----|
| V. De vtilitate ex pietate in litteras redundante               | 201 |
| VI. De corporis motu atque exercitatione litteratis necessaria. | 219 |
| VII. De periculis et malis eruditorum.                          | 236 |

## LITTERAE ACADEMICAЕ AD DISPV-TATIONVM SOLEMNIA

p. 251 - fin.

1) subpraeſidio VIRI SVMME REVERENDI habitarum:

- |  |      |
|--|------|
| I. De loco diffīcili 10. X. com. XXXIII - XXXVIII.                           | 253  |
| II. De precatione CHRISTI pro auertendo calice ad MATTH. XXVI. com. XXXVIII. | 255  |
| III. De dictis <i>scripturae sacrae</i> probantibus                          | 258  |
| IV. De CHRISTO a IUDA EIS conspicioendo ad MATTH. XXIII. com. XXXVIII.       | 261  |
| V. De gradibus peccatorum  | 263  |
| VI. De concilio tridentino.  | 269  |
| VII. De patrum primitiuae ecclesiae feliciori successu cet.                  | 273  |
| VIII. De discrimine eius quod naturale et morale dicitur in theologia.       | 276  |
| VIII. De <i>avapaeteta</i> ab hominibus in hac vita non obtainenda.          | 279  |
| X. De <i>scriptura sacra</i> .   | 284  |
| XI. De paedobaptismo.  | 287  |
|  | XII. |



## INDEX.

- XII. De polygamia simultanea illegitima. 290  
XIII. De gradibus bonorum operum et virtutis,  
295  
    2) aliis moderantibus defensarum.  
XIV. De notionibus superi et inferi. 297  
XV. De nonnullis ad poema pertinentibus. 300  
XVI. De veritate. 303  
XVII. De DIONYSIIS SICILIAE tyrannis. 306  
XVIII. De veterum coniunctione matheſeos cum  
philosophia, de qua in ipsis litteris agi-  
tur. 308  
XVIII. De paronomasia sacra. 314  
XX. De EBRAEORVM grammatica. 318  
XXI. De re athletica. 321  
XXII. De venae sectione. 324  
XXIII. De antiquitate codicis alexandrini. 327  
XXIV. De soloecismis generis codicis ebraei.  
330  
XXV. De nonnullis abstractis mathematicis. 332  
XXVI. De soloecismis casuum sacri codicis. 335  
XXVII. De punctorum ebraicorum antiquitate.  
338  
XXVIII. De affectibus. 341



PRO-



90  
is,  
95  
97  
00  
03  
06  
m  
gi  
08  
14  
18  
21  
24  
27  
ei.  
30  
32  
35  
e.  
38  
H  
0-  
  
**PROGRAMMATA  
ACADEMICA**

QVIBVS

TAM EXSEQVIARVM QVAM  
DIERVM FESTORVM  
SOLEMNIA  
NOMINE SENATVS ACADEMICI  
INDICVNTVR.





D· O· M· S·

MEMORIAE  
INCOMPARABILIS. THEOLOGI  
VIRI  
SVMME· VENERABILIS· EXCELLENTIS-  
SIMI· AMPLISSIMI  
**IO ACHIMI· IVSTI  
BREITHAVPTI**

ABBATIS· BERGENSIS· SVPREMI· SACRORVM· IN  
TERRIS· MAGDEBURGICIS· ANTISTITIS· EARVM-  
DEMQUE SANCTORIS CVRIAЕ SENATORIS· S' THEOLOGIAE  
DOCTORIS· ET· PROFESSORIS· IN· FRIDERICIANA· SE-  
NIORIS· SEMINARIИ HILLERSLEBIENSIS  
DIRECTORIS

DE' ACADEMIA' OMNIQE' DEI' POPVLO  
MERITISSIMI

QVI

DIE· XVI. MARTII. HVIVS. ANNI. CIC 13 CC XXXII  
VITA· BEATE· DEFVNCTVS

AD· DIEM· IIII· MAI  
FVNEBRI· SERMONE· IN· AEDE· SCHOLASTICA  
CONDECORANDVS· EST

HOC· MONVMENTVM

L· L· Q· POS·

ACADEMIAE· FRIDERICIANAE· SENATVS

PRORECTOR E

SIMONE· PETRO· GASSERO

POTENTISSIMI· PORVSSIAE· REGIS· A· CONSILIIS· INTIMIS  
BELLICIS· AC· DOMANIALIBVS· IVRIVM· ET· RERV M· OEGO-  
NOMICO· CAMERALIVM· PROEFSORE· ORDINARIO· ET  
SCABINATVS· MAGDEBURGICI· ADSESSORE.





**Q**VEM REBV humanis Interceptum et a statione sua euocatum morte, quod vnum immortalitatis iter patet, ad beatorum religionem transiisse ante aliquod tempus tristissimo nuntio accepimus, D. IOACH. IVST. BREITHAVPTVM, theologum consummata doctrina et integritate venerabilem, plures nobiscum lugent et non sine exquisito dolore lacrimantur. Communis enim est et ad plures pertinet ille acerbissimus casus, neque vna, sed multiplex fortunae iactura facta est in uno homine, plurium virorum virtutes, munera et merita complexo. Ut gentem amplissimam taceamus, quae se hoc ornamento et capite orbam in squalorem coniecta grauissime dolet, ut amicos praetereamus et familiares, qui feralis huius casus dolore paene opprimuntur: omnis purior CHRISTI coetus illaetabili lacrimarum officio planctibusque prosequitur doctorem de se meritissimum, suae incolumenti confer-

uandae, dignitatique amplificandae per LII annos publice operato; cuius labori et institutioni sane quam plurimos diuinæ mentis interpretes dignissimos, per omnem domini vineam longe lateque dispositos, acceptos refert, et ex quo numquam, nisi hac tristissima deceSSIONe, aliquod detrimen-tum, innumera vero accessionum incrementa ce-pit. Illa in primis sacratior respublica, quae in terris magdeburgicis floret, vigilantissimum hunc praefulem et supremum sacrorum anti-sti-tem lugubri voce gemituque deflet, eiusque in-defessum de sua integritate studium, curam, re-gimen tristis desiderat. Sanctior senatus, regio nomine rebus sacris praefidens, aegre fert amis-sionem huius membra, quod annis laboribusque exantlatis in illustri hoc collegio reliquis omni-bus superius erat, prudentia, longo rerum usu parata, conspicuum. Berga, coenobium, or-bitatem suam gemit, et luctuosissime deplorat decus suum, fulcrum firmissimum et caput lu-get, sub quo annos XXII, et quod excurrit, sartum, rectum, conseruatum fuit et innumeris mo-dis locupletatum.

NOSTRA tamen academia iure quodam suo hanc communem tristitiam propriam sibi et peculiarem vindicat, neminique de primis in hoc moestissimo officio partibus concedit. Noster enim diutissime fuit, nobis maxime nostraeque academie vixit, ac longissimam vitae partem insumisit, nobis etiam maxime, o acerbissimam fortem!



fortem! mortuus est et fato ereptus. Amisimus collegam aetate, beneque de musis nostris merendi diuturnitate, omnibus nobis prouetionem: qui ab huius academiae incunabulis ei operam nauauit, et ad eius celebritatem, si quis alius, plurimum contulit, eius fasces bis prudentissime administrauit, saepius gesturus, fin reliquae occupationes impediuerent. Ereptus nobis est doctor theologus: qui litteras sacras primus in hanc bona mentis sedem inuexit et ad sublimem locum euexit: qui ea fide, sollertia, dexteritate omnes sacratioris disciplinae partes docuit, ut incredibilis ad eum fieret iuuenum DEO se consecrantium confluxus: qui ut communis theologorum nostratium praceptor plures religiosa doctrina initiauit discipulos, quam alii non incelestres doctores umquam viderunt. Derelicta est tribus iuuenum inopum, regiaque beneficentia subfultorum, a directore, capite et patre suo, qui illos in familiam receperos cura, consilio, ope sustinuit. Orbati sumus boni omnes rarissimo doctrinae, sanctitatis et religionis exemplo, quod eximium adhuc decus nostrum et ad virtutem incitamentum fuit, iam triste desiderium.

HAEC lacrimabilis, numquam tamen satis deflenda iactura, publico certe luctu testanda est: ne felicitatis nostrae, atque adeo nostri ipsorum incurii, aut iniqui fortunae nostrae aestimatores videamur. Publicae salutis et posteritatis



magni interest, tam rarum et inusitatum inter mortales exemplum in publicum proferre, et auctoritate solemni ad posteros transmittere. Quod itaque pietas in venerabilem senem, grata immortalium eius in rem nostram meritorum recordatio, senatus academicici consultum, laudabilis nostra consuetudo, ciuium exspectatio, collegii iura, et amor denique noster postulant, ut more academico iura funebria peragantur, merita dignis laudibus condecorentur, et ipsis de immortalitate inter nos, quoad suus virtuti honor constabit, prospiciatur: extremum hoc sanctis manibus officium praestabimus, ipsisque publicum hoc monumentum, omnium conscientia suffragioque subnixum, lugentes moestique consecrabimus.

COGITANTIBVS autem nobis incomparabilis et antiquae virtutis theologi vitam, vnum is ex omni antiquitate sacra AVRELIVM AVGVSTINVM, primi ordinis in ciuitate diuina virum, ita viuendo retulisse, et alterum nobis hipponeensem praefulem reddidisse visus est, vt satis ad eius laudem dixisse credamus, satis etiam ad declarandum, quantum caeli depositum in BREITHAVPTO nobis concessum et iam origini suae repetitum sit, si cum aliqua vtriusque contentione nostratem AVGVSTINVM antiquo nequidquam inferiorem fuisse demonstrauerimus. Quare venerabilem hanc priscae integritatis imaginem in BREITHAVPTO proposituri, eius ante omnia



omnia vitam ad ipsum annorum rerumque gestarum ordinem enarrabimus, deinde singulares, quibus eminuit, virtutes concelebrabimus, ea fide, quae non solum historiam, sed grauissimam illius magistratus, quem gerimus, auctoritatem decet.

IN EO diuus AVGVSTINVS incredibilem gratiam apud posteritatem sanctiorem peperit, quod vitae partem ipse litteris consignavit, et iuuentutis errores pariter, ac infinitam numinis benignitatem, confessus est in praeclaro confessorum opere, quod singularem erga deum pietatem spirat, et legentibus dubium relinquit, maioremne ex huius partis scriptione delectationem, an grauiorem dolorem ex reliquae narrationis desiderio conceperint. Eamdem ab omnibus laudum diuinarum cupidis gratiam iniit BREITHAVPTVS, quod commentarium vitae anno CIC IC CC XVIII, auctore per illustri CANSTEINIO, condidit, et post quinquennium in lucem prodire permisit, longe maiorem certo initurus, si, quo cooperat, filo, eodem illum pertexere potuisset. Hunc igitur certissimum auctorem per ipsam vitae narrationem sequemur.

SI IN republica litteraria et ciuitate dei ordines non doctrina, virtute, et meritis propriis; sed maiorum imaginibus, gentis antiquitate et profapiae nobilitate censerentur: non tamen fuisset huic nostro de primo et splendidissimo

A 5

ordine



ordine dubitandum. Maiores enim habuit in hercynio tractu per plura saecula, gestis in utraque republica magistratibus, innumeris in litteras, patriam et religionem meritis, ac vitae sanctitate clarissimos. Quorum vestigia non consequutus solum, sed longe praetergressus est, ab illis alienissimus, qui domesticas dignitatum imagines ad gloriandum magis, quam imitandum aemulandumque propositas esse credunt. Parentes ipsi obtigerunt, felicissima nascendi forte, M. CHRISTIAN. BREITHAVPTVS, vir integerrimus, gregis christiani northeimensis pastor, et iurisdictionis hohenstedensis antistes, et ANNA ANGELA TROSTIA, matrona ornatissima, oriunda ex gente TROSTIA, de re sacra et litteris, per MARTINVM maxime TROSTIVM, longe meritissima, quae illum NORTHEIMIAE, anno a salute parta CIO IOC LVIII mense februario inter fulgurantis et tonantis caeli fragores, ea anni tempestate inusitatissimos, in lucem enixa est, non obscuro omne, fore hunc tenellum aliquod fulmen filiumque tonitruum, omnia quoquouersum diuinitus postraturum, et salutari flamma accensurum, quales in diuinis oraculis IACOBVM et IOANNEM ab ipso CHRISTO vocatos legimus MARC. III comm. XVII.

QVOD AVRELIO a parentis PATRICII cura valde destituto piissima MONICA fuit, fuit idem nostro religiosissima ANNA mater: in cuius procurationem concessit, postquam vix quadrimus patrem



trem immaturo fato amiserat, cuius etiam ardentissimis apud DEVVM supplicationibus, vigiliis, adhortationibus, longeque sapientiore, quam vel a patribus plerisque proficisci solet, cura et educatione effectum est, vt summi numinis amore et consuetudine a teneris mature initiatus, primum aetatis florem a corruptione intemeratum transigeret, et annos, accelerato virtutis ac religionis, quam cum lacte inbiberat, gradu superaret. Quamobrem, beneficiis maternis AVGVSTINO aequalis, grati animi testificatione ipsi secundus esse noluit. Nam sicut ille libro confessionum III et VIII matris amabilem et venerabilem consignauit imaginem: ita etiam noster MONICAE suae castam virtutem, modeste quidem, at digne et grauiter collaudauit, pietatis monumento, quod ipsi vita functae erexit anno CIO IO CC IIII, dignum sane, vt omnium seminarum manibus teratur et matribus familias exemplo perenni proponatur. Partem oneris et curarum sustinuerunt, atque in formando fratre natu minimo eximie elaborarunt tres fratres aetate maiores: quorum primus M. CHRISTOPH. ANDREAS BREITHAVPTVS, scholae patriae moderator, patris prouinciam, quae ipsi cum hereditate testamento tradita fuerat, adeo administravit praeclare, vt NOSTER patre orbus patrem non desideraret, in eiusque disciplina inusitatae doctrinae tirocinia poneret.



FVIT IN HOC BREITHAVPTVS multo felicior AVGUSTINO, quod ille admodum puer, litterarum caussa MADAVRAS in ludum grammaticum missus, a domo et a MONICA sua absuit, vnde demum ephebus factus rediit, cum insigni bonae mentis detimento: NOSTER in patria vrbe et domo sub circumspectae matris fratrumpque cura adoleuir, et periculosisissimam vitæ partem transegit, cum magno illibatae religionis incremento. Refert AVGUSTINVS, se inter reliquas litteras, quibus tenera aetas illis temporibus imbui consueuit, praecipuo quodam oratorum et poetarum amore conflagrasse, totumque fuisse in VIRGILIO legendō, erroribus AENEAE et DIDONIS calamitatibus plorandis. Eodem naturae impetu BREITHAVPTVS puer ferebatur ad oratorium et poeticam artem, illa erectorum ingeniorum oblectamenta, omniumque disciplinarum antiquissimas. In reliquo quidem puluere scholastico nihil parvum suarum, diligentiae et contentio-  
nis reliqui fecit, linguarum elementa, historiam, philosophiam omnem, indefessus didicit: quoties tamen aliis laboribus perfuncto otiali licebat, poetae sibi illum vindicarunt, quos graecos et latinos diurna nocturnaque manu versauit, et praestantissimis floribus decerptis, atque in usum futurum congestis, imitari conatus est. MARONEM vero, qua erat iudicandi felicitate, ita præ reliquis adamauit, ut memoriae traderet omnem, eiusque heroicam dictionem suam faceret. Atque



que ut ex his studiis aliquis fructus ad rem diuinam rediret, cui se totum viuere existimabat: prouerbiorum SALOMONIS versionem poeticam ab illo iam tempore molitus est. Tantum absfuit, ut his litteris a religione, quod multis tamen accidit, diuelli se pateretur.

SIC Igitur formatus de sententia fratrum, qui nil diutius ipsum morati e laribus egressum in illustriori luce vires suas experiri, aemularique ingenia voluerunt, anno aetatis XVIII, saeculi superioris LXXVI, academiam IULIAM adiit: quae non loci solum propinquitate, sed celebritate professorum, CHRISTOPH. SCHRADERI maxime, et HEINRICI MEIBOMII, in oratoria et poesi insignium, ipsum attraxerat. Habuit hic doctores per orbem, qua litteris colitur, longe excellentissimos, GERHARD. TITIVM, ANDREAM FROELINGIVM, cuius iucundissimo etiam conuictu usus est, et WIDEBVRGOS fratres, qui erectiorem huius adolescentis indolem, incredibilem industriam et arripiendi, quae proponebantur, celeritatem experti, ipsi ad recondita et interiora litterarum penetralia contendenti facem fidi praetulerunt, neque committendum putarunt, ut ingenium non mediocre, sed excellens et ad omnem praestantiam factum, mediocriter coleretur.

QVAS AVGVSTINVS CARTHAGINEM, ad locupletissimum illo tempore eruditio[n]is mercatum, profectus litteras coiuit philosophicas, lecto CI-CERONIS HORTENSIO excitatus et in ARISTOTELIS cate-



categorias aliosque libros delatus, in quibus mire profecit: easdem BREITHAVPTVS HELMSTADII imbibit ex fidelissima philosophorum, quibus audiendis operam dedit, institutione haustas; ita tamen, ut caelestem doctrinam, cui se maxime deuouerat, non negligenter, sed maxime etiam coleret. Nec fuit, cur ipsum huius industriae in utraque eruditione positae umquam peneret: etenim cum deinde in litteris sacris docendis omnem vitam consumsit; ipso euentu comprobatum vidit, non sine prouidi DEI cura et prae sagae mentis moderamine factum esse, ut theologiam etiam scholasticam, quam vocant, disceret, et philosophicis litteris ingenium ad rectum veri falsique sensum, notionesque rerum distinctas et adaequatas subigeret. Vicefimo aetatis anno emensus stadium academicum, omniumque aequalium admirationem, praceptorum, quibus quotidianas et insignes litterarum progressiones mirifice probauerat, laudum testimonia et apparatissimam omnis doctrinae elegantioris, reconditae et sacratioris scientiam consequutus: secessum litterarium, quem fore in rem suam intelligebat, felici opportunitate BRVNSVIGAE et GVELPHERBYTI inuenit; ubi biennium exegit in recolendis digerendisque lectionibus academicis, et praecepris oratoriis celeberrimi SCHRADERI ad usum conferendis. AVGVSTINVs in foro per aliquod tempus versatus, priam suam in dicendo operam caussis agendis addixit



dixit: primus facile in hac iuris eloquentia futurus, nisi internis stimulis ad rem diuinam reuocatus, cum hac eloquentia litigiosa diuortium fecisset. BREITHAVPTVS, certius et deliberatus iter ad bene merendum de re sacra ingressus, quam sibi naturae beneficio concessam et rhetorum cura excultam cognoscebat eloquentiae facultatem, eam omnem ad caussam DEI in concionibus sacris agendam, hominumque animos ad religionem flectendos, impendere elaborauit, adeo felici successu, ut inter oratores sacros paucos haberet pares, superiorem neminem. Obtigerunt ipsi in hoc otio duo consummata ad imitandum exempla oratorum, CASPAR CRVSIUS, serenissimi terrarum brunsvicensium principis a rebus sacris, et D. BRANDANVS DAETRIVS, abbas supremusque sacrorum guelpherbytensium antistes: quorum prior in dictione concisa et colorata, posterior in periodica et ponderosa excellebat. Hos admiratus, imitatus, aemulatus est: ita, ut ad BRANDANI virile robur proprius accederet, eumque in dictione et actione felicissime exprimeret, in cuius etiam consuetudinem penitus se immersit, paterna eius consilia et auctoritatem pie veneratus.

AVGVSTINVS THAGASTAE, in patrio municipio, grammaticum agere, atque in scholastico puluere, molestiarum et fastidiorum plenissimo, desudare coepit: cuius tamen mox pertaesus, ad alia contendens et academicam celebritatem nobilius-

que



que litterarum genus desiderans, eo se paullo post ipse abdicavit; licet non paucos haberet, qui ludum frequentarent et praeceuntem indefessi sequerentur. Eamdem prouinciam NOSTER ornandam suscepit anno CIC 100 LXXX, quum illustris gymnasii guelpherbytani moderandi secundas partes, quas correctoris vocant, subiret, auctore potissimum et suoſore venerabili BRANDANO, sacramento etiam voluntatis paternae permotus, quo cautum erat, ne BREITHAVPTI fratres primam quamque prouinciam ipsis oblatam recusarent. In hunc fundum diuinis auspiciis rite immisus adeo sancte, caste et indefesse illum coluit, ut eius laboris, licet breuioris, amplissimos fructus ferret, magnamque exspectationis de se excitatae accessionem faceret. Quidquid ex solida linguarum notitia, earumque causis reconditis, ex antiquitate remotissima, historiarumque monumentis, scriptorum elegantissimorum, qui ob praestantiam classici nominantur, lectione, ex rhetorum praeceptis et philosophorum disputationibus, omni denique litterarum apparatu ad scholarum vſum conferri potest: id ex doctrinae opibus depromſit, habitoque rerum delectu ad intelligentiam tironum accommodauit. In primis ad latinitatem, bene, copioſe et ornate dicendi, recteque sapiendi artem ex ipsis fontibus antiquis hauriendam suis se ducem praebeuit: quibus sine ambagium circuitionibus, in eo studiorum genere visitatissimi

mis



mis, idem expeditum facileque iter, quod ipse decurrerat, ad humanitatem praeiuit. Qua laboriosissima opera aliis forte satisfecerit, qui praeter litterarum culturam in paedagogo nihil desiderant quidquam: sibi nullus videbatur partibus suis satisfacere, nisi eamdem operam in iuuentute ad bonam mentem, veram sapientiam, animi morumque integritatem formanda collocaret, et sollicite prouideret, ne virgiliani et ciceroniani magis, quam christiani euaderent pueri, non ad umbram, sed ad vitam, ad salutem publicam, ad ipsam aeternitatem fingendi. Quam ob rem sollertia dexteritate non solum ubi litterae sacrae docendae fuerunt, sed ipsae reliquae omnes, quas quotusquisque non arbitratur a sanctiore doctrina et vera in DEVUM pietate alienissimas? scite in pectora iuuenum inuolare, eorumque animos a virtio ad virtutem transducere, sanctis commotionibus afficere, DEO que familiarius conciliare satagit. Peculiarem opem praestitit accessuris ad sacra christianorum mysteria, quos singulos, antequam sacerdotem adirent, se conuenire, animum excutere, de corruptione dolere, et nuntio rebus omnibus misso, serio cum DEO in gratiam redire iussit, quibus, aliisque religiosis exercitiis magnam horarum partem, et plerumque diem primum sanctiorem transfigere solebat. Neque inanis fuit haec opera, quam DEVS ita fortunauit, ut felices hos successus pignoris et boni ominis instar

B

habe-



haberet, ad optima quaevis a propitio numine  
in reliquis suis publicis laboribus speranda.

VIX ANNVM expleuerat in hac bonae mentis  
officina strenue elaborans, quum pestis vicinas  
terras peruagata, et ad has oras progressa, soli-  
tudinem vbiuis et scholarum in primis missionem  
subito imperauit. Qua re factum est, vt, dum  
iuuentus litterarum studiosa sarcinas colligit et  
fugam meditatur, noster BREITHAVPTVS ani-  
mum sanctissimis igniculis inflammari, et ad alia  
omnia stimulari sentiret, atque receptum cogi-  
tare inciperet ex hac arena ad theologicas litte-  
ras magis colendas, illas quondam delicias suas,  
a quibus se diuulsum esse moleste ferebat. Ini-  
tio quidem his stimulis resistit, veritus, ne in-  
tempestiue et inauspicato mutationem subeat,  
DEO rem permittit, eumque ardentissime obte-  
statur, vt hoc affectu, magis in dies magisque  
aucto, liberetur. Verum vt excelsis ingeniis  
praesagia rerum futurarum inesse, et incitamen-  
ta ad altius enitendum diuinitus indi solent: ita  
hic ardor eundo vires acquirit, et ipsa diutur-  
nitate, quae inordinatos impetus minuit, auge-  
tur. Subductis tandem rerum suarum rationibus  
in hac statione cum ipso vitae discrimine perma-  
nendum sibi esse duxit, donec aliqua diuinae vo-  
luntatis significatione et indulgentissimi principis  
RVDOLPHI AVGVSTI auctoritate dimitteretur. In  
mediis his turbis aliquis opulentior iuuenis, san-  
ctiori disciplinae consecratus, ex academia IVLIA  
domum



domum commigraturus, studiorum comitem et moderatorem desiderat, qui doctoribus helmstadiensibus vnu omnium accommodatissimus videtur BREITHAVPTVS. Re itaque ad patriae patrem delata, cuius singularem fauorem sibi conciliauerat, et speciminibus poeticis et sermonibus sacris a principe frequentari solitis, emigrationis veniam impetrat, aegrius quidem, nec sine dolore sapientissimi ingeniorum arbitri, atque habita oratione ultima solemini, post edita, *de pietatis cultu in scholis necessario*, prouincia adeo praeclare administrata decedit, xv mensium labore laudabiliter perfunctus, omniumque, quibus eius industria innotuerat, laudibus exornatus.

CVM HOC igitur studiorum socio KILONIVM, celebre eruditorum pariter ac mercatorum emporium, petit eodem anno CICIOCLXXXI: per magni sua referre arbitratus, KORTHOLTOS, WASMVTHOS, FRANCKIOS, MORHOFIOS, aliosque litterarum vindices, audire, iisque ducibus dulcissimos rerum sacrarum fontes repetere, litteras sanctiores limatius retractare, magnumque horum studiorum opus sancte et ex voto perficere. Atque hos quidem omnes suspicit, frequentat, sequitur et veneratur: in vnum tamen KORTHOLTVM animo et veneratione defigitur totus, in eius familiam, coniuctum et intimam consuetudinem concedit, eius lateri et ori ita adhaeret, ut filius patrem maiori pietate colere nequeat, quam KORT-

HOLTVM suum coluit, ex quo intra sindonem admissus ab eius ore pependit. Eminebat consummatus ille theologus exquisita historiarum sacra rum notitia, controversiarum sanctorum, bellorum in coetu CHRISTI gestorum, diuinaeque militiae peritissimus erat, prudentia insuper et sapientissima regendae ciuitatis sacrae dexteritate insignis, atque oraculorum sacrorum interpretatione nemini secundus. Hunc praeceptorem consequutus BREITHAVPTVS non tiro et rerum sacrarum expers, sed omnem theologicarum litterarum campum iam emensus, maturo animo et ad diiudicanda opinionum discrimina meditando docendoque subactus, non potuit non insigniter proficere et longe vltra mediocritatem progredi. Primam operam hic posuit in examinandis verae doctrinae, diuinis oraculis fulta e errorumque diuertiis, atque litium nefandarum vicissitudinibus inuestigandis. Eorum potissimum, qui in pontificis romani castris contra CHRISTI disciplinam puriorem militant, officias, si quis alias, discussit, et moderatore KORTHOLTO disputauit de *disputandi processu papistico*. Deinde vterius progressus reliquam errantium familiam visitauit, si quid impeditum dubiis offendit, sollicita veri disquisitione expediu it, et sedulo elaborauit, vt non praeiudicatas docto rum opiniones imbibisse, sed firmissimo demon strationis diuinae fundamento subnixus et in vero corroboratus videretur. Postea auctor KORTHOLTO,



HOLTO, theologice experientissimo consultissimoque, exstitit explicandi casus difficiliores, et prudentiam in sanctiore prouincia necessariam praecipiendi, vnde ingentem ad omnem vitam muniaque grauissima utilitatem cepit. Praeter haec commoda, quae ex hoc doctore habuit cum aliis communia, benevolentiam specialem numquam satis praedicari posse, semper professus est, licet pro grati animi religione mirifice praedicaret. Ut verbo dicamus, tanti fecit BREITHAVPTVS KORTHOLTVM, quanti AVGVSTINVS AMBROSIVM, hoc est, longe maximi, quem, ex AFRICA MEDOLANVM profectus, diuinitus sibi datum accepit doctorem et parentem, a quo, ex errorum anfractibus ad rectum doctrinae caelestis tramitem transductus, atque ciuitati sacrae non vindicatus modo, sed ad magistratus etiam in ea gerendos praeparatus fuit. Eius insigni doctrina, sapientissimis sermonibus, morum castitate et venerabili integritate, adeo commotus fuerat, ut, licet ipse alios iam satis diu docuisse, in huius tamen se disciplinam traderet, huic se formandum fingendumque permitteret, huius imaginem per omnem vitae decursum exempli instar ad imitandum intueretur.

NOTIOR est et longior, quam ut huc transferatur, felicissima mentis conuersio, quae AVGVSTINO euenit, eumque mouit, ut secessum a laboribus vacuum quaereret, eaque digereret, quae ex AMBROSIO hauserat, quem in agro me-

diolanensi, et post in AFRICAM reuersus, THAGASTAE opportunum habuit, sibique utilissimum re ipsa comperit. BREITHAVTVS, qui, indulgentia venerandi theologorum ordinis, scholas theologicas aperuerat, suamque fidem et operam in sermonibus sacris habendis, dogmatibus theologicis, examinando et disputando inuestigandis, aliisque studiis, auditoribus addixerat, operaे pretium fieri credidit, si a laboribus, discendo docendoque exhaustis, per tempus ante vacaret, quam ad nouos grauioresque labores requireretur. Quod otium non utilius locari posse putauit, quam in peregrinatione litteraria ad celeberrimos doctores et academias. Illustrauerat eo tempore non magis FRANCOFVRTVM, quam omnem coetum CHRISTI puriores, beatus SPENERVS, incredibili doctrina incertum, an pietate et indefesso bene de CHRISTO merendi studio, excellentior, innotueratque *piis desideriis*, quae in academiis multos ad beneficandum, laborandumque excitauerant. Hunc igitur visurus FRANCOFVRTVM aduolat, inde ARGENTORATVM ad SEBAST. SCHMIDIVM aliosque progressurus. Verum non citius SPENERVM convenit et familiarius cognoscit, quam, eius amore captus, peregrinationis consilium mutat, eiusque perfruendi desiderio FRANCOFVRTI tenetur, atque in hoc antistite eum gregis pastorem, quem KORTHOLTUS praeceptis tradiderat, viuum praesens intuetur, concatenatam supplicationum,

medi-



meditationum, laborum et certaminum seriem,  
vitae domi et foris gestae sanctitatem, prudentissimam animorum curam, incredibile studium  
CHRISTI dignitatem in terris vindicandi et amplificandi cum admiratione veneratur. Sicut etiam SPENERVS ita illum peramare coepit, ut, quantum huic per omnem vitam, tantum reliquorum theologorum deferret nemini. Facundum simul, diuinumque in flectenda concione robur HOLTZHVSII non sine delectatione audiuit et in usus conuertit. Iisdem his auctoribus statuit, DEO ad operas publicas ipsum vocanti obsequi, quod adhuc recusauerat, infra mediocritatem de se sentiens, admodum, qua erat animi modestia, viribus suis diffisus. Iam difficillima erat optio, et prouinciarum, ad quas simul euocabatur, diuidicatio, quam aliis prudentioribus integrum reliquit, atque illis voluntatis diuinae nuntiis KILONIVM redire decreuit, quorsum inopinatus vocabatur, et prouido DEI nutu destinatus pluribus videbatur. CATTORVM academias, ludovicianam et marpurgensem, in transitu salutat, et ex morbo, quo in itinere ad mortem decubuerat, aliquique discriminibus spartam formandū oratores sacros seu professionem homileticam, ad quam natura multoque usu factus erat, capessit, habito auspicali sermone *de homileticis difficultibus*. Nactus hunc campum, in quo per omnes litterarum diuinarum partes excurrere et in eloquentia sacra, tamquam possessione pro-

pria, subsistere, omnemque doctrinam suam explicare posset; in hanc cogitationem totus incubuit, ut auditoribus, diuinae mentis interpretibus, DEIque ad populum internuntiis futuris, ea proponeret, quae in omni sanctiori officio momentum haberent. Quam ob rem non aliquam pro sacris rostris declamandi artem, non lenocinia verborum, ad circumueniendos imperitos comparata, non circumforaneam illam verbositatem et blaterandi procacitatem docuit, quas pestes ciuitatis DEI ipse detestabatur: sed prudentiam mysteria sanctissimae religionis clare, distincte, copiose et grauiter eloquendi, oracula DEI et doctrinas inde desumptas seligendi, quasuis suo loco discrete et electe proferendi, omnia denique ad illum finem dirigendi, ut populus erudiatur, instruatur, ad DEVUM flectatur et vere emendetur. Eo animo publice explicauit AVGVSTINI, ad cuius similitudinem proxime accedebat, IIII libros de doctrina christiana, eorumque epitomen edidit insignitam nomine *institutionis hermeneutico-homileticae*. Et quod experiundo didicerat; oratorem sacrum nasci et innutrir debere ipsis diuinis oraculis: potissimum operam nauauit ad sacratissimas vtriusque foederis tabulas in eruditis circulis praelegendas, explicandas et ad oratorium usum applicandas; ut olim haberent auditores, unde singula dogmata depromerent, probarent et ad emendandos suos adhiberent.

NVM.



NVMQVAM AVGVTINVM in annalibus legimus magis anxium et de rebus suis sollicitum fuisse, quam vbi ad operam suam ecclesiae praestandam renitens admouendus fuit. Quot gemitus, lacrimas et lamentationes fudit, cum HIPPONE ordine sacro initiaretur! Quam aegre a se impetrare potuit, ut VALERIO praefuli, vices suas in populo erudiendo in ipsum transferenti, morem gereret! In similes angustias redigebatur BREITHAVPTVS, quoties de statione mutanda, aut vna ex pluribus oblatis feligenda, deliberandum fuit, fuit autem saepissime. Anno CIC LXXXV ad quinque loca simul distrahebatur. Non poterat enim tam benignum sidus populo DEI exoriens, quod radios late spargere cooperat, ita obscurum latere, ut non omnes, si quod ipsis lumen extinctum erat, aut locus a luce vacuus, illo collustrari, eoque omnibus modis potiri cuperent. Facit NOSTER, quod fidum DEI seruum facere decet, DEO rem commendat, animum in omnem partem versat, et euidentissimam diuiuae voluntatis significationem consequutus sibi videtur in theologorum prudentissimorum, quos in consiliorum societatem assumferat, auctoritate, et mirabili somnio, quo ipse sibi apparuit stipatus cohortibus angelorum, conceptam formulam canentium, *DEVS custodit omnes tuas vias, ut illarum nulla pereat*, ad serenissimum ducem saxonem, BERNHARDVM, in aedem meinungensem delatus. In huius igitur

B 5

piissimi



piissimi principis, patre, ERNESTO, vnanimi omnium suffragio, PIO, dignissimi filii, aulam commigrat: postquam pro consequendi supremi honoris theologici copia disputauit *de ministerio euangelico*, et cimbricas musas solemniter valere iussit, ibique principis ab audiendis confessionibus et habendis sermonibus sacris futurus, atque in sanctiore tribunali locum occupaturus. Quo breuius tempus in hac statione transacturus erat, eo felicius et auspicatus omnia ipsi euenire voluit benignissimus DEVS, vt eius merita de hoc loco non ex fastis aut diuturnitate, sed fructibus, aestimanda sint. Totus id egit, vt, quam aliis praeceperat curam animarum, medicinae aemulam, moderandaeque reipublicae sacrae prudentiam ipse iam praestaret et viuendo exhiberet: quod suum studium multum extimulari et iuuari deprehendit constitutionibus ernestinis religiosissimis, quibus populi erudiendi per interrogantis respondentiumque reciprocationes, coetuumque solemniter lustrandorum cura illis, ad quos pertinet, sancte imperata fuerat. Harum longe obseruantissimus fuit, et praeter alias census, quibus multorum coetuum iurisdictionem absoluti, auctoritate principis anno CIC IOC LXXXVI lustravit gymnasium schleusingense, cui tunc praeerant SCHADIUS rector, et D. CHRISTOPH. SONNTAGIVS, ephorus sacrorumque in ipsa vrbe antistes. Plura moliebatur, omnis in illam sanctissimam cogitationem conuersus, vt, quantum fieri



fieri posset, illibata religionis castitas in his ter-  
ris floreret, plura etiam sine dubio pro insatia-  
bili laborum voluptate praestiturus, nisi DEO,  
mortaliū res ex arbitrio moderanti, aliter res  
placuisseſet. Is enim anno CIOICLXXXVII BREIT-  
HAVPTVM per quatuor nuntios, publico no-  
mine alegatos, ERFVRTVM concedere iussit, iu-  
dice tam supremo, qui rebus sacris saxonis  
praefidet, senatu dresdensi, ad quem haec cauſa  
deferebatur, quam ipſo serenissimo principe,  
qui fidem ab ERNESTO PIO datam de theologo  
ciuitati erfurdenſi opportune olim permittendo,  
qua erat aequitate et indulgentia, liberatum iuit.

QVA RE NOSTER diuinae vocationis certior fa-  
ctus, meinungensem stationem cum erfurtenſi  
commutauit, in qua ad aedem primariam, quam  
praedicatorum vocant, gregis sanctioris pastor,  
omniumque in illa ciuitate sacris purioribus ope-  
rantium ephorus constituebatur, collegii, quod  
rem diuinam procurat, praeſes simul et augusta-  
nae confessionis theologiae professor ex more  
maiorum futurus. Hanc amplissimam prouin-  
ciam ut eo rectius ornaret, erfurtenſes acade-  
micam doctoris theologi dignitatem ipſi KILONI  
conferendam munifice curarunt. Quam conse-  
quuturus laudabile iusiurandum, ex eius aca-  
demiae consuetudine, conceptis verbis iurauit,  
velle ſe omnes docendi loquendique modos fu-  
gere, qui legitimam erroris ſuspicionem facerent,  
et litium inutilium materiam preeberent. Quo  
minus



minus temere existimandus est turbarum ipsi  
motarum occasionem umquam dedisse: sed com-  
munem excellentium theologorum, vel longe  
innocentissimorum sortem subiisse, qui, si alio-  
rum inuidiam semel excitarunt, nihil adeo ve-  
rum et rectum dicunt, quod non cauillando per-  
uertatur. ERFVRTI multiplex onus ita sustinuit,  
vt exspectationem et aliorum et suam ipsius non  
tam exploreret, quam superaret potius. In aca-  
demia auditions theologicas, quae in desuetu-  
dinem venerant, instaurauit publicas et priuatas,  
codicem sacrum exposuit, libros symbolicos il-  
lustrauit, doctrinam sanctiorem in locos dige-  
stam docuit, selectiora etiam argumenta *de sa-*  
*tisfactione, iuramentis, alia, ad disputandum*  
subiecit, et adornato ingeniorum certamine de-  
fendit: vt insignis academie, qua emendatori  
religioni addicta est, eius tempore accessio  
fieret. In regenda ciuitate sacra nihil prius ipsi,  
nihil antiquius fuit, quam vt disciplina castior  
postliminio in usum reuocata sancte obseruare-  
tur. Quem in finem in magistratus religiosi con-  
uentibus, quibus praesidebat, seuerum vitio-  
rum censorem, bonique per omnia ordinis stren-  
uum vindicem egit: gymnasii augustiniani et  
reliquarum scholarum census habuit, et amplum  
ordinem sacerdotum extra urbem rem sacram  
agentium accurata lustratione visitauit. In cu-  
ra autem animarum sibi concreditarum, quan-  
tum cogitatione contendere potuit, tantum in-  
defesso



defesso labore efficere parauit. Sermones ad conciones frequentissimas habuit grauissimos, quibus animos huc illuc trahere, saluberrimisque commotionibus afficere solebat, vt ad sui explorationem conuerterentur, in sanctissimum dolorem, vitiorum detestationem, desiderium et supplicationes, castissimamque mentis emanationem coniicerentur. Non tamen his sermonibus labores suos circumscripsit, sed publica et priuata rudiorum institutione, repetitionibus sermonum habitorum, multaque cum singulis coufuetudine id sedulo laborauit, vt morbos aegrotantium et conualecentium curaret, vulnera caute tractaret, et medicinam singulis attemperaret. Illis maxime, quorum secretiores confessiones audiendae erant, animaeque currandae, incredibilem operam dedit: hos aliquot dies praeparauit, de peccatis sanguine CHRISTI rite expiandis monuit, vehementerque, quod in ipso fuit, cauit, ne indigni sacris epulis hospites essent. Dici non potest, quot quantasque anxietates in hac medicina facienda subierit, quot etiam animae ipsius cura conualuerint, et quam multos his parturientis animi doloribus ad sanctiorem lucem, nouamque vitam generauerit.

IN SIGNIS ad memoriam posteritatis animorum conuersio, hominumque ex veterno excitatio, hanc industriam consequuta est, ex eo in primis tempore, quo AVGVST. HERM. FRANCKIVM, LI-

PSIA



PSIA euocatum, collegam, laborum et fortunae  
socium habuit. Iam in KORTHOLTI familia ar-  
ctius coaluerat cum diuino hoc iuuene, ac si de  
duplicis collegii vinculo ipsis diuinando consti-  
tisset. Non secus, quam AVGVSTINVS cum ALY-  
PIO suo in scholis et AMBROSI maxime disciplina  
animorum confessione coniungebatur, quem stu-  
diorum et laborum per pluriam vitam partici-  
pem et thagastensem antistitem in AFRICA repur-  
ganda et moderanda adiutorem deamauit. Eadem  
inuisita et plus quam fraterna amicitia NOSTER  
FRANCKIVM complectebatur et colebat, ira, vt  
per xxxvii annos, quos in illa societate transege-  
runt, numquam in gratiam cum eo redierit. Non  
habet recentior aetas rei sacrae, veraeque pie-  
tatis vindicandae accessionem vllibi factam, quam  
cum illo erfurtensi tempore comparare possit.  
Nam ex quo hi duumiri collatis viribus in ho-  
stes regnumque tenebrarum, quod plerosque  
mortales occupatos tenet, impetum fecerunt:  
incredibili felicitate inter innumerias luctas, tur-  
bas et commotiones fines regni CHRISTI late pro-  
tulerunt, eiusque dignitatem cum multa anima-  
rum salute amplificarunt; vt innumera pectora  
expugnata in DEI possessionem fortiter vindica-  
rentur. Atque cum insana aduersariorum ra-  
bies hanc operam inuidiose et nefarie impugna-  
ret, et FRANCKIVM maxime peteret, vt vrbe  
tandem interdiceretur: NOSTER faustissimo hoc au-  
gurio motus, caussamque DEI ex calamitatibus  
et



et oppugnationibus maxima incrementa capere arbitratus, noluit ab eius fortunae societate abesse, in quam non incidit, sed sponte sua venit, intrepidus periclitantis caussae bonae cum iactura tranqullitatis, dignitatis et vel ipsius vitae propugnator.

QVOD IN externis terrarum gentiumque vici- bus plerumque accidit, vt vnius diminutio alterius et plurium incrementa preebeat: eadem sapientissima DEI prouidentia litterarum, bonae mentis et religionis ratio fuit, cuius tot euererunt migrationes, quot imperiorum conuer- siones. Nobis igitur et academiae nostrae gratulamur hos saxonicos motus sacros, in quos ipsi illius natales incident, vnde singulari bene- ficio DEI vna cum florentissima iuuentutis colo- nia hos duumuiros erfartenses habuimus. Iam anno CIC LXXXXX HILDESIA ciuitas amplissimis conditionibus BREITHAVPTVM inuitauerat ad sacrorum moderamen suscipiendum, ad quam stationem, a molestissimo periculosissimoque au- diendarum confessionum labore liberam, animo ipse multum propendebat. Erfartenses tamen, ac si de palladio ageretur, et a BREITHAVTO multis precibus mansionem, et ab HILDESIORVM republica, missis legatis ex senatorum et sacer- dotum ordine impetrarunt, vt a sollicitando hoc viro abstinerent, cuius tamen non diuturna fuit possessio. Sapientissimus enim huius litterariae ciuitatis conditor FRIDERICVS, omnes laudes rebus



rebus in toga sagaque paeclare gestis longissime  
supergressus, cum musarum domicilium et bonae  
mentis sedem HALAE meditaretur, vnde  
colonos eo deduci curaret, virosque conuocaret  
celeberrimos, ad litteras diuinias huc inuehen-  
das, nascentisque academie rem sacram consti-  
tuendam: BREITHAVPTO accommodatiorem  
aequissimus meritorum aestimator inuenit ne-  
minem. Qua re illum, auctore potissimum  
SPENERO, fridericianae suae vindicauit, et anno  
CICICLXXXI ad professoris, directoris semina-  
rii theologici, senatoris in sanctiori senatu mag-  
deburgico, et oratoris sacri ad aedem cathe-  
dralem halensem munera euocauit, habuitque  
obsequentissimum, quum indubium DEI nutum  
animaduerteret, et tristia tempora erfurtenia  
migrationem iuaderent.

MULTA SVNT et immortalia merita ab AVG-  
STINO in hippomenem coetum et vniuersum  
CHRISTI populum collata per XXXX annos, quos  
ibi sacerdos primum, deinde praesul exegit, la-  
borando, instituendo suos, conuellendo hostes,  
ordinando rem sacram, agendoque DEI caussam  
apud sui temporis homines. Quae tamen BREIT-  
HAVPTVS, in oras nostras delatus, non anno-  
rum solum numero aequauit, sed amplitudine  
etiam et dignitate superauit. Initium facile, ex-  
itum difficillime inueniremus, si singulos labores  
nihilo acrius suscepitos quam perfectos, vel stri-  
ctim persequi vellemus. Ut tamen posteritas  
habeat,



habeat, quod miretur, nec ad figmenta referat,  
si audierit, vnum hominem tot labores suffecisse,  
potiora commemorabimus.

ACADEMIAE primus de lectionibus sacrī prospexit, habitaque oratione solemnī de *reformationis euangelicæ natura et indole* scholas aperuit, atque, vt ex p̄spectatione frequentius peregre aduentantes non frustraretur, omnes doctrinae sacrae partes explicauit, splendidissima semper iuuenum ad illum confluentium corona vel domi septus, vel in publicum deductus, qui colonias disciplinae brei hauptianae per omnem puriorem CHRISTI coetum duxerunt, nostraeque academiae famam late propagarunt. Dogmata sacra et doctrinarum sacratissimæ religionis corpus studiose, distincte, copiose et grauiter docuit, omnemque lapidem mouit, vt non suorum capita inani theologicarum vocum formularumque notitia impleret, sed ipsas mentes efficacissima DEI cognitione et reuerentia imbueret, instrueretque sapientia vera, non ad scholam et arenam, sed ad vitam et post vitam profutura, atque in ipsis, DEI ope adiutus, praestantissimum amissæ diuinae similitudinis decus, ad quod facti olim eramus, instauraret. Quam ob rem doctrinas, quae ad animum emendandum, moresque corrigendos pertinent, a reliquis intelligentiam rerum sacrarum prouehentibus, sine irreparabili rei diuinae detrimento, separari posse negavit, sed utramque disciplinam semper acutissime copulauit. Initio HVTTERVM concinnae perspicuitatis caussa explicandum sum-

C

fit,



fit, atque ex ARNDIO potissimum, CHEMNITIO, LVTHERO, symbolisque eximie illustravit: postea ab anno CICICLXXXIX propriae praeceptis usus, ita tamen, ut aliorum labores magni faceret, commendaret et adhiberet, ipseque KOENIGII theologiam ob technicas voces suis nonnumquam exponeret. Atque in hoc nobilissimo dogmatum docendorum studio, aucto deinceps collegarum numero, laboribusque inter ipsos distributis, tamquam in fundo suo condidit, eique lectionibus et examinibus excolendo se totum consecravit.

VERVM quod oracula diuina theologum formare, rerumque sacrarum, quidquid est, ad hanc normam summumque arbitrium reuocandum et constituendum esse, probe intelligebat hanc quoque sacrorum librorum interpretis personam gessit, et vtriusque instrumenti diuinitabulas sedulo commentatus est, apostolorum in primis epistolas saepius explicauit, examinibus et disceptationibus academicis illustravit. Omnis historiae sacrae stadium aliquoties decurrit, et praeeuntes vel antiquos vel recentiores scriptores optimos quosque sequutus felicissime conficit, genuinum antiquitatum usum ubiuis demonstrauit, origines et vicissitudines rituum, doctrinarum errorumque familias et necessitudines, regni DEI certamina et amplificationes, verae sapientiae inter mortales migrationes, rerumque sacrarum conuersiones, fide ex ipsis fontibus fa-

cta,



cta, proposuit. Polemicam theologiam parcius quidem docuit, non tamen omnem neglexit: sed in dogmatibus proponendis, quoties scrupuli animis euellendi erant, et auditores in vero confirmandi, curate tractauit, et ipse licet pacis studiosissimus, lacescit tam nonnumquam exercuit, ut a contentiosa litigandi libidine se demonstraret alienissimum. Saepe iuuenes in arenam solemnem deduxit, plurimi academiarum interesse ratus, ut haec laudabilis consuetudo a maioribus accepta, a vitiis repurgata multum floreret. Praeter auspicales disputationes, quibus tamquam brabeuta praefuit, ut qui primus in ipsa consecratione academiae superiorum auctoritate summos theologicos honores aliis consulit, xxii solemnes disputationes, plerasque a se conscriptas, moderatus est, et xxxiii minores, publice tamen habitas in epistolas diuinis: ut reliquas taceamus, priuatim in libros maxime symbolicos institutas. Oratoriam sacram saepe docuit, et ab anno CIO IOCC1 curauit, ut prouectiores quidam iuuenes bis per hebdomadem sermonum sacrorum tirocinia ponerent, se audiente, et, quae monenda viderentur, animaduertente. Ipse in eiusmodi orationibus, quantum per reliqua negotia licuit, assiduus fuit, et in aede scholastica, ut vocatur, quam primus his usibus consecrauit, ab anno CIO IOCLXXXXII usque ad CIO IOCLXXXVIII post meridiem, exinde horis matutinis verba DEI concioni interpre-

C a

tatuſ,



tatus, populumque ad animi emendationem, veramque pietatem cohortatus est, ita, ut mirifico a cunctis studio audiretur, omnesque acriter excitaret, attentos teneret, et redeundi cupidissimos dimitteret.

NON minorem se praebuit in ciuitate sacra curanda, ordinandisque rebus diuinis per harum terrarum iurisdictionem. A primo enim ad nos accessu senatus sacri magdeburgici patribus conscriptis cooptatus, aliquot etiam annis post dioeceseos salanae primae inspector constitutus fuit: anno autem CIC 15CC V ad supremi sacrorum antistitis, quem superintendentem generalem vocant, gradum euectus. In hac statione circumspectiōnem vigilissimam cum summa fide, fidem cum insigni prudentia felicissime exaequauit. Anno CIC 15CC XI composuit lites, quae MAGDEBURGI ordinem sacrum distractum tenuerant, eundemque laborem DERENBURGI in terris halberstadicis peregit anno CIC 15CC XIII.

OMNIVM vero grauissimam curam gessit candidatorum ad rem diuinam initiandorum. Perspexerat enim, operam et oleum perdi, frustaque elaborari in emendando DEI populo, quamdiu hic ordo, a quo reliquorum corruptio fluxit, non repurgetur, sancteque caueatur, ne quis profanus illotis manibus arduum hoc et sacratissimum opus attingat. Intellexerat etiam, ad quos haec cura pertinet, mirifice peccare, si ad alios DEO conciliandos adhibent, qui ipsi cum DEO



DEO in gratiam nondum redierunt, ipsosque coecos coecorum duces constituunt. Quare, quum ad examinandos ordinandosque pastores delectus esset, totus in illam curam incubuit, ut lupos a grege CHRISTI arceret: veritus, ne, quod PAVLLVS TIMOTHEO edixerat, in societatem peccatorum deueniret, damique exinde redundantis; si manus, ex formula sacra, illis temere imponeret, qui hac prouincia sunt longe indignissimi. Ex eadem hac cura, quae apud ipsum semper excubabat, enata est dissertatio solemnis, anno CICIC LXXXVII habita, *de notis candidatorum ministerii ecclesiastici*, et illa serenissimi principis constitutio anno CICIC LXXXVIII promulgata, ipso potissimum auctore concepta, *de requisitis et praeparatione candidatorum*. Eiusdem curae testis est liber, qui SAL TERRAE insignitur, anno CICICXXVIII editus, laborum in praeparandis his pastoribus specimina complexus: testis est multitudo certaminum, inimicitarum et odiorum, quae acerrimus ciuitatis sacrae a maleferiatis hominibus defensor sibi conflauit: testis denique est tot doctorum conscientia, qui hanc eius fidem vsu compererunt. Atque haec vigilandi pro securitate sacra statio magnam ipsius usurae partem nostris musis ademit, ex quo supremus regendae prouinciae senatus anno CICICXIII MAGDEBURGVM translatus eum praesentem vindicauit: licet a fridericana sua ita non diuelleretur, ut non per satis magnam anni par-

C 3

tem



tem ad illam excurreret; academia hanc mutationem aequius ferente, duobus venerandis collegis iam anno CICLOCCVIII, quum abbas bergen-  
sis crearetur, in eius abfuturi locum suffectis,  
illamque deminutionem abunde compensantibus.

VIDIMVS vitam praeclare actam, quae tota qui-  
dem singularis est, et ultra communem morta-  
lium sortem ad excellentiam facta: memoris ta-  
men animi religio postular, officiique ratio, vt,  
quibus maxime eminuit, virtutes et dona singu-  
laria omnino et peculiaria mente lustremus, ve-  
lis tamen contractis pleraque praeteruecturi.  
Multas habebat dores a natura exquisitissimas,  
divini tamen fauoris operatione demum perfectas.  
Pollebat ingenio secundo, sagaci, ampio et ad  
discrete iudicandi admirabilem dexteritatem sub-  
acto. Quale AVGUSTINI ingenium fuisse florida,  
acuta et ornata scribendi ratio demonstrat, doctri-  
naque breui tempore sine multis subsidiis colle-  
cta, talem BREITHAVPTIANI ingenii prae-  
stantiam fuisse abunde omnes cognouimus. Non  
deerat tenacior memoria, qua multum valebat;  
nec destituebatur copia fingendi componendique  
rerum imagines, quam excellens poesis et elo-  
quentia satis produnt: acriter tamen iudicandi  
dexteritas, quae longe reliquis facultatibus ma-  
ior erat, potissimum diuinae prudentiae, quam  
omnes in eo suspexerunt, momentum faciebat;  
vt, quoties confilium rogatus, aut ad disceptan-  
dum laceffitus, sententiam pronuntiaret, paucis  
multa



multa dixisse, omneque punctum tulisse videtur.

CVLTVRA multo studio peracta diuinum hoc ingenium ad illud eruditionis fastigium euexit, vt, nisi praestantiora superessent, per partes eundo multa enarrare possemus doctrinae inusitatae specimina. Nisi theologus primi ordinis fuissest, fuissest sine dubio incomparabilis poeta, acerrimusque elegantioris litteraturae, quae ab humanitate nomen habet, vindex. Nemo poeseos vel mediocriter gnarus *commentarium poeticum in proverbia et ecclesiasten, sacra anniuersaria, epigrammata biblica et miscellanea carmina vi libris edita legit*, quin mirificum hunc carminis pangendi artificem admet, venam dulcissimam, virgilianum robur et sublime decus miretur. Philosophorum disciplinas exakte meditatus tandem complectebatur, quantum theologiae prodescent, extra quam se extorrem versari existimabant. Erat ratiocinandi et ex ipsa rationis lege argumentandi peritissimus: mire callebat distinguendi, suosque singulis rebus, vocibus et formulis significatus determinandi negotium, quo litterarum doctores carere nequeunt. Nihil sententiarum, opinionum, litiumque philosophicarum per omnes eius partes non perspectum cognitumque habebat. Antiquorum in primis libros multum versabat, commendabat, molesteque ferebat a pluribus rideri et false traduci, quam legi et intelligi.

SACRARVM vero litterarum eam sibi compara-  
uerat scientiam, quam admodum pauci, alio-  
rum tamen doctores, quaerunt, consequuntur  
paucissimi. Arduum sane, multisque difficul-  
tibus obfessum iter est, ad vnius dumtaxat  
theologicae disciplinae excellentiam, adeo, vt  
plurimi de omnibus obeundis et complectendis  
ne cogitent quidem. Quo magis celebranda est  
theologi huius incomparabilis industria, qua  
omnes diuinae doctrinae partes ita lustravit, vt  
singularum esset peritissimus, in plerisque ex-  
celleret et ad consummatae intelligentiae fasti-  
gium contenderet. Interpretem codicis sacra-  
tissimi, quem per vitam de manu numquam de-  
posuit, egit felicissimum, multisque ad eum in-  
telligendum viam aperuit: longe tamen in hoc  
genere se ipsum certo superaturus, si alii labo-  
res illum non tenuissent occupatissimum. Quo-  
ties dogmata sacra praecipienda, aut controuersiae  
disceptandae erant: omnia ad hanc diuinitus nobis  
constitutam normam regulamque ita reuocauit,  
vt ab ea numquam oculos deiiceret, nedum disce-  
deret, sed ipsa verba, loquitiones, diuinaque  
definiendi et pronuntiandi formulas sequeretur.  
Nihil est in antiquitatibus sacris, historiis tem-  
porum prisorum, monumentis vetustiorum do-  
ctorum, qui patres vocantur, statutis denique  
ecclesiasticis, ad dogmata intelligenda, lites di-  
rimendas, ciuitatem DEI gubernandam, ius fa-  
crum



crum dicendum praesidii, quin ab illo cogitatum adhibitumque sit in loco, et conuenientissime explicatum. Quae, necessitate iussus, non ad aliorum offensiones, sed sui verique defensionem, bella gesit, cum et intra muros et extra, manus conserendae, et vel ore disputandum, vel calamo impetus hostiles sustinendi frangendique fuerunt, ea fortitudine, prudentia dexteritate administrait, vt superior discederet, breuique tempore longissimas rixas conficeret.

DE DOGMATICA tamen theologia piae reliquis studiis sacris immortaliter meritus est: quam iterum iterumque explicauit, scriptis illustrauit et ita adornauit, vt, si vel hoc vnum egisset, in primariis coetus purioris doctoribus collocandus esset. Incredibili felicitate et instruere simul, et mouere poterat suae disciplinae traditos, et ad solidam, viuam atque efficacem DEI cognitionem formare, vnaque opera et doctrinam diuinam, et dissensiones aduersariorum, et morum emandandorum rationes docere: vt nemo attentus ipsum differentem audierit, aut consuluerit priuatum, quin doctor et eruditione theologica locupletior discesserit. Digna sunt, vt aetatem ferant, et ad posteritatem propagentur eius scripta dogmatica, quae eximum aliquod antiquae, solidae et pragmaticae theologiae simulacrum effingunt. Atque in hoc augustinianae eruditionis simillimus fuit: quem in iisdem

litteris et operam posuisse, et immortalitatem laudum consequutum esse nouimus, vt nemini, nisi eius librorum ignaro, obscurum esse potest. Scripsit enim, vt reliquorum librorum mentione supersedeamus, quasdam explicationes epistolarum Paulli, sermones et paecepta reliquit ad morum disciplinam pertinentia, contra impudentissimam MANETIS petulantiam, turbulentissimas DONATISTARVM sententias, et arrogantes PELAGII errores, sanae doctrinae caussam egit: plurima tamen, quae litteris confignauit, faciunt ad dogmata sacratissima explicanda et argumentis corroboranda, vt libri de doctrina christiana, de fide et symbolo, de natura et gratia, de libero arbitrio, de fide et operibus, de ciuitate DEI, reliqua. Hic quidem numero et mole librorum AVGUSTINO admodum inferior est BREITHAVPTVS, in scribendi tamen genere ornatissimo, solida eruditione adhibita, et ad emendationem usumque legentium directa, ubi non aequalis AVGUSTINO, ibi certe est superior. In epistolis antipelagianis, librisque doctrinalibus, illam potissimum AVGUSTINI, ipsiusque spiritus sanctissimi sententiam de gratia et peccato stabilitam deprehendimus.

INTER eiusdem AVGUSTINI eximias dotes facundia non postremo loco commemoratur: quia ita excelluit, vt non solum quamdiu rhetoris partes CARTHAGINE, ROMAE et MEDOLANI ageret, omnium in se admirationem conuerteret, sed post



post etiam facro ritu initiatus a VALERIO, hippo-  
ponensium praefule, sacerdos adhuc, quod in  
AFRICA ante inauditum fuerat, ad sermones in  
solemni concione sacra habendos inuitaretur,  
omnes dicendi flumine permulceret, et disse-  
rendi robore attonitos relinquenter. Quam elo-  
quentiam peculiari iure BREITHAVPTO vin-  
dicamus propriam. Quoties latine vel germanice  
in omnis generis solemnitate, concione et  
opportunitate verba fecit, quae sane fecit sae-  
piissime: quantam non excitauit sui admiratio-  
nem, quam non omnes ab ore suspensos tenuit!  
vt cunctis et natus et factus orator videretur. Ita  
vocem tonantem, latera, lacertos, oculos, to-  
tum corpus intendere, temperare, mouere et  
dirigere poterat. Erat adhaec spectabili corpo-  
ris forma, ad gratuitatem ipso dignam composita,  
vultu a leuitate remotissimo, procera statura,  
et valetudine ad labores doloresque obfirmata.

LONGE HIS maiora sunt, et aeterna laude di-  
gniora, singularia dona, quibus a specialiori gra-  
tia diuina instructus fuerat. Rara in DEVM  
pietate et morum sanctitate longe felicior fuit  
AVGVSTINO praestantiorque. Satis is sero, post  
infelicem iuuentutem, libidinibus conspurcatam,  
ad meliorem frugem rediit, et ad virilem demum  
aetatem prouectus errores expiauit, aliquamque  
vitam, alias mores omnibus probauit: eo fortio-  
ri tamen impetu, viriumque contentione id con-  
sequutus, vt non solum illam maculam abster-  
serit,



serit, sed inusitatum etiam sanctitatis exemplum dederit. BREITHAVPTVS non interruptam fidem DEO, quum sacro baptismatis rito lustraretur, datam sancte praestitit, omnemque vitam in piissimis sanctae religionis exercitiis transegit. Iuuenis adhuc virilem temperantiam et incredibilem severitatem contra naturae corruptionem adhibuit, idemque reliquas aetates emensus in senectute idem fuit accerrimus sui ipsius censor, castissimusque sanctitatis sacerdos. Vni CHRISTO seruatori totus adhaerebat, vnum illum animo, cogitatione, desiderio, fide et amore prosequebatur: quo vno demum potitus intelligebat, aditum sibi patere ad DEI fruitionem, ad vitam virtutio vacuam ex legis diuinæ formula agendam, et ad ipsam beatissimam aeternitatem. Hinc mirum non est, tot incrementa cepisse castissimam eius pietatem, et mirificis progressibus ad excellentiam excreuisse.

IN ORATIONE, meditatione, tentatione, quæ tria et christianum et theologum facere LVTHERVUS grauissime enuntiauit, assiduus fuit: quem in eo potissimum imitabatur, vt statas singulorum dierum horas in familiari cum DEO consuetudine locaret. Multas noctes insomnes agebat, DEVVM veneratus, miseriam suam communemque lacrimatus, suspiriis, gemitibus numinis fauorem sibi, suis, populo, generi humano deprecatus. Ieiuniis saepe vacabat, vt eo parvior ad precandum accederet. In meditatione

CHEMNI-



CHEMNITIVM aemulatus est, MELANCHTHONEM, alios. Quotidianam scripturae sacrae lectionem a prima pueritia sancte continuauit, eamque cum legendis aureis ARNDII libris *de vero christianismo*, THOMA KEMPISIO, LÜTKEMANNO, et aliis, sedulo coniunxit: a qua cum nec litterarum ardore, nec laboribus cumularissimis umquam impediretur, factum est, ut diuina mente mature imbueretur totus, sanctis cogitationibus adsuefieret, et illecebras otiosi animi euitaret. Tentationes vero tot tantasque et pariendo sustinuit, et exercitationibus ipse subiit, ut ARNDII non minus in hoc luctarum genere, quam in doctrinæ forma, euaderet longe simillimus. In prima adolescentia flagellis sanctioribus se caedi sensit, multosque tenebrarum adsultus perpessus est: quae insignior spiritus disciplina eum a se ipso per iuuentutis vitia euagari numquam permisit. Et in reliqua aestate cum innumeris hostium vndique irruentium turmis ipsi colluctandum fuit: licet pleraque certamina modesta sua taciturnitate texerit. Non adeo a se discessit regnum tenebrarum, ut fortissimum hunc ipsius debellatorem tranquillum relinqueret. Atque ut, quod res est. dicamus, verus fuit crucis theologus, hoc arduum mysterium, quod solemnni disputatione et integro sermonum sacrorum volumine illustrauit, experiundo edocitus. Ab anno GIO IOCLXXXVI acutissimi arthritidis dolores misere ipsum ex-cruciarunt, contra quos, et longe grauiores internos



ternos equuleos, animum ad patientiam exercitatum ita fortiter confirmauit, ut omnia inconclusus superarit.

VETERVM eremitarum et anachoretarum mores sanctissimos libere et felicissime aemularus est, ut nec antiquissima aetas habeat, quicum non sit comparandus. Vitam, quam caelibem et curis, domesticis liberam duxit, his religiosis exercitiis abstinentiae, temperantiae, precum et meditationum consecrauit. Vnde unus omnium aptissimus censebatur, qui coenobiis nostrationibus moderandis praeficeretur. A primordiis académiae seminarium hillerslebiense gubernauit, et constituta familia sanctiori quotidie horas, quas veteres canonicas vocarunt, sancte obseruan curauit. Anno CIO IOCC V MAGDEBURGI praepositus monasterii b. MARIAE virginis creabatur, anno vero CIO IOCC VIII abbas coenobii bergenii prope MAGDEBURGVM rogabatur: quas stationes ita obiit, ut specimen daret reuocandi eiusmodi familias sacras ad primum piissimum florem, unde sequenti tempore mirum quantum decesserant. Et in hac vitae parte AVGVSTINVM retulit, qui tam in agro thagastensi priuatus, quam postea HIPPONE eiusmodi necessitudinem sacram constituit, legibus circumscriptis, et ad usum publicum ordinauit.

MVLTI essemus necesse est, si reliqua de constantia, de modestia, de incredibili laborandi aliisque inferuendi studio, de benefico pauperum



rum patrocinio, de intrepida fortitudine, de priuata animarum cura, quam ab academico doctore separari posse negauit, vel breuissimam mentionem facere, nedum exsequi cuncta vellemus. Quare cum imaginem tanti viri digne exprimere, suisque coloribus exornare nequeamus: sufficiat nobis primas lineas duxisse, ex quibus omnibus facilis erit diiudicatio, quantus et quam incomparabilis fuerit, quem deploramus, theologus sui ordinis hac aetate facile princeps.

RESTAT, ut paucis iam videamus, qui reliquam vitam singularem egerat, quomodo ultimum eius actum obierit, morte commigraturus ab excubiis laboribusque ad aeternam quietem, in quam coniunctissimos collegas, FRANCKIVM ante quinquennium, ANTONIVM ante biennium, se relicto, praeire aegre conquerebatur. Nullus quidem grauissima senectutis incommoda in senectute senerat, habueratque vegetum animum in effeto morbisque confecto corpore: ut longiori vitae, qua dignissimus erat, conseruari videretur; licet domesticis familiaribusque solito saepius mortem meditari, instantemque emigrationem praesagire putaretur. Ineunte mense martio HALA MAGDEBURGVM profectus, satis, ut per aetatem licuit, bene valebat, suas res ordinabat, ultimam manum institutionibus theologiae moralis et sermoni in emortualem CHRISTI diem sacrum typis exscribendo imponebat: cum op-



opinione omnium celerius eiusdem die xiii mor-  
bum sentiret, subiretque febriles motus, cum  
insigni capitis tremore et virium postratarum  
debilitatione coniunctos; ut non exiguam immi-  
netitis apoplexiae suspicionem faceret. Noctem  
quieram exegit, atque ex medici lege, a febi  
relictus, die sequenti sanguinem misit, vena in  
pede secta, vnde melius se habere coepit, no-  
ctemque satis tranquillam transduxit. Die ta-  
men xv febri denuo ita corripitur, ut post leue  
frigus, modicum aestum pulsusque sanguinis fe-  
briles alii magis animaduerterent, quam toleran-  
tissimus senex, qui extra lectum ex more labo-  
rabat, nihil praeter aliquam virium infirmita-  
tem conquestus. Nocte iam satis prouecta op-  
primitur multa anxietate: vnde qui aderat, ap-  
paritor periculum suspicatus plures adesse iubet,  
qui aduentantes ipsum vehementiori apoplexia  
percussum, DEV M precari, suosque, ut ab ipsis  
in se erigendo iuuaretur, aduocare, tum loquen-  
di copia destitutum quiescere et aegre ultimum  
spiritum trahere vident. Hinc omnes ad facros  
hymnos concinendos, DEV Mque precandum  
conuertuntur, inter quos complorantium gemi-  
tus animam placide in DEI seruatoris manibus  
posuit, mortisque, ad quam diu admodum sанde  
moriendo se praeparauerat, acerbitate non ex-  
pertus, a laboribus, aerumnis et calamitatibus bea-  
te conquieuit die xvi martii, qui in sacris fastis do-  
minica oculi insignitur, exeunte hora iii matutina:  
post-

postquam sibi, suis meritis, suae dignitati, non  
vero nobis satis diu vixerat, attigeratque annum  
LXXV, aliquot mensibus viuendi diuturnitate  
AVGVSTINO inferior, qui LXXVI aetatis anno VANDALORVM HIPPONEM oppugnantium iniurias alia-  
que irruentia DEI iudicia effugit, progressus a  
militante ad caelestem DEI ciuitatem. Exuuias  
mortalitatis, carum diuinae mentis domicilium,  
digne efferri, manibusque inferias mitti curarunt  
die XVIII aprilis ad sacrum coenobii bergensis  
conuentum adlecti.

vos, CIVES, quid vestri officii sit, cogitate!  
DEVM immortalem dignis laudibus concelebra-  
te, qui adeo incomparabilem virum vobis ad-  
modum diu permisit et incolumem seruauit,  
iamque laboribus defunctum ad se euocauit. Sup-  
plicationibus malum omen auerruncate, DEVM  
venerati, vt academiam ab acerbis casibus immu-  
nem florere, eius senatum et venerabilem theo-  
logorum ordinem diu rectissime valere iubeat.  
Familiae luctuosissimae bene precemini. Prae-  
clarum virtutis exemplum memoriae mandate,  
idque, licet impari gressu, sequimini. Sancte  
prouidete, ne, cum IVSTVS hic moritur, ne-  
mo vestrum attendat et in rem suam abeat. In  
primis date hoc sanctis manibus immortaliter de-  
vestra salute meritis, vt sermoni funebri, qui

D

in



50 PROGRAMMA ACADEMICVM I.

in aede scholaſtica cras post horam nonam ante  
meridiem habebitur , oratore collega amicissimo  
GOTTH. AVG. FRANCKIO, professore theo-  
logiae ordinario , frequenti concione adſitis, aur-  
ibus animisque faueatis, oſſa placidissime quiescere,  
animam in beatorum ſedibus beatissimam eſſe in-  
beatis, virumque ad ſuperos egressum ultimu-  
ob tutu, gemitu, deſiderio profequamini. P.R.  
in fridericiana ad d. iii maii , qui ex formula ſa-  
cra proxime praecedit dominicam iubilate,  
anno ab orbe reſtituto cccc xxxii.



Q. D. B. V.

SOLEMNITATEM· FVNEBREM  
VIRI

SVMME· REVERENDI· EXCELLENTISSIMI  
AMPLISSIMI

IOANNIS· LIBORII  
ZIMMERMANNI

PROFESSORIS· THEOLOGIAE· ORDINARII  
ET· QVVM· MORERETVR

SVI· ORDINIS· DECANI

DE CIVITATE· DEI· IMMORTALITER· MERITI

AD· D· XVIII· APR· ANNI· ḠD ID CC XXXIII

HORA· II· A· MERIDIE

SERMONE· SACRO·

IN· AEDE· ACADEMICA

CONCELEBRANDAM

CVM

CANCELLARIO· DIRECTORE

ET

RELIQVO· ACADEMIAE· FRIDERICIANAE·

SENATV

INDICIT

IOANNES· HENRICVS· MICHAELIS

S· THEOL· DOCTOR· EIVSQUE· ET· LINGG· GRAEG· AG  
ORIENTAL· PROFESSOR· ORDINARIUS· SEMINARI· HIL-  
LERSLEBIENSIS· DIRECTOR· ACADEMIAE  
TERTIVM· PRO-RECTOR.





**Q**VAM sit rerum humanarum stabile nihil,  
firmum, et a conuersione periculo  
immune, omnis contra mortalium  
conditio fragilis, fluxa et vicisitudi-  
nibus intertexta, nouo iam documento, sed eheu  
quam caro! nobis constitit. Paucis enim abhinc  
diebus, prius sensimus, quam praeuidimus in-  
opinatum fulmen, quod ACADEMIAM nostram fe-  
rali iactu perculit, et eius ordinem illum tetigit,  
qui ex multis iacturis vix sibi restitutus fuerat,  
ipsique membrum eripuit nouissimum, decori  
sanctoris disciplinae inter nos conseruando, et  
ad posteros transmittendo destinatum, virum  
summe reuerendum, IOANNEM LIBORIVM  
ZIMMERMANNVM, professorem theologiae  
ordinarium, de re sacra egregie meritum, lon-  
giore vita, si quis umquam dignissimum. Prae-  
coci is festinatione praecclare viuendi metam,  
quam ipsi bonus quisque precabatur remotissi-  
mam, moriendo consecutus est, et accelerato  
immortalitatis itinere, subito oculos cum admira-  
tione et plausu intuentium subterfugit, stadio  
inter nos decurrendo modo immissus. Incredibi-  
lis hoc uno lacrimabili casu concidit spes no-  
stra, et magna exspectationis in longissimam  
aeratem praegressae, facta est commutatio in lu-  
ctuosissimum dolorem, adeo ut dubium relin-  
quatur, plura ne de eo sperauerimus olim, quam  
in eo nobis erepto, iidem desideremus moestissimi.

D 3

NON



NON IAM ex veterum formula immaturam mortem, crudelia fata, dirissimam vitae humanae legem, praeposterum naturae aberrantis ordinem, coecam fortunam queremur, aut superis inferis diem dicemus, aut prouidam numinis curam in regendis hominum rebus incusabimus, aut vniuersi rectorem neglectae sapientiae, commissi erroris, immitis imperii vel alias hoc genus vitii postulabimus. Abfir hoc per omnem modum. Possunt illae impotentis animi voces, quae ad funerum solemnitatem et manes expiandos pertinere credebantur, antiquitati a vero DEI O. M. cultu alienae, condonari, nobis rectiora edocetis non possunt. Quare ita rationes illaetabilis officii nostri subducemus, vt in hoc calamitatis sensu, cum tenerimi in COLLEGAM amoris, atque acerbissimi doloris conscientia et publica testificatione, castissimam supremi numinis venerationem aequemus, et religiose prouideamus, ne quid detrimenti capiat certissima de eius voluntate persuasio, neque in eius sapientiam, et bonitatem iniurii cogitetur quidquam. Aut enim toti fallimur, aut tantum abest, vt his tempestibus et procellis a prouidae mentis cogitatione abripiamur, vt potius ex vetero et neglecto in consuetis rerum vicibus diuini regiminis meditatione ita demum excitati, ad eius vestigia contemplanda feramur fortissime.

HABENT hoc proprium sibi et peculiare repentinae casus, in primis tristiores, vt de multis grauisli-



uissimis rebus omnes, quibus mens non laeta est, commonefaciant, animumque impetu facto ad serias cogitationes impellant, et plurimum conferant ad sapientissima DEI consilia, quae sic innotescunt, ex euentibus cognoscenda.

NIHIL itaque prius iam nobis esto, nihil antiquius, quam ut omnem hanc rem ad DEVUM, unde fluxit, referamus, eius decreta taciti cum stupore veneremur, iisque cogitationibus immergamur, quas non verbis et sermone, sed factis et re ipsa, diuinitus cogitare iubemur. Iubemur autem infinita diuortia meditari, quibus DEI consilia a nostris distant, vel sapientissime conceptis; fallaces hominum spes vel certissimis bonaе cauſae et voluntatis diuinae fundamentis superstrui visas; circumscriptam vel sagacissimum intelligentiam in praeuidendis rebus futuris: ut DEVUM nube tectum, et lucis abundantia nobis obscurum non cogitando anteuerteramus, sed pie sequamur, praeeuntem vias incertissimas. Admonemur praeterea de supremo et liberrimo DEI in suos dominio, quod ita exercet, ut non temere quidem et frustra; sine exspectata tamen nostri iudicij consensione omnia decernat, beneficia conferat, auferat pro lubitu sapientissimo, suamque familiam disponat mirifice: ut eius muneribus recte vtamur, perpetuitatis ipsorum parum securi. Excitamus deinde ad abitum ex fragili hac vita mature parandum, sarcinas colligendas, animumque a terra, quae in aeternita-

tis itinere diuersorum, non habitationem prae-  
stat, abstrahendum, et ad caelestium curam ad-  
plicandum, vt sic fugacissimi temporis fiamus  
studiosissimi. Certiores etiam reddimur de in-  
credibili indulgentissimi DEI benignitate in acce-  
leranda quorundam ex seruis suis mercede, pre-  
cibusque ipsorum audiendis, vt perficiantur quan-  
to ocio et consummentur. Praecipimur deni-  
que DEI irati, suique contemptum vlturi, iudicia  
et poenæ, quas minitantur frequentiores piorum  
decessus, quales his nouissimis annis habuimus  
proh dolor! plurimos, precibus auerruncare ar-  
dentissimis. Docemur tandem imaginem vitae  
rarissimæ, ac quo breuioris, eo certe laudabi-  
lioris: cum non ex annorum serie, sed rerum  
gestarum, laborum exantlatorum et cursus con-  
fecti rationibus vita sit metienda. Quam hac ta-  
bula delineatam proponemus: vt non solum me-  
moria tanti VIRI inter nos conseruetur, sed simul  
testemur, quo loco habeamus insignem, quam  
in eo fecimus, iacturam. Erimus in eo breui-  
simi, vt sanctos manes a pompa affectatione alien-  
nissimos decet, primum enarraturi vitae vicissi-  
tudines ad annorum ordinem quo se exceperunt,  
ac deinde dotes et beneficia DEI in eum collata  
potiora commemoraturi.

WERNIGERODA in HERCYNIAE tractu, ad BRO-  
ETERVM montem, inclyta illustrissimorum comit-  
tum STOLBERGIAE sedes, hoc liberalis naturae do-  
num protulit: vbi anno secundo saeculi, quod  
a na-



a nato CHRISTO iam voluitur, decimi octaui, die  
III idus nouembr. qui in fastis nostris MARTINO  
sacer est, in lucem prodiit, a mediocris quidem  
fortunae, honestis tamen parentibus procreatus,  
patre, HENRICO ZIMMERMANNO, qui pistorio  
opificio deditus, boni ciuis et solliciti familiae  
nutritoris partibus defunctus, ante aliquot an-  
nos diem suum obiit, matre ANNA BARBARA HOL-  
TERHOFIA, quae superstes et huius filii et orna-  
tissimae filiae BVTNERIAE eodem morbo paucos  
dies ante nostrum mortuae, orbitatem non sine  
exquisito dolore deflet. Multum se his parenti-  
bus debere semper gratus professus est ZIMMER-  
MANNVS, quod omnem operam posuerunt in  
ipso educando, quoad per vitae rationes fieri  
potuit recte formando, atque tam domi, quam  
in litterariis peregrinationibus sustentando. Ma-  
ture enim emicuerat infantis, ad omnem excel-  
lentiam, et vrbanitatem non facti et compositi sed  
nati, excitatior indoles, et insita ingenii virtus  
magni quid et vltra mediocritatem progressuri  
praecipiens. Cuius felicitatis suae ab aliis moni-  
niti parentes hunc filium ex tribus, quos sus-  
ceperant, natu minimum litterarum studiis con-  
secrandum esse putarunt, aut a natura ipsoque  
DEO consecratum profanare, et ad operas manua-  
rias detrudere, nefas duxerunt. Quare illum  
litteris, tam sanctioribus, quam reliquis ad hu-  
manitatem pertinentibus omni doctrinarum ge-  
nери fundamento futuris, in patrio ludo initian-

D 5

dum



dum et breui post, peregre HALBERSTADIVM,  
quod prope a patria aberat, deducendum cura-  
runt, vt in gymnasio cathedrali doctrinam acces-  
sionibus locupletaret. Ampliorem hic campum,  
fidosque duces natus excurrendi per litterarum  
stadia, grassandique ad omnem elegantiam, et  
ipsa sublimioris doctrinae penetralia: ea animi  
viriumque contentione hunc scholasticum pul-  
uerem mouit, vt concitatiore cursu, incredibili  
alacritate non magis quotidie se ipsum superareret,  
quam alios priores praeteriret, multisque post  
se parafangis relinqueret. Ad facundiam in pri-  
mis, ad quam natura ferebatur, perpoliendam,  
et pure, eleganter, copiose eloquendi dexter-  
itatem omni exercitationum genere contendit: qua-  
tantum breui tempore valebat, vt in scribendo  
differendoque paucos haberet aequales, superio-  
rem neminem. Multum ipsi hac in re profuit  
assidua antiquorum scriptorum lectio, cui se to-  
tum ita dederat, vt diurna nocturnaque manu  
eos versaret, magnam noctium partem insomnem  
ageret in castae latinitatis pariter ac elegantiae  
auctoribus euoluendis, legendis, relegendis et  
ad usum transferendis, admodum in eo felix,  
quod hac cum immortalibus antiquarum anima-  
rum reliquiis consuetudine, comissiones effu-  
git et consortia facinorosorum adolescentum,  
pestem illam scholarum publicarum, hoc uno  
dumtaxat nimium infelix, quod moderatore do-  
mestico caruit, qui fraenum iniiceret, deuoran-

di



di omnes litteras libidinari impetumque vehementiorem cohiberet, et diuturnitati tam excellentis ingenii consuleret.

ITA succreuerat ZIMMERNANNVS floribus iam admodum onustus, cum in aliud solum denuo transferendus videretur, et praceptoribus, quibus incredibilem diligentiam, improbum laborem, proficiendi ardorem, omnem denique vitae rationem probauerat, et sibi ipsi, qui morae impatiens, maturitatem magnamque fructuum vberatem animo iam destinauerat. Salutatis igitur et in consilium adhibitis suis, patre comite, anno supra millesimum septingentesimum vicesimum primo, vere ineunte, IENAM adiit celebrem litterarum mercatum, quae eo in primis tempore magni et incomparabilis BVDEI fama longe lateque sparsa se efferebat, omnibusque commendabat. Postquam, ex more recepto, nomen apud magnificum academie prorectorem SYRBIVM professus erat, et auditiones doctorum frequentare propositarumque doctrinarum dulcedinem degustare cooperat: nouas sibi faces admoueri sensit, quibus latentes igniculi excitati, flammarum conciperent easque vires sumerent, ut totus litterarum ardore flagraret. Dici non potest, quam nihil a priori diligentia remissior factus, quod multis accidit in academias delatis: otium sibi et requiem numquam indulxit, sed acerrimus laborum exactor, operas quotidie vrsit, feruentissime telam, quam orfus



sus fuerat, pertexturus. Post linguas sacras, quibus se in oraculis diuinis intelligendis, carere non posse sapientissime intelligebat, philosophiam sibi maxime addiscendam delegerat: cui etiam principem temporis, curae et laboris partem ad-dixit, atque omnis in eo fuit, ut non tam memoriā sententiis formulisque philosophorum one-raret, quam potius recte cogitandi, veri falsique discrimina et rerum omnium inter se connexa-rum principia perspiciendi atque curate medi-tandi dexteritatem consequutus, ultra vulgus eruditum saperet. Nullus tamen ita his litteris se implicari passus est, ut theologiae suae obli-uisceretur, cui se a teneris deuouerat: sed il-lam diuiniorem doctrinam reliquarum sibi finem praefixit, ad quem referret omnia. Quam ob rem licet RVSSIVM, in linguis sacris, WALCHIVM, HAMBFRGERVM aliosque publicos doctores in phi-losophia audiret assiduus, neque priuatos artium magistros negligenter: BVDDEVUM tamen vnum omnium, maxime suscipiebat, venerabatur et in eius disciplinam totus concedebat. A cuius ore ita indiuulsus pependit, ut non solum ipsas do-ctrinas caelestes ex eo hauriret, sed eius disse-rendi docendique rationem imbiberet omnem, sibiique redderet familiarissimam. Huic non ci-tius innotuerat, quam is prudentissimus inge-niorum arbiter iuuenem eximia omnia pollicitum deamare, fouere, familiarius sibi conciliare, et ad omnem praestantiam priuatim fingere fate-git



git. Cognoscebat religiosissimus doctor non intra honestatis externae et naturalis ingenuitatis limites contineri bonae mentis studium, quod noster prae se ferebat, sed altiores egisse radices, diuinamque indolem redolere. Euenerat enim nostro breui ante alia omnia cogitanti, ut efficacissimos spiritus diuini motus sentiret, iisque in grauissimos laborantis erroresque et labem, quam a natura habemus, anxie lugentis animi dolores coniiceretur: quos precibus ardentissimis ad DEVUM fusis, riteque inito animi turbati et luctantis certamine exitu expertus est longe saluberrimos. Nam quo diutius et vehementius excarnificatus fuerat internis his equuleis, non sine valetudinis detimento, eo fortiori postmodum gaudio perfundebatur, cum peccata sanguine CHRISTI eluisse, deumque sibi conciliatum diuinitus fieret certior, sibique et omnibus nouam vitam consequutus, et totus aliis factus videretur. Non poterat diuinior haec animi tam excellentis commutatio, et ad caelestia conuersio diu latere, aut BVDEVM fugere, qui ciuitati diuinae insignem utilitatem ex hoc iuuene praesagiebat, adeo a natura instructo, et sanctiore diuini spiritus disciplina emendato. Quare ut illum diutius IE-NAE detineret, et occasionem, de salute publica deique populo bene merendi, mature praeberet, grauissimus ipsi auctor extitit, animi ad alios docendum applicandi, capessendique eum in finem academica iura et honores philosophicos.

OBTEM-



OBTEMPERAVIT noster et prouinciam ad quam a primis litterarum initiis se praeparatum, insistoque naturae impetu destinatum cognoscebat, adiit et ita ornauit, vt diuinis auspiciis faustoque omniē hoc initum esse consilium exitus comprebaret. Quam primum enim scholas philosophicas anno cīc 10CC XXV aperuit, ingens ad eum factus est studiosae iuuentutis concursus, cui per omnes harum litterarum partes, comitem se ducemque adiunxit, et operam nauauit adeo indefessam in ipsorum desideriis explendis, vt ea multum superaret. Non ad tortuosas subtilitatem ambages, aut formulas inanes, quas ipsi non intelligunt qui pronunciant, suos deduxit, neque fallendi alios, callideque circumueniendi artes, vñquam docuit: sed quam ipse inuenerat sapientiae viam ad omnem vitam profuturae, eam aliis praeire, ad veri, recti, bonique leges suos formare, vnice laborabat. Memor praeterea principis sui studii, ad quod omnem doctrinam componere decreuerat, eam iniit docendi rationem, vt non solum in scholis philosophicis, auditores ad DEVUM recte agnoscendum colendumque traduceret, sed horas huic proposito destinaret singulares, quibus religiosas exercitationes iuuentutem doceret, omnemque ordinem redeundi in gratiam cum DEO a nobis distracto et auerso distincte, copiose, grauiter nec sine stimulis profunde in animos audientium insinuatis, proponeret. Quod pro-



propius et felicius egit, ex quo BVDDEI auctoritate dogmata sacra exponere coepit scholasque theologicas cum philosophicis coniunxit. Plures ex hac felici officina ZIMMERMANNIANA priuata quidem, frequentissima tamen prodierunt viri ad solidam eruditionem, integerrimumque religionis, virtutis et cognitionis CHRISTI promouendi studium formati, quam multi saepe doctores publici per omnem vitam habuerunt auditores. Verum, ut sunt res humanae suis limitibus circumscriptae, ipsaque felicitate laborantes, et ad summum perfectionis gradum prouectae, in eodem diu stare nesciae, si quod res est, fateri volumus, longe nobis iam laetior esset, huius temporis IENENSIS recordatio: nisi cum nostrae calamitatis, quam deploрамus, sparsis feminibus cohaereret. Nam quod excellenteribus animis ad publicum emolumentum natis commune est, ut aliis inferiendo consumantur, id huic nostro, pro indole alacriori proprium fuit, ut cum detrimento virium et incolumentis, cuius nimis incurius fuit, in aliorum incrementis promouendis elaboraret. Plerumque diem in coronis auditorum, aut priuatis singulorum ipsum adeuntium et grauissimas res interrogantium circuli, et confabulationibus transigebat. Quod reliquum erat horarum ad doctrinam amplificandam, siluam praecipiendorum colligendam, meditatione digerendam et ad captum auditorum accommodandam impendebat,



bat: ut de litterarum commerciis, sermonibus in concione sacra solemini habendis et priuatissimis operis BVDDEO praestandis, nihil dicamus. Fieri hac ratione non potuit, quin viribus exhaustur et a semet ipso laboribus enecando parum abesset, quo liberalior in alios, eo certe in se iniquior factus. Sed ea fuit summi numeri prouidentia in sic disponendis VIRI laboriosissimi laboribus, ut vita quam definiuerat breuissimam, euaderet tamen longe fructuofissima.

ATQVE haec ipsa virium debilitatio, acceditibus non obscuris diuinae voluntatis significacionibus, fecit, ut et ipse abitum ex illa contentione meditatus, DEVM vocantem lubentius sequeretur, et BVDDEVS, qui antea ipsum alio transferri sibi a latere diuelli aegre tulerat, in eius discessum consentiret. Celsissimus enim STOLBERGIAE comes, CHRISTIANVS ERNSTVS TOGATVS HEROS, cui merita ZIMMERMANNI eius potiundi desiderium excitauerant, anno CCXXVIII illum sibi, ad quem nascendi lege pertinere videbatur, vindicauit, et WERNIGERODAM inuitauit, futurum a sacris in aula currandis, et tribunali sanctiori admouendum. Morem gessit noster, DEI magis nutum et COMITIS indulgentissimi voluntatem sequutus, quam animi instinctum, quo ad scholas et litterarum labores totus propendebat. Et habuit profecto, quod sibi gratularetur vterque: nam fertilior fundus et ZIMMERMANNO obtingere non potuisset, neque



neque eo colendo dignior facile futurus fuisset quisquam. Fuit quidem breuior temporis et laboris wernigerodani decursio, sed ienensi minime inferior. Digna sunt ut aetatem ferant, et ad posteritatis memoriam transeat, quae in hac statione ipsius fuerint partes curarum, laborum et fructuum vicissitudines. Postquam DOMINI DOMINAEQUE et iuuentutis illustrissimae animos, non sibi, sed DEO familiarius conciliauerat, quae princeps apud ipsum excubabat cura: indefessam diligentiam collocauit in sibi concretis, ad veram et viuam DEI CHRISTIQUE cognitionem traducendis; in consiliis domino suo dandis de re sacra recte constituenda, prouehenda que aeterna hominum salute per terrarum suarum iurisdictionem; in euocandis fidis hominibus ad munera sacra, et iis omnibus ordinandis, quae prodescent causae diuinae, iis vero quae obessent, fortiter expugnandis. Bone deus, quam numerosus fructus hos labores consequutus est! quam incredibilis rerum commutatio! quot testes et monumenta spirantia, aur, ut cum PAVLLO loquamur, epistolas viuas WERNIGERODAE reliquit.

ANNVS tertius agebatur secessus wernigerodani, laboriosi quidem, sed ob laetissimos laborum progressus et interpositas quietum itinerumque vices, non molesti neque inepti ad vires instaurandas, sibique vitae sociam iunxerat lectissimam virginem DOROTHEAM LVISAM omnibus gra-

E

tiis



tiis exornatam, plurimum reuerendi MARTINI LANGII, qui CHRISTIANOPOLI IN LVSATIA primam sacrorum curam gerebat et generum aliquot menses moriendo anteuertit: quum re domestica ita constituta, denuo ad lares transferendos, et commutandos labores insigni academiae nostrae commodo destinatur.

FACTVM enim est benefico numinis nutu, vt ab augustissimo PATRIAE PATRE FRIDERICO WILHELMO, sapientissimo academiae nostrae nutritore, ZIMMERMANNVS deligeretur, qui vna cum alio venerando collega in locum celeberrimi RAMBACHII ad ludouicianam in CATTIS euocati sufficeretur. Non deerant rationes, quibus ab hac prouincia adeunda deterrerri potuisse: noluit tamen vocantem DEVM migracionem nouam luculenter satis iubentem, obsequio destituere; in primis postquam certior fieret de successore dignissimo, et fructuosisima hac prouincia, non penitus deferenda, cuius partes in consiliis dandis et iure sacro dicendo absens obire debebat, impetrata simul potentissimi REGIS venia excurrendi quotiescumque opus esset, WERNIGERODAM. Quare se iterum DEO permisit et  
ao. CIC 10 CC XXXI aestate exeunte HALAS conces-  
sit, noster factus.

RECENTIORA sunt quae per vnum et sesquianum inter nos paeclare gessit, quam ut opero-

sa



sa narratione indigeant. Nouissimum vitae actum gloriosius et utilius agere non potuisset, qui reliquos laudabiliter peregerat, quam eum egisse inter omnes constat. Fefellit quidem et aliorum de ipso, et suam de se opinionem in viribus nondum integrati restitutis et ita instauratis, ut multis laboribus sufficerent: quam tamen debilitatem cum tempore in melius mutatum iri, malo hypochondriaco, quod ipsum affligebat, moderatiore vita, et debita corporis moti exercitatione, imminuto et superato, sperabamus omnes. Verum eo magis superauit exspectationem quam de infracta eius valetudine et corpore viribus exhausto concipere poteramus: obiit enim officii sui partes, paucis vel corporis robore longe superioribus, inferior. Auditores et in lectionibus, quas apud nos habuit, dogmaticas, polemicas, homileticas et morales et omni data occasione non tam diuinarum litterarum cognitione imbuere, quam emendatores et religiosiores reddere conabatur. Neque euentus impar fuit desiderio, sed consilia eius agendique rationes comprobauit. Fuit enim iuuentuti studiose apud nos gratissimus, cuius frequentissima corona cingebatur, quoties ex utraque cathedra verba faciebat, multorum etiam serium ad DEVUM redditum animique conuersionem, proficiendique conatus monitis, precibus, doctrina, exemplo impetravit, iuuit, promouit. Et ut paucis multa complectamur, eorum quibus penitus inno-

E a

tuit,



tuit, qui eius mortem acerbe non doleat fore arbitramur neminem.

VIDIMVS quantus fuerit ZIMMERMANNVS, quantus se ipso maior, futurus fuisse sine dubio si longiorem eius usuram habuissimus. Verum hoc omne intercepit luctuosissimus vitae exitus, quem nobis, non sibi, habuit improuisum. Satis conualuisse per hiemem putabatur, si a nonnullis consueti morbi incommodis et languore, quem per aliquot menses sensit, discesseris, excurreratque in patriam, vnde ineunte martio redux melius se habebat, nihilque funesti aut instantis mali quidquam ominabamur. Confueuerat tamen iam ex aliquo tempore ipse, et vxori suauissimae, et familiaribus instantem mortem praedicere, et illustrissimo COMITI STOLBERGENSI ipsum inuisenti saepius edixerat: *breui moriar, in CHTISTO beatus, et, si DEO libuerit, admodum laetus.* Quae omnia praesagientis futuraque prouidentis animi indicia, verissima fuisse, iam satis eheu comperatum habemus. Die xx martii febri corripiebatur, quae post aliquot dies malignam se prodebat: vt statim experientissimo medico, collegae coniunctissimo, qui morbum curabat vehementer periclitari videretur; in primis cum die septimo purpura rubra, vndecimo alba prodiret, neque excretionis consuetae signa morbum immuni docerent. Erat igitur dies decimus quartus cum multo metu exspectandus, spem nouam alla-



allaturus, quam anteuertit decimus tertius, a medicis cyrannus vocari solitus, ipsi feralis, nobis omnibus ater, et longe funestissimus. Cuius hora ante meridiem postrema, viuere inter nos sequiore sui parte desit, qui DEO, saluti publicae, et sibi satis diu vixit: nobis viuere non desinet, quam diu immortalis exempli imago animis nostris obuersabitur.

ANIMO DEVS vltimum hoc iter ingresso, affiduus comes adfuit. Primis morbi diebus incredibili gaudio pectus perfundi sentiebat, quod adeo intra se continere nolebat, vt quos inuisendi causa praesentes habebat et aduocari iusserat, eius certiores faceret, saepius asseuerando, se ea omnia, quae de CHRISTO et summa in eius coniunctione, felicitate nostra publice docuerit vnumquam, iam re ipsa experiri longe verissima, et impense laetari, animum ab omni culpa, ab omni rerum terrestrium cura, et omni denique merito suo longe esse liberrimum. Exceperunt hanc effusissimam laetitiam, angores et tenebrae, in quibus aliqua itineris pars conficienda fuit: donec iis superatis, certissimis spei et fiduciae in dei promissionibus et fide positae significationibus, quas quam diu licuit per sermonis usuram, quae appropinquante morte intercipiebatur, nonnumquam reiterauit verbis, diutius signis affirmavit, mentem in DEO conquiescere. Inter quas obuiam euntis DEI praesensiones ab exuuis, quas

E 3

cum



cum multa molestia rexerat abstractus, caelestis ille animus ad beatorum religionem auolauit in CHRISTI sui, quem anxie desiderauerat, amplexus ruiturus, vbi ipsi aeternum bene esto!

SUPEREST, ut quam recepimus, mentionem faciamus de dotibus praecipuis: quibus adeo eni-  
tuit ZIMMERMANNVS, ut omnium in se oculos con-  
uerteret, et cum admiratione defixos teneret.  
Non hic per singula eundo accuratum censum  
ageamus virtutum vulgarium, a quibus ambitiose  
laudantur, quorum vita licet a faece mortalium  
admodum distincta, peculiare tamen ac eximum  
nihil haberet, sed intra mediocritatem subsistit.  
Tot enim tantaque, et naturae benignioris ei  
studii felicissimi, et spiritus diuini dona in vnum  
ZIMMERMANNVM facta conspiratione coive-  
rant, ut quae seorsim singula alios homines alte-  
uehere solent, in eo exornando confluxisse vi-  
deantur, et delectum rerum laudandarum red-  
dant longe difficillimum.

MAGNA sunt, quae natura ipsi impertuerat be-  
neficia. Erat insolita nascendi felicitate, ab in-  
genii facultatibus instructissimus, ad quas cum  
accederet culturae et exercitationis usus, opti-  
mus ingeniorum magister, reddebatur, omnia  
clare peruidendi, imaginandi, recordandi, sin-  
gula discernendi, comparandi, iudicandi pe-  
ritissimus. Factum est hac re, ut quam alii  
aliunde



aliunde operose conquerunt, et suam aegre faciunt doctrinam, eam noster foecunditate ingenii domi in fertilissimo agro enatam et laetissime succrescentem haberet, et vbi cunque occasio postulareret, largissimum cogitationum prouentum ferret, ac nullibi locupletior rediret, quam ab ingenio suo. Multum id in omni eruditione ipsi profuit, et ad pretiosissimum tempus lucrandum, progressuumque incrementa acceleranda, et ad aequabilitatem doctrinae incredibilem, qua quidquid differeret, scriberet, a se ipso numquam discessit sibi numquam dissimilis. Perficiebat hanc felicissimam ingenii indolem animi alacritas, qua mirifice pollebat, cum singulari morae et desidiosae inertiae impatientia. Solebat ex re minima magnum et generosum impetum capere, intendendi animum et praeclera moliendi, qui eundo vires acquirebat, nec ante remittebatur, quam propositi compos factus. Pepererat haec animi actuosissimi contentio eam laborum pertinaciam, ut nec otium, a quo natura et consuetudine, quae ipsa altera natura est, abhorrebat, sibi indulgeret umquam, sed varietate et commutatione occupationum vteretur ad curas et cogitationes ex animo protrudendas, in quas se altius praecipitauerat, neque alii, qui apud eum auctoritate multum valebant, quietem et laborum remissionem impetrarent. Corpus habebat ad gratiam, ipsa forma ab

E 4

aliis



aliis ineundam compositum, et ad intemperantium laborandi satis diu sustinendam, a prouida natura confirmatum: donec ferendis oneribus impar animum desereret, et intermissionem laborum imperaret. Excellebat eloquentia, quam naturae beneficio habebat copiosissimam, humanitate increbili, qua ab austera morositate et erudito supercilie alienus facilem se et sine leuitate iucundum omnibus praebuit, et morum ac conuerstationis suavitatem, qua omnium ordinum hominibus se ita attemperauit, ut singulos sibi deuinciret.

SUNT his omnibus maiora, quae litterarum studiis accepta retulit et a pertinacissima diligentia habuit ornamenta. Dignus fuit omnium iudicio, qui non solum ex proletariis et capite censis eximatur, sed classicis etiam ac primi et senatorii ordinis hominibus accenseatur in ciuitate erudita, hoc tempore nostro humorosa, et in ciuium tabulis conficiendis admodum accurata. Philosophum se praestitit intra sindonem receptum, curata doctrinarum scientia imbutum. Non enim ad fucum faciendum, aut inanem gloriam captandam has litteras salutauerat, eamque difficultatem expertus cum vocibus et formulis aufugerat: sed deliberato prudentissimoque consilio in earum recessus ita penetrauerat, ut nihil harum rerum ipsi esset non perui-



perium, cognitum et familiare. Didicerat in primis rerum rationes scrutari, veri rectique leges ex originibus repetere, et ita in omni hoc negotio versari, ut a peruersa quorumdam hoc nomen mentientium consuetudine, qui incredibili mutatione ex philosophia historiam faciunt se demonstraret remotissimum. Edidit in hoc genere aliquot *disputationes IENAE* habitas, praeterea *tabulas logicas*, quibus aditum ad recte ratiocinandi dexteritatem omnemque eruditionis ambitum pandere studuit, et, qui liber primo loco nominandus fuisset, *principia omnis humanae cognitionis de DEO, mundo, homine, lectu dignissima*, quibus praeclare multa tentauit in his spinosis rebus perspicue et utiliter explicandis. Potuisset in hac disciplina vnuis inter primos fieri, nisi theologiae se vindicasset totum, et in hac omnium principe doctrina, aliquis ex secundis quam in illa primus omnium esse maluisset, in qua a se suaque praestantia non discessit. Quam reconditam plerarumque huius diuinae scientiae partium cognitionem fuerit consequens, testamur auditorum conscientiam cum aliquot sermonum editorum monumentis. In nulla disciplinae theologiae prouincia peregrinus fuit: dogmaticam tamen et moralem ut proprium fundum exolendum sumvit, in quo praceptorum BVDDEVVM orbi eruditio reddidit, docendoque expressit, in eo certe ipso non inferior ut

E 5

animos



animos fortius moueret, suauius demulceret, celerius ad DEVVM alliceret, et sermones sacros in concione solemni haberet cum delectatione efficacissimos.

MAXIMA denique sunt et his laudibus longe priora, quae diuinitus in ipsa spiritus diuini disciplina consequutus est dona, quibus destitutus magnus forte in ciuitate erudita euadere potuisse, populo DEI prodesse, de re sacra bene mereri, aeternitati viuere, theologus esse non potuisse. Pietate fuit in DEVVM feruentissima, cui intemerata fide, casta mente adhaesit, atque in religione personam, non rem agere nefas arbitratus, sancte cauit, ne quas aliis grauissime praeciperet, DEO seruendi, eius offensiones vitandi gratiamque apud ipsum per CHRISTVM in eundi leges viuendo destitueret. Salutis viam noluit docere magis quam viuere aliquis ipse praeshire: quare seuerum se gessit sui ipsius censorem, et omnem lapidem mouit, ut arctius in dies atque intimius cum DEO coalesceret. Inusitato rerum terrenarum, quibus quotus quisque non implicatur? fastidio et generoso contemtu animalium tricis expediuit, ac pernicissimo volatu in liberiorem aeternitatis auram ad splendidam CHRISTI gloriam contendit: longe infra diuinam maiestatem, quam affectabat, fore ratus, ut inani pompa quisquiliarum et fordium tentaretur, aut

ad



ad ea retraheretur, quae vel retro respicere indignabatur. Iuuit hanc vmbrae despiciens veri summique boni, quod in CHRISTI facie viuis coloribus repraesentatum deprehenderat, cognitione: quae eius cogitationes, obtutus, desideria mentem denique omnem in diligentem sui contemplationem pertraxerat.. Totus in hanc CHRISTI sui cogitationem defixus, in quaestuosaam sui et omnium rerum reliquarum obliuionem ita concesserat, vt quidquid sibi relictus ex animi sententia meditabatur, loquebatur, moliebatur, CHRISTVM id saperet, redoleret omne.

INTELLIGITIS, ciues, quam rarum naturae, litterarum et religionis in ZIMMERMANNO peculium habuerimus, quod iratone, an benigno numine vobis erectum sit, ipsi iam apud animos vestros reputate. Grauissimo hoc casu moniti in rem vestram abite, malum omen academiae deique populo auertite, iram numinis supplicationibus expiate, animae de VOBIS bene meritae requiem et felicitatem, exuuis leuem terram, VIDVAE moestissimae doloris et miseriarum leumentum, familiae afflictae et amicis DEVVM consolatorem precamini. Imaginem doctoris vestri memori mente reponite, vltimumque hoc eius manibus officium grati exhibete, vt cras hora a meridie



76 PROGRAMMA ACADEMICVM II.

meridie secunda in aede scholaſtica frequenteſ  
confluatis, ſermonem ſolemneſ a venerando  
collega oratore facundiſſimo, GOTTH. AVG. FRAN-  
CKIO, pro concione funebri habendum animis  
fauentibus audituri. P. P. in academia fride-  
riana, die xvii aprilis, qui ex ſanctiorum fa-  
ſtorum conſuetudine praecedit domi-  
nicam palmarum.



SVC-



entes  
ando  
RAN-  
uimis  
ride-  
fa-

SUCCINCTA COMMENTATIO  
DE  
**VETERVM TEMPORIBVS  
MEMORIAE CHRISTI  
VITAE RESTITVTI  
SACRIS**

---

QVA  
NOMINE ACADEMIAE  
**SOLEMNIA PASCHATOS**  
INDICVNTVR.



ANNO MDCCLXV  
M. J. GÖTTSCHE

200



**Q**VOD ORBI CHRISTIANO, ACADEMIAE nostrae et vobis omnibus, CIVES aestimatissimi, felix, faustum ac salutare sit, redit iam auspicatissima dies anniuersariae memoriae CHRISTI, mortem cum vita commutantis, sacra: ad quam pie concelebrandam quum maiorum ritu inuitandi estis; religionem veterum CHRISTIANORVM in temporibus huic memoriae consecrandis exemplo vobis, quod imitemini, proponendam esse putauimus. Vbi id nobis negotii datum esse arbitramur, ut primum ipsa haec solemnia recondita antiquitate venerabilia in tabula breuiter exhibeamus, deinde in rationes harum consuetudinum inquiramus, et tandem quid nostri officii sit in legendis sanctissimis his vestigiis commemoremus.

SCILICET prisci cultores IESV domini, religiosissimi mortales, legem quam PAVLLVS, CHRISTI legatus, TIMOTHEO tulerat, μνημόνευε Ἰησοῦν Χριστὸν σύνγερμενον ἐκ ρεχέων, memento IESVM CHRISTVM redeuntem ex mortuis (a) iure suo ad se in vniuersum pertinere crediderunt. Quam ob rem in pia huius memoriae consecratione studiosissime elaborarunt. Atque obuiam ituri obliuioni, quae vel grauissimas cogitationes ex animo delere solet, nisi excitentur iterum iterumque, et ad imaginationis regulam, ope temporum rituumque ipsis consecratorum, ex fugientibus umbris crebro ad animum reuocentur: huic in primis benefi-

(a) II TIM. II com. VIII.



beneficio recolendo plura tempora sacra esse voluerunt. In tres ordines illa commode satis distingui posse videntur, quod singulorum dierum, hebdomadum, annorum partem aliquam illi officio antiquitus deuotam fuisse deprehendimus. Sicut enim ipsi CHRISTI legati, testes euocati huius resurrectionis (b), et primi ipsorum discipuli nihil antiquius existimarent mentione frequenterissima huius reditus IESV ex morte (c): ita ipsorum auctoritate factum est, ut dierum in festos profestosque ex ISRAELITARVM tabulis discriminis sublato, omnis sacrorum publicorum et conuentuum agendorum celebritas CHRISTO, et huic ipsius per mortem in vitam itineri consecrando dicaretur. Ipse PAVLLVS post unicum sacrificium CHRISTI Corinthiis propositum, huic ferias peragi iubet (d). Neque primis a CHRISTO saeculis alia festa in veterum monumentis occurserunt, quam quae huic memoriae sacra fuerunt, ad quae temporis progressu anni versariae hominum supplicio in CHRISTI causa enectorum commemorationes accesserunt, et tandem reliquorum beneficiorum, quae CHRISTO accepta referimus solemnitates (e).

AT-

- (b) ACT. I. com. XXII. ca. III. co. XV. ca. X. co. XXXXI. (c) ACT. II. co. XXIII. XXXII. ca. III. co. XV. ca. III. co. X. ca. X. co. XXX. ca. XIII. co. XXX. XXXIII. ca. XVII. co. XXXI.  
 (d) I COR. V co. VII. VIII. (e) conf. ROD. HOSPINIANVM *de festis christianorum cap. I. et II.*

IOACH.



ATQVE UT per gradus haec tempora CHRISTO ex morte suscitato consecrata lustremus, a quotidianis veterum sacris initium faciemus, quae antiquissima quidem fuerunt, pro illius temporis simplicitate tamen ad certam horam nulla lege adstricta, sed liberiora, ex temporum et locorum commoditate interdiu aut nocte celebrata, donec post ordinatas precum horas statas, antelucani conuentus huic in primis resurgentis CHRISTI memoriae tribuerentur. In ipsas diuinis tabulas relatum legimus, sub laetissimis regni CHRISTI auspiciis coiuisse ciues ipsius quotidie ad preces fundendas, hymnos canendos, cibum diuinum capiendum et memoriam mortis vitaeque SERVATORIS sancte obeundam. Quae consuetudo diu satis continuata, tempore calamitatum publicarum obseruabatur maxime, magnumque ad praeiuam fortitudinem in superandis cruciatibus monumentum habebat. Neque poterat epulum solemne, ad memoriam IESV piaculari suppicio sublati vitaeque restituti ordinatum (f), celebrari quotidie, sine quotidiana huius transitus CHRISTI ex morte in vitam celebratione.

## Quod

IOACH. HILDEBRANDI libr. singularem *de festis*, GISB.  
VOETIVM *de sabbato et festis* in disp. select. part.  
**III.** atque in primis MART. CHEMNITIVM in examine  
concilii tridentini part. **III.** ad finem, et reliquos  
huius argumenti scriptores, quos recenset celeberr.  
IO. ALB. FABRICIVS in *bibliographia antiquaria ca.*  
**X. §. XX.** (f) I COR. XI. CO. XXIII. XXV. XXVI.  
F (g)



Quod in africanis coetibus inualuisse CYPRIANVS (g) perhibet. HIERONYMVS idem de romanis et hispanicis affirmat (h) AVGVSTINVS autem in multis locis id obtinere suo tempore docet (i). Et postquam saepius quotidie conuenire coeperunt CHRISTIANI ad communes preces; quod mane a vesperi primum, deinde alicubiter, postea quinques, et septies tandem labante et in formulas ritusque abeunte re sacra, factum esse constat (k): vigilia autelucana singulorum dierum non facile praeteriit sine laeta grataque commemoratione excitationis CHRISTI ex morte, quae in illud diei tempus inciderat; adeo ut illa conuocatio nocturna ante lucem, quae laudum nomen sortita est, huic celebritati sacra esse videretur. ISIDORVS (l) testis est, diluculo orari ut resurrectio CHRISTI celebretur (m).

MAIOR

(g) epist. XXXVI. al. XXXVIII. ad THIBARITANOS et LIII alias LVII ad CORNELIVM et in libro 'de oratione dominica'. (h) Epist. I ad PAMMACH. contra IOVIN. cap. VI et Epist. XXXVIII ad LUCIANVM. (i) Epist. CXVIII. ad IANVAR. ca. III. conf. IOACH. HILDEBRANDI enchirid. de sacris publicis priscae ecclesiae cap. III sect. I. et Ios. BINGHAMI origines lib. XV. cap. VIII §. IIII ubi pluribus testimoniis EVSEBII, BASILII, CRYSTOMI quotidianae synaxeos veterum fidem facit. (k) conf. CASP. CALVOERI rituale eccles. part. II sect. II cap. III. et Ios. BINGHAMI originum lib. XIII. cap VIII. §. VII. et VIII. ubi horarum precandi canonicarum ortus traditur. (l) de ecclesiast. officiis lib. I cap. XXXIII. (m) conf.

10.



MAIOR semper et solemnior fuit hac quotidiana CHRISTI in vitam redeuntis memoria, eiusdem celebratio singulis hebdomadibus instaurata, quarum primum quemque diem huic solemnitati sancte deuouerunt CHRISTIANI, quod diuini scriptores a primis initii coetu CHRISTO collecti saeculum fuisse non obscure indicant. LVCAS grauissimus huius veterinae consuetudinis testis est (n), dum refert PAVLLVM TROADE discedere noluisse ante sermonem in concione publica habitu, eamque ob caussam primam hebdomadis diem exspectasse, qua CHRISTI discipuli tunc temporis coire consueuerint. Quod ipse PAVLLVS confirmat, quem CORINTHIOS ad stipem pauperibus primo quoque die hebdomadis colligendam hortatur (o). IGNATIVS ita iubet CHRISTIANOS vivere (p), μητέτι σοιββατίζοντες, ἀλλα κατὰ νυγιανν ζωὴν ζῶντες, εν ἦ καὶ ζωὴν ἡμῶν ἀνέτειλεν δι' αὐτοῦ, καὶ τὸν Γαράτου αὐτοῦ, ut non sabbatum celebrent sed domini diem digne agant, qua vita exorta sit per CHRISTVM et mortem eius, et IV-

STI-

10. BONA de divina psalmodia in primis cā. V. §. II.  
vbi veteres et medii aevi scriptores producit,  
qui resurrectionis memoriam principem finem  
grauissimumque argumentum matutinorum so-  
lemnium constituunt. (n) ACTOR. XX cō. VI.  
VII. (o) I COR. XVI. com. II. (p) Epist. ad  
MAGNESIANOS n. VIII, quae verba CLEMENS ALE-  
XANDR. Stromat. VII. de mandato celebrandi dient  
primam hebdomadis explicat, idem IGNATIVS l. c.

F 2

hanc



STINVS MARTYR ita hanc consuetudinem com-memorat (q), τὴν τοῦ ἡλίου ἡμέραν καὶ νῆ αὐτες τὴν συνέλευσιν ποιούμεθα, ἐπειδὰν - - - Ἰη-σοῦς Χριστὸς ὁ ἡμέτερος σωτῆρ τῇ αὐτῇ ἡμέρᾳ ἐκ νε-κρῶν ἀνέση, solis die communiter conuentum agi-mus, quandoquidem IESVS CHRISTVS SERVATOR noster eo ipso die a mortuis surrexit. Qui simul indicant IOANNEM (r) facta mentione diei domini, hanc primam diem intellexisse. Atque eadem hac denominatione, accendentibus veterum te-stimoniis euidentissimis idem perhibentibus (s), edocemur, rationem huius prae reliquis cultui diuino et sacris publicis dicati diei, fuisse unam omnium facile principem, ut memoria reditus CHRISTI in vitam, quae hoc primo hebdomadis die euenerat, sanctius coleretur. Neque potuit PLINIUS de alio die loqui, dum ad TRAIANVM scripsit (t) christianos solitos esse statu die ante lu-cem conuenire, carmenque CHRISTO quasi deo di-cere secum inuicem, seque sacramento obstringere. Quid quod ipsa calumnia ab hominibus aduersus

CHRI-

hanc diem vocat, τὴν αὐγαστίμον, τὴν Εασ-  
τίδα, τὴν ὑπατὸν πατῶν τῶν ἡμερῶν. (q) in  
apolog. II. (r) APOC. I. com. X. cf. celeberr. IOH.  
CHRISTOPH. WOLFII curas philolog. adb. l. (s) quae  
collegit IO. CASP. SVICERVS in thesauro ecclesiast. sub  
voce κυριακῇ. (t) Libr. X. epist. LXXXVII. ad  
quam conf. illustris academ. directoris IVST. HENN,  
BOEHMERI differt. Iuris ecclasiast. antiqui ad PLINIVM  
SEGUNDVM et TERTULLIANVM. (u)



CHRISTIANOS pessime animatis insidiose excogitata, qua cultus, quem soli exhiberent, accusabantur, hunc primi diei celebrandi morem comprobant: vnde illam ortum traxisse, incrementa certe cepisse, et aliquem colorem verique speciem obtinuisse TERTULLIANVS perhibet (u). Nam quum fictarum diuinitatum patroni animaduerterent: nouae huic religioni addictos imaginibus deorum carere, diem primum soli sacrum, vnde ex consueta ROMANORVM et GRAECORVM formula solis dies vocabatur, religiose transigere, ad solis ortum conuenire, preces solemnes astantibus facie ad solem orientem versa fundi, sacra denique ipsorum personare vocibus solis, luminis, lucis aeternae, qua ipsum CHRISTVM intelligebant, illuminationis, et illuminatorum, uti aqua solemini initiatos vocabant: perquam ipsis ficti facile erat, religione solis haec omnia fieri (x). Qua obtricatione certiores omnino reddimur de celebritate huius diei ubique locorum a CHRISTIANIS antiquitus obseruata (y). Soliti autem fue-

(u) *in apologetico ca. XVI. et libr. ad nationes ca. XIII.*(x) cf. CHRIST. KORTHOLTI *paganum obtricatorem libr. II cap. II*, quod totum in hac heliolatria amolienda consumitur. (y) Vberius hoc confirmatum iuerunt praeter plerosque histor. sacrae et dogmatum scriptores curatores, IAC. ALTINGIVS in tractatu de sabbato, tom. V operum, CASP. CALVOER in *rituali eccles. part. II sect. II cap. VI* IO. PEARSON *ad symbolum apostolicum pag.*

fuerunt veteres illo die solemnii feriari, a ieiunio abstinere, laetitiam festiuam curare, frequentiores conuentus agere, cibum sacrum capere, vnde eadem *dies panis* vocari coepit, electioni tabularum diuinorum vacare, recitationibus et adhortationibus doctorum operam dare, preces communes stantes fundere, numquam genibus flexis aut humi prostrati, quod in lucu siebat, omnem denique diem piae hilarique memoriae et laudibus CHRISTI ex morte in vitam reducis tribuere, quam ob rem eumdem *ἀναστάσιμον* dixerunt (z).

SEQVITVR iam tertium tempus CHRISTO vitae restituto deuotum, idque anniversarium, sum-

ma

CCCCLXVIII. edit. lat. et qui reliquos testimoniorum copia et selecetu superat Ios. BINGHAM originum lib. XX cap. II §. I. alios plures exhibet litteratissimus Ios. ALB. FABRICIVS bibliograph. antiqu. cap. X §. XIII. (z) conf. Ios. CASP. SVICERVS in thesaur. eccl. sub voce *ημέρα* et *ἀναστάσιμος*, atque in primis LEO ALLATIVS de hebdomadibus et dominicis graecorum ad finem libri de eccl. occident. et orient. confensione, vbi pag. MCCCCXII ex euchologis graecorum demonstrat, singulis diebus domini, in formula solemnii, quae faderotes post sacra peracta concionem dimittunt occurtere verba CHRISTI qui *resurrexit ex mortuis*, aliis autem diebus eorum loco in missione coetus adhiberi verba CHRISTVS *verus deus noster*, quod documento esse potest, diem domini semper habitam fuisse resurrectioni eiusdem celebrandae sacram. (a)



ma semper festiuaque solemnitate et effusissimis laetitiis celebratum quod PASCHA veteres dixerunt, voce non solum a IUDAIS desumpta, sed ex ipsa eiusdem proprietate huc translata. Licet enim nonnulli christiani populi doctores graecam ipsi dederint originem, et a cruciatis CHRISTI deriuarint, quod in plerisque ebraeis vocibus ex nimio alios ad sacras cogitationes excitandi studio magis, quam ignoratione genuinae significacionis factum fuisse videtur (a): plures tamen rectiorem et exploratiorem illius nominis rationem credunt, quod salutaris CHRISTI transitus per mortem in vitam eo tempore festo celebretur. Auctoriis ipsis CHRISTI legatis haec solemnia inualuisse, aut certum anni diem iisdem constitutum fuisse negat SOCRATES (b), qui asseuerat, nullibi apostolum neque euangelia iugum seruitutis christianis imposuisse, sed festum paschatos et reliqua ex consuetudine ad salutarem memoriam CHRISTI ordinata fuisse a christianis, nulla lege domini aut ipsius legatorum ea obseruare iussis. Idem NICEPHORUS testatum reliquit (c). Nemini tamen in antiquis ciuitatis sacrae monumentis versato dubium esse potest, fuisse haec annua solemnia reliquis omnibus antiquiora, et a temporibus, quae ad apostolos

F 4 pro-

(a) Quod IS. CASAVBONVS exercit: XVI ad annales BARONII erudite disputat. (b) hist. eccles. lib. V cap. XXII. (c) hist. eccles. lib. XII. cap. XXXII. (d)



proxime accedunt, vbiue locorum obtinuisse, quod ipsa occidentis ab oriente dissensio funestissima, et controuersia de die statu paschatis, magna animorum contentione saeculo secundo et tertio agitata, et per patres conscriptos nicaenos demum composita, satis demonstrat. Numquam enim ita a se dissidere potuissent CHRISTIANI, si quid illius rei a CHRISTI legatis sanctum aut certa consuetudine obseruatum fuisset: neque tamen ab utraque parte ad apostolorum consuetudines prouocatum fuisset, nisi eosdem annuam resurrectionis huius memoriam celebrasse inter omnes constitisset (d). Hoc certe in controuersiam numquam venit, esse hanc memoriam solemnissime consecrandam: cui negotio non solum integrum hebdomadem sed duas continuas, quae diem hunc solemnem proxime antecedit et eundem excipit, imo septem illas omnes, quae inter pascha et pentecosten intercedunt, veteres dicarunt. Praegressa hoc festum hebdomas magna et sancta, quam GRAECI πάσχα ταυρώσιμον vocarunt (e), inter ieunia conuentus sacros, et sup-

(d) conf. FRID. SPANHEMII *introd. ad histor. sacr. saec. II sect. XIII.* et CL. FLEYRY *histoire eccles. tom I.* pag. CCCCXXXVIII. et CCCCLXXXI.

(e) conf. GERH. IO. VOSSIUS *de vitiis serm. cap. VI* et LEO ALLATIVS *de hebdom. graec.* pag. MCCCCX. qui luculenter demonstrat graecos consueuisse in fastis sacris hebdomadas non a die prima seu dominica, quae antecedit, sed a subsequente deno-

supplicationes solemnes transigebatur. Ipsum autem paschatis diem, vna cum nocte antecedente, quam insomnem ducebant, dici non potest quanta festivitate, solemnumque sacrorum celebritate condecorarint antiqui CHRISTIANI in omnes laetitas, caritatem mutuam, conuentuum frequentissimorum, hymnorum canendorum et sacramentorum peragendorum solemnitates toti effusi(f). Patet illud ex GREGORII NAZIANZENI orat. XXXII. quae in PASCHA secunda est: vbi facundissimus doctor in exordio post sermonem angeli propositum sic exclamat. Πάσχα, κυρίου πάσχα, καὶ πάλιν ἐρῶ πάσχα, τιμὴ τῆς τριάδος. Αὕτη ἔορτῶν ἡμῖν ἐορτὴ, καὶ πανήγυρις πανηγυρεων. τοσῶτον ὑπεράρουσα πάσας, οὐ τὰς ἀνθρώπικὰς μόνον καὶ χαμαὶ ἐρχομένας, ἀλλ' ἥδη καὶ τὰς ἀντοῦ χειρῶν, καὶ εἰς ἀντῶ τελουμένας, ὅσον ἀσέρας ἥλιος. Καλὴ μὲν καὶ ἡ χθὲς ἡμῖν λαμπροφορία καὶ Φωταγωγία, ἣν ιδίᾳ τε καὶ δημοσίᾳ συνεβησάμεθα πᾶν γένος ἀνθρώπων μικρὸν καὶ ἄξια πᾶσα, δαψιλεῖτῶ πιεῖ τὴν νύκτα καταφωτίζοντες, καὶ τοῦ μεγάλου Φωτὸς ἀντίτυπος. - - - Καλλίων δὲ, ἡ σήμερον καὶ

F 5

περι-

denominare, vnde illa appellatio paschatos ad praegressam hebdomadem transuecta videtur.  
 (f) conf. CHRIST. WILDVOGELII *chronoscopiam legalem cap. II.* CASP. CALVOERI *rituale eccles. part. II sect. II Cap. XXXIII.* et Ios. BINGHAMI *origines lib. XX cap. V §. V-VIII et lib. XV cap. VIII §. VI.*

(g)



περιΦανεσέρα. ὅσῳ χθὲς μὲν πρόδρομον ἦν τοῦ μεγάλου Φωτὸς ἀνισταμένον τὸ Φῶς, καὶ διον ἐνΦροσύνῃ τὶς προέορτιος, σήμερον δὲ τὴν ἀνάστασιν ἀυτὴν ἔστελλομεν, οὐκ ἔτι, ἐλπιζομένην ἀλλ' ἡδη γεγενημένην, καὶ κόσμον ὅλον ἐκυρῆ συναγούσαν. *pascua, paseha domini, iterumque pascha dicam in honorem trinitatis.* Haec nobis festiuitatum festiuitas, et celebritatum celebritas, tanto caeteris omnibus, non solum humanis et humi defixis, sed iis etiam quae ipsius CHRISTI sunt, ac propter ipsum celebrantur, superior quantum sol stellas antecellit. Praeclara quidem nobis quoque fuit besterna facium ac luminum gestatio, quam priuatim publiceque peregrimus, omne genus hominum ferme, atque omnes magistratu insignes, largo igne noctem illustantes, magnumque illud lumen referens: --- at hodierna praeclarior et excellentior, nam hodiernum lumen magni illius luminis exsurgentis praenuntium erat et veluti profesta quaedam animalium voluptas. Hodie autem ipsam resurrectiōnem celebramus, non in spe positam, sed iam ortam, mundumque totum sibi conciliantem. Et paullo ante haec verba: σήμερον σωτηρία τῷ κόσμῳ ὅσος τε ὄρατος καὶ ὅσος ἀόρατος. Χριστὸς ἐκ νεκρῶν, συνέγειρεθε. Χριστὸς εἰς ἑκυρὼν, ἐπανέρχεθε, Χριστὸς ἐκ τάφων, ἐλευθερώθητε τῶν δεσμῶν τῆς ἀμαρτίαις. *Hodie salus mundo, tam visibili quam inuisibili, CHRISTVS ex mortuis: simul surgite! CHRISTVS ad fēse: redite! CHRISTVS ex sepulcro:*

pec-



peccati vinculis soluamini! Solemne sacramentum aqua lustrali initiandorum hoc potissimum die administrabatur: vnde ob vestes albas, quibus recens iniciati vtebantur λαμπροφόρος ἡμέρα (g) lucens et splendida dies magis, quam a cereis sacris lucernisque nocturnis vigilias praegressas illustrantibus, vocari consuevit. Cibus diuinus corporis et sanguinis CHRISTI eo die communiter capiebatur, a quo non facile quisquam tunc aberat aut arcebatur: vnde postea ratus et semel dumtaxat per annum eodem vescendi consuetudo saeculo XIII stabilita, perperam tamen, inualuit et contra sententiam primorum CHRISTIANORVM, qui ab eiusmodi cibi huius, neglectu longe fuerunt alienissimi (h). Acclamationum praeterea mutuarum iteratione, cuius reliquiae inter GRAECOS manserunt, dum eo die conceptis verbis surrexit dominus, vere surrit se inuicem laetissimae huius reicertiores faciunt, donis etiam et largitionibus publicis aequae ac priuatis, atque sub imperatoribus CHRISTVM collentibus libertate et impunitate captiuis donata, haec annua sacra celerabantur, quae ad antipascha usque, seu diem dominicam nouam et in albis dictam, atque ad ipsum quinquagesimum diem

F 6

omni

(g) conf. IOH. CASP. SVICERVIS in voce λαμπροφόρος.

(h) cf. B. PAVL. ANTONII nostri programma de pietate paschali veteris ecclesiae, quod inter ipsius collecta programmata sectionis II secundum est, et celebritatem fynaxeos paschalidis pertractat.



omni festiuitatis genere producebantur. Quam feriarum diuturnitatem TERTULLIANVS (i) testatur, AMBROSIUS autem si describit (k) per hos quinquaginta dies nobis est iugis et continuata festiuitas, ita ut hoc omni tempore, neque ad obseruandum indicemus ieunia, neque ad exorandum DEVVM genibus succidamus: instar ergo dominicae tota L dierum curricula celebrantur, et omnes isti dies velut dominici deputantur. Resurrectio enim dominica est, nam in dominica resurgens SALVATOR reuersus ad homines est, et post resurrectionem tota quinquagesima cum hominibus commoratus.

EA SI QVIS cogitauerit, certe non mirabitur fuisse hanc diem PASCHATOS a veteribus vocatam principem omnium et maximam diem, festum festorum, fontem et fundamentum reliquorum festorum (l): nec difficulter intelliget illos tanti fecisse haec sacra ut nihil supra; adeo ut quidquid solemnitatum diuinis oraculis conuenire crederent, id omne huc conferendum esse arbitrarentur. Verum ut sunt humanae res omnes aegerrime suis limitibus et mediocritate circumscribendae, religiosissimi hi veterum mores (m) postquam ad fastigium excreuerunt, tem-

po-

(i) *de idololatr. c. X<sup>IIII</sup>. et de baptismo cap. XVIII.*  
 (k) *serm. LXI.* (l) Potuit haec denominatio exinde enasci, quod festorum antiquorum mobilium computus a paschate pendebat, et multi annum sacrum ab eodem inchoabant. (m) Conferendi sunt post antiquitatum sacrarum scriptores



porum successu tandem in superstitiones, febriculosis nugas et umbras aut festiuitates profanas et saturnalia sanctissimo CHRISTO indigna, degenerarunt. Cuius tamen corruptionis verterimi CHRISTIANI, purissimi homines, non retius accusantur, quam ipse CHRISTVS nefandorum scelerum, quibus sacra ab ipso instituta contaminata umquam fuerunt.

SATIS PRO instituto iam disputasse nobis vide-  
mur de ipsis temporibus CHRISTO in vitam susci-  
tato sacris: erunt iam rationes illorum conse-  
cratorum subducendae, ut quid animo voluerint  
cordatissimi maiores, hac sua in CHRISTVM pieta-  
te his solemnibus restificata, intimius perspicia-  
mus. Sicut enim neque omnia, neque omnino  
nihil primis CHRISTIANIS, apostolorum discipulis,  
tribuimus, quos homines quidem, mirifice tam-  
en in CHRISTVM amore, diuinoque spiritu ani-  
matos esse bene meminimus: ita neque ipsos coe-  
co impetu sectamur, neque pios ductores negli-  
gimus, sed perspectis ipsorum agendi rationibus  
praeeuntes sponte et acriter, licet pro tempo-  
rum calamitate impari gressu, sequimur. Rede-  
unt autem, ni toti fallimur, rationes illae ad qua-  
tuor argumenta, quibus integerrimi homines ad  
memoriam CHRISTI in vitam reducis toties re-  
lendam, et tam religiose consecrandam moti fuis-  
se videntur.

PRI-

res, libri de moribus antiquorum christianorum  
facile parabiles CL. FLEVRY, WILH. CAVEI et GOT.  
ARNOLDI.

(n)



PRIMVM EORVM EST, quod CHRISTVM et ipsius piaculare hoc mortis vitaeque iter fontem et vnicum principium salutis esse, probe cognoverunt, suaque hac pietate declaratum iuerunt. Erant enim ab ipsis CHRISTI legatis edocti, DEVM peccatis hominum lacesitum, hac IESY morte expiatoria, qua legibus violatis satisfactum fuit, non solum hominibus conciliatum esse, verum etiam consequuta eiusdem in vitam restitutione illam hominum expiationem reddidisse testatissimam, fidemque publicam fecisse tam rediisse se in gratiam cum genere humano, quam omnia a CHRISTO dicta gesta et sancta probari sibi rataque haberi (n). Habebant praeterea exploratum, parasse CHRISTYM hoc transitu suo viam immortalitatis, dedisse hominibus exemplum hac transiundi, ac peperisse iisdem et ius legitimum et vires necessarias, nouam, divinam, aeternitate dignam, neque ipsa morte finiendam vitam vivendi (o). Neque ignorabant spem omnem restitutionis exuuiarum, ossium cinerumque nostrorum, et redditus animarum in pristina domicilia longe ipsis aptiora redditam, inniti hoc CHRI-

STI

(n) ACT. II com. XXIII. cap. III com. X. cap. XIII com. XXV. cet. ROM. III com. XXIII. XXV. EBR. XIII com. XX. coll. ACT. XVI. com. XXXVII. quorsum et pacis significatio pertinet frequenter ab ipso CHRISTO vitae reddito repetita, quas suos liberos et salutis certos esse iussit.  
 (o) I PET. I com. III. cap. III com. XXI. ROM. VI com. III.

(p)



STI capit is ex morte in vitam transiru (p). Atque has doctrinas, in quibus cardinem omnis salutis verti prouidebant, hoc publico et solemnni cultu certissime conseruari, ad usum commendari, et ad posteros rectissime propagari posse crediderunt.

SECVNDA ratio, quae CHRISTIANOS mouit ad hanc temporum curam, fuit, quod experiundo didicerunt nemini ante prodesse hanc CHRISTI mortem vitamque, quam viua eiusdem cognitione, certaque applicatione singuli salutis indigicupidique utramque suam fecerint et eiusdem societatem iniuerint (q). Intellexerunt animum excitandum esse ex somno morteque cupidatum, incuria felicitatis, et aeternarum rerum neglectu, conuertendumque versus caelestium curam, ipsum DEVUM et eius coniunctionem, atque sursum semper sublimiusque evehendum, neque id vna alteraue fugaci cogitatione peragi, sed seriis meditationibus, intensissimis curis, et longiore animi in eo occupati et defixi studio omnino opus esse. Quam ob rem solemnem operam dederunt, omnemque mouerunt lapidem, ut grauissimis his doctrinis animus ad se rediret,

con-

(p) I COR. XV. com. XX. seqq. ROM. VIII com. XI. I  
THESS. III com. XV. praeclare haec prosequitur  
HVMPH.DITTON *in demonstrationis doctrinae christiana-  
nae ex resurrectione IESV part. III cap. XIII.* (q) EPH. V  
com. XIII. ROM. VI com. III. XI. COL. II. com. XII.  
ACTOR. III com. I. II. (r)



concitatissimis cogitationibus, obtutibus et desideriis in CHRISTVM, salutis et aeternae felicitatis instauratorem ferretur, totusque in eius amplexus rueret atque sic aeternitati restitueretur et vere aeternumque reuiuisceret. Prouiderunt denique vacandum esse huic studio, feriandumque per tempus, ne animus in partes pluresque curas distractus minori, quam par est, intensione grauissimam hanc rem agat: neque semel dumtaxat peyagi, aut vna, licet enixissima, opera absolui arduum hoc et aeternum negotium, sed crebrius et frequentius iterandum esse, donec sanctissima consuetudo, quae altera natura est, contrahatur CHRISTVM colendi, spirandi, vita moribusque referendi. Quam ob rem toties hoc officium instaurandum esse duxerunt.

ACCESSIT tertia caussa, quod partium suarum esse animaduerterunt piissimi homines, CHRISTVM immortaliter de salute ipsorum meritum publice profiteri, laudibus celebrare et gratias, si non referre, agere saltem et habere se omnibus modis significare. Apprime perspexerunt, pertinere hoc, si quid aliud, ad officium hominis CHRISTO deuoti, ve non solum salute et immunitate CHRISTI fruatur, sed eidem se haec omnia debere cogitet, honorem beneficiorum ab ipso prosectorum eidem deferat, delatumque verbis sermone et omni viuendi ratione testificetur, atque solemni laetitia, accepti beneficii professiore

et.



et celebratione studiosissimam grati animi contentionem p[re]se ferat.

QVARTA tandem ratio fuit, quod didicerant omnem hanc rem mirifice leuari si communiter agatur, plurimorum latentes sopitosque igniculos certius excitari, et fortiorē flammanā concipere in vnum collatos, mutuisque facibus adnotis, sparsos contradisiectosque hinc inde facilius extingui. Compertum simul habebant CHRISTVM incredibiliter delectari sanctissima hac ciuium suorum inter se foederatorum societate communibusque studiis: illam autem animorum coniunctionem nec felicius coalescere, nec certius conseruari, nec rectius augeri, quam communibus his sacris, contentibus sanctaque aemulatione.

FACIVNT grauissimae hae rationes, ut nemo cum recta ratione negare possit, recte et laudabiliter haec solemnia instituta, atque multiplici utilitati illis consultum fuisse. Iam igitur ipsimet CIVES AESTVMATISSIMI hodiernos mores CHRISTIANORVM cum hac antiqua maiorum disciplina contendite, atque apud vos reputate, quantum descivuerimus a pristino feroce, debitaque in CHRISTVM pietate, quantumque recesserimus ab his sanctissimis institutis, quorum vix vola et vestigium supereft. Nomina certe antiqua, for-

G

mulas



mulas, luctuosissima ruinarum nostrarum rudera  
retinuimus, licet a bene multis satis fastidita,  
tristem aliquam imaginem vmbramque ciuitatis  
primaevae circum ferimus: res ipsa dudum proh  
**DEVM IMMORTALEM!** inter nos euanuit et illae-  
tabile sui desiderium reliquit. Quotusquisque  
iam CHRISTIANORVM CHRISTI mortem vitamque  
ita quotidie meditatur, cogitationibus, preci-  
bus, laudibus prosequitur, sancteque laetatur  
ut eius particeps euadat, aeternitati vindicetur,  
vitamque CHRISTO dignam viuat? Quam frequen-  
tes DOMINI dies praelabuntur plerisque nihil ad-  
modum CHRISTVM cogitantibus? Et BONE DEVS!  
quam vel languent vel profanantur annua sacra,  
quamque infra tanti beneficii dignitatem inex-  
cusabili neglectu subsident? Adeo iam exsulat  
ille pristinus feruor et antiqua fides in fre-  
quentandis conuentibus sacris, iisque CHRISTO,  
qui spiritu magis quam corpore colitur, digne  
peragendis, in precibus fundendis, laudibus de-  
cinendis, beneficiis CHRISTI memorandis, atque  
familiari sermone et colloquiis religiose conce-  
lebrandis: ut CHRISTVS ex ciuitate sacra ab ho-  
stibus carmine euocatus esse videatur, atque dis-  
similes omnino euaserint CHRISTIANI priscis CHRI-  
STI ciuibus, licet ipsorum nomen mentiantur,  
non sine multo magnoque ciuitatis discrimine;  
in primis quum ipsimet, qui litteris et sacris ope-  
rantur, atque longe vltra plebem sapiunt, nec  
has



has ciuitatis leges ignorant, scire certe poterant  
decebantque, lacrimabilem hunc errorem er-  
rant, et turpius proinde ac periculosius peccant,  
tantum certe in fructibus mortis et vitae CHRISTI  
percipiendis, primis CHRISTIANIS inferiores olim  
futuri, quantum ab illis superari voluerunt feroare  
et seuera CHRISTVM colendi disciplina.

QVOD reliquum est, CIVES CARISSIMI  
sancte VOBIS edicimus: PROCVL HINC,  
PROCVL ITE PROFANI! IMPII EX-  
ESTE! QVISQVIS AD HAEC SAGRA  
CHRISTI ADEST, HOC AGITO! PV-  
RIS MANIBVS, PVRA MENTE AESTO!  
ANIMO ET ORE FAVETO! ATQUE  
RELIGIOSE PROVIDETO, NE QVID EX  
EORVMDEM PROFANATIONE DETRI-  
MENTI CAPIAT! Mysteriis CHRISTI VOS  
initiatos esse mementote CIVES! ne igitur chri-  
stianos simulate, res enim hic agitur non per-  
sona, peccata serio expiate, pie salutate ani-  
moque complectimini IESVM ex morte redi-  
cem, vestrumque facite SERVATOREM OPT:  
quo sine felicitatis iactura non carebitis, neque  
tamen dissimulate pietatem in eundem, laudibus  
vestris ipsum dignamini, quod bene de VOBIS  
meritus est, vt vos sua olim testificatione di-

gnetur, ad sacra solemnia confluente, iisque non  
corpore magis quam animo intereste, bona  
verba dicite, omnemque operam date ut vita  
ipsius apud vos instauretur. Ita veterimos  
**CHRISTIANOS** orbi reddetis, ita temporum  
**CHRISTO** sacrorum numquam vos poenitebit,  
ita omnis vestra vita **CHRISTO** sacra fiet, et  
ipsimet aeternitati viuetis. P. P. in academia  
**FRIDERICIANA** prid. cal. apr. ex formu-  
la sacra **VIGILIA PASCHATOS** anni  
**ciclo cccxxxvi.**



ACADEMIAE FRIDERICIANAE  
PRORECTOR  
**IAC. GABR. WOLFFIVS**  
POTENT. PRVSS. REGIS A CONSIL.  
AVLICIS IVR. DOCTOR ET  
PROF. ORDINARIUS  
VNA CVM  
CANCELLARIO DIRECTORE  
ET  
RELIQVO SENATV ACADEM.  
PROPOSITO  
**TEMPORE SPIRITVS DEI**  
IN PRIMOS  
CHRISTI DISCIPVLOS EFFVSI  
OMNIVM OPPORTVNISSIMO  
SOLEMNIA PENTECOSTES  
INDICIT





PROGRAMMA ACADEMICVM IV. 103

*Q. B. F. F. Q. S.*

**V**IVENDO IAM attingimus auspicatissimos dies, memoriae DIVINI SPIRITVS in primos CHRISTI discipulos effusi antiquitus consecratos. Ad quos sancte obeundos, ut ex laudabili maiorum consuetudine inuitemini, CIVES AESTVMATISSIMI, ex tanta memorandarum rerum copia vnicum dumtaxat TEMPSUS quo immortale hoc beneficium orbi contigit, vobis proponemus, commonstraturi, fuisse illud a sapientissimo DEO adeo couuenienter constitutum, ut nihil opportunius dici possit, aut accommodius cogitari ad homines commonefaciendos de rebus grauissimis aequae ac vtilissimis, scituque omnino necessariis. Nouimus enim auctore SALOMONE, (a) omnia a DEO pulchre fieri suo tempore, seu eo ordine, qui rebus, quae et antecedunt, et simul fiunt, et consequuntur omnium maxime conueniat, plurimumque nostra referre ad consilia DEI O. M. intimius perspicienda et sapientiam infinitam dignius venerandam, harum opportunitatum curatiorem institui cogitationem, et maiorem apud homines rationem haberi. Erit igitur e re nostra, neminique ab religiosa sanctissimi SPIRITVS, in homines collati, meditatione alienum videbitur, felicissimum hoc tempus, in litteras diuinis sollicite relatum, ita a nobis cogitari, ut fines diuinorum in illo sic constituendo inuestigemus, atque ea edoceamur

G 4

et

(a) COHEL. III. com. XI.



et agamus sedulo, quae DEVS intelligi fierique ab officii studiosis hac ipsa re iussit. Vbi triplex potissimum consideranda occurrit illius temporis laetissimi definitio, cuius nos LVCAS in describenda hac re occupatus certiores fecit, eiusque rationes subducendae, ut appareat, cur DEVS et festo IVDAEORVM pentecostes, et paucis aliquot ab ingressu CHRISTI in caelum diebus elapsis, et hora denique dici tertia exoptatissimum illud miraculum edendum esse duxerit.

DIES ILLUXERAT, cum SPIRITVS discipulis CHRISTI diuinitus illaberetur, quinquagesimus, non tam a reditu CHRISTI ex morte in vitam, quem in civitate CHRISTI tempore paschae celebramus, quam a festo IVDEORVM paschae, dieque CHRISTI emortuali, (b) vnde etiam graece pentecoste vocabatur, et ipse festus erat ex ISRAELITARVM tabulis (c).

Quod

(b) Sequimur in eo vulgariorem et a plerisque interpretibus receptam sententiam de paschate a CHRISTO eodem cum Iudeis die celebrato, ut longe verisimiliorem altera de anticipatione eiusdem, quam GRAECI olim defenderunt, ad panis fermentati usum in epulo sacro ea ratione stabilendum, multique recentiores suam fecerunt, licet in rationibus illius anticipationis mirifice a se dissideant. Copiofissime nostram sententiam probatum iuit ANTON BYNAEVS *de morte IESV CHRISTI* libr. I pag. XXIII-LXV, et post illum celeberr. IO. REINH. RVS. *in harmonia euangel.* tom. III, pag. CCCCLXXX, et DII-DXVIII. (c) LEVIT. XXIII. com. XV etc. DEUT. XVI com. VIII etc.

(d)



Quod ideo accidisse videtur, tam ut certitudini huius beneficii consuleretur, ipsique de celebri-  
tate eo melius prospiceretur, quam ut finis sacro-  
rum solemnum, ab ISRAELITIS eo tempore olim  
celebratorum, clarius significaretur. Nam quum  
in eo esset benignissimus DEVS, ut ciuitatem CHRI-  
STI, promulgatione salutis ab ipso partae condi-  
turus, primos eiusdem discipulos, quibus mini-  
stris et legatis haec incredibilis rerum animorum-  
que per orbem terrarum conuersio peragenda  
erat, necessaria doctrina, viribusque ad patran-  
da miracula, mentes flectendas, molestias cru-  
ciatusque superandos instrueret, et sic fidem de-  
largitione spiritus sui per vates antiquos datam (d),  
et ab ipso CHRISTO saepius confirmatam (e) sol-  
ueret, atque hunc IESVM liberatorem generis  
humani vere esse sibique probari testatissimum  
redderet (f): non in obscuro et paucis homi-  
nibus consciis, quorum postea fides dubia vi-  
deri poterat, sed in clarissima luce, omni IUDAEO-  
RVM populo adstante et inspectante praesenti-  
busque innumeris testibus, legatos CHRISTI pu-  
blice et solemniter inaugurarī curauit. Lege  
diuina

(d) JOEL III com. I IES. XXXXIIII com. III EZECH.  
XXXVI com. XXVII cap. XXXVIII com. XXVIII.

(e) ACTOR. I com. III io. VII com. XXXVIII. cap.  
XIII com. XVI. XXVI cap. XV com. XXVII cap.

XVI com. VII. XIII LVC. XXIII com. XXXXVIII.

(f) ACTOR. II com. XXXII-XXXVI cap. III com.

XV. cap. V com. XXX etc.

diuina sanctum erat, ut ad haec sacra solemnia  
**EX PALAESTINA** mares in vniuersum omnes con-  
 fluenter. (g) Quod, postquam **IVDAEI** per varias  
 calamitates et migrationes extra **PALAESTINAM**  
 peregre viuebant, ab illis etiam hoc maxime  
 festo ob tempestatem commodiorem fieri consue-  
 uit, eoque anno solemnii mirifice factum esse **LV-**  
**CAS** commemorat, qui aliquem censum agit (h)  
 hominum iudeorum, ipsorumque sacris addi-  
 torum, ex remotissimis regionibus tunc **HIERO-**  
**SOLYMIS** hos dies degentium (i). Non potuisse  
 igitur huic negotio maior celebritas conciliari,  
 eiusque fama citius ad exterros propagari, quam  
 hac **DEI** cura, qua prouidit, ut in gente mira-  
 culorum cupidissima (k) et ad extraordinarias res  
 quasuis attonita, vndiquaque in vnum collecta,

tot

(g) EXOD. XXIII com. XIII - XVII cap. XXXIII  
 com. XXIII DEUT. XVI com. XVI. (h) ACTOR.  
 II. com. VIII - XI. (i) Videntur nonnullis 10.  
 LICHTFOOTO in primis in *horis ebr.* ad **ACT.** II.  
**com. V.** illi homines **HIEROSOLYMIS** habitasse pe-  
 petuumque ibi domicilium habuisse ob vocem  
 graecam *natoiesv*, quod ex communi omnium  
 MESSIAE hoc tempore aduenturi exspectatione ac-  
 cidiisse existimant. Non possunt tamen peregre  
 aduentantes excludi omnino, quos hoc anno  
 maiore quam aliis frequentia attrahere potuerat  
 fama de iis, quae in causa **IESV** nuperrime acta  
 fuerunt, longe lateque sparsa. cf. M. V. IO. LVD.  
 LINDHAMMERI *commentarius in Act. II. com. V.*  
(k) I COR. I com. XXII. MATT. XII com. XXXVIII  
 cap. XVI com. I. (l)



tot infimae sortis homines 'galilaei', a litterarum studiis destituti, prisorum vatum instar res diuinis oraculis antiquis conuenientissimas praedicarent, inauditis miraculis confirmarent, et IESVM supplicio nuper sublatum, CHRISTVM esse publice testarentur. Neque successu caruit hoc DEI consilium, sed incredibilem produxit animorum commutationem, effecitque ut opinione celerius innotesceret haec res, quae ad omne humanum genus pertinebat, et quam non ignorari omnium intererat. Atqne sic IESVS inter solemnia ISRAELITARVM summamque eorumdem frequentiam ignominiosa morte peremptus, in pari frequentia proximisque illorum solemnibus supremo honore condecorabatur.

VERVM VT vnius rei sapienter dispositae plures esse solent fines: sic vna hac destinatione diuina circumscribi non potest SPIRITVS DEI in homines missio die pentecostes nec alio quodam die festo facta; sed latius omnino patet, et ad umbrarum in primis imaginumque in ISRAELITARVM sacris obuiarum, explicationem directa fuisse videtur. Ante enim quam abrogarentur ISRAELITARVM solemnia, significandum erat distinctius atque in clariore luce ponendum, quorsum illa tempora sacra spectauerint: ne tam abolerentur, quam postquam finem obtinuerant, ipsaeque res illis repraesentatae euenerant, per se cessarent, nihil amplius profutura. Atque vt de hoc consilio suo certius inter omnes constaret, illis ipsis festis



festis diebus ea fieri DEVS procurauit, ad quae ob-  
scarius significanda olim comparata fuerunt. Vt  
contra senatus IUDAORVM supremi consultum (l)  
piacularis mors IESV in ipsa solemnia paschae in-  
cidit, vt arcanum DEI consilium panderetur; in  
sacris his ita ordinandis: ipsumque illius um-  
brae corpus sisteretur: ita eamdem ob causam  
SPIRITVS DIVINI missio solemnis eo tempore eue-  
nit, quod olim iam huc directum fuerat. Sicut  
enim quinquagesimus ab exitu ISRAELITARVM ex  
AEGYPTO dies sacris solemnibus deuouebatur ad  
memoriam huius liberationis consummatae felici-  
cius consecrandam, legis diuinæ eo tempore so-  
lemnī ritu promulgatae beneficium recolendum,  
et gratias pro frugum messe, oblatis earundem  
primitiis panibusque sacris, publice agendas;  
vnde et *festum messis* dicebatur (m): ita certe op-  
portunius legati CHRISTI, SPIRITVS DIVINO initiari  
non potuissent, quam eo ipso tempore festo; vt  
intelligeretur ab omnibus facrorum israeliticorum  
gnaris, hoc SPIRITVS SANCTI beneficio consum-  
mari et applicari liberationem hominum ex ca-  
lamitate et seruitute malorum per CHRISTVM  
partam (n), legem ZIONIS (o) solemnem certissi-  
mamque voluntatis diuinæ declarationem tunc  
coepisse, atque DEI legem SPIRITV SANCTO in-

stau.

(l) MATT. XXVI com. V MAR. XIII com. II. (m) EXOD.  
XXIII com. XVI. (n) II COR. III com. XVII  
GAL. III. com. XIII. XIII cap. III com. V. VI.  
VII IO. VIII com. XXXVI. (o) IES. II. com. III  
(p)



staurari apud homines, cordibusque ipsorum  
 inscribi (p), parari denique DEO messem amplis-  
 simam laetissimarum frugum ex agro sterili ante,  
 sed feraci reddito, hoc benignissimo spiritus im-  
 bre diuinitus demisso (q), ipsosque CHRISTI di-  
 scipulos fuisse primitias huius messis DEO publice  
 consecratas oblatasque solemniter. Et quemad-  
 modum ISRAELITAE circa illud tempus olim in  
 ciuitatem coire, propriisque legibus longe sa-  
 pientissimis gaudere coeperunt, atque hoc anni  
 tempore beneficium terrae feracissimae, ipsis  
 promissae ac postea donatae, grata mente co-  
 lere consueuerunt: ita SPIRITVS solemnis missio  
 ad ciues CHRISTI colligendos, nouam ciuitatem  
 circumscribendam, abundantiam felicitatemque  
 ipsi procurandam accommodatius fieri non pote-  
 rat, quam hoc ISRAELITARVM tempore festo.  
 Neque mysterio caret numerus dierum quinqua-  
 gesimus, qui numerum ex septies septenis com-  
 positum excipit, quem veteres sacrum habue-  
 runt, (r) propter quem numerum *festum hebdo-*  
*matum* vocabatur (s). Nam ut quinquagesimus  
 quisque annus sacer et iubilaeus erat<sup>o</sup> ISRAELI-  
 TIS, (t) libertate seruorum manumissorum, re-  
 cupe-

(p) IER. XXXI com. XXXIII HEBR. VIII com. X.

(q) IES. XXXXIII com. III. III EZECH. XXXIII com. XXXVI. XXVII ps. LXVIII. com. X etc.

(r) conf. IO. VAN DER WAYEN librum singularem *de numero septenario.* (s) DEUT. XVI com. X.

(t) LEVIT. XXXV tot. (u)



cuperatione possessionum omnium, quiete de-  
mum et laetitia solemni transfigendus: sic quin-  
quagesimus dies a liberatione et salute homini-  
bus acquisita quotannis destinatus fuisse videtur  
ad SPIRITVS diuini missionem celebrandam; ut  
significaretur libertatem immunitatemque populi  
DEI inchoari SPIRITVS SANCTI beneficio et eodem  
consummari olim, omnem etiam requiem et laeti-  
tiam per eundem obtineri. Si cui libuerit hic  
per partes eundo singularum contentionem insti-  
tuere, quantumue sacris solemnibus israelitarum  
hoc die festo peragendis, cum SPIRITVS DIVINI  
in legatos CHRISTI collati beneficio conueniat,  
distinctius meditari: habebit certe in quo inge-  
nium exerceat, animam pascat, seque ad re-  
conditam DEI sapientiam venerandam excitet  
quam felicissime.

NOBIS IAM ad alteram exponendorum par-  
tem properandum est inuestigandumque quibus  
rationibus inductus sapientissimus DEVS, qui cum  
ratione omnia agit, SPIRITVM suum paucis ali-  
quot ab ingressu solemni CHRISTI in caelum die-  
bus elapsis, in eius discipulos conferendum exi-  
stimauerit. Quae si eas recte inimus huc rede-  
unt, primum ut testatissimum fieret, hoc do-  
num CHRISTO deberi, pertinere ad fructus re-  
demtionis, grauissimique itineris per innumeratas  
calamitates, ipsamque mortem in vitam, et cer-  
tissimum signum ac documentum esse maiestatis  
regiae et infinitae gloriae in quam transferit: de-  
in-



inde ut discipuli, conuersatione, quae quadraginta dies ipsis cum CHRISTO vitae restituto intercesserat, de vita ipsius certiores facti et incredibili gaudio affecti, (u) nouis postea curis per eiusdem ex terris abitum turbati (x) ipsaque rerum consequiturarum exspectatione suspensi, ad se redirent, sibimet ipsis redderentur, obsequium fidemque CHRISTO praestarent, atque sic precum communiter per hos octo dies fusarum (y) spei et fiduciae exercitiis ad beneficium hoc, ipsis destinatum, melius recipiendum praepararentur. Admodum ipsis salutare fuit hoc temporis interuum, tam ad incrementa capienda desideriorum sanctorumque cupiditatum, CHRISTI promissionibus excitatarum, quam ad continentiam huius desiderii vehementiam, morae alias impatientem, intra limites animi sedati, contra rerum praesentium speciem innixi verbis et promissionibus DEI, eiusque se voluntati penitus submittentis. Ardua certe res fuit

mul-

(u) Plerique, qui typos legum israeliticarum explicarunt, utilissimam hanc operam nauarunt. Conf. in primis FRID. AD LAMPII mysterium foederis gratiae part. III. cap. XXVII. et WILH. MOMMA oeconomiam lib. III cap. VIII §. VI etc. et lib. II cap. XI §. LXVI etc. LXXXV, nec non WOLFG. FRANZIVM de interpretatione script. sacr. part. II orac. CXXI et CXXII vbi veteris et nouae pentecostes comparationem instituit. (w) ACT. I co. III cap. XIII co. XXXXI. (x) ACT. I com. X. XI. (y) ACT. I com. XIII ca. II co. I. (z)



multisque difficultatibus impedita, et indicium maioris animi fide a CHRISTO data eructi et confirmati, quam hominibus natura inest, discipulos CHRISTI in urbem infensissimam, mediamque hostium turbam redire, confoederatos societatem colere, precibus tempus transfigere sola permotos exspectatione rei, si a sermonibus CHRISTI discesseris, incertae et dubiae. Quare indulgentissimus DEVS, perspecta hac ipsorum fide et obsequii constantia, diutius eos suspensos teneri noluit, sed octavo die a nouissima ipsis facta promissione eamdem impleri curauit (z). Monemur hac re officii nostri et viae, quam ingredi quemque oporteat, ad beneficium commune SPIRITVS SANCTI certius consequendum, ut animus viua cognitione CHRISTI, exantlatis laboribus expiatoriis in gloriam reducis, perfusus, ad caelestia erectus, fide amore, obsequio et spe certissima exercitatus, nec morae a DEO prof-

(z) Quodsi quinquagesimus dies, huic solemnitati consecratus, non a resurrectione CHRISTI, sed secundi paschae IVDÆORVM die morteque CHRISTI numeratur, quod ex IVDÆORVM sententia, hac in re in diuersa abeuntium, exponit ADR. RELANDVS in antiquit. ebr. part. III ca. IIII §. III. IIII. non potuit solemnis CHRISTI ingressus in caelum longius quam octo dies, neutquam vero decem a pentecoste distare. Quare non habuit LEN. de TILLEMONT cur in memoris ad histor. eccles. tom. I. part. I. nota in vitam IESV XXXXII. pag. CCLXI. CHRYSOSTOMO indignaretur, qui in homiliis ad acta haec iam obseruauerat. (aa)



Quae impatiens, cogitatione et desiderio in hoc  
DEI donum feratur, et magis magisque ad largio-  
rem eius mensuram recipiendam præparetur.

RESTAT POSTREMA illius temporis confide-  
ratio, mane hora diei tertia illud miraculum, ex  
hominum memoria inauditum, non sine ratione  
euenisse. Quam vnam omnium principem LVCAS  
commemorat, vt hac re a DEO, futura quaevis  
prouidente, caueretur, ne ebrietatis aut vini  
effusius sumti suspicio a nonnullis excitanda vel  
aliquam veri speciem haberet: quare PETRVS ad  
amoliendam hanc procacissimae impudentiae ca-  
lumniam hoc potissimum a tempore et hora de-  
sumto argumento utitur (aa). Erat illa hora, qua  
CHRISTVM ligno ferali affixum fuisse legimus (bb),  
precibus publicis deuota, quae eo solemniores  
erant, quod cum sacrificio quotidiani cultus ma-  
tutino coniungebantur, cui ISRAELITAE ieuniari et  
ante cibi potusque vsum interesse solebant. In-  
dicabatur hac re, si quid coniicimus, SPIRITVM  
DEI esse spiritum gratiae et precum (cc), preci-  
bus obtineri (dd), eiusque hac missione et grauis-  
simis illius effectibus impleri vota a tot saeculis  
nuncupata, et suspiria fusa ad impetrandum ac-  
celerandumque regni diuini inter homines aduen-  
tum, ipsosque iam homines ope huius SPIRITVS

H

ho-

(aa) ACT. II. com. XIII XV. (bb) MARC XV.

com. XXV. (cc) ZACH. XII com. X. (dd) LVC.

XI. com. XIII. (ee)



hostias DEO acceptissimas paratum iri (ee). Grande praeterea opus hoc die peragendum erat, fundamenta nouae ciuitatis iacienda, et aliquot milie homines in illam transducendi, solemnique aqua publice initiandi: quare hanc operam maturandam esse statuit sapientissimus DEVS, ferrumque cudendum quoad ferueret. Oribatur tandem hac laetissima luce in orbem illarum, exoptatissima dies nouae manifestationis DEI inter homines longe illustrioris, quam illud obscurius tempus fuerat, quod antecessit (ff).

POSSET HAEC meditatio vterius extendi, si de hebdomadis die, quo illa SPIRITVS effusio accidit, disputaretur, aut opportunitas ciuitatis CHRISTI eo potissimum tempore condendae, ex horum temporum historia ciuili repetetur, et rerum facie, qualem tunc fuisse inter IUDAEOS, ROMANOS et reliquas gentes huic negotio accommodatissimam, scriptores antiqui perhibent. Sed vela iam contrahenda sunt: praesertim quum triplex haec illius temporis determinatio, cuius rationes inuestigauimus, in tabulis sacris sola occurrat, et ea, quae disleruimus, ad illarum sensum illustrandum sufficient, reliqua etiam pleraque in hanc rem dicenda magis ad vniuersum CHRISTI aduentum pertinent, qui suo tempore omnium longe opportuni-

(ee) ROM. XV com. XVI. (ff) ROM. XII. com.  
XII. II COR. VI com. II. I THESS. V com. V.  
(gg)



nissimo accidit (gg), quam ad effusionem SPIRITVS SANCTI.

VOS, CARISSIMI CIVES, agite quaesumus exemplum, quod vobis praeiuimus ita sequimini, ut in vniuersum hunc campum historiae sacrae, de solempni SPIRITVS SANCTI missione, qua patet amplissimum, cogitationibus vestris excurratis, eiusque singulas partes lustratis, reliqua oracula DEI, quibus et huius doni omnibus in vniuersum conferendi fidem fecit, eius necessitatem, exoptatissimas operationes, certissima signa et laetissimos effectus exposuit, studiose compareatis, omniaque in rem vestram conuertatis. IESVM post gloriosissimum in coelos triumphum actum, hac gloriae suae declaracione conspicuum religiose veneramini, ipsique, beneficii huius populo suo vobisque exhibiti bene memores, gratias immortales agite, necessitatem huius spiritus ad mentem emendandam apud vos reputate animumque ad spem erigite, fore, ut ardenteris precibus idem DEI donum consequamini. Qui olim sacra IUDAEO RVM publica, licet tunc longe corruptissima a CHRISTI discipulis frustra peragi noluit; sed eo potius quam alio quouis tempore hoc in suos contulit beneficium,

H 2 remu-

(gg) Qui hoc argumentum tractarunt, allegantur nonnulli a celeberr. IO. CHRIST. WOLFFIO in *curis philol. ad GAL. IIII. com. IIII.* quibus addendus est NATH. LARDNER in *fide historiae euangelicae* libr. I.

(t)



remuneraturus ipsorum obsequium fidemque: idem munificentissimus D E V S dies memoriae huius beneficij digne et religiose celebratos, sine fructu transire non patietur, innumeris suspiriis, supplicationibus laudibusque, quibus ciuitas sacra hos dies personabit, facile ad donum hoc omnibus eius adeo cupidis quam indigis conferendum exorabitur. Hanc oportunitatem ne vestra culpa negligatis cauete. Mane et quoad tempus est D E V M quaerite, ne ex hac vita abrupti sine hoc s P I R I T V , quo destituti nec C H R I S T I ciues estis, nec heredes felicitatis futurae, D E O aeternum careatis. P. P. in academia FRIDERIC. d. XIII cal. iunias, qui in fastis sacrī VIGILIA PENTECOSTES est anni

c I C I C C X X X V I .



COM.



COMMENTATIO HISTORICO THEOLOGICA  
DE  
**SOLEMNIVM CHRISTO NA-  
TO SACRORVM ORI-  
GINIBVS**

---

QVA  
SENATVS ACADEMICVS  
**NATALEM DOMINI**  
INDIXIT.





## Q. F. F. Q. S.

**L**AVDABILI academiarum more natalem  
IESV CHRISTI DOMINI publice indicturi  
operae pretium vobisque CIVES AESTV-  
MATISSIMI rem non ingratam facturi no-  
bis videmur: si ex antiquitatum monumentis me-  
moriae CHRISTI gentem nostram ingressi in ciui-  
tate sacra celebratae origines breui narratione ex-  
plicauerimus. Per magni enim nostra interest ad iu-  
stum his solemnibus pretium statuendum, illorum  
inter CHRISTIANOS exortorum tempus et occasio-  
nes non ignorare: ne antiquarum rerum fastidiosi  
ad atiles saeculorum obscuriorum superstitiones  
detrudamus, quae altius omnino repetenda sunt,  
neque ad apostolos autores referamus, quae  
subsecutorum temporum pietati, satis, quoad  
tunc licuit, oculatae, ratione certe non destitutae  
debemus; sed ut maiores nostros, religiosissimos  
mortales feroe saltem in CHRISTO de nobis im-  
mortaliter merito enixissime concelebrando,  
eiusque e re nostra nati memoria consecranda  
aemulemur. Atque ut ordine procedamus, pri-  
mum in *tempus* inquiremus, quo haec sacra pu-  
blica inualuerunt, deinde *rationes* illorum institu-  
torum subducemus, visuri quid officii nostri sit in  
premendis veterum vestigiis (a).

QVIN-

(a) Ampliorem harum antiquitatum tractationem  
animo conceperamus, ut de vtraque diuini huius  
beneficii celebratione publica ageretur et

H 4

annis.



QVINQUE saecula, quae a nato CHRISTO proxime effluxerunt, ex eruditorum sententiis horum sacrorum origines sibi vindicant singula. Quare per partes eundo rationes breuiter examinabimus, quibus singulorum caussa agitur. Antiquissimae originis eorumdem ad *saeculum primum* referendae patroni omnium certissime caussa cadent. Si *constitutionibus apostolicis* sua, quam mentiuntur, auctoritas constaret, non foret cur dubitaremus de ipsis CHRISTI legatis extraordinariis huius consuetudinis auctoribus. Ita enim praecipiunt lib. V cap. XIII τὰς ἡμέρας τῶν ἐορτῶν Φυλασσότε, ἀδελφοῖ, καὶ πρώτην γετον γενέθλιον, ἣτις ὑμῶν ἐπιτελέσθω εἰνάδι πέμπῃ τοῦ ἴννάτου μηνός. atque lib. VIII cap. XXXIII. PAVLLVM et PETRVM edicere perhibent, σερντ τῶν γενεθλίων ἐορτὴν αργείτωσαν. Sed quum

du-

*anniversaria* peculiaris diei his sacris dicati et *perpetua* aerae annorum numerandorum a sanctissimis huius nativitatis auspiciis constitutae, atque in *annua* illius memoria praeter *tempus*, quo celebrari coepit, et *mensis diesque*, quem veteres huic memoriae addixerunt, inuestigaretur, et tandem *solemmnia* quibus illam obierunt, enarrarentur. Maluimus tamen, quum argumentum nimis ex cresceret, unam illorum partem vberius disputare, quam copia obrui, reliqua vero alii occasione destinare: in primis quum historiae christianaे scriptores, recentiores etiam, de *tempore* ortae huius celebrationis constituendo in partes discedant, atque rem fatis dubiam relinquant. (b)



dudum decoxit fides horum PSEUDOCLEMENTIS  
scriptorum (b), neque alii testes fide digni  
producere possunt (c): conclamata est veterima  
huius festi antiquitas. Quam ipsa etiam senten-  
tiarum apud veteres aequae ac recentiores de-  
mense et die nati CHRISTI diuersitas satis conuel-  
lit. Numquam enim in partes discessuri fuissent  
CHRISTIANI aut a se inuicem dissensuri in die huic  
memoriae consecranda, si natalis illius celebra-  
tio ab apostolorum tempore obtinuerat.

QVI IN saeculo secundo haec solemnia depre-  
hendere sibi videntur RVD. HOSPINIANVS (d) et  
WILH. GAVE (e) ad THEOPHILI (f) cæsariensis COM-

## MODO

- (b) Post doctissimas censuras THOM. ITTIGH in *de  
pseudepigraphis CHRISTI, MARIAE et APOSTOLORVM*  
*cap. XII in heptad. dissertt. appendici diss. de  
haeresiarch. adiecta p. m. CLXXXX sqq. 10.  
BAPT. COTELERII in iudicio de const. apostol. opp.  
patrum. apostol. inserto tom. I. p. m. CLXXXIII  
NATAL. ALEXANDRI bish. eccl. saec. I diss. XVIII  
LVD. ELL. DV PIN bibl. auct. eccl. tom. I a. p.  
LXXXII et SEB. le NAIN. de TILLEMONT memor.  
ad bish. eccles. tom. II part I de Clem. art. VII  
nemo facile de ipsis CLEMENTI aut aevo apostolico  
vindicandis laborabit, neque WILH. WHISTONI argu-  
mentis mouebitur, quibus a MATTH. HENRY IO. ERN.  
GRABIO, ROB. TVRNERO et IO. CLERICO abunde satis-  
factum est. (c) Epist. TELESPHORI et CHRYSOSTO-  
MI testimonium infra examinabitur, neque pro-  
xime sed per conclusiones tantum fundamento de-  
stitutas ad saeculum I pertinent. (d) *de festis  
CHRISTIANORVM* p. m. CLXVIII sq. (e) *in pri-  
mitivo christianismo* p. CLVIII ed. germ. (f) HIE-  
RONY-*

MODO et SEVERO aequalis epistolam prouocant, ex qua prior haec verba recitat: *sicut domininatalem, quocumque die VIII kal. ian. venerit, ita et VIII. kal. apr. quando resurrectio accidit CHRISTI debemus pascha celebrare.* Verum haec verba THEOPHILI non sunt, sed ex recentiori scriptore incerti temporis, EVSEBIO tamen caesariensi iunioris, cuius historiam allegat, desumta, qui in narratione concilii palaeostini seu caesariensis hanc GALLORVM fuisse consuetudinem non THEOPHILI, cuius deinde sermones in concilio habitos profert, sed suis verbis perhibet (g).

ALII

RONYMVS *de vir. illustr. cap. XXXXIII* THEOPHILI huius et epistolae synodicae ab ipso scriptae mentionem facit. EVSEBIUS etiam *hist. eccles. lib. V. cap. XXII et XXIII* eundem commemorat, et *cap. XXV* epistolae illius fragmentum exhibit. IOACH. HILDEBRAND *de diebus festis p. m. XVIII* hunc THEOPHILVM caesariensem cum antiocheno aliquantum antiquiore confundit. (g) Sagacissimus Ios. BINGHAM *orig. eccles. libr. XX cap. IIII §. IIII* negat a se vllibi inueniri potuisse haec verba satis omnino vague ab HOSPINIANO citata, quae in epistola paschali THEOPHILO tributa et a BEDA *de aequinoctio vernali* atque ex eodem in *collectione conciliorum labbeana tom. I p. DLXXXVI et BVCHERII comm. in canon. paschalem VICTORII sub nomine PHILIPPI* exhibita frustra quae-siuit. Exstant enim in STEPH. BALVZII *noua coll. concil.* et ex illa in *veneta conc. collect. NIC. COLETI tom. I p. DCV. sqq.* ex alia narratione de concilio caesariensi a BDAE admodum diuersa et lon-



ALII IDEM suspicantur ex mentione natalis CHRISTI a CLEMENTE alexandrino facta (h). Cuius tamen verba tantum absunt ut horum tolemnia saeculo II iam peractorum fidem faciant, ut contrarium potius affirment: *Eἰσὶ δὲ οἱ περιεργότεροι τῆς γενέσεις τοῦ σωτῆρος ἡμῶν οὐ μόνον τῷ ἔτος,*  
*αλλὰ*

longe ampliore: quam ex codicibus mscr. monasterii St. GALLI in HELVETIA et biblioth. colbertinae desumfit BALUZIVS. Vbi ita se habent haec verba: *sicut DOMINI natalem quocumque die venerit VIII kal. ianuar. ita et VIII. kal. april. quando resurrectio traditur CHRISTI, debemus pascha tenore.* Hanc narrationem HOSPINIANVS ex eodem cod. mscr. S. GALLI desumisse, eamque pro ipsa epistola THEOPHILI habuisse videtur quem errorem diu antea RABANVS errauit *de computo cap. LXIII ALTAMVRA seu MICH. le QVIEN in panoplia aduersus schisma GRAECORVM p. XXV THEOPHILVM alexandrinum a GENNADIO massiliensi in cat. vir. ill. c. XXXII memoratum pro illius auctore habet, secutus ANASTASIVM bibliothecarium in vita VICTORIS. Ipsa certe acta concilii, cuiuscunque auctoris fuerint, recentiorem originem satis produnt, dum et in epitome apud BEDAM obvia, et ampliora baluziana perhibent THEOPHILVM cæsariensem auctoritate a VICTORE episcopo romano data hoc concilium conuocasse, quae ab illorum temporum historia vera mirifice absunt, atque ineptum colloquium THEOPHILI cum episcopis, quale ibi proponitur, a conciliorum consuetudine, eiusque temporis sententiis alienissima continet. Quare TILLEMONT in *memor. ad hist. eccl. tom. III part. I* in notis ad vit. VICTORIS not. 11 p. m. CCCCLXXVIII spuria esse haec acta fatetur et commonstrat.*

(h) *Stromat. lib. I p. m. CCCXXX,* (i)



αἰδοὺ καὶ τὴν ἡμέραν προσιθέντες: et paulo post  
οἱ δὲ απὸ Βασιλείδου καὶ τοῦ Σαλπιγμάτος αὐτῶν  
τὴν ἡμέραν ἐορτάζουσι. Quibus verbis et differ-  
te improbat natalis CHRISTI ad certam  
aliquam diem determinationem, sine qua  
tamen eius celebratio fieri nequit, et basiliad-  
nis tribuit EPIPHANIAS festum, cum natali CHRI-  
STI apud AEGYPTIOS et plerosque orientales anti-  
quitus coniunctum, qui proinde haec sacra pe-  
culia habuerunt eo tempore, coetu puriore  
ea ignorantē.

PERTINACIORES huius sententiae patroni TE-  
LESPHORVM episcopum romanum excitant,  
qui in epistola decretali (i) praecipit: nocte ve-  
ro sancta nativitatis domini saluatoris missas cele-  
brent et hymnum angelicum in iis solemniter de-  
cantent sqq. et de quo liber pontificalis damasi  
idem perhibet, quae non solum huic sed ipsi pri-  
mo saeculo illa solemnia vindicant, quorum ac-  
cessionem tantum TELESPHORVS procurauit.  
Sed actum ageremus (k), si de hac auctoritate

amo-

(i) Exstat haec decretalis in *collectione conciliorum cole-  
tiana* tom. I p. DLXIII vbi illa verba n. Illeguntur. (k)  
Impudentissima ISIDORI fraus adeo pellucet, vbique,  
vt plerique, quorum maxime intereat hanc compi-  
lationem tueri, vadimonium dudum deseruerint.  
Omnium in hac caufsa industriam superarunt  
DAV. BLONDELLVS in PSEUDOISIDORO et TURRIANO  
vapulante et PETR. de MARCA de concil. lib. III c.  
V cf. SAM. BASNAGII *annales politico ecclesiast.* tom.

II

amolienda operose laboraremus. Nam qui ea hodie sibi imponi patitur, illum nae oportet aut perfictae admodum frontis esse, aut a bonis litteris et ratione alienissimum.

MAIORI specie veri *saeculo tertio* haec natalitia a multis tribuuntur, qui *HIPPOLYTICANONE paschali* potissimum nituntur. Nam quum in hoc canone dextro lateri statuae marmorae *HIPPOLYTI* inscripto, cellulae laterculorum distinctae, certis interuallis obseruatis, verba exhibent, in primo laterculo γενεσις χι. Εξιας. Ιωσιας. Εζοδος κατὰ Δαυιδ et in sequentibus laterculis alia (l): obscuriora haec verba a nonnullis interpretibus (m) praeterita, a plerisque de lectionibus statis *CHRISTIANORVM* explicantur, qui *SCALIGERI* (n) opinionem sequuntur coniiciunt ex lectione in natalitiis *CHRISTI* re-

ce-

II p. III et p. LXXXVII vbi haec *TELESPHORI* decretalis imposturae conuincitur. (l) cf. hunc canonem in *ios. SCALIGERI* de *emendatione temporum lib.* VII p. m. DCLXXVII et tabulam aeneam in *io. ALB. FABRICI* *operibus HIPPOLYTI* exhibitam p. XXXVI. (m) ab AEG. BVCHERIO de *doctrina temp. cyclo VICTORII* vbi ap. CCLXXXI canonem *HIPPOLYTI* interpretatur. (n) Qui l. c.p. DCLXXII ad verba γενεσις χι, quae perpetram mutat in χου, sic commentatur: *haec autem omnia, quae inclusa sunt in cellulis areae laterculi sunt lectiones ex utroque testamento quorum usus erat eo tempore in ecclesia. Sed quaedam earum statuae sunt ex orbe hebdomadum et eidem*



cepta et huic caponi inserta apparere eorum antiquissimam originem, saeculo tertio saltem non abiudicandam. Verum etiamsi vni parti huius coniecturae locum daremus, et statueremus illis verbis lectiones publicas designari: altera certe te tempore harum lectionum simul indicato, ex qua dumtaxat haec sententia de natali CHRISTI tempore HIPPOLYTI iam celebrato deducitur locum omnino non habet. Nam ut ipse SCALIGER fatetur, in nonnullis tantum, imo ut ipsa res loquitur, in duabus solum collocationibus horum verborum ea coniectura verisimilis est, reliquorum verborum termini vagi vocantur a SCALIGERO: quare improbabilis redditur haec sententia. Praeterea opinio quorundam de natali CHRISTI ad mensem pharmuthi seu aprilem referendo, ad quam prouocatur, nullibi locorum celebrationem illius memoriae eo mense

*dem diei hebdomadis haerent, aliquando fortassis eidem diei mensis: quedam vogae pro ratione termini. Ut ecce γενέσις Χριστοῦ, quotannis ex primo MATTHAEI ev. εγδιαυντερέψει seu τῷ αριθμοῖς natalis CHRISTI legebatur mense pharmuthi, quo tempore quidam natum dominum putabant, ut scribit CLEMENS alexandrinus, qui et alias non paucas veterum sententias de die natalis dominici recenset. Quam sententiam amplectitur et exornat IAC. GOTHOFREDVS ad cod. theodos. lib. XV tit. V de scriptaculis p. CCLVI et in notis ad philostorg. p. CXVII neque minus IO. RONA rerum liturg. lib. II cap. VI et WILH. ERN. TENZELIUS diss. de ritu lectionum sacrarum §. XVIII. XX. XXI.* (o)

mense effecit, saltem ROMAE et in occidentali ecclesia numquam obtinuit. Quam ob rem alii (o) haec canonis verba de lectionibus publicis quidem intelligunt, omnibus illis tamen ad pascha referendis, in cuius solemnibus singula haec codicis sacri pensa praelegi solita fuisse arbitrantur. Qua coniectura admissa et altera parte opinionis scaligeriana reiecta, nihil plane huius testimonii ad natalem CHRISTI pertinere evidentissime apparet. Alia tamen restat de sensu illorum verborum demonstratio magis quam coniectura, qua de solemnibus paschae vel proprie vel improprie et in figura secundum duplum chronogrammum celebratis ante tempora HIPPOLYTI intelliguntur (p). Vnde conficitur HIPPOLITVM perperam excitari ad hanc antiquitatem illorum solemnium comprobandum, neque audaci reiectione illius canonis opus esse ad illud testimonium infirmandum (q).

## QVAE

- (o) Eruditissime haec disputauit STEPH. le MOYNE varior. *sacr.* part. II p. m. DCCCCXLVII seqq.  
 (p) Primus in hanc interpretationem incidit THOM. GALE apud CAVE *script. eccl. hist. litt.* saec. III. p. m. LXVI. quam deinde certam et in dubiam effecit FRANC. BLANCHINI in *dissert. de canone pasch.* HIPPOLYTI *cap. III. §. IV* in *editione HIPPOL. fabriciana tom. I* p. Cl. (q) Ita hunc nodum secare videtur celeberr. 10. GE. PERTSCH in *hist. eccl. saec. III cap. III §. VI*. ubi GOTHOFRIDVM fecutus perhibet in *canone paschali annotatum* fuisse lectionem statam vigiliae diei natalis

CHR-



## PROGRAMMA

QVAE PRAETEREA huc trahuntur ORIGENIS homilia in diem epiphaniae (r) et CYPRIANI de nativitate CHRISTI (s) non facile cuiquam persuadebunt huius festi antiquitatem: quod recentior suppositiorum illorum scriptorum origo nemini hodie dubia videtur, ut examine illorum supersedere possimus.

ACCEDIMVS ad saeculum quartum, in quo certiorem quidem et indubiam horum sacrorum ori-

CHRISTI, quod tamen non de verbis ipsis sed illorum tantum interpretatione olim recepta intelligi debet. Quae ex *chronico* HIPPOLYT<sup>I</sup> in hanc rem producuntur, examine, non indigent, quum ad HIPPOLYTVM episcopum et martyrem non pertinent, sed iunioris THEBANI sunt, qui ad saec. XI vel X referendus est, ut euicit le MOYNE var. *sacr. part. II p. m. MLXXX seqq.* et CAVE *scr. eccl. hist. litt. saec. X p. m. CCCCLXXXVII cf. opera HIPPOL. fabric. tom. II p. XLII seqq. et LII.* Neque moramur HIPPOLYT<sup>I</sup> *sermonem in sancta theophania I. c. tom. I p. CCLXI obuium,* qui eiusdem furfuris est cum HIPPOLYT<sup>I</sup> *traditione apostolica.* (r) Occurrit illa inter homilias de diuersis, quarum octaua est in operum latinorum tom. II. Censuram eius et reliquarum scripsit PET. DAN. Huetius in *origenianis p. CCLXXV.* (s) Deprehenditur in CYPRIANI operum editione *baluziana seu benedictinorum* inter opuscula vulgo adscripta CYPRIANO p. LXXVIII. seqq. In vita CYPRIANI illi editioni praemissa p. CXXVIII §. XXXV. commemoratur ex codicibus mscr. satis apparere hanc homiliam cum reliquis, quae librum d<sup>e</sup> duodecim cardinalibus CHRISTI operibus constituunt, ad ARNOLDVM bonae vallis abbatem in dioecesi carnutensi pertinere. (t)



originem deprehendimus, perperam tamen a nonnullis demonstratam et male euictam. Quam ob rem primum inane huius sententiae fundamentum remouebimus, deinde firmiora argumenta stabiliemus, et tandem efficiemus haec sacra eo tempore particularia fuisse, sensim tantum ubiuis locorum introducta.

PLERIQUE constituendae huic illorum solemnium origini praetendunt auctoritatem NICEPHORI CALLISTI, qui lamentabilem narrationem crudelissimi supplicii, quo NICOMEDIAE viginti millia CHRISTIANORVM flammis templo iniectis iussu DIOCLETIANI vel MAXIMINI, quem illi per errorrem substituit, misere periisse perhibet, his verbis exorditur (t) ἐπεὶ δὲ η τῶν χριστοῦ γενθελίων αἵστοι ἑορτή, καὶ σύμπαν τὸ χριστώνυμον πλῆθος, ἐκ πάσης ἡλικίας τῷ ἐκεῖτε νεῷ ἡθροισο πανηγυρίζοντες τὰ γενέθλια. Quae, si fide digna essent, omnino probarent non quarto tantum, sed ipso tertio etiam saeculo, exeunte saltem, haec natalitia iam peracta fuisse. Nam si anno CCCIII, quo tempestas diocletiana exorta est, iam inuoluissent, non potuissent non ex praegresso saeculo ortum trahere. Sed ut, quod res est, fatigantur, parum aut nihil iuuamur hoc testimonio scriptoris et recentioris quam ut ipsum de rebus saeculi III auctorem tuto sequi possimus, et fabulosissimi atque credulitate prodigiorumque amo-

(t) *histor. eccl. lib. VII cap. VI p. m. CCCCXXXVI sq.*



amore incredibilibus commentis referti, et quod omne in hac causa monumentum habet, genuinis antiquae historiae monumentis ita contradictis, ut fidem non mereatur. Nouimus enim auctore LACTANTIO (tt) initium calamitatis nico-mediensis incidisse in *terminalia*, quae d. VIII kal. mart. celebrabantur, libros sacros ex templo nico-medensi desumtos et flammis traditos, aedem vero dirutam et solo aequatam fuisse per milites praetorianos, sed neminem suppicio affectum praeter quemdam a LACTANTIO et EVSEBIO non nominatum, qui *edictum* imperatoris d. VI. kal. mart. propositum publice *diripuerat* et *consciderat*, atque ob audax illud facinus statim productus non modo extostus, sed etiam legitime coctus, cum admirabili patientia postremo exustus est. Quae omnem NICEPHORO fidem derogant, per martyrologia recentiora et spuria suppliciorum acta a CAES. BARONIO (u) nequidquam stabilitam (x).

NEQUE

(tt) *de morte persecutor.* cap. XII sqq. cum quo consentit EVSEBIUS hist. eccl. lib. VIII cap. I sqq.

(u) ad ann. CCCI n. XXXXI seqq. (x) Multum huic testimonio detulisse, qui ante LACTANTI librum de mort. persec. editum antiquitates sacras inuestigarunt, non adeo miratur: quare MAR. CHEMNITIO in ex. conc. trid. part III de dieb. fest. p. CCLXII HOSPINIANO de fest. CHRIST. et qui hos sine examine sequuntur, venia dari debet huius allegationis. Accuratis-

fimo



quod  
eniv.  
radia-  
enim  
nico-  
I kal.  
nico-  
edem  
ilites  
ctum  
non  
. kal.  
cide-  
uctus  
co-  
cussu  
gant,  
licio-  
n sta.  
  
EQVE  
  
o con-  
I sqq.  
ultum  
TANTU  
uitates  
amur:  
. part  
e feli-  
intur,  
uratis.  
sime

NEQVE lubrico fundamento opus est, vbi firmiora adsunt argumenta, quae iam recensēbimus, Primum desumimus ex historicorum fide dignorum narrationibus, quibus haec solemnia saeculo quarto obtinuisse dicuntur. AMM. MARCELLINVS (y) de IVLIANO imperatore haec refert, quum enarrat quibus consiliis rebellatum iuerit contra CONSTANTIVM: *utque omnes nullo*

fimo tamen BINGHAMO nollemus orig. eccl. lib. XX cap. IIII. §. IIII haec verba excidisse satis probabilem esse hanc narrationem, quum ab omni verisimilitudine certo longissime absit, vti extra dubium posuerunt, qui vberius calamitatēm diocletianam recens enarrarunt BASNAGE ann. polit. occl. tom. II p. DLXXXIII et TILLEMONT membr. hist. eccl. tom. V. part. I quae tota in hoc argumentum insumitur. (y) rer. gest. lib. XXI p. m. CLXXXXV. Neminem mouebit mentio ianuar. et epiphaniorum hic facta, quominus haec ad natalem CHRISTI pertinere arbitretur: in primis quum ZONARAS annal. tom. III diserte perhibet in natali CHRISTI haec accidisse. Satis enim constat memoriam nati seruatoris sexto die ianuarii, qui et ephiphania et theophania dicebatur, celebratam olim fuisse cf. 10. CASP. SVICERI thes. eccl. voce, επιφανεία. Et licet in occidente et GALLIA, vbi tum agebat IVLIANVS, illam consuetudinem obtinuisse nonnulli negant CHRYSTOMI verbis postea explicandis induci: fatendum tamen erit epiphania aliis DEI beneficiis ante consecrata non fuisse, quam seorsim celebrari coepit natalis CHRISTI, vt hoc testimonio omnino euincatur iam inualuisse eo tempore sacra publica CHRISTO nato dicata.

*nullo impediente ad sui fauorem illiceret, adhaerere cultui christiano fingebat, a quo iam pridem occulte desciuerat, aruspicinae auguriisque intentus et caeteris, quae deorum semper fecere cultores, et ut haec interim celarentur, feriarum die, quem celebrantes mense ianuario CHRISTIANI epiphania dicitant, progressus in eorum ecclesiam, solemniter nomine orato discessit: quae in ann. CCCLXI incidunt. SOZOMENVS in enarranda BASILII fortitudine aduersus VALENTEM demonstrata, imperatorem aedem sacram ingressum dicit ἐπιτελουμένης τῆς τῶν Θεοφανίων ἑορτῆς (z), et in explicanda tempestate, quae contra IO. CHRYSOSTOMVM ineunte saec. V desaeuiit, ἐπιγενωμένης τῆς γενεθλίων ἡμέρας τοῦ χριστοῦ imperatorem cum eo communicare noluisse scriptum reliquit (a). Eamdem rem SOCRATES in litteras retulit his verbis usus, τῆς δὲ ἑορτῆς τῶν γενεθλίων τοῦ Σωτῆρος ἐπελθόντης (b), vnde intelligimus a saeculo III haec sacra constantinopoli inuoluisse (c).*

ALTERVM argumentum petitur ex doctorum celebrium illius saeculi sermonibus sacris bene multis ad haec solemnia peragenda habitis, qui ad

(z) *bist. eccl. lib. VI cap. XVI.* (a) *ibid. lib. VIII cap. XX.* (b) *bist. eccl. lib. VI cap. XVIII.* (c) Alias eiusmodi narrationes ex GREGORII nazianzeni or. XXXI et VIII atque GREGORII nysseni de BASILIO magno et in luminum festum congeffit TILLEMONT mem. tom. I part. I p. m. CLXXXII quae computum requirunt. (d)



ad nos peruererunt BASILII (d) GREGORII NAZI-  
ANZENI (e) AMBROSI (f) et IO. CHRYSOSTOMI (g),  
atque demonstrant ab hoc saeculo non praeter-  
iisse diuinum seruatoris nati beneficium sine  
publica stati temporis celebratione (h).

CERTVM tamen huius saeculi tempus, quo  
primum introducta fuerint haec sacra, definiri  
nequit. Si IOANNIS NICAENI (h) recentioris  
scriptoris fide stare liceret (i) ad IVLIVM I epi-  
scopum romanum ab anno CCCXXXVII referenda  
foret illorum origo, quae opinio cum illis o-  
mnibus, quae adhuc disputauimus, apprime con-  
spiraret.

## ID

(d) *homil. XXV* quae in *operum BASILII* editione a  
GARNIERIO procurata exstat *tom. II* in appendice  
inter scripta dubia. (e) *orat. XXXVIII* in edi-  
tione morelliana p. DCXIII *tom. I.* (f) *Serm.*  
*VII-X* ed. colon. *tom. V.* (g) *hom. XXXIII*  
*tom. V* edit. francof. et *hom. XXXI* *tomi I.* (h) CHRIST.  
DAVMIVS peculiari libro edidit *patrum et veterum*  
*doctorum homilias et meditationes in fest. natiu.*  
*CHRISTI*, in quo occurunt BASILII, GREGORII naz.  
ZENONIS veron. AMBROSI, AVGUSTINI, PETRI *crysol.*  
EVSEBII gall. LEONIS m. MAXIMI *taurin.* FVLGENTII,  
GREGORII m. ISIDORI *bispal.* BDAE, ALCVINI, ODI-  
LONIS, PETRI *damiani*, RADVLPHI *ardentis*, BRV-  
NONIS *astensis*, GOFFRIDI *card.* HILDEBERTI *cenoman.*  
HONORII *augustodun.* ABSALONIS *abb.* BERNARDI  
*claraeuall.* et PETRI *blesens.* sermones. Quae  
farrago bona multa et eximia deterioribus mixta  
exhibit. (i) in COMBEFISII *auctario ad bibl. patr.*  
*tom. II* p. CCLXXXXVII et CCCVIII.

(k)



ID SALTEM dubio caret particularem initio fuisse illam consuetudinem nonnullis ecclesiis propriam, ex quibus sensim quidem at satis celeriter vniuersam tandem CHRISTI ciuitatem occupauit, quod quarto hoc saeculo nondum evenit. AVGVSTINVS ineunte saeculo quinto fidem facit quatuor dumtaxat solemnium suo tempore per omnem ecclesiam celebrari solitorum, quum ad IANVARIVM scribit (k) : *illa autem quae non scripta sed tradita custodimus, quae quidem toto terrarum orbe obseruantur, dantur intelligi vel ab ipsis apostolis vel plenariis conciliis, quorum est in ecclesia soluberrima auctoritas commendata atque statuta retineri, sicuti quod domini passio et resurrectio et ascensio in caelum et aduentus de caelo spiritus sancti anniuersaria solemnitate celebrantur.*

EX CELEBRIORI IO CHRYSOSTOMI loco (l) multa cognoscuntur, quae huc faciunt. Cuius haec verba sunt: *καὶ τοι γε οὐ πώ δέ κατόν ἐστιν ἔτος ἐξ οὐδῆλη καὶ γνώριμος ἡμῖν ἡ ἡμέρα γέγονεν αὕτη ἀλλ' ὅμως ὡς αἰνωθεν καὶ πρὸ πολλῶν ἡμῖν παρεδοθεῖσα ἔτῶν ὄντως ἥνθησε διὰ τὴς ὑμετέρας σπουδῆς, ὅθεν οὐκ ἀν τις ἀμάρτοι καὶ νέαν αὐτὴν ὅμοιν καὶ αρχαίαν εἰπὼν, διὰ τὸ πρὸς Φάτως ἡμῶν γνωριθῆναι, παλαιὰν δὲ καὶ αρχαίαν, διὰ τὸ ταῖς πρεσ-*

(k) *Epiſt. CXVIII cap. I edit. basileens. tom. II pag. DLVI.* Alibi tamen horum sacrorum mentionem facit, alicubi saltem celebratorum *epiſt. CXVIII. cap. I et epiſt. CCXXXVI.* (l) *homiliae XXXIII tom. V pag. CCCCXVII.*

(m)



πρεσβυτέρους ταχέως ὅμηλικα γενέθαι: et nonnullis interiectis ὄντω καὶ αὗτη παρὰ μὲν τοῖς τὴν ἐσπέραν ὁμοῦσιν ἀναθεν γνωριζομένη, πρὸς ήμᾶς δὲ κομιδεῖσα νῦν καὶ οὐ ἀπὸ πολλῶν ἔτῶν αἰθρίουν αὔτας αἰνέδραμε.

VNDE APPARET primum circa annum CCCLXXVII haec solemnia ex occidente ANTIOTHIAM (m) peruenisse, ibique studiosissime habita atque ad proximas regiones propagata fuisse. Deinde ex illis verbis et quae proxime consequuntur, elucet, satis iam diu ante hanc rem, illa sacra publica per vniuersam ecclesiam occidentalem obtinuisse ROMAE in primis et a THRACIA ad HISPANIAE fines usque. Id vero hinc non efficitur, quorsum nonnulli propendunt, perpetuam fuisse ROMAE saltem et a prima antiquitate ortam illorum celebrationem, licet orator nimium tribuat auctoritati *romanae ecclesiae* in definienda die, qua CHRISTVS in lucem editus fuerit.

SI

(m) Non CONSTANTINOPOLIN, quod SCALIGER de *emend. tempor. p. LX.* arbitratur: habitus enim est ille sermo a IOANNE presbytero adhuc ANTIOTHIÆ circa annum CCC LXXXVII. Neque in illo, quod aliis visum est, quod CHRYSOSTOMVS de consuetudine tantum celebrandi haec sacra d. VIII kal. ian. loquitur, sed de celebratione illius festi in vniuersum omni, ignota ante hoc tempus ANTIOTHIÆ.

I 4

(n)

(m)



SI QUI veterum et recentiorum scriptorum ad saeculum quintum has origenes memoriae nati CHRISTI publice consecratae, referre videntur, vel de peculiari origine illius consuetudinis in ecclesia aliqua, quae illa caruerat antea loquuntur, vel de tempore quo in vniuersa CHRISTI ciuitate inualuerit legibus stabilita. BASILIVS seleuciensis quum IVVENALEM hierosolymitanum primum haec sacra peregisse testatum facit (n), qui ab anno CCCCCXX ecclesiae hierosolymitanae praefuit, sine dubio vel auspicia horum solemnium HIEROSOLYMIS commemorat, vel, quod probabilius aliis videtur (o), natalitia CHRISTI ab epiphaniis distincta IVVENALI tribuit.

IDEM iudicandum est de NICEPHORO (p), qui ad IVSTINVM imperatorem hoc festum refert, nam solemnia purificationis MARIAE a IVSTINIANO instituta commemorat his verbis: τάττει δε καὶ τὴν τοῦ Σωτῆρος ὑπαπαντὴν ἄρτι πρώτως απανταχοῦ τῆς γῆς ἐορτάζεθαι, ὡσπερ Ιουστῖνος τὴν τοῦ χειροῦ ἀγίλαν γένεσιν. Qua relatione IVSTINVM (q) saeculo VI horum sacrorum nativitatis auctorem facit

- (n) orat. in STEPHAN. quae exstat in opusculis CHRYSOSTOMI a COMBEFISIO editis p. CCCII. (o) cf. COTELERIVS ad const. apost. lib. V cap. XIII not. XXXII. (p) bish. eccl. lib. XVII cap. XXVIII. (q) Non secundum IVSTINIANI successorem, quod TILLEMONT mem. eccl. bish. tom. I. pag. CLXXXIX per errorem existimat, sed primum, eiusdem antecessorem, qui ab anno DXVIII imperium moderatus est. (r)



rum  
nati  
, vel  
cle-  
tur,  
itate  
ensis  
haec  
nno  
fuit,  
HIE-  
abi-  
epi-  
qui  
nam  
in-  
xai  
av-  
rou  
(q)  
rem  
cit  
RY-  
cf.  
not.  
III.  
uod  
III  
an-  
no-  
(r)

facit, vel insigni errore abreptus, vel de confirmatione noua solemnum per omne imperium romanum agendorum locutus. Iam enim in codice theodosiano solemnum horum mentio sit, his verbis (r): *Dominico et natali atque epiphaniorum CHRISTI, paschae etiam et quinquagesimae diebus, quamdiu caelestis lumen JANVARII imitatio nouam sancti baptismatis lucem vestimenta testantur: quo tempore et commemorationis apostolicae passionis, totius christianitatis magistrae, a cunctis iure celebratur, omni theatrorum et circensem voluptate per universas urbes earumdem populis denegata, totae CHRISTIANORVM ac fidelium, mentes DEI cultibus occupentur. Quae in codice iustinianeo confirmantur (rr). Idem codicis theodosiani interpretatione stabilitur (rrr): nec non et dies natalis DOMINI nostri vel EPIPHANIAE, sine forensi strepitu volumus celebrari.*

BREVITER nunc lustranda sunt occasiones rationesque horum solemnum et adeo sero, et sae-

(r) lib. XV tit. V de spectaculis leg. V. (rr) lib. III tit. XII de feriis leg. VII. (rrr) lib. II tit. VIII de feriis in interpretatione leg. II ad quae verba GOTHOFREDVS obseruat, videri natalem domini nondum eadem celebratione peractum esse tempore THEODOSII I quam reliqua solemnia paschae et pentecostes, et a THEODOSIO iuniore demum iuridicis diebus exemptum fuisse, hic vero in interpretatione recentioris consuetudinis mentionem fieri.

saeculo quarto statim post pacem imperiumque CHRISTIANIS stabilitum exortorum. Veterimi CHRISTIANI in constituendo CVLTV DEI publico et paucitati solemnium studuerunt, quod profestos dies aequae ac festos CHRISTO sacros transigebant, atque in sacrorum publicorum difficultate, qua laborabant, summoque subinde periculo, ab ipsis multiplicandis arcebantur, et maximam semper, quid quod *vnicam exitus CHRISTI ex orbe terrarum piacularis gloriose rationem* habuerunt. Vnde euenit, ut per tria saecula prima solus hebdomadum dies primus memoriae CHRISTI in vitam redeuntis consecratus, et annua solemnia eiusdem ex morte expiatoria in gloriam transitus ab *vniuerso CHRISTI populo* celebrarentur quinquaginta dies integros, quibus paschae festum et hebdomas; sacra praegressa cum pentecoste cohaeret (s), quorsum martyrum in singulis locis commemorationes publicae sensim accesserunt.

PRAETEREA ipse DEVS in ciuitate sanctiore sapientissime condenda hac obliuione natalis CHRISTI eiusque neglecta commemoratione publica prouidisse videtur, ne quis suspicioni regni externi CHRISTO parandi, cum periculo et detimento reipublicae et ciuilis imperiorum constitutionis, locus daretur. Et enim, quum prin-

(s) TERTULLIANVS de baptism. cap. XVIII.

(t)



principes, penes quos summa rerum erat illo tempore, hac praerogativa gauderent, ut natales ipsorum, quibus in lucem editi et ad imperium electi fuerunt, publice a ciuibus celebrarentur annique ab illis numerarentur: primi CHRISTIANI, quibus natalis CHRISTI notior esse potuit, et certior procul dubio fuit, quam a nobis iam omni adhibita cura exputari potest, non sine sapienti consilio et diuina prouidentia sibi temperarunt ab eiusmodi solemnibus; ne seditionem regnumque peculiare meditari putarentur, hostibusque suspicacissimis atrocissimae calumniae rebellionis, quam molirentur, vel leuissimam veri speciem conciliarent,

POSTQVAM vero felici rerum conuersione saeculo quarto facta libertate et tranquillitate publica frui coeperunt: suarum omnino partium esse iure meritoque existimarunt, vt insigne hoc DEI beneficium ab obliuione, neglectu et erroribus quibus lacescebatur vindicatum irent, peculiare tempus illi publice explicando, celebrandoque consecrarent, atque posteris occasionem prospicerent piae huius mysterii meditationis et salutaris in rem suam applicationis, gratiis DEO actis laetitiisque publicis obeundae.

ACCESSERVNT quorundam, qui vel sacris vel imperio praeerant consilia, pia magis quam felicia,



licia, tam sacris publicis et religionibus multiplicatis varieque auctis deorum subdititiorum solemnia facilius debellandi, traducendique populum ad CHRISTI cultum sine iactura feriarum quibus delectabatur, quam ita componendi res christianas ut, quoad fieri posset, proxime ad cultum publicum IUDAORVM DEO auctore institutum accederent: quae aemulatio temporis saltet progressu tria festa solemniora populi nostri peperit, imitatura ISRAELITARVM tria solemnia.

FORTE etiam innumeri natales martyrum, quon nomine dies ipsorum emortuales insigniebantur, et natalitia urbium et imperatorum quibus postea ipsorum episcoporum alicubi natales additi fuerunt effecerunt, ut per nominis similitudinem satis mature in cogitationem inciderent, CHRISTI potissimum natalem publicis sacris celebrandi.

QVIDQVID vero consiliorum rationumque fuerit, quae religiosissimis hominibus haec solemnia persuaserunt: praclare sane meriti sunt de re christiana, quod gratae in CHRISTVM pietatis exemplum nobis praeiuerunt. Quae res tantum abest, ut male et in detrimentum ciuitatis sacrae cesserit, ut singularibus potius DEI beneficiis adnumerari debeat, quibus infectorum temporum superstitioni obuiam itum est, cautumque ne



ne omnis CHRISTI commemoratio publica inter CHRISTIANOS penitus interiret aut, hominum consecratorum religionibus concederet.

PROBE ILLUD perspexerunt pii maiores nostri, qui ante saecula duo, et quod excurrit, felicissima secessione a pontifice romano facta antiqua sacra postliminio reducta instaurarunt, aut potius puriorem doctrinam professi ex ciuitate romana expulsi suasque sibi res habere iussi sunt. Quam ob rem licet superstitionem hominum sanctorum venerationem abrogarint, atque populum ab onerosa festorum multitudine liberarint: nihil tamen de memoria publica CHRISTI et beneficiorum, quae ipsi debemus, posteritati commendanda detraxerunt; neque sine iniuria in rem sacram et veterum pietatem fieri posse existimarent, ut omnia quae antiquitatem redolent et humanae originis sunt, a cultu publico, qui ritibus externis et ordine, temporibusque festis carere nequit, rescinderentur (t). Inter quas non superstitionis sed antiquarum religionum reliquias apud nos conseruatæ et purioribus suis originibus restitutas haec nativitatis

(t) cf. aug. confess. art. XV apolog. sect. VIII epist. articulor. sect. X et declarat. eorumdem sect. X. vna cum 10. BEN. CARPZOVII isag. in libr. symbol. p. CCCXX. et CCCCXXXVIL

(u)

tatis CHRISTI solemnia ad nos transiisse merito laetamur.

NEQVE NOSTRA dumtaxat ecclesia haec solemnia CHRISTO nato deberi putauit, sed reformatores etiam ANGLI atque HELVETI, et quae ad horum formam rem sacram ordinarunt ecclesiae reliquae, haec sacra natalitia conseruanda duxerunt (u).

SOLI IGITVR, si a fanaticis sectis omnem cultum DEI externum perturbantibus discesseris,

SCOTI

(u) cf. IO. IAC. HOTTINGERI hist. reformat. helvet. p. m. CCL XXXXIII. (x) cf. collectio actorum in synodis SCOTIAE ab ann. C15 10 C XXXVIII ad ann. C15 10 C XXXXIIII f. *Acts of the generall Assemblies of de Church of Schotland vbi p. XXXVI. seqq. in actis synodi glasgouiensis an. C15 10 C XXXVIIII habitae antiquiora decretorum edinburgensium annorum MDLVI. LXXXV. LXXVII, LXXXVI. contra solemnia haec renouantur et stabiliuntur: neque minus DAN. NEAL. hist. puritanorum tom. III, in cuius appendice constitutions de cultu DEI in synodo westmonasterensi decretae exhibentur, quarum ultima omnia tempora festa praeter diem dominicam abrogari iubentur p. DLXXXI. pag. vero CLXVIII. seqq. turbae enarrantur, quae in ANGLIA exceperunt commutationem horum sacrorum cum ieunio solemnii semel tantum a presbyterianis scotos imitatis an. C15 10 CXXXXIII factam.*

(y)



scoti nostris temporibus ab his sacris abhor-  
rent (x), qui tamen numquam rationes suas ae-  
quis rerum arbitris approbabunt.

DE *Valdensium* sententia circa haec sacra vix certi quidquam constat: illa enim festorum omnium abrogatio, cuius accusari solent ab aduersariis, aequae dubia est quam plerique errores ipsis afficti et imputati. Ipsa certe confessio-  
num antiquiorum ab ipsis editorum verba ita  
concepta sunt ut de superstitionis sanctorum sa-  
cris in CHRISTVM iniuriis loqui videantur (y)  
Neque si vel certissime euinceretur, respuisse  
illos haec sacra, de praeiudicio contra legit-  
imam eorumdem celebrationem verendum esset  
admodum: quum facilis in extrema delapsus sit,  
atque cordatissimis hominibus humani quid acci-  
dere potuerit, ut zelo abrepti in ritus humanos,  
qui ipsis violenter obtrudebantur, bona cum  
malis refecanda esse ex cultu diuino censuerint.

AGITE igitur, CIVES CARISSIMI, salutaria haec  
solemnia in rem vestram conuertite. CHRISTIA-  
NORVM antiquorum in CHRISTVM pietatem caste  
sancteque aemulamini, neque putate officio sa-  
tisfieri otiosa a laboribus vacatione male a ple-  
risque collocata, sed serio rem grauissimam  
agite.

(y) cf. PHIL. LIMBORCHI *hist. inquisit. lib. I cap. VIII*  
et 10. LEGERI *histor. valdens. lib. I cap. XVIII*  
p. CXX. seqq. et lib. II cap. III. p. XXIII.



agite. Ita recolite memoriam CHRISTI vobis natu  
et fundamentorum salutis vestrae ea natiuitate  
positorum, ut fructibus ab ipso partis omnique  
felicitate aeterna fruamini. Viam VOBIS pan-  
dunt vberius sermones publici, quibus hos dies  
sacri conuentus personabunt, ad quos salutis  
cupidi, obsequiosi, grati laetique confluente,  
operamque date, ut CHRISTI beneficio in fami-  
liam DEI transeat. P. P. in acad. frideric.  
d. VIII kal. ianuar. qui in fastis sacris vigilia na-  
talium CHRISTI est ann. CIC ID CCXXXVIII.



COM-

is nati  
uitate  
nique  
pan-  
s dies  
salutis  
uite,  
fami-  
leric.  
na-

COMMENTATIO  
AD  
**DIFFICILIORA VERBA**  
*ROM. I COM. IIII*  
QVA  
ACADEMIA  
**PASCHAE SOLEMNIA**  
INDIXIT.



CONVENTUS

DILECTIONIS VERRA

KOMM COM MI

AV

ACADEMIA

ANNAE SOLLEMNIA

INDIT.



**P**ASCHAE solemnia ritu maiorum indicturi  
VOBIS, CIVES AESTVMATISSIMI, e re ve-  
stra fore existim vimus, vt sanctae medi-  
tationis exemplum praeceundo materiam  
VOBIS sufficeremus gloriosi reditus CHRISTI in  
vitam pie recolendi hos dies et gloriose conce-  
lebrandi. Rectius id fieri posse non putauimus,  
quam si de oraculis diuinis insigne hoc DEI be-  
neficium commemorantibus unum aliquod ex-  
plicatum vindicatum atque in rem nostram ap-  
plicatum iremus. Selegimus igitur, praegnanti-  
ssima, si quae alia, PAVLLI verba ROM. cap. I:  
com. III obuia τοῦ ὄρισθεν ὅς τιοῦ Θεοῦ, εὐ δυ-  
νάμει κατὰ τὸν μὲν ἀγιωτάτην, εἰς τὸν διάστατον  
νέργων. In quibus succinete petractandis ope-  
ram dabimus, vt post vindicias lectionis nostrae  
atque connexionem brevibus expositam, singu-  
las voces et locutiones legitime interpretemur,  
atque sensum gentium a detorsoribus homi-  
num maleferiorum, eorum in primis, qui in so-  
cini castris contra gloriam CHRISTI militant,  
tueamur, et tandem nonnullas doctrinas inde-  
deriuemus ad applicationem grauissimi huius ar-  
gumenti comparatas.

INTEGRITAS *lectionis communis* horum verbo-  
rum, qualém supra propositum, duplice potis-  
simum ratione sollicitatur. Prior diuersitas in voce  
ὄρισθεν occurrit, quam nonnulli compositorum  
legunt ωρογράφεντος auctoritate unius codicis bar-

*beriani*, aliquot patrum latinorum et versionis vulgatae: ad quam postremam reliqua suffragia redire videntur, ut ex interpretis latini vetustioris explicatione magis quam versione ab HIEORONYMO deinde retenta, in patrum latinorum scripta, MARCELLVM *ancyr.* et EPIPHANIVM occidentalibus quam orientalibus addictiores, atque unum alterumue codicem graecum transierit. Quae tamen contra codicum graecorum probatissimorum, patrum, qui graece scripserunt, et versionum orientalium *syriacae* maxime confessionem parum valent (a). Alteram diuersitatem in posteriora verba intrudere ausus est LVCAS MELLERIVS ARTEMONIVS seu SAM. CRELLIVS, qui in *initio euangelii S. IOANNIS ex antiquit. eccles. restituto part. I cap. XLI p. CCXIII* sine vlla codicum vel scriptorum versionumue antiquiorum auctoritate inexcusabili aequo ac infelici temeritate locum hunc sic dispungit et mutat, ut verbis τοῦ γενομένου usque ad πνεύμα ἀγιωσύνης in parenthesi positis, reliqua quae sequuntur verba cum initio commatis tertii copulet atque legat περὶ τοῦ νιοῦ ἀυτοῦ (a) οὐασάσεως ἐν νεκρῶν, Ιησοῦ Χριστοῦ: qua textus de-

(a) Conf. io. MILLII N. T. graec. tam in obseruatt. ad ROM. I com. III, quam in prolegomenis §. DCCXXXII clar. io. ALE. BENGELII N. T. gr. in appar. critico p. DCXXXII. et celeberr. io. CHRISTOPH. WOLFII cur. phil. et erit. in IIII pror. PAVLLI epist. p. VIII. (b)



depravatione solo ingenio parum tamen hic ingenio fulta, ab indeole linguae graecae abhorrente et sensum longe impeditorem reddente nemo facile sibi imponi aut assensum imperari patietur, ut confutatione vltiore iam opus non sit (b).

QVOD AD NEXVM attinet, quo haec verba cum praegressis et consequentibus cohaerent, PAULLVS inscripturus hanc epistolam *com. I - VII* in eo adhuc est, ut semet ipsum describat, quo auctore de grauissimis rebus certiores fieri debebant lectores. Atque id ita agit, ut omnia CHRISTO delaturus in laudes excurrat et commendationem tam euangelii *com. II - IIII*, quam officii ab ipso sibi demandati *com. V et VI*. Euangelium commendat ab origine *com. II* et arguento *com. III et IIII* CHRISTO, quem non nominat tantum sed pro tenerrima animi commotione concelebrandum proponit secundum humanam naturam et humilitatem *com. III, IIII* vero secundum infinitam deitatis gloriam, eo redire arbitratus quidquid sub ambitu euangelii comprehenditur. Parenthesibus abundat hic apostoli sermo: quibus ut alibi indulgere solet

K 3 PAVL-

(b) Quae deprehenditur in clar. M. IO. PHIL. BARATERII *antiartemonio part. II cap. VIII*. p. CLXXVI &c. et ven. WOLFFII *appendice ad librum ante excitatum pag. DCCLXXXII - et DCCCII*. Reliquae lectiones a communi diuersae leuioris momenti sunt nec sensum mutant.

(c)



PAVLVS, ita hic in primis delectari videtur multa paucis et simul dicturus, atque foecundam animisque commouendis accommodatam indolem doctrinarum propositarum significaturus. Quare ultima huius commatis verba Ιησοῦ Χριστοῦ τοῦ κυρίου ἡμῶν licet per constructionem cum immediate praegressis copulari possint, rectius cum primis verbis tertii commatis coniungimus, reliquis omnibus, quae interiacent, pro parenthesi insertis habitis (c). Sic igitur fluere verba haec existimamus: PAVLVS separatus ad euangelium DEI agens de filio ipsius IESV CHRISTO domino nostro, qui natus est ex semine DAVIDIS secundum carnem, DECLARATVS VERO DEI FILIVS IN VIRTUTE SECUNDVM SPIRITVM SANCTITATIS EX RESURRECTIONE A MORTVIS. Quae postrema dumtaxat verba curatius iam interpretabimur, primum visuri, quid sit ὁ πατὴρ νικὸς θεὸς, deinde cur apponatur ἐν δύναμι, praeterea quid verbis κατὰ πνεῦμα ἀγιωτύνης intelligatur, et tandem quid εἰς αὐτοῖς νεκρῶν significetur, ut tum demum totius sermonis sensus integer eluceat.

IN PRIMA LOCUTIONE τοῦ ὁπλέντος νικοῦ θεοῦ explicanda, ante omnia subiectum propositionis constituatur necesse est, seu is, qui ὁρθεῖς νικὸς θεού dicatur. Atque is sine dubio ipse dei filius

(c) Conf. clariss. CHRISTOPH. WOLLI comm.  
philol. de parenthesis sacra pag. LXIII. etc.

(d)



*lius est, IESVS CHRISTVS dominus noster, quod connexio verborum nostrorum cum commate III ineunte et fine quarti commatis supra exposita satis demonstrat. Quare totus Ἰησοῦς πατέρος neutra naturarum, quibus constat, exclusa huc referri debet. Licet enim publica et solemnis declaratio arctissimae relationis huius domini nostri ad DEVVM proxime ad humanam naturam pertineat; neque fuisset necessaria futura, nisi humana natura a filio DEI assumta eiusque humilitas contrarii suspicionem fecisset: nihil tamen secius totius CHRISTI DEI aequa ac hominis dignitas diuina manifestata dicitur his verbis. Longe igitur quam par est angustiorem reddunt sensum propositionis, qui omnia ad solam humanam CHRISTI naturam coarctant: quod non solum interpres *sociniani* ad vnum omnes per systematis sui hypothesis principem faciunt, neque minus *pontificii* plerique, quotquot nimirum interpres latinum secuti praedestinationem CHRISTI hic deprehendere sibi videntur; verum etiam alii interpres pauciores tamen ab his praecognitis opinionibus liberi (d).*

*Tiōς Θεοῦ hic non latiori significatu ponitur, quo relationem quamlibet, tum originis seu de-*

K 4 pen-

(d) Videatur io. TILLOTSON in sermone *de IESV per resurrectionem demonstrato filio DEI*, qui tomus primi sermonum a RAD. BARKERO editorum LXVI est, vbi ad sententiam ARMINIANORVM hoc oraculum accommodatur. (e)



penhentiae, tum similitudinis seu conuenientiae cuiusuis licet remotioris denotat, atque vel rebus creatis omnibus, hominibus maxime magistribus et angelis IOBI XXXVIII *com.* VII. *cap.* I *comm.* VI. PSAL. LXXXVI *comm.* VI. MAL. II *comm.* X tribuitur, vel ciuibus DEI arctius cum ipso iunctis ob regenerationem, adoptionem et imaginis diuinae iustificationem IOAN. I *comm.* XII. XIII. ROM. VIII *comm.* XIII. etc: sed strictiori significatione θεανθρώπων propria et peculiari, quis solus ἴδιος ROM. VIII *comm.* XXXII et μονογενῆς IOAN. III *comm.* XVI *cap.* I *comm.* XVI. DEI filius dicitur. Atque illa omnium, quae concipi possunt, arctissima ad DEVUM relatio, quae hac FILII DEI denominatione significatur, ad utramque naturam ipsius pertinet, tam primario ad diuinam, qua per aeternam et necessariam generationem eamdem cum patre essentiam secum ab ipso communicatam possidet PSAL. II *comm.* VI. XII EBR. I *comm.* III. V. *cap.* V *comm.* V PROV. XXX *comm.* III MICH. V *comm.* II, quam secundario ad humanam naturam, idque non ob originem et dependentiam a DEO vel ipsi cum aliis hominibus communem vel singularem et propriam, miraculosae conceptionis, aut officii et imperii a DEO ipsi delati; neque ob adoptionem actumque moralem collatae in ipsum dignitatis huius, ut quae vel longe infra veritatem subsident, vel locum habere non possunt nisi humana CHRISTI natura fingatur per se subsistere



sistere tanquam suppositum intelligens seu persona: sed ob vniōnem personalem eiusdem cum diuina natura, qua in societatem omnium illius perfectionum et praerogatiuarum, quoad in eam transire potuerunt, atque adeo et huius ad DEVUM PATREM relationis assumta est, factusque CHRISTVS, qua homo est, naturalis DEI filius licet non naturaliter neque multo minus essentialiter LVC. I comm. XXXV. Etiam si igitur largiremur CHRISTVM, quoad viueret in terris, subinde fuisse vocatum filium DEI eo sensu, ut officium legati extraordinarii significauerit, atque idem valuerit cum nomine *regis ISRAELIS* et MESSIAE: facile tamen euinci potest, quidquid fuerit huius significatus inadaequati, illud omne ex nomine hoc MESSIAE in prophetis obvio eoque tempore minus intelligi coepio ortum traxisse, eamque ob caussam nobiliorem significatum non euerte-re aut infirmare, sed stabilire potius et confirmare.

DISPICIENDVM iam est de voce ὁμοίως, in qua explicanda interpretes in tres potissimum partes abeunt. Nonnulli interpretantur *destinatum*, *decreto* et *prae destinatum* fuisse CHRISTVM ab aeterno filium DEI suo tempore futu-rum, eique sententiae vel variantem lectionem ante memoratam praetendunt, vel enallagen verbi simplicis pro composito, vel ipsius simpli-cis vocis significatum eundem cum composito, quem demonstrare satagunt ex locis ACT. II comm. XXIII cap. XVII comm. XXXI. cap. X comm.

XXXXII lvc. XXII comm. XXII EBR. IIII comm.  
 VII: quae tamen ipsa vel omnia vel pleraque  
 certe aliter intelligi possunt, neque si vel indu-  
 bii significatus forent rem efficerent. Atque  
 illorum opinio huc redit, decreuisse DEVUM ab  
 aeterno non solum redemtionem generis huma-  
 ni per missionem filii in orbem terrarum,  
 eiusdemque incarnationem, verum etiam desti-  
 nasse huic coniunctioni cum diuinitate aliquam  
 individuam naturam humanam seu filium DAVIDIS  
 eertis generationibus ab eo disiunctum atque per  
 omnia illi fini accommodatissimum. Quod ta-  
 men *et* ab huius loci scopo atque connexione  
 alienissimum est, quum euangelium de hac praes-  
 destinatione nihil omnino perhibeat eaque ad  
 argumentum eiusdem referri nequeat, *et* sen-  
 sum multis difficultatibus implicat, vnde illae  
 scholasticorum dissensiones enatae sunt de praes-  
 destinatione hominis seu filii MARIAE ad vni-  
 onem cum diuina natura, quam nonnulli ad ab-  
 stractum alii ad concretum humanae in CHRISTO  
 naturae retulerunt. (e)

ALII

(e) Post HVG. GROTIUM in *annot. ad b. loc.* qui ta-  
 men cum praedestinatione, illam diuinae glo-  
 riae post resurrectionem manifestandae praefigu-  
 rationem per vitam et miracula CHRISTI dum in  
 terris ageret factam coniungit. Hanc sententiam  
 exornauit maxime DIONYS. PETAVIVS in *theolog.*  
*dogmatibus tom. VI pag. LXXVI. f. de incarna-*  
*tione libr. XI cap. XIII et XIV,* vbi veri fontes  
 huius



ALII REDDVNT *œquorâta constitutum, ordinatum et factum.* Quae interpretatio SOCINIANIS tantum non omnibus perplacuit ut erroribus suis fauere visa (f). Vtraque illorum versio noui testamenti germanica sic reddidit haec verba, racouiensis, *Der verordnet ist zum Sohne Gottes mit Krafft, nach dem Geist der Heiligung, aus der Aufferstehung der Todten.* Cum qua consentit felbingeriana priora verbasic exhibens, *Der verordnet ist ein Sohn Gottes in Krafft.* ION. SCHLICHTINGIVS (g) vertit quidem hanc locutionem *definitus est DEI filius,* addita tamen paraphrasi, *definitus, id est constitutus per metonymiam caussae pro effectu.* Nam per definitiōnem seu designationem constituebantur magistratus seqq. IO. CRELLIVS in paraphrasi ep. ad

ROMAN,

huius opinionis seu auctoritates patrum, AVGVSTINI in primis adducuntur, atque anonymus scrip tor de la defense de la traduction du nouv. testament imprimée a MONS contre M. MALLET libr. IIII chap. IIII et V vbi ANT. ARNALDVUS plura interpretum latinorum suffragia excitat pro hac sententia. (f) Solus SAM. PRCIPCOVIVS cogit. sacr. ad initium evang. MATTH. et omnes epist. apostol pag. XXXVI in aliam sententiam aequa erroneam concedit, his verbis significari arbitratu s: CHRISTVM ab ipsa nativitate destinatum fuisse spiritus sancti miraculosa operatione in ipsius conceptione et signis postea editis ad diuinitatem per resurrectionem connexamque exaltationem obtinendam. (g) Commentar. in plerosque nou. test. libros tom. I. pag. CLVI,

(g)



ROMAN, (h) ita textum proponit constitutus est  
DEI summi filius potentissimus, quod in comment.  
in epist. ad ROM. (i) sic explicat: τοῦ ὁγιδέντος  
qui constitutus est, non ut vulgo solent hoc loco  
verbum illud interpretari, qui declaratus id est  
manifestatus (nam alioquin declarare aliquem con-  
sulem apud LATINOS significat consulem creare, seu  
constituere, quo sensu id hic admitti posset) nec  
enim hic agitur de rei, quae iam fuerit, declara-  
tione seu manifestatione, sed de rei, quae non-  
dum erat, constitutione. Cum quibus hac in  
explicatione consentiunt ARMINIANI plerique,  
comprobatur ea re sententiam suam de pluribus  
rationibus cur CHRISTVS in sacris litteris filius DEI  
dicatur

(h) Operum exeget. tom. I. fol. CCIII. (i) ibid.  
fol. LXVIII. Cum quo loco conferatur eiusd.  
de uno DEO patre lib. I sect. II cap. XXXI, atque  
praeterea ION. SCHLICHTINGII disputatio aduersus  
BALTH. MEISNERVM art. II membr. II pag. CCCCXXV  
et membr. III pag. DLXIII, VAL. SMALCHI refutat.  
thesium WOLFG. FRANZII disput. III p. LXXVI  
atque anonymi (qui IO. PREVSSIVS fuit) Gespräche  
von der Dreyeinigkeit pag. DCXXXVI seqq. Cum  
quibus tamen iungi debent ABR. CALOVIVS in exam.  
libror. CRELLII de uno DEO patre §. CCCXXXV etc.  
et CCCLVII etc. ei. socinism. proflig. art. II.  
controu. X. et theol. apost. ROM. p. XX. seqq. ADAM.  
SCHERZERI colleg. antisocin. disp. XV. pag. CXXXV.  
IO. HOORNBECKI socinianismi confutati tom. II pag.  
XXX seq. et THEOD. DE BLANC principes contre les  
SOCINIENS part. II sect. VII chap. XXXVI art. II.

(i)



dicatur (k). Operose satis eam colorat PHIL. LIMBORCH in *comment.* in *ep. ad ROM.* (l) ita vertens verba nostra per resurrectionem autem ex mortuis e gremio terrae quasi natus et productus et noua ac immortali vita a DEO accepta constitutus est filius DEI.

ARGUMENTA huic interpretationi praetexi solita eo redeunt: primum ob connexionem debere vocem τοῦ ὄγιστέντος comm. IIII respondere voci τοῦ γενομένου comm. III. Sicut igitur CHRISTVS non dicatur manifestatus sed factus filius DAVIDIS, ita etiam eumdem non manifestatum sed factum et constitutum filium DEI dici hac altera voce: quo tamen vix cogitari potest quidquam a legitima interpretandi ratione alienius. Ne tunc quidem, si de diuersa re eodem verbo locutus fuisset apostolus, id valeret ratiocinium; quem verborum significatus per nominum appositorum significationes versaque vice determinetur: multo vero minus id locum hic habet, ubi PAULLVS studio aliud verbum adhibet, quod facturus non fuisset, breuius et clarior longe de eadem re locuturus eadem voce. Illud certe in hac obiectione supponi debet, quod probandum erat, non differre generationem CHRISTI

se-

- (k) De qua opinione conf. SIM. EPISCOPII *inflit. theol. lib.* IIII *sect.* II *Cap.* XXXIII et PHIL. LIMBORCHII *theol. christian. lib.* II. *cap.* XVII §. VIII et X.  
 (l) pag. CCXXIII et CCXXVI ubi in obseruatione ad *comma IIII CRELII* argumenta et verba sua facit,

(m)



secundum carnem tempore saltem ab illa generatione qua DEI filius est: quod non solum ex hoc loco demonstrari non potest, aliisque oraculis repugnat, verum etiam cum ipsa aduersiorum doctrina huiusque loci explicacione parum cohaeret. Secundum argumentum petitur ex significatione ordinaria vocis ἀγέλης, quae nusquam in sacris litteris designare, sed semper decernere et constituere significet, quem in finem allegatur LVC. XXII comm. XXII ACT. II comm. XXIII cap. X comm. XXXXII et cap. XVII comm. XXXI. Quod etiamsi concederetur, necessitatem eiusdem significationis hoc in loco non evinceret. Omnis vero haec ratio ambiguitate latinorum vocum absolvitur, ex eo enim quod verbum ἀγέλης decernere, rem futuram apud animalium constituere et secum determinare significat, certe non sequitur ut quaevis rei constitutio effectio et procreatio eodem denotetur. Nostrum vero declarationis significatum postea stabilitum ibimus. Praeter hunc parallelismum verbalem tertio ad realem prouocant, arbitrati ex collatione ACT. XIII comm. XXXII et XXXIII cum PSAL. II comm. VII elucidere generationem CHRISTI a DEO, qua filius ipsius euasit, peractam fuisse eiusdem a mortuis suscitatione. Qua in argumentatione alterutrum gratis supponant necesse est, vel ἀναστάσιστον resuscitationem eiusdem a mortuis indicare, quum missionem ipsius in uniuersum omnem promissorumque de ipso facta-



factorum praestationem significare possit per  
ACT. III *comm.* XXVI. XXII coll. DEVT. XV  
*comm.* XV. XVIII, neque contrarium ex l. c.  
*comm.* XXXIII demonstrari queat, vbi noua  
mentio fieri incipit resurrectionis ex mortuis,  
*vel* oraculum PSALMI secundi eo loco *comm.*  
XXXIII excitatum, vt vnum ex praecipuis in  
CHRISTI missione per resurrectionem a mortuis  
obsignata impletis, ad solam hanc resuscitatio-  
nenem pertinere. *Vltimam* denique argumenti  
speciem desumunt ex ipsa rei inuestigatione per-  
negando CHRISTVM resurrectione declaratum  
fuisse DEI filium, etiamsi ponatur, quod tamen  
neutquam concedunt, vi suamet ipsius propria  
eamdem peractam fuisse. Egregia sane ra-  
tio! Qua si quid proficeretur facilis foret  
refutatio quarumuis doctrinarum in sacris  
litteris euidentissime reuelatarum: quum  
quo quis imperitior arrogantiorque fuerit, eo  
impudentius negare posset, has illasue doctrinas  
a se intelligi atque adeo in sacrarum litterarum  
explicatione locum habere. Ipsi fatebuntur ad-  
uersarii iam ante resurrectionem CHRISTVM fuisse  
DEI filium: quod coaceruatae ab ipsis rationes  
huius praerogatiuae in CHRISTO obuiae satis  
comprobant, ei ipsa haec illorum sententia per  
ascensionem demum connexamque exaltationem  
eudem plene effectum fuisse DEI filium, vnde  
consequeretur neque concipi posse qua ratione  
per



per solam resurrectionem euaserit filius DEI sine reliquorum oraculorum diuinorum euersione.

TERTIA IAM sequitur vocis explicatio certior, qua ὁρθεις idem est quod declaratus, definitus, manifestatus. Ipsa vocis etymologia hunc significatum requirit. Sicut enim ὁρθος terminus, limes est, ita ὁρίζω terminum ponere, circumscribere limitibus, definire, determinare, idque vel rem futuram decernendo praecidendoque vel praesentem significando, notas characteristicas indicando, eamque id vere esse demonstrando et solemniter pronuntiando quod esse fertur atque videtur. Atque ad illam significationem oculo illa loca omnia in nouo testamento obuia (m) referri poterunt, teste inductione: licet prior subordinatus significatus decernendi in plerisque reliquis praeualeat. Eamdem glossaria vetera (n), scriptores profani (o), et ecclesiastici (p), neque mi-

(m) LVC. XXII com. XXII ACT. II com. XXIII cap. X.  
com. XXXXIII cap. XI cap. XXVIII cap. XVII  
com. XXVI et XXXI EBR. IIII cap. VII vna cum  
nostro ROM. I com. IIII. (n) Conf. ALEX. MORI  
notas in noui. foedus a IO. ALB. FABRICIO in ob-  
seruatt. selectis in varia noui. testam. loca denuo  
editas pag. CIII. (o) WIL. BVDAEI comm. graec.  
ling. col. DCCCLXX seq. celeberr. IAC. ELSNERI  
obs. sacr. tom. II pag. IIII. (p) In BARNABAE epi-  
stola cap. XI et XII eadem vox eodem significatu  
occurrit. Patrum et interpretum graecorum,  
quorum maior certe quam latinorum ratio ha-  
benda est in hoc negotio philologico, bene  
mul-



nus versio syriaca comprobant. Ut igitur ὁ θεὸς idem significet quod ἀποδεῖγμένος ACT. II. com. XXII cap. XIII com. XXXIII προσαγορευθεὶς EBR. V com. X et σΦεαγιθεὶς IOAN. VI com. XXVI I. Quod qua ratione factum sit resuscitatione CHRISTI ex mortuis explicata demum ultima phrasι ἐξ αὐτοσέως νεκρῶν ostendi poterit.

SECUNDĀ LOCUTIO ἐν δινάμει varias, itidem interpretationes subiit. Sunt qui eam cum prae-  
gressa phrasι immediate coniungunt ut vel adie-  
ctivi vices sustineat si ad υἱὸν Θεοῦ refertur, vel  
adverbii si cum ὁ θεὸς proxime cohaerere exi-  
stinetur. Priore modo significaretur illa, CHRI-  
STVM, fuisse declaratum DEI filium potentem  
eminenter p̄ reliquis latius sic dictis et ado-  
ptiis filiis, comprobantem efficacissime diuini-  
tatem suam, ut qui non λεγύμενος vel ἐν λόγῳ  
sed ἐν δινάμει sit DEI filius. Arque haec inter-  
pretatio positu verborum immediato se com-  
mendare videtur, vnde celeberrimis interpreti-  
bus arrisit (q). Posteriori vero ratione his ad-  
iectis vocibus indicaretur, factam fuisse hanc de-  
clarationem filii DEI potenter et quam effica-

L cissi-

multa collegit DIONYS. PETAVIVS loco not. d. alle-  
gato et io. CASP. SVICERVIS in thesauro eccles. sub voce  
οὔρος (q) SEB. SCHMIDIO in comm. in VI priora  
cap. ep. ad ROM. pag. XXX STARKIO in not. sel ad loca  
sel ep. ad RÖM. p. CVIII MARCO VAN PEENE in comm.  
ad b. loc. p. CCXXXII et CHRIST. SCHOETGENIO  
in hor. ebr. adu. test. pag. CCLXXXVII. (r)



cissime, modo ad fidem omnibus abunde faciendam sufficiente exceptionibusque longe maiori. Atque sic coincidit immo maius pondus habet quam *δύναμις* II THESS. I *com.* XI. *col.* I *com.* XXVIII. MARC. VIII *com.* I. LVC. III *com.* XXXVI. (r) Quae sententia cum connexione maxime cohaerere videtur.

ALII AB antegressis vocibus separant per incisum, et sicut reliquias duas phrases ita hanc etiam pro descriptione modi habent, quo haec declaratio filii facta sit (s) per miracula et operationes infinitae virtutis. Sicut enim *δύναμεις* frequentissime in sacris litteris extraordinaria signa et miracula edita significant: ita etiam *δύναμεις* hic indicat *per potentiam* quae miraculis perpetratis abunde se exseruit et omnibus approbavit (t). Quae interpretatio fortius cohaeret cum omni contextu si potissimum ad miraculum ipsum resurrectionis, et quae cum eadem conexa

- (r) Conf. IAC. WELLERI et IO. IAC. RAMEBACHII *comm.* *in ep. ad ROM.* et WOLFII *curas ad h. loc.* (s) Interpretationem THOM. DE BLANC loc. supra not. h. citato nihil moramus ut minus probabilem, qua *δύναμις* ex coll. LVC. I *com.* XXXV ad ipsam diuinam naturam refertur: quam etiam multis rationibus exornauit DION. PETAVIVS *dogm. theol.* *tom. II lib. III §, VIII.* Poteſt tamen haec opinio ad sensum priorem ante adductum referri. (t) Suam fecerunt hanc sententiam summ. ven. IOACH. LANGIVS *in com. ad h. l.* GROTIUS *in annot. ad h. loc.* HOORNBECK loc. cit. not. h. et TILLOTSON l. cit. not. d. (u)



nexa fuerunt prodigia restringitur, reliquis tam  
en-  
ori.  
bet  
om.  
om.  
one  
nci-  
iam  
cla-  
tio-  
fre-  
a si-  
n iv  
culis  
pro-  
eret  
lum  
con-  
nexa  
omm.  
) In-  
not.  
em,  
pfam  
multis  
theol.  
c opi-  
ferri.  
ven.  
adb.  
SON 1.  
(u)

men  
non exclusis, quae et ipse peregit CHRISTVS  
et sua virtute discipulis concessa suoque nomine  
ab illis perpetrata fuerunt.

ACCEDIMVS ad tertiam locutionem *κατὰ πνεῦ-*  
*μα ἀγιωσύνης*: quae duplicem interpretationem  
admittit. Vna refertur ad SPIRITVM SANCTVM,  
qui non solum in formanda vngendaque infinitis  
et extraordinariis donis humana CHRISTI natura  
occupatus fuit LVC. I com. XXXV MATTH. I com.  
XVIII. XX. cap. XII com. XXVIII. MARC XII  
com. XXXVI IOAN. I com. XXXIII cap. III com.  
XXXIIII: verum etiam a CHRISTO discipulis do-  
natus fuit donis suis et operationibus extraordinariis maxime diuinitatem CHRISTI comprobatu-  
rus IOAN. VII com. XXXVIII cap. XIIII com.  
XVII seqq. cap. XV com. XXVI ACT. I com. XVI  
cap. II com. XVII seqq. XXXIIII seqq. Quo spi-  
ritu ipse CHRISTVS et corpus ipsius spirituale fan-  
tificatus deoque peculiari ratione consecratus  
fuit, quod tamen rectius *ἀγιωσύνη* dictum fuis-  
set, praepositione etiam *διὰ* non *κατὰ* proposi-  
tum (u).

ALTERA interpretatione his vocibus ipsa CHRI-  
STI diuina natura intelligitur: quam suadent tam  
alia

(u) Conf. AVG. VARENIVS *in exeg. ep. ad Rōm.* pag.  
LXIII et ARNALDVUS loc. cit. not. d. Hanc senten-  
tiā praeter SOCIĀNOS, qui ob negatam CHRI-  
STI diuinam naturam necessario spiritum DEI seu  
potentiam eiusdem spiritualem hic assumunt,

alia sacrarum litterarum loca, quibus in CHRISTO *spiritus carni* opponitur, *caro* vero non corpus sed omnem naturam humanam humilem in primis et infirmatam indicat, *spiritus* igitur per leges oppositionis diuinam in eodem naturam designat I PET. III *com.* XVIII I TIM. III *com.* XVI EBR. VIII *com.* XII ROM. VIII *com.* V quam loci nostri connexio, vbi restrictio *com.* III *natura σάρξ* aut a sensu et ratione destituitur omnino, aut eiusmodi significationem phraseos *natura πνεύμα* requirere videtur, neque verisimilis est eiusdem praepositionis diuersus plane significatus tam breui interuallo obuius (w). Atque haec diuina CHRISTI natura merito suo *spiritus* dicitur et ob simplicissimam essentiam infinitae intelligentiae potentiaeque et in oppositione ad circumscriptam atque caducam rerum corporearum,

ho-

PONTIFICII interpretes plerique ob veterum auctoritates, et ARMINIANI amplectuntur: potest tamen salua fidei analogia locum habere et commodum satis sensum totius loci reddere, quare eam secuti sunt LUTHERVS, HVNNIVS, BALDVINVS alii. (w) Praeter interpretes qui hanc sententiam sequuntur, copiose commemoratos in MATTH. POLI *synopsi* et WOLFFII *curis phil.* ad h. loc. hoc concesserunt ven. LANGIVS. RAMBACHIVS. WELLEKVS. SCHMIDIUS. VAN PEENE. POLVS. STEPH. DE BRAIS in *comm.* ad b. l. neque minus illam confirmarunt PHIL. IAC. SPENERVS von der ewigen Gottheit Christi cap. V. §. CX et CXV-CXVIII. THEOD. DE BLANC l. c. not. h. et CHRIST. SCHOETGENIVS in hor. ebr. ad h. l.

(x)



hominis maxime, in dolem IOAN. III com. XXIII. (x)  
*s*anctitatis vero tam ob sanctissimam omniue  
 veneratione dignissimam perfectionem, qua in-  
 finitis modis ab aliis rebus distat, quam ob con-  
 feerationem ipsius humanae naturae per hanc  
 diuinitatem eiusdem factam, quae rationem con-  
 tinet, cur ipse *sanc&tum* DEI fuerit et ad genus  
 humanum DEO consecrandum sufficerit LVC. I  
 com. XXXV DAN. VIII com. XXIII MARC. I  
 com. XXIII IOAN. XVII com. XVIII EBR. X  
 com. X cap. VIII com. XIII et cap. II com. XI.

VLTIMA phrasis ἐξ ἀναστοσεως νεκρῶν pro du-  
 plici significatu vocis ἀναστοσεως duplarem sen-  
 sum sortitur. Vel enim *transitiue* illa intelligi-  
 tur de fuscitatione mortuorum CHRISTO hic at-  
 tributa, vnde totius locutionis ille sensus enasci-  
 tur, fuisse CHRISTI diuinitatem demonstratam  
 reuocatione mortuorum in vitam indubio ope-  
 re diuino, quam CHRISTVS quoad in terris ver-  
 saretur aliquoties praestitit LVC. VII com. XIIII seq.  
 cap. VIII com. LIII seq. IOAN. XI com. XXXII seqq.  
 coll. MATTH. XI com. V; quae mortem ipsius  
 comitabatur MATTH. XXVII com. III seq; quam  
 discipuli ipsius nomine peregerunt ACT. VIII  
 com. XXXX cap. XX com. X; et quam olim perpe-  
 trabit, ab ipso CHRISTO diuinitatem suam demon-  
 straturo allegatam IOAN. V com. XVIII. XXI.

L 3 XXV.

(x) Loca patrum vbi diuina CHRISTI natura spiritus  
 vocatur affatim concessit GE. BULLVS in *def. fid.*  
*nic. operr.* p. XVIII. seqq. (y)



XXV. (y) Vel *intransitue* sumitur *avāsaōis*  
 quod duplicem item sensum parit pro significa-  
 zione praepositionis *ēξ* diuersa. Quae si tempus  
 designat et loco *μετά* aut *ἀπό* potius posita ex-  
 stimatur (z), ille sensus hic enascitur, a resurre-  
 ctione ex mortuis diuinitatem CHRISTI maxime,  
 euidentius saltem quam antea, demonstratam  
 fuisse omnibusque euictam. Quam interpreta-  
 zionem LUTHERI versio exhibet. Si autem vſi-  
 tationis particulae significatus hic retinetur, ut  
 principium cognoscendi demonstrandi indi-  
 cet, verba hunc commodiorem verbisque pre-  
 gressis et toti scopo sermonis conuenientiorem  
 sensum fundunt, CHRISTVM fuisse demonstratum  
 filium DEI ipsa ex mortuis resurrectione et per  
 eamdem. Perinde erit in hac explicatione siue  
 fuscitatione siue resurrectione reddatur *avāsa-*  
*ōis* vtrumque enim significat. Ellipsis vero  
 praepositionis *ēx* ante *νεκρῶν* repetendae ipsi  
 nequidquam obest: quum hic euphoniae in-  
 seruiat, neque alibi in sacris litteris inusitata sit,  
 quod

(y) Propugnarunt hanc interpretationem ERASMUS, SCHMI-  
 DIVS in *annot. ad h. loc.*, et SEB. SCHMIDIVS tam in *com.*  
*ad h. l.*, quam in *disput. theologico philolog. fasciculo,*  
*disp. VI pag. CCCLXVII* qui posterior tamen CHRISTI  
 propriam suimēt ipsius resuscitationem simul  
 comprehendēt hac phrasē existimat. (z) Stabi-  
 liuerunt hanc significationem particulae *ē-*  
*τε* G. E. RAPHELIVS in *annot. polybianis pag.*  
*CCCCVIII* et SCHOETGENIVS *lib. cit. ad h.*  
*loc.* (aa)



quod indubium euadet si conferatur ACT. XVI  
com. XXXI et XXXII EBR. VI com. II et I COR.  
XV com. XXX. XII. XIII ACT. III com. II et cap  
X com. XXXI. (aa)

QVOD SI IAM in summam contrahantur quae  
hactenus disputauimus, difficiliora haec verba  
alterutra ratione reliquis verisimiliore explicari  
poterunt. CHRISTVM fuisse declaratum filium DEI  
et per miracula et spiritum sanctum discipulis  
partum datumque et denique per resurrectionem (bb). Aut rectius, si mauis, CHRISTVM  
efficacissime fuisse declaratum filium DEI per  
resurrectionem a mortuis secundum diuinam na-  
turam. Vtra lectoribus se approbauerit mag-  
gis, parum hic nostra refert, euicturis dum-  
taxat ex hoc oraculo diuinitatem CHRISTI re-  
surrectione ipsius evidentissime demonstrari, quod  
vtraque interpretatio indubium facit.

QVA VERO ratione haec demonstratio proce-  
dat paucis nunc explicatum ibimus, si pree-  
mouerimus studio hic a nobis praeteriri senten-

L 4. tiam

(aa) Plerique interpretes hunc sensum amplectun-  
tur cf. in primis IO. IAC. RAMBACHVS in com. ad  
h. l. pag. XXXXIII. vbi tamen ponit non de-  
buitset, passuum sensum videri hic praeferendum,  
quum ea quae consequuntur satis demon-  
strant ipsum auctorem haec verba de actiua  
CHRISTI suimet ipsius fuscitatione interpretatum  
fuisse. (bb) Conf. le nouveau test. par le  
BEAVSOBRE et l' ENFANS ad h. loc.



tiam de resurrectione CHRISTI ab ipsa humana eiusdem natura peracta, seu huius naturae infinitis perfectionibus per vniōnem hypostaticam praeditae ad suscitationem suimet concursu; quae licet verissima sit aliunde facile probanda tantumque absit, vt demonstrationem diuinæ in CHRISTO naturae infirmet, vt eam potius si ipsa recte stabiliatur corroboret; hic tamen eius tractatione supersedemus, ne longius distrahamur ab oraculo nostro, cum quo non ita cohaeret, vt ex eo deduci queat aut ad illud illustrandum necessaria sit.

IPSA IGITVR demonstratio diuinitatis CHRISTI per resurrectionem eiusdem facta dupli ratione concipi potest. Vna si passiue consideratur atque ad DEVM refertur, altera si actiue ipsi CHRISTO tribuitur. In vtraque afferenda ipsas sacras litteras habebimus praeēentes.

FREQVENS SATIS mentio fit in sacris litteris suscitationis CHRISTI ex morte a DEO et PATRE in primis ob oeconomiam personarum diuinarum factae ACT. II comm. XXIII, XXXII. cap. III comm. XV cap. IIII comm. X. cap. X comm. XXXX. cap. XIII comm. XXXII. XXXXVII. ROM. III comm. XXIII cap. VIII comm. XI. 1 COR. VI comm. XIII. 2 COR. IIII comm. XIII EPH. I comm. XX. Qua ipsa re DEVS testatissimam facit indubiamque arctissimam eiusdem ad se relationem ipsam diuinitatem, atque id multiplici ratione et remotore et propiore.

EMOR



REMO<sup>T</sup>IVS DEVS CHRISTVM declarauit filium, suum reuocando ipsum ex morte, *primum quum ea re solempne testimonium perhibuit tam summae gratiae, qua apud se valeret, quam veritatis certissimae omnium ab eodem vniuersam dictorum, atque adeo et diuinitatis ab ipso saepius sibi vindicatae.* Solemnius certe significare non potuisset DEVS, per placere sibi CHRISTVM, probari que omnia ab ipso in terrarum orbe gesta, quam vindicando eumdem ex morte, quo documento apud omnes constare potuit fuisse IESVM vere a DEO legatum eidemque sacrum. Neque certius et exceptione maius testimonium DEI extare potuisset veritatis sermonum CHRISTI doctrinarumque ab eodem propositarum hoc redditu ipsius in vitam. Impostorem, erroresque et falsa professum eiusmodi miraculo confirmare numquam potuisset sine iactura sanctitatis veracissimae benignissimaeque, quae tamen de DEO cogitari nequit. Quam ob rem ipse CHRISTVS in terris versatus ad hoc DEI testimonium, quod suscitando ipsum a mortuis editurus erat, vt omnium grauiissimum fidemque doctrinae suae facturum, prouocauit MATTH. XII comm. XXXVIII seqq. cap. XVI. comm. III. LVC. XI comm. XXVIII et IOAN. XIII comm. XVIII. XX. Ne mini autem sermonum doctrinarumque CHRISTI non penitus ignaro obscurum aut dubium esse potest, CHRISTVM sapienter quidem et pro humilitatis necessariae conditione, libere tamen

L 5

et



et cum vitae periculo diuinitatem sibi vindicasse  
seque profectum fuisse DEI filium, adeo arcte  
cum ipso coniunctum, ut vnum sint, ipseque  
eodem honore quo pater venerandus sit. Quare  
subductis his rationibus omnibus iure merito-  
que hinc effici arbitramur diuinam hanc glo-  
riam CHRISTI omnium doctrinarum ab ipso pro-  
positarum maxime dubiam visam fundamentum  
tamen reliquarum necessarium, a DEO efficacis-  
sime obsignatam fuisse et testificatam suscitate  
eiusdem a mortuis. ACT. XVII. comm. XXXI.

PRAETEREA indirecte et remotius DEVs com-  
probauit diuinitatem CHRISTI procurato eiusdem  
in vitam reditu: quum ea reperactum ab eodem  
redemptionis hominum opus declarauit, quod  
seruatorem infinitum aequa ac finitum, immen-  
sique valoris requirebat. Resurrectionem CHRI-  
STI solemne et iudiciale testimonium fuisse, eum-  
dem vadimonium obiisse, et praestitisse exacte  
quae ab ipso vice hominum apud DEVm reorum  
praestanda fuerant, sacrae litterae euidenter do-  
cent IES. L comm. VIII cap. LIII comm. VIII.  
X seqq. EBR. XIII comm. XX ROM. III comm.  
XXV. ACT. II comm. XXIII coll. cum cap.  
XVI comm. XXXVII. diuinae autem virtutis  
negotium fuisse hoc opus satis constat ex PSAL.  
XXXXVIII comm. VIII. VIII et PS. XXXX  
comm. VII-VIII atque EBR. VII comm. XXVI  
seq. quam ob rem eadem suscitate CHRISTI  
ex morte atque in libertatem restituzione, infi-  
nitum



nitum eiusdem valorem immensamque virtutem atque adeo et diuinitatem fuisse demonstratam.

PROPIVS vero et directe magis eadem haec CHRISTI deitas fuscitatione ipsius a mortuis euicta fuit, quum DEVS ea re publice declarauit competere CHRISTO non solum ius legitimū, verum etiam necessariam possessionem vitae sempiternae. Postquam enim CHRISTVS ea omnia exantlauerat iisque vicissitudinibus fatisfecerat, quae per DEI consilium, et redēptionis oeconomiam subeundae fuerunt: restituendus omnino erat plenae perpetuae et euidentissimae possessioni maiestatis, quam non meruerat sibi sed ex vnione humanae naturae cum diuina habebat. Quod quum fuscitatione eiusdem ex mortuis factum sit, statuendum omnino est, CHRISTVM aut sibimet ipsum promeruisse hanc gloriam, quod vicariata satisfactionem penitus euerteret, aut resurrectione tantum plenam possessionem praerogatiuarum diuinitus accepisse, quibus se sponte euacuauerat antea, et quae ipsi ut θεανθεωπω debebantur atque per ipsam naturalium vniōnem propriae erant, idque a DEO ipsum vitae restituente declaratum fuisse, quod ex ACT. II comm. XXIII. PHIL. II comm. VIII neque minus ACT. XIII comm. XXXIII si de fuscitatione ex mortuis intelligitur, et euidentius ex comm. XXXIII sq. eluet.

ALTERA demonstratio diuinitatis CHRISTI ex resurrectione ipsius desumitur: si ut actiue ab ipsomet peracta consideratur, siue diuinæ natu-

rae



rae siue utriusque rectius id tribuatur. Suam  
virtute ipsum CHRISTVM se vitae restituisse in-  
dubium est ex IOAN. II *comm.* XVIII. XVIII.  
*cap.* X *comm.* XVII. XVIII collato I PETR,  
III *comm.* XVIII. Diuinam autem infinitam-  
que potentiam id requirere et constabit ex  
COH. VIII *comm.* VIII. II REG. V *comm.* VII.  
PSAL. LXXXV comm. III et cuius facili per se  
patebit. Vnde recte colligimus CHRISTVM omni-  
bus se comprobasse DEI filium suaque diuinita-  
tis certissimam fidem fecisse reditu in vitam sua  
vi peracto.

INTELLIGETIS ex haec tenus disputatis, CIVES  
CARISSIMI! quam ingens pondus ferat resurreccio  
CHRISTI ad omnem doctrinam christianam, at-  
que ipsam salutem aeternam, quantique vestra  
intersit illam non solum cognitam perspectam-  
que, verum etiam recte apud animum collo-  
catam applicatamque haberi. Agite igitur,  
vestris commodis opportune consulite, vindic-  
ate hos dies a ciuitate CHRISTI huic doctrinae  
recolendae consecratos, si eius ciues estis, san-  
ctis meditationibus, solemnibus sacris, effusissi-  
misque ad DEVVM CHRISTVMQUE precibus. Ve-  
strum facite CHRISTVM ex morte expiatoria re-  
ducem, vt felicissima eius coniunctione potiti  
filii DEI ipsi euadatis ex morte olim reuocandi  
declarandique haeredes et participes gloriae  
primogeniti huius ex mortuis. P. P. in academia  
fridericana d. V. kal. april. qui in fastis sacris est vi-  
gilia paschae anni clo lɔ CCXXXVIII.

PRO-



PROGRAMMATA  
SCHOLASTICA

QVIBVS

LVSTRATIONVM IN ORPHANOTRO-  
PHEO GLAVCHENSI INSTITVENDA-  
RVM SOLEMNIA  
LITTERARVM PATRONIS  
ET FAVORIBVS  
INDICVNTVR.



ATAMMIA FRO  
SCHE

ONTOHANTO IN GÖTTINGEN  
DIE GÖTTINGER UNIVERSITÄT  
RUF. 2000

1811



# PROLVSIO AD EXAMEN SOLEMNE

D. III. ET IIII OCT. CL IO CCXXVIII

HABITVM

**Q**VAM ante sex menses publice institui-  
mus *classis selectae* lustrationem sole-  
mnem, gratam sibi fuisse non obscuris  
voluntatis suae significationibus decla-  
rarunt litterarum patroni, et quotquot frequen-  
tes eo tempore confluxerant, auditores. Eam-  
dem simul deprehendimus inferiorum ordinum  
alumnis incitamento fuisse, ad torporem, qui  
nonnullorum animos occupauerat, exutien-  
dum, aemulumque illorum studium inflammaisse,  
vt ad praeclarum humanitatis decus, maiori,  
quam vulgo fieri solet, nisu adspirarent. Qua-  
re subductis his rationibus, exacto iam ordina-  
rio temporis, quo labores scholastici circumscri-  
buntur, interuallo, huius diei solemnitatem re-  
petendam esse duximus, vt et noui huius *classis*  
ciues, qui in locum priorum successerunt, in-  
dustriae in arte oratoria, theologia, philosophia,  
latina et graeca lingua collocatae, specimina edant,  
et unus ex illis \*) GEORGIVS LVDOVICVS HERN-  
SCHMIDIVS, bopfingenensis, optimi, et de orpha-  
notropheo meritissimi parentis filius, qui annuo  
cursu

\*) iam legionis Kleistianae sacris BEROLINI praeest.



cursu finito ad academiam, non sine diligentiae laude dimititur, publice scholam nostram valere iubeat. Huius vero celebritatis quidquid erit, cum ordinario vniuersae scholae examine coniungere, quam singularem ipsi diem destinate maluimus, ne patronorum, qui exercitiis nostris scholasticis benenoli interesse solent, favore abuti velle videantur, nec illis, qui ex reliquis ordinibus ad academiam festinant, longiorrem moram iniiciamus. Quamobrem pro more apud nos recepo, die III. Octobris singularum classium profectus examinabuntur, interspersis declamationibus quorumdam ex classe prima alumnorum, die vero IV. horis matutinis classis selecta, et a meridie tandem reliquae, quae super sunt classes, examinis periculum subibunt.



EXER-

# PROLVSIO

AD EXAMEN CLASSIS SELECTAE

D. III. APR. CL<sup>O</sup> I<sup>O</sup> CC XXX

INSTITVTVM.

**C**rebriorem exercitationem et frequen-  
tiorem usum, si quid aliud, summae et  
inevitabilis necessitatis esse ad littera-  
rum studia, ab antiquissimis temporis-  
bus inter omnes harum rerum vel leuiter gnaros  
dudum conuenit. Nascimur hac lege miseri mor-  
tales ad unum omnes, ut praeter facultates et  
vires a natura habeamus nihil: reliqua, quae ad  
habilitates, artes et dexteritates pertinent, cun-  
cta ab exercitio profiscantur. Nec ita corpo-  
ris dumtaxat indoles comparata est, ut eius vi-  
res non sine frequentiori et saepius repetito labo-  
re ad artis conditiones subigantur, et illo tandem  
adhibito, excellens quid et incomparabile ena-  
scatur in artibus et opificiis: sed animi eadem ra-  
tio est. Quod experientia et illorum quae no-  
bismet ipsis euenerunt conscientia, vlla exce-  
ptione maior testis satis euincit. Exercendo enim  
recte cogitamus, percipimus, recordamur, iu-  
dicamus, ratiocinamur. Ad eloquentiam in pri-  
mis una haec exercitationum frequentia requiri-  
tur adeo, ut nemo umquam dicendo, pure, per-  
spicue et eleganter loquendo ante valeat, quam

M

in-

ER-



innumera huius laboris fastidia deuorauit. Fin-  
gamus hominem sexcenta rhetorum praecepta e-  
doctum, vsu tamen et exercitio destitutum: dici  
non potest, quam inepte, quam misere is, ad  
declamandum forte laceffitus, balbutiet, voces  
tertiabit, et auditorum stomachum ac risum moue-  
bit. Quare illi demum doctores iuuentuti, suae  
disciplinae permisae, recte consulunt, qui non  
tam id operose agunt, et regularum et praece-  
ptionum mole illam onerent et tantum non obru-  
ant, quam ut post breuem institutionem ad exer-  
citionis et usus contentiones illam reuocent, et  
litteris quotidiana consuetudine familiariores red-  
dant. Hac enim ratione tenera aetas non memo-  
riae mandat, quomodo se gerere debeat, quid co-  
gitatu, dictu, factuque opus sit, sed experiun-  
do discit. Sic praceptiones aliud quasi agen-  
tibus se insinuant, et puerorum ingenia, ad imi-  
nationem tota composita, non magis facili quam  
felici negotio difficillima quaevis superant. Ha-  
bet hoc peculiare umbra scholastica, ut in illa  
haec laborum et exercitationum felicitas magis  
vigere possit, quam alibi inter litterarum culto-  
res: quos laboris piget, ac interrogationum et  
correctionum pudet; quum scholarum contra  
subsellia non solum viua docentium, sed et di-  
scendentium voce, et mutuis sciscitantium, exami-  
nantium et respondentium reciprocationibus per-  
sonant, et hunc scholasticum puluerem incredi-  
bilis virium contentio exercet. Quem morem

no-



nostris temporibus, summo saeculi beneficio, in scholas postliminio reductum sancte et studiose adhuc obseruauimus, *cum* apud omnem, quae vndeque ad hanc orphanotrophei scholam frequens confluxit, iuuentutem, tum in supremo maxime discipulorum selectorum ordine. Nam quum illi nemo abscribatur, quam qui reliquas ordinarias classes emensus, ad academiam maturuisse videtur: omnis in eo opera collocatur, ut ultima ipsis lima adhibeatur et exercendo magis magisque poliantur et perficiantur. Quam ob rem praeter auditiones quotidianas theologicas, philosophicas, ebraicas, graecas et latinas, atque exercitationes oratorias et disputatorias, inscriptionibus variis conficiendis sedulo elaborant. Vnde factum est, ut XII huius ordinis ciues, sex mensibus hibernis, qui ab examine solemni nouissimo effluxerunt, disputationes XXIV componerent, declamationes XLVII, quarum aliquot quidem germanice, pleraque tamen latinae et soluta et ligata oratione scriptae sunt, epistolas XXX, dialogos XXIX, carmina XVIII, translationes paraphrasticas, inscriptions et fabulas XXIV: ut breuiores meditationes taceamus. Quas applicationis logicae causâ conscriperunt, quae omnia censuram et virgulam criticam subierunt, quantum profecerint his concatenatis laboribus et exercitiis, publico iam specimine ex laudabili consuetudine declaratum ibunt

M 2

dine.



In iisdem solemnibus ultimis simul sermones habebunt scholam cum academia commutaturi (a) IOANNES GOTTFR. ARNDIVS, halensis, 10. CAROLVS SCHVLTZE, guelpherbyt. et IO. HEINRICVS FREVDE, prizwalcensis, pereximii ingenii et optimae spei iuuenes, quorum secundus VIII annos in schola nostra, reliquorum vterque V, singuli autem integrum annum in hac classe transegerunt, bonorum et diligentium discipulorum officiis functi. Ex reliquis, qui semestre tantum tempus in hac arena consumserunt, domesticis rationibus ab illa statione euocati, scholam valere iubebunt (b) IACOBVS HILDEBRAND, wernigerodanus, bonae mentis et litterarum elegantium studiosissimus, nec non SEBAST. HEVCKE, halberst. et (c) CHRIST. PETR. SEXT. CRAVSE, stendalensis, ingenii singulari praestantia commendabiles. Fortunet ipsis deus hanc studiorum mutationem. Continuet et perpetuet, beneficia in illos cunulata et noua atque maiora in dies incrementa iis adiiciat.

- (a) Scholae in insula OSELIA ad LIVONIAM pertinente praeesse dicitur. (b) Domestica cellissimi STOLBERGIAE comitis, CHRISTIANI ERNESTI, qui WERNIGERODAE degit, sacra administrat.
- (c) Gymnasii reualienensis professor celeberrimus.



PRO.



PROGRAMMA SCHOLASTICVM III.

PROGRAMMA  
DE TRANSITV EX SCHOLIS  
IN ACADEMIAS FELICITER  
INSTITVENDO AD EXAMEN SO-  
LEMNE D. IX ET X OCT.  
c/o I o ccxxx.

**P**ermagni interest et reipublicae temporumque felicitatis, et singulorum, qui litteris operantur priuatae vtilitatis, ab omnibus scholafticae vitae cum academica commutationem bonis auspiciis, recte et sapienter fieri: quae, si intempestiue, male et sinistro omne suscipitur, dici non potest, quam sit perniciofa, et ad irreparabile damnum saluti inferendum comparata. Habet enim hic ad altiora studia transitus incredibilem vim et efficaciam in adolescentum animos, mores, studia, fortunam, et vitam denique omnem. Quod et per se nemini obscurum esse potest, qui iuuentutis ingenia vel leuiter norit, et luculentis exemplis illustratur, quoties noui homines in academias commigrant et ciuitate donantur. Summa igitur cautione, ne quem illius mutationis umquam poeniteat, prouidendum est. Prouidetur autem felicissime, ni toti fallimur, si, et quo tempore, et quaratione ex scholis ad academias transeundum sit, sollicite cogitetur. Vtrique et tempori et modo sua ra-

M 3

tio



tio constet necesse est: adeo ut illi aequa male  
fuis rebus consulant, qui vel intempestive, vel  
praepostere in hoc genere agunt.

Tempestiuam e scholis emigrationem facit et  
aetatis et profectuum, quamvisque consequen-  
tus est, maturitas. Prudenter olim ROMANI,  
sapientissimi mortales: pubertatem, et togae praetextae cum virili commutationem certis annorum  
limitibus definiuerunt: arbitrati rarius naturam  
ordinaria annorum spatia anteuertere. Quae nec  
nostris temporibus ita a seipso recessit, ut in inge-  
niorum maturitate per saltus eundo se praecipi-  
tet, et fructus satis coctos una cum flore vire-  
scente ferat. Non quidem adeo arcte cohaerent  
annorum progressiones, cum ingeniorum incre-  
mentis, ut, non nisi cum barba, et ad illius suc-  
crescentis mensuram, vires intellectus mature-  
scant. Ne in corpore quidem staturae accessio-  
nes illam annorum proportionem aequaliter ob-  
seruant. Plerumque tamen puerili aetati deest  
prudenter de rebus iudicandi dexteritas, unde  
et pueriliter, hoc est inepte viuendi ratio in pue-  
ris maiorem, quam in adultioribus excusationem  
habet. Ad academicam vero vitam, quam ne-  
cessaria sit haec dexteritas, nemo ignorat: cum  
in homine idem sit quod in nauigubernator, quam  
illo destitutam, mari et tempestatibus permitte-  
re, esset periculosisimum. Ipsorum quidem  
annorum, quos exspectare oporteat, determi-  
nationem nostri iudicii esse negamus: omni ta-

men



nmen assueratione affirmamus, a praematura maturitate cauendum esse sedulo, nec facile aetatis veniam dandam esse ad academiam aufugituris.

Ne quis tamen barbam in academie candidatis sufficere existimet, profectuum simul mentionem adiecumus: ut qui maximum ad hanc rem momentum habent. Ipsa scholarum inferiorum et superiorum distinctio videtur a maioribus, cordatis et prudentibus viris eo consilio facta, ut singulae suos labores, sua studia sibi propria vindicarent, nec quis ad altiores superiorum scholarum auditiones admitteretur, ante tirocinia in inferioribus recte posita. Qua re cautum esse voluerunt, ut omnes propaedeuticis litteris nondum initiati profani haberentur, et ab adytis ac penetralibus scientiarum, illarumque sacris vio-landis arcerentur. Cuius instituti obliuionem magna eruditionis iactura et mira rerum confusio insecura est. Cognitione enim et naturali vinculo inter se iunctae sunt et copulatae disciplinae ad vnam omnes. Elegantiorum in primis litterarum ea est conditio, ut ad superiores scien- tias viam pellant, ingenia praeparent et illis carere nemo possit, qui in grauioribus doctrinis proficere illasque sibi familiares reddere velit. Quam ob rem spatiofissimus illorum studiorum, quae ab humanitate nomen trahunt, ambitus ante decurrentis est in scholis, quam aditus ad altiora tentetur. Oleum is perdit et operam in academiis, qui, ab his litteris impa-

ratus, ad reliquarum mysteria p[re]propera festinatione auolat, et reconditis disciplinis temerario ausu immiscetur. Non magis ad domum, quae aetatem ferat, exstruendam fundamentis opus est, quam his subsidiis ad solidam eruditionem comparandam. Praeclare de re litteraria ageretur, si omnes academiae candidati linguas scitu necessarias calerent: *latinam* ita sibi conciliassent, ut non solum latina, sed latine etiam latina scriberent et loquerentur: *graecam*, *gallicam*, et si quis sacris litteris olim operam esset daturus, *ebraicam* quoque addidicissent: *historiarum* et *cognatarum* litterarum gnari essent: *theologiam* ad omnes vitae casus, et ipsam aeternitatem, cui nascimur, maxime necessariam, ac *philosophiae*, instrumentalis certe, ut vocatur, elementa imbibissent: nec *mathematicis* doctrinis penitus destituerentur. Quae tamen non ita intelligi volumus, ac si ignoraremus miram ingeniorum et scholarum diuersitatem multiplicem etiam profectuum diuersitatem parere. Exercitatores adolescentes illos terminos longissime migrant, quos hebetiores vix, ac ne vix quidem consequuntur. Misera quoque scholarum quarumdam conditio multos infra debitam profectuum mensuram subsistere cogit. In illorum iniuriam haec verti minime debent, quibus tallem CORINTHVM per has caussas, valetudinem et alias temporum calamitates adire non licet.

Iam



Iam vero, si cum illis quae haec tenus dicta sunt, nostri temporis mores contendamus, bone deus! quam misere in deterius omnia ruunt! quanta confusio, ut reliquos ordines ita et literatum, reliquis scilicet oculatiorem inuasit, in hoc mundi senio, vbi dudum in consuetudinem abiit, nihil tempestive facere! Pec-  
catur autem in vtramque partem et cunctando,  
et velocius festinando. Rariora tamen illorum  
exempla sunt, qui maturitatem et annos ad stu-  
dia accommodatos praeterire patiuntur, omnem  
aetatis florem in scholis, seu, ut rectius dicamus,  
in choro musico et paedagogiis consumunt, ac  
de stipe merenda et vita commodius trahenda  
quam de studiis prosequendis solliciti magis,  
academicam peregrinationem tunc demum me-  
ditantur, cum ingenium iam debilitatum et effe-  
tum factum est. Cunctabundi hi homines, dum  
in se solos iniurii sunt nec turbas publicas facile  
excitant, excusatius peccant aliis, qui le suaque  
studia praecipitant. Quod parentum saepe,  
saepius tamen ipsorum puerorum culpa fit. Multi  
enim parentes vel ad rem attentiores sumtibus  
parcunt, vel gloriolam ex filiorum praecoci eru-  
ditione captant, vel honores ab illis adeudos  
iam ambitiose distribuunt, vel indulgentius ipso-  
rum lubidini gratificantur et crudos filios in aca-  
demias protrudunt. Verum multo frequentius  
ipse iuuenilis pruritus, morarum impatiens, in  
academiam prorumpit. Variis de cauissis, ut est

M. 5 pue-



puerorum ingenium varium et multiplex, iter hoc adeo acceleratur. Aliis petulantioribus speciosus libertatis titulus arridet, quare frena mordere assueti, effrenem licentiam, vitiorum ac debacchationum impunitatem quaerunt. Alii gloriae cupidiores arbitris remotis sui iuris fieri et domini haberri volunt, ac nescio quid futuri sibi videntur, si gladio alligatis, nemini de via cedere, neminem salutare liceat. Alii ambitionem excelsioris et praecocis ingenii famam affebant, aliis persuasuri se ultra communem mortalium mediocritatem maturius sapere. Alii litterarum librorumque heluones plura ingurgitare et omnem eruditionem citius deuorare se posse sperant in tanta collegiorum, scholarum auditionumque multitudine. Alii desidiae patroni plus otii et feriarum sibi promittunt, si nemo instat diligentiam exstimulaturus. Alii tandem animi leuitate abripiuntur, quotidiana fastidiunt et consueti laboris pertaesi, ex variatione delegationem capturi, aut commilitones prouectiores securi, ante tempus ad academiam profiscuntur. Incredibile dictu est, quam longe lateque serpat haec lues, quantamque perniciem saluti publicae inferat. Solet enim de plurimorum salute conclamatum esse, qui pueri in iuuenum studia immissti, dum solito citius ex ephesis egressi videntur, puerilitatem in academiam, et quod peius, in omnem vitam transducunt: praesertim cum plerosque pudeat,

et-



etiam si ad se redierunt, ad puluerem scholasticum redire. Non vna vero huius miseriae indoles est. Nam multi qui studia academica suas vires superare deprehendunt, et de damno resarciendo desperant, vel cuticulam curant, saturnalia quotidie agunt, missis litteris omnibus nuntio, vel, ne ignorantiam prodant, patientissime, nec sine censoriae grauitatis specie triennium lapis lapidi insident, et tandem studia nondum tractari coepta absoluunt, ineptiores facti quam ante fuerunt. Alii excitatores omnem lapidem mouent et operose in eo elaborant, ne tempus in academia frustra praeterfluat: sed cum ignorant quid distent aera lupinis, multa indiscrete, in spem futurae obliuionis addiscunt, et ea anxie corradunt, quae olim dediscere oporteat. Aut, ut cum grammatica et elegantiis, quas, ut viles et labore indignas res, alto supercilium ante contempserant, in gratiam redeant, insomnes noctes ad lucernam agunt, et per ambages diffilime eo perueniunt, quorsum facilius et felicius in scholis per mutuas interrogationum et responsionum vices atque elaborationum aemulationes contingere potuissent.

Sed vela iam contrahenda sunt. Quare de recto huius ad academiam transitionis modo, has dumtaxat leges ponamus. I. Cauent noui coloni, ne maius et augustius, nec tamen minus et leuius quam par est, huic mutationi pretium statuant. Nam qui maioris faciunt, illi subito



subito toti alii sibi facti videntur, fastu tument, pedem in alio orbe posuisse somniant et pristina quaevis ex alto despiciunt. Illi contra, qui minus aestimant, toti iidem manent, nec cogitant, aliam vitam alios mores postulare. II. A DEO noui laboris et decursus primordia capessant, illum sibi ducem ac moderatorum sumant, ipsi vota nuncupent exacto hoc cursu soluenda. Quo enim periculosior est illa periodus, eo religiosius mala precibus auerruncanda sunt. III. Minus sibi iam licere existiment quam ante. In alios igitur modestiores fiant, ut ingenuae liberalitati conuenit, in se ipsos vero multo seueriores. Circumspectione et longa deliberatione opus est, ne quid temere, inconsulte et tumultuarie agatur. Quamdiu pueris nil praeter obediendi gloriam relinquitur, male et imprudenter actorum culpa maximam partem in paedagogum deuoluitur, quo remoto, omnis in adolescentem redundat. IV. Litterarum studia nec prorsus eadem continuent, nec tamen longioribus spatiis diuortiis remota adgrediantur, sed sensim ad noua et sublimiora adscendant. Et parta tueri virtus est. V. Vitae scholaisticae rationes accurata memoria recolant et subducant, ut illas res, vnde damni quid ceperunt, cauius euitent et veteres scopulos tutius praeterant, atque ab ipsis detrimentis utilitatem capiant. VI. Prouideant tandem ne suo sensu abun-



abundent et se solos duces sequantur neglectis  
aliorum monitis.

Ita vero et nobis et huic scholae nostrae fau-  
sta et fortunata cuncta eueniant, vti serio opta-  
mus, et ardentissimis precibus precamur, vt  
quotquot ex hac bonae mentis sede, in aca-  
deiniam prodeunt, prodeunt autem tamquam  
ex equo troiano, ingenti quotannis multitu-  
dine tempestive, pie et sapienter emigrent.  
Quae nostrarum partium sunt, illorum nil reli-  
qui facimus: monemus, obsecramus, hortamur  
et per sacratissima quaevis obtestamur nostrae  
curae concreditos, vt caute his discriminibus se  
permittant. Si qui morem gerere recusant,  
dolemus: si qui obtemperant, gaudemus. Ad  
hos posteriores referendi sunt, vt de nonnullis  
certo nouimus, de reliquis speramus, eximii  
adolescentes, qui iam sarcinas colligunt et emi-  
grationem parant. Vnus ex illis (a) ALEXANDER  
GOTTLIEB BAVMGARTEN, supra annum sex men-  
ses in ordine selecto transegit, et bonam sui  
exspectationem omnibus fecit. Reliqui qua-  
tuor (b) SAMVEL ZORN, qui morbo ex quo ae-

LAND

(a) Professor philosophiae in academia nostra constante  
fama atque omnium sermone celebratissimus, de  
quo idemidem mihi cogitanti quam maxime du-  
biū videtur, vrum FRANCOFVRTI ad ODERAM,  
eui professor philosophiae ordinarius destinatus est,  
maiorem sui exspectationem, an HALAE, quam re-  
linquit, maius sui desiderium excitaturus sit. (b) Qui  
summos in philosophia honores nostrae academie  
debet.



gre conualuit, a sermone constituto habendo  
impeditur, IOACHIMVS FRIDERICVS ALBRECHT,  
OANNES FRIDERICVS HEYMELL et IOAN NES FAHR-  
LAND annum cursum in hac suprema classe con-  
fecerunt, officiis suis multo studio diligenter de-  
functi: ad quos accedit LVDOVICVS GVILIELMVS  
a LANGENAV, qui post semestre spatium in hac  
classe bene exactum hinc euocatur. Illi ut so-  
lemnius scholam cum academia commutent, et  
quam diligenter, caste ac prudenter in studiis  
scholasticis versati sint atque ad academiam ma-  
turerint, omnibus probent, vna cum exerci-  
tio oratorio quaedam lectionum specimina publi-  
ce dabunt. Quae cum examine reliquarum scho-  
lae classium ita coniungentur, vt primi diei ho-  
rae matutinae selecto ordini tribuantur, reliquis  
lustrationibus declamationes quorumdam primae  
classis ciuium, inter quos nonnulli academiam  
adibunt, immisceantur.



PRO-



PROGRAMMA SCHOLASTICVM IV.

PROGRAMMA  
DE ORATIONVM SCHOLA-  
STICARVM ARGV-  
MENTIS

BENE SELIGENTIS AD EXAMEN

D. II. III. APRIL. CLO CCXXXI.

**S**I quis ex orationibus scholasticis ad utilitatem publicam frugis redundare debet, qui sane magnopere debet et potest esse uberrimus: praeter alias cautiones necessarias, opus est, ut sollicitus thematum et materiarum selectus habeatur, atque adolescentum industria in argumentis exerceatur, et ingenio ipsorum accommodatis, et labore insunto dignis. Quod si negligitur publicae declamationes tantum absunt ab utilitate vera, ut litterarum studiis et solidae eruditioni, quid quod ipsi eloquentiae officiant magis, quam inferuant. Dici enim non potest, quam ingens oratoria, praestantissimae artis, et bonae mentis corruptio, ex huius rei incuria manauit, quae, malum, iam antiquissimis temporibus et his nostris etiam multas scholas peruersit. Non una autem ratione hac in re ab imperitis eloquentiae cultoribus et magistris peccatur: dum vel nimis ardua et captum iuuentutis superantia, vel subtiliora,

inu-



inutilia, ficta et paradoxa argumenta scholasticis sermonibus discutienda sumunt.

Qui arduas quaestiones et publicas controuer-  
sias altioris indaginis ac solitu difficultimas ad puluerem scholasticum transferunt: ut ambitio-  
sius reliquis agunt, ita primum etiam locum in-  
ter ineptos nugatores merito occupant; licet  
non careant admiratoribus et multa eruditionis  
specie superbiant. Hi vmbomatici doctores nimis  
magnifice de oratoria sua sentiunt, illamque pro  
arte venditant, de re quavis cognita vel inco-  
gnita, copiose et cum multa verborum pompa  
differendi. Quare parum de eo solliciti sunt,  
an rerum de quibus verba facere volunt, gnari  
sint nec ne: verum non felicius, quam si quis pi-  
ctor facies et figuræ numquam visas pingere et  
coloribus ad viuum repraesentare conaretur.  
Hinc temerario ausu grauissimarum rerum cen-  
sores et arbitros se constituunt, et, ne quid  
ex omni rerum vniuersitate rhetoricam suam  
dexteritatem subterfugere videatur, in quasuis  
disciplinas et caussas petulanter inuolant, nil in-  
tentatum et incorruptum relinquunt. Quoties  
aliquid noui in aulis, comitiis, et legatorum  
conuentibus accidit, lites de imperantium iuri-  
bus et controuersiis mutuis feruent: certe aliquis  
declamator imberbis surget, sententiam non in-  
terrogatus pronunciabit, auctor suasorque pa-  
cis ineundae, aut belli suscipiendi exsistet, he-  
roes togatos et sagatos in ius vocabit et dictato-

ria



ria auctoritate successiones et caussas principum dirimet. Nec facile aliquis nouator in philosophia et aliis disciplinis dogma ante inauditum proponet, quin hinc illinc in scholis hostes in se concitaturus sit, mordacissimis illorum declamatiunculis excipiendus. Nisi veterum sophistarum artificia, loci topici rhetorum, ars magna combinatoria et *lulliana* et plures huiusmodi ineptiae notissimae essent: possemus per singula momenta eundo illis quae diximus fidem facere. Sed quantum hos febriculofos homines ratio fugiat, dum volunt cum ratione insanire, oculatior quisque facile deprehendit. Multiplex vero detrimentum inde capit iuuentus, quae misera in hos duces incidit, siue magistri hanc eruditio*n*is farraginem et syluam conquirant ad onerandam puerorum memoriam, siue ipsi adolescentes haec monstra pariant. Nam cum omnis illorum cogitatio ad materiam abripitur, de elocutione, de verbis, de stilo, de numero oratorio, de elegantiss minus cogitant: nil ex proprio ingenio, harum rerum vacuo, proferunt, sed per bibliothecas cursitare, collectanea sollicitare, polyantheas compilare, aliena corrader, scriptoribus sua suffurari, centones consuere, et alienis pen- nis, ut graculus in fabula, superbire discunt: ipsarum etiam rerum, quod peius est, confusas imagines sibi formant, et cum multa in auctoribus, quos exutiunt, nec recte intelligunt, nec intellecta digerunt, grauissimos errores imbibunt.

N

Obscu-



Obscuram praeterea, hiulcam, frigidam et inaniter tumentem dictionem contrahunt ieuni hi declamatores ignorantiam rerum verborum am pullis compensaturi, qua re loquaces, vanilo qui, garruli, blaterones, locutuleii et quiduis potius quam eloquentes, quam facundi, quam oratores euadunt. Nasuti etiam fiunt et gnauiter impudentes: arrogantia enim et temerarior audacia illi aetati familiaris egregie excitat bitur et mira accessionum incrementa capiet his magnificis nugis, et adolescentulus talia ausus, nescio quid protinus factus, et quod eruditionis fastigium consecutus sibi videbitur, vnde humana quaevis alto et censorio superciliosus despiciet. Auditores denique, si quos forte incautos attraxerunt, ut coruos hiantes eos deludunt, indignatione quam gratia digniores dum nec erudiendo nec delectando ipsorum exspectationem implent.

Verum non his solum *thrasonibus* rhetoriciis dies dicendus est, vix enim excusatius peccant, qui ad alterum extremum delapsi argumenta inutilia, subtiliora nec umquam profutura, hoc est grandes minutias sermonibus publicis concelebrant. Hi cum superioribus in eo conueniunt, quod oratoriae suae nimis confisi quidlibet aliis persuadere et imponere posse credunt, et nihil tam certum arbitrantur, quod non in utramque partem confirmare et conuellere, nihil etiam tam vile et abiectum, quod non exornare, colorare et euhere posse sperent. In eo vero ab illis



illis discedunt, quod laureolam in mustaceo  
quaerunt, et vel v lulam, asinum, busonem,  
diabolum, neminem, famem, febrem et des-  
diam, aut si quid huius furfuris abiectius exco-  
gitari possit, magnifice laudant, vel subtilitates,  
spinas, tricasque philosophicas et criticas, ar-  
gute differunt, oratione ad utilitatem minus quam  
ostentationem composita. Scilicet his praeclara-  
tes est, vniuerso generi humano contradicere,  
incredibiles nouitates proferre, verborum am-  
biguitate ludere et per infinitas circuitiones ad  
inanem aliquod nihil deuenire, in seirpo nodos  
quaerere, difficiles nugas et antiquas neniae ma-  
gno molimine agere. Et hic tamen morbus longe  
lateque grassatus, incommoda multa in scholas  
et rem omnem litterariam inuexit. Adolescen-  
tes enim dicturi de rebus leuissimis et nullius  
momenti, sesquipedalia verba et inanes tumo-  
res sectantur, res in vulgus notas, innumeris  
auctorum testimoniis stipatas cumulant, aut in-  
geniosius et subtilius disputant, quam ut ipsi se  
intelligant. Deberet in scholis iuuentus non  
vmbrae sed vitae praeparari, non tam ad scien-  
tiam, quam ad sapientiam et prudentiam formari,  
ut iustum rebus statuere pretium et ex aequo  
omnia contemplari disceret, cui, si quid aliud,  
solemnis haec nugandi consuetudo aperte re-  
pugnat. Nec tandem artium disciplinarumque  
diuertia norunt, qui pro rostris philosophan-  
tur, et in grammaticorum aut rhetorum scho-  
lis

lis disputant. Habent singulae artes sua confinia, suos limites, quos conuellere et lapidibus motis turbare nefas est.

Cuius etiam vitii accusandi sunt, qui ex ludo litterario scenam et theatrum parant, et iuuenes personatos in orchestram prodire, mordaci et ridiculo sermone alios carpere, aut in se inuicem debacchari, fictos furores furere, et verbo belle ineptire iubent. Vnde incredibilis animorum labes enascitur. Comica enim et theatalis cogitandi, loquendi vel agendi ratio in forum, suggestum, cathedram, vitam denique ipsam communem transducitur, et vbiunque hi homines pedem ponunt, soccis et cothurnis incedere somniant, numquam rem, sed semper personam aliquam acturi. Naturalis etiam verecundia et modestia tenerae aetati propria expellitur et peccatans impudentia confirmatur, vbi aliquis adolescentis eiurato iudicio imaginationi se totum reliquit. Non potest quidem omnis fictio ex scholis exsulare; poetis tamen potius quam oratoribus, et horum priuatis exercitiis et recitationibus rectius, quam publicis et solemnioribus actibus permittitur.

Sed ne omnem declamatoribus materiam dicendi eripere velle videamus, ad amoliendam hanc suspicionem inuidiosam, qualia debeant esse themata harum orationum paucis explicabimus. Quare subductis illarum rerum rationibus aut toti fallimur, aut themata feligenda sunt, primum faci-



facilia et ad vires, eruditionem atque ingenium declamatorum accommodata, illis nec inferiora, ut habeant in quo se exerceant, et dexteritatem periclitentur, nec tamen etiam superiora, ut propria meditatione omnia digerere, ordine naturali disponere, verbis et locutionibus convenientissimis explicare atque ornare, et auditoribus persuadere possint, ut perspicuitas sermoni concilietur, quae sine claris et distinctis cogitationibus esse nequit, ut tempori demum parcatur et exercitatio omnem ad quem directa est finem obtineat. Praeterea themata deligantur utilia, quae neque elaborasse declamatorem, neque audiuisse praesentes umquam poeniteat: quibus vel aliqua memorabilis historia pragmatice exponatur, vel disciplinae alicuius pars quaedam penitiori scientia digna illustretur, vel res alia quaevis scitu factuque necessaria in animos insinuetur. Vnde patet et ciuilem et sacram et litterariam historiam abundantissime sufficere exempla, locos communes et themata orationum, in quibus nec utilitatis nec delectationis quidquam desiderabitur. Ipsa dein naturae et rerum quotidie obuiarum contemplatio neminem destituet materiam dicendi cogitantem: et haec quidem themata eo praestantiora sunt, quod quo propius ars ad naturam accedit, eo maiorem gratiam habet. Morum etiam doctrina, hominum officia, virtutes et vitia vel pueris non ignota campum spatiostissimum aperiunt in

N 3

quo



quo declamator cum fructu decurrere possit.

Theologia denique seu sanctior doctrina, quae primum commemoranda fuisset, tanta materiae copia abundat, ut inde non sine arte et delectatione declamationum argumenta depromere licet, quibus et dignitate et utilitate alia vlla praestare fortiter negamus. Felicius profecto ageretur cum inuenture scholastica, si quavis occasione data sacratissimis nostrae religionis mysteriis initiatetur, ne piae litteris profanis sacrae sorderent, aut vilescerent umquam. Cum fallorum multorumque deorum cultores pudendarum suarum diuinitatum non puduit, quas panegyricis sermonibus studiosissime condecorant; et grauissimi viri regum principumque suorum laudes adeo efferre non erubescunt, ut fideli suspicionem faciant: cur nos quaeſo venerabilis nostri DEI ipsiusque laudum puderet? Digna utique sunt beneficia, quibus indulgentissimum NUMEN de nobis immortaliter meritum est, ut nulla aetas de illis conticescat, eorumque grata celebratione non tempaſ ſolum ſed ludi etiam resonent. Sint haec vulgaria, habeantur leuiora et minoris aestimentur a profanis hominibus: non tamen erit, cur ex hac parte circumueniri nos patiamur, rectius quippe edociti, quantum praestent aeterna caducis, diuina humanis.



manis. Nec utilitas maior aliunde exspectanda est, vt quae ab his argumentis ad ipsam aeternitatem transit, cui tori viuimus. Quamobrem nemo nobis vitio vertet, quod in his tabulis sacra themata declamationum proponenda duximus. Etenim temporis ratio et laudabilis scholae nostrae consuetudo postulat, ut exacto semestri hiberno publica lustratione ex speciminibus singularum classium, industriae et profectuum ratio illis, quorum haec scire interest, constet, et academiae candidati, quos iam ultra XXX vel studiorum conditio, vel aetas prouectior, vel parentum iussa, vel aliae rationes hinc auocant, manumittantur. Inter hos VIII alumni classis primae publice scholam valere iubebunt. Ex ordine vero selecto, qui die *II aprilis*, ante meridiem examen subibit, ad academiam transibunt V ingenui et bonae spei iuuenes ultimos simul sermones habituri, IOANNES MICHAEL LEVINVS WETZEL, *onoldinus*, qui VII. annos in disciplina nostra, vnum vero et VI. menses in classe selecta eximio conatu transegit, MATTHIAS CHRISTOPHORVS MITTELSTEDT, *frisacco mesomarchicus*, excitatoris ingenii adolescens, GOTTLÖB ERNESTVS MÜLLER, *halensis*, et ERNESTVS GOTTHOLD STRVVE, *primislauiensis*, labiosissimi adolescentes, qui III annum singuli in hac classe consumserunt suis partibus gnauiter fundi, et ADAM GOTTLIEB NEVBAVER,

N 4

ha-



*halensis* qui VI menses in illo stadio diligenter decurrit. Quibus hanc mutationem gratulati, felicem et faustam emigrationem ac beneficiorum perpetuitatem et quotidiana incrementa a DEO, rerum nostrarum arbitro omnisque felicitatis statore precamur, ut spei quam def se excitarunt, abunde satisfaciant.



PRO-



PROGRAMMA  
DE  
VTILITATE EX PIETATE IN  
LITTERAS REDVNDANTE  
AD  
EXAMEN SOLEMNE  
SCHOLAE LATINAЕ  
IN ORPHANOTROPHEO GLAVCHENSI  
D. VIII. ET VIII. OCTOB. ANNI CICCC XXXI.

**I**nsedit in multorum animis, atque in uetera-  
uit proh dolor! opinio, veram in DEVM  
optimum maximum pietatem litterarum cul-  
toribus minus conuenire, iisque studiorum  
impedimenta ponere. Qua sententia dubito, an  
alia vñquam fuerit, et a vero remotior: et ipsis lit-  
teris periculosior, licet specie veri et rationibus ad  
circumueniendum callide excogitatis non careat;  
nec proletarios tantum et capite censos, sed classi-  
cos et primi ordinis in ciuitate litteraria viros pa-  
tronos habeat, qui vel pietatem penitus ignorant,  
vel ab eruditione et sapientia vera longe absunt,  
vel ut prudenter agere et per officiorum ratio-  
nes bonam mentem negligere, aut certe excusa-  
tius illam pessundare videantur, in hanc opinio-  
nem animis pedibusque transeunt, illamque vi-

N 5

uen-



uendo confirmant. Adeo a felicitate nostra et ipso DEO, naturae prauitatem abhorremus homines, vt eius longissimo diuortio miseri delectemur, et hanc alienationem ineuitabilem et necessariam fingere, quam detestari et effugere malimus. Cui malo, quod nobiscum nascitur, in scholis alitur, in academiis inualeat, et per omnem denique vitam cum incredibili ipsius eruditionis et aeternae felicitatis iactura grastatur, vt medicina paretur, bonus quisque elaborat. Nos, vt innocentior saltem iuuentus, quae in scholis ad utilitatem publicam adoleat, rectiora edoceatur, contrarium iam demonstratum ibimus, pietatem litteris prodesse magis quam obesse, et ex ea neglecta eruditionem innumera detimenta capere.

Ante vero quam hoc fiat, ipsius pietatis explicatione opus erit, ne omnia ea, quae homines vel per ignorantiam vel inuidiam splendido hoc nomine insigniunt, intelligere existimemur. Neque enim anilis supersticio, ad conceptas formulas, inanes ritus et caerimonias solempnes obseruandas comparata: neque infucata vultus, sermonis, vitaeque ratio, aut superciliosa et severior morositas: neque civilis morum honestas, temperantia et modestia ad humanas aequi bonique leges composita: nec benignior in alios humanitas: nec demum reuerentia et naturalis amor in parentes et superiores, quam ROMANI olim pietatem vocarunt, aut si quid aliud ex natura



natura corrupta proficiscitur, pietas est. Sed ea animi diuinitus emendati et caelesti luce ac virtute iniciati integritas, qua homo cum DEO per CHRISTVM intime coniunctus, nuntio omnibus rebus aliis misso, torus ab illo pendet, et omni studio viriumque contentione id vnicce agit, ut ipsi placeat, ex eius voluniate viuat, ac familiarius cum eo coalescat, ipsoque tandem aeternum fruatur. Hanc pietatem nemo hominum a natura habet: haec sola sibi semper et ubiuis constat: haec non temporis, studiorum, viriumque partem quandam aut hominem dimidiatum, sed totum, quantus est, sibi vindicat, quem ita immutat, ut alius plane fiat; quam natura ipsum formauerat: haec non virtus est, sed omnium omnino virtutum complexus fundamentum et radix est: ad hanc aditus nemini, ne infantibus quidem et pueris praeclusus est, nullus tamen homo eam sic consequitur, ut ulteriorum progressum locus non sit: huius nobis perfectissimum exemplum CHRISTVS praeiuit, dum mortaliitate indurus in terris ageret. Quicquid hanc imaginem non refert, quam venustum, pulchrum et amabile videatur, meretricium est, pietatis nomen mentitur, et ab illa tantum differt, quantum falsum a vero, terra a caelo, umbra a corpore.

Ex hac igitur pietate, quae et quanta in litteras redundet utilitas, iam disputabimus. Varia illa et multiplex est, potest tamen commode ad ali-



aliquot potiora capita reuocari, quae ordinis  
caussa sigillatim lustrabimus. *Primum* in eo de  
litteris praecclare meretur pietas, quod  
in illarum cultoribus ignauiam pellit, et calcar  
ipfis ac stimulum addit fortissimum. Multa fa-  
stidia deuoranda, innumerae molestiae, sudore  
res et calamitates superandae, et incredibiles  
labores exantlandi sunt ab illis, qui litteris ope-  
rantur, et ad solidae eruditionis decus adspira-  
nt, quibus profecto segniter, remissius et ne-  
gligenter agere, cuticulam curare, otio diffue-  
re, sibique indulgere non licet. Quamobrem  
veterus excutiendus, animus, ne torpore um-  
quam langueat quotidie excitandus est, inpri-  
mis si naturae tarditate et stupore laborat, aut ad  
socordiam et leuitatem propendet, faces admo-  
uendae sunt et studiorum incitamenta, quae aliun-  
de quam a pietate rectius et felicius non petun-  
tur. Tantum enim neque ambitiosa valet glo-  
riae et aemulationis cupido, nec lucri et diuitia-  
rum dira fames, nec voluptatis ex litteris percep-  
tae recordatio, quantum haec vnica bonae men-  
tis integritas: quae vel horam, ne dum diem  
aut longius tempus otiose transigere, sibi viuere,  
et occasionem bene agendi negligere nefas ducit:  
quae *DEVM* obseruatorem studiorum suorum,  
censorem et monitorem praesentem habet: quae  
ultimo horam instare et rationes temporum,  
virium, sumtuum totiusque vitae, in decretorio  
die postulatum et subductum iri intelligit: quae  
omnem



omnem aeternitatem, ad quam creati sumus et viuimus a breuissima vita bene maleue, studiose negligenterue transacta pendere cogitat: quae DEO consecrata eiusque innumeris beneficiis deuincta indefesse elaborat de gratiis ei vel ipso sanguine habendis: quae, vt verbo dicam, DEI causa litteras tractat, et flagrantissimo ipsius amore tota consumitur. Fortior est hic castae mentis ad studia impetus, constantior et generosior, quam qui a gloria aliisque illecebris humanis est: numquam enim spe et fine suo excidit, numquam turbatur et a se distrahitur, sed continuus et perpetuus est, ac eundo vires acquirit.

*Secunda utilitas*, quam litterae pietati debent, in eo consistit, vt animum serenum, tranquillum, alacrem, a curis, commotionum et cupiditatum turbis vacuum reddat. Quae mentis sedatae tranquillitas dici non potest quantum iuuet ad litterarum studia, sicut turbatior et fluctuans animus ingenii vires obtundit, frangit, debilitat. Hanc vero mentis tranquillitatem et omnium curarum, cupidinumque missionem sola pietas efficacissime imperat. Nam DEVUM sibi conciliatum et propitium habere, apud illum gratia valere, ipsi omnes vitae studiorumque rationes probare, de ipsius paterno fauore et prouida cura certissimum esse, ea demum vera animi tranquillitas est, quae homini formidine, curis et cupiditatibus interdicit. Atque haec sui neglectionem acerbe vindicat. Felicius sane litterae



terae his nostris temporibus florerent: nisi qui illis se addixerunt, felicitatis et suae et aliorum oblitii, priuata commoda, pro suae quisque propensionis intemperantia sectarentur, curis et sollicitudinibus exederentur, affectuum fluctibus circumagerentur, ad mutuas digladiationes, aut illiberalia mancipiorum et parasitorum servitia et sexcenta mala abriperentur. Et bone Deus quam misere is in litteris versabitur, qui vel malorum conscientia et futurarum rerum, sane quam formidolosissimarum, terroribus angitur, vel ira vehementiori aestuat, vel tristitia grauiori deprimitur, vel lasciuia libidine vritur, vel plurius cupiditatum furiis simul exagitatur. Vilia opicia et sellulariae artes, quae corpus potissimum requirunt, forte peragi possunt animo perturbato et a laboribus distracto, litterarum certe studia sic tractari non possunt, ut quae omnes animi vires in unum collectas, bene dispositas et a perturbationibus liberas requirunt.

*Tertia pietatis utilitas est, quod frenum iniicit litterarum cultoribus, illosque intra mediocritatis limites continet, ne ad id, quod nimium est in litteris, et a vitio non differt, intemperanter abripiantur. Grauissimus morbus est et eruditioni nocentissimus studiorum praecipitatio, in quam facillime delabuntur, qui vigore et immoderata alacritate abundant, in primis si portentosae polyhistorias pruritu vellicantur.*

Hoc



Hoc morbo qui laborant, tumultuarie litteras tractant, per scientias seu earum potius superficies et extremitates peruvolant, rudem et indigestam confusae materiae molem corradunt, et dum id operam dant, ut ante maturitatem sapientiam maturent, ad perpetuam immaturitatem properant, atque in omnibus disciplinis multa discunt, nihil autem quod solidum sit, perfectum et suis partibus absolutum. Alii litterarum heluones breui tempore insatiabili voracitate omnem eruditionem deglutire, et litteris se ingurgitare satagunt, dies noctesque insomnes in libris consumunt, fortiter in seipsofaeuiunt, et non corporis solum, quod studiosissime encant, sed animi etiam robur ita conuellunt, ut post aliquot annorum intemperiem ad incitas redacti, vel omni labore supersedere et valetudinem curare necesse habeant, vel missis plerisque litteris, quas ad futuram obliuionem didicerant, aegre redeant ad sobrietatem. A qua pernicie nemo sibi melius cauet, quam intemeratae pietati deditus, illa enim vna optime prouidet, ne quid detrimenti capiant litterae ex iuuenili et concitatori festinatione. Sicut otiosos stimulat, ita etiam nimis currentes retinet et moderatur, maturae omnia, suo ordine et tempore fieri, corporis rationem haberi, rebus et laboribus singulis limites poni iubet sapientissime.

Quarto praeterea loco ab opinionibus prae*iudicatis* animum liberat pietas, quae eruditioni lon-



longe sunt perniciosissimae. Homo enim, qui se hominem esse experiundo didicit, et humanae imperfectionis conscius, nihil humani a se alienum esse nouit, nec se praeципitanter, nec alios, si homines sunt, autores coeco impetu sequetur, sed omnia legitime examinabit, a partium, sectae et officiorum studio immunis, veritatis vestigia leget, nil odio, inuidia aut amore hominum creder, sed rem uti est, ex vero, dijudicabit. Parum enim sollicitatur divina mens aliorum sententiis, externis commodis aut incommodis, et dummodo in sentiendo et agendo veri rectique sibi conscientia sit, in illo trahente immota pergit.

Accedit quinta utilitas, quae ex pietate in eruditionem deriuatur, quod et intellectum hominum et voluntatem, cuius magnum est in intellectum imperium emendat, hominem recte sapere ac iustum et aequum rebus pretium statuere docet, qua tamen re nullus vere eruditus carere potest. Etenim si quis vel omnem litterarum farraginem conquisiisset, linguas omnes calleret, historiarum vicissitudines et nexus in numerato haberet, atque artium, disciplinarum et scientiarum quarumuis ambitum emensus esset, posset is doctus, litteratus, polyhistor et multisius vocari, eruditus vero, sapiens et prudens vocari non posset: nisi animus simul e ruditate naturali vindicaretur, et iudicium hominis subigeretur, ad bona malis, meliora leuioribus,

ne-



necessaria vtilibus et haec gratis et iucundis anteponenda. Et ad veram hanc sapientiam, sine qua ipsa eruditio rudis manet, vnum pietatis iter patet, quae hominem prouidum et oculatorem reddit, vt numquam praesenti rerum grato vel ingrato sensu regatur, sed veri bonique iustum habeat, et omnia ex finibus, eorumque arctissimo vinculo diiudicet, atque illos, quo diuiniores, perenniores et vltimo fini propiores sunt, eo meliores reputet. Eadem et inclinations motusque voluntatis ita temperat, vt rerum aestimia non ab his propensionibus, sed haec potius ab illis pendeant, eaque sequantur. Tanta est et tam peruersa animi naturalis prauitas, vt nisi diuinam emendationem subierit, errore et stultitia vacare nequeat. Actiones enim omnes adeo cohaerent, vt vltimo hominis fine, ad quem nascimur et viuimus omnes, posthabito, nec velimus, neque, etiamsi vellemus, possimus bonos nobis fines praefigere, aut accommodatas ad illos consequendos vias ingredi, sed deteriora semper sequamur. Quam ob rem sacratior codex recte timorem domini sapientiae initium praecipit. Illi vero rationes suas male subducunt, qui de sapientia minus quam scientia, et de eruditione prudentiaque leuius quam doctrina laborant, vnde euenire solet, vt per omnem vitam insigniter ineptiant, magno conamine magnas saepe nugas agant, grauissimasque curas sic instituant, vt postquam fabula acta est et

O

per-



persona ipsis detrahitur, consiliorum suorum, serius tamen quam par erat, ipsos poeniteat, et vnum hunc laborum fructum habeant, se gnaui-  
ter, cum ratione, aliisque applaudentibus insa-  
niuisse, per hominum ora et sermones circum-  
uolitasse, ipsisque vanitatis spectaculum praebu-  
isse. Tantine litteratis constat stultitia? adeo-  
ne ipsis laborese operandum est ut inspi-  
plant?

Cum hoc emolumento coniunctissimum est *sex-*  
*tum*, ex eodem verae sapientiae studio ortum,  
quod pietas ad veram et aeternam utilitatem,  
litterarum usuram concedit. Non scholae et um-  
brae sed vitae et aeternitati discimus, aut di-  
scere debemus litteras, magna igitur eruditionis  
pars est, eruditione recte uti. Quae TANTALI  
apud poetas fortuna fuit, ut fame sitique confi-  
ceretur in mediis vndis fructibusque, eadem  
multorum doctorum conditio est, quibus ira-  
tum numen, vna cum casta mente ab ipsis sus-  
que deque habita, litterarum, quibus circumfluunt  
usuram ademit. Nec sibi nec aliis vere profunt  
doctrina sua, auaris simillimi, qui opes corra-  
dere norunt, illis frui nesciunt. Pietas vero uti-  
lem et fructuosam fieri iubet eruditionem, homi-  
nem omnibus usurpandum permittit, et facit ut  
vel mediocriter doctus, modestus, facilis et la-  
boriosus plures fructus ad utilitatem publicam  
conferat, quam multa inutilia terrae pondera,  
litteris onusti, earum tamen tenacissimi.

Septi-



Septimum litterarum *commodum* ex bona mente redundans in eo consistit, ut contra vitia eruditorum visitatissima, optimum sit praesentissimumque remedium. Habent singulae hominum aetates, vitae conditiones, et ordines sua propria vitia, adeo familiaria, ut vix ac ne vix quidem nonnulla eorum, omnia vero numquam, homini sibi relicto per naturae corruptionem ad optimarum rerum abusum pronae, evitare liceat. Litteratorum in primis familia tot abundat vitiis domesticis, ut ipsa librorum enumeratio, qui in illis explicandis occupantur, librum faciat. Et quis nisi in litterario orbe penitus hospes, fastum, temeritatem, impudenciam, sordidem, vmbriticam superbiam, circulatorias fraudes, litteraria furta, digladiationes et alia his gemina mala, quae eruditionem populantur, ignorat. Quorum si quis vnum alterumue praeterire conabitur, incidet in aliud, priori forte periculosius. Una tutissima pietatis via per hos scopulos et precipitia secure itur. Illa enim ab extremis ad mediocritatem reuocat animum, a ventosa vanitate, rerumque sacrum contemtu, quae alias a litteris diuellidifficulter possunt, conseruat, et contra haec pericula praemunit.

*Vitima utilitatis pietatis*, quae vel primo loco commemoranda fuisset, ea est, ut vires necessarias diuinitus sufficiat, laborumque felices progressiones atque exitus desideratos impertiar.

O 2

Nam



Nam quotiescumque animus sub onere laborum defatigatus et viribus exhaustus DEV M praesentem supplex veneratur, sancte amplectitur, eiusque consuetudine fruitur, non potest non ex hoc inexhausto fonte vires nouas, nouumque robur consequi, et suspiriis ac deprecationibus in se deriuare. Neque illa res alia, infractas et labefactatas vires ita instaurat, instauratas confirmat, confirmatas auget, quam efficacissimus diuini fauoris sensus, qui non solum animum recreat et refocillat, sed in ipsum corpus robore influit. Si his secundis ventis vela damus, iisque ferentibus vehimur, nemo potest credere nisi expertus, quantus cursus breui tempore conficiatur. Et sane, aut ipsum arbitrium rerumque humanarum moderamen summi DEI inficiandum est, negandumque omnes rerum enentus ex ipsius voluntate fieri, aut fatendum est, rectius rebus suis consulere neminem, quam qui de huius summi rectoris et studiorum moderatoris fauore consequendo et conseruando sollicitus est.

Plura supersunt emolumenta, quae ex hoc diuinae virtutis fonte manant, licet paullo remotius, quorsum e. g. pertinent, quod aliorum et praceptorum saepe amicitias conciliat, a sumptibus, tempore, viribus inutiliter dilapidandis, et alienis rebus agendis, homini cauet, cetera: verum cum haec leuius momentum trahant, neque tam numero et multitudine, quam pon-



pondere et praestantia rationum caussa agenda sit, et illa, quae proxime ex pietate fluxerunt, satis abunde fidem tententiae nostrae faciant; diutius huic argumento inhaerere supersedemus, si vnum dumtaxat ex innumeris testem, omni exceptione superiorem produxerimus, diuinum PAVLLVM, qui ἐν σέβειαν grauiter edicit πρὸς πάντας Φέλιμον. I TIMOTH. III.

Reliquum tamen est, ut maleferiatorum hominum officias examinemus, et obiectionibus eorumdem obuiam eamus: a quibus tamen, si serio res agitur, non erit, quod caussae nostrae multum timeamus. Una illarum, eaque grauissima est, multam iacturam temporis fieri per pietatis exercitia, preces cetera, quod longe felicius ad studia insumi posset. Tria vero sunt, quibus hic fumus dispelli potest, si primum dicamus, longe plus temporis ab aliis, qui nihilosecius magna doctrinae gloria turgent, inutiliter consumi ad explendas cupiditates, et vana illa studia tractanda, quae, ut numquam profutura, fastidit animus DEO sacratus. Certum deinde est et exploratum, ad recreationem et instaurationem virium vicissitudine quadam opus esse, quam felicissime his diuinis interstitiis parari demonstrauimus. Nemo tandem dubabit, quin haec temporis iactura, si iactura dicenda est, quod DEO deuouetur, felicissime compensari possit numinis fauore.

Prouocant etiam profani homines ad innumera exempla castarum mentium, quae in litterarum studiis rudes et a doctrina alienissimae manserunt, et in quibus haec pietatis uilitas minus se probauit. Qua fallacia, ut in scholis loquimur, caussae non caussae, satis callidas fraudes necunt, solutu tamen non admodum difficiles. Non enim sola pietas ad eruditionem sufficit, quod nemini umquam, ne febricitanti quidem in mentem venit. Plura sane, ingenium natura non ineptum, bona institutio, discendi ardor, et diligens cultura ad illam requiruntur: id tamen non efficient hi nequitiae patroni, bonam mentem in caussa fuisse, cui, quod aliunde accidit, perperam et iniuriose tribuitur. Poteat etiam hoc telum ita retorqueri, ut verius affirmemus longe plures profligatis moribus, flagitiis, cupiditatibus et ipsa improbitate a doctrina impediri.

Aliud praesidium contrariae sententiae in eo quaeritur, quod multi impii, ab hac saltē diuina virtute alienissimi homines, eruditione claruerunt. Verum licet liberalius hoc ipsis concedamus, omni tamen adseueratione affirmamus, longe eruditiores et sapientiores illos futuros fuisse, accedente pietate, et longe maiorem in ipsis aliasque redundaturam fuisse uilitatem.

Addunt pietatis contemtores, per sacras tabulas omnia abneganda, ipsam eruditionem et sapientiam flocci pendendam esse. Quod vere qui-



quidem, sed inuidiose tamen, vafre, et mali-  
tiose dicunt. Nam et ea sapientia, quae con-  
temni debet, iejuna, imaginaria, fictitia, nulla  
est, et ipsas litteras abnegare, est minoris illas  
facere quam diuinam et aeternam sapientiam,  
iisque non ad fastum et ultra limites, sed mo-  
deste, suo loco, suaque opportunitate vti. Quem-  
admodum, si ipsam vitam abnegare et odisse  
iubemur, nemo sanus id de interfectione sui et  
ipsius vitae contemtione interpretabitur, eadem  
ratione eruditionem abnegando eruditii euadi-  
mus.

Nec defunt qui litteratorum sortem conque-  
runtur et insuperabiles difficultates obtendunt,  
quibus virtutis et bonae mentis studium circum-  
septum teneatur, ac si miraculis et prodigiis opus  
esset ad illas superandas et haec studia coniungenda.  
Hi tamen non in virtutem, sed litteras  
iniurii sunt, quae aeternum auerruncandae es-  
sent, si pietatem arcerent, hominesque a felici-  
tate sua distraherent. Potest his pudor subfun-  
di multis praeclaris exemplis virorum, qui  
vtramque prouinciam per se coniunctissimam  
studiose ornarunt, et ita litteras tractarunt, ut  
pietatis detrimentum nullum, pietatem vero,  
ut litterae multa incrementa caperent.

Alii tandem audacter calumniantur, pietatem  
barbariem et ignorantiam in orbem inuexisse,  
ipsaque leges diuinias velle, ut ratione eiurata,  
et posthabita, stulti fiamus. Sed hi maculam,

quam innocentissimis mentibus adspergere student, sibi ipsis inurunt, et vel ignorantiam produnt, dum superstitionem pro pietate habent, vel ignoriniosam malitiam declarant, dum obfuscatae et febriculosa rationis fugam, rectumque et suis limitibus circumscriptum usum fanae rationis, eius eiurationem vocant.

Ex illis quae hactenus differuimus, satis apparet, et quam male suis partibus satisfaciant paedagogi, qui laboriosissime quidem iuuenturem, suae curae concreditam, ad litteras formant, mentis tamen emendationem prorsus negligunt: et quid caussae sit, cur officii religione teneri nos credamus ad bonae mentis studium in schola nostra sancte vrgendum; quo nobis adeo nihil prius, nihil antiquius est, ut operam et oleum in illis pueris perdidisse putemus, qui ad illam se formari non patiuntur. Caste hoc et intemperate factum esse, vos, in primis testamur, optimi iuuenes, qui iam ex disciplina nostra manumitemini. Et vtinam vos omnes huius litterarum et pietatis consortii et conspirationis felicissimae testes ac documenta producere liceret, qui re ipsa comprobarent hanc bonae mentis cum eruditione coniunctionem. Verum, si quid nostra apud vos valet auctoritas, postremum hoc a vobis nos impetrare finite, aut a vobismet ipsi hoc impetrare, ut intemeratae pietatis studium indefesse suscipiatis, et hunc tramitem, quem toties totiesque vobis paecepimus, ingressi,



gressi, ab eo umquam recedere, nefas habeatis neque cum casta mente pariter ac cum schola, bonae mentis sede, diuortium fecisse arbitremini. Ita DEVS profectionem vestram fortunabit, ita felicissime pericula academica praeteribitis, nostramque de vobis exspectationem non frustrabimini.

Vos vero studiorum nostrorum patronos et fautores, qui nobis bene cupere nouis quotidie voluntatis vestrae significationibus declaratis, obseruanter et officiose rogamus, vt si per grauiora negotia fieri potest, lustrationem iuuentutis nostrae solemniores, vestra praesentia condoreatis, et tam declamationibus, quam examini linguis auribusque faueatis, nec tempus male locasse existimetis, quod ad iuuentutem vestro fauore iuflammandam impenditis. Posteriori lustrationis die, VI ordinis selecti ciues laboribus scholasticis bene defuncti ultimos sermones habebunt CHRISTIAN. GOTTLÖB HEERMANN. IO. KAGEL, et CHRISTIAN FRIDERIGVS SCHMERWITZ, quorum primus quinque et dimidium, secundus quinque, tertius septem annos in disciplina nostra, singuli vero integrum annum in hac suprema classe obsequentissime et diligenter transegerunt. (a) MICHAEL FRIDERIC. VNRVHE, (b) IOH. GEORG. BVCHOLZ, et HEN-

O 5 RIC.

(a) Collega paedagogii, quod in coenobio bergensi prope MAGDEBURGVM floret. (b) BEROLINI conliarius aulicus et caussarum capitalium.



RIC. CHRISTIAN. HOLLAENDER, qui VI menses  
in hoc ordine honeste et laudabiliter consumse-  
runt, vltimus II et sesqui annum, reliqui duo  
biennium in hac schola fuerunt bonae mentis  
et litterarum elegantiorum studiosissimi. Faxit  
DEVS O.M. vt bonis omnibus cumulati singuli  
et publicae felicitati diu intersint.



PRO-



# PROGRAMMA

DE

## CORPORIS MOTU ATQVE EXERCITATIONE LITTE- RATIS NECESSARIA

AD

EXAMEN SOLEMNE  
SCHOLAE LATINAЕ

IN ORPHANOTROPHEO GLAVCHENSI

PRID. CAL. ET IPSIS CAL. APRIL. ANNI ID CCXXXII.

**C**orporis non minus quam animi rationem habendam esse ab eruditis, verae felicitatis cupidis, et vnum, quod ad illum patet, sapientiae iter ingressis, neminem fore arbitror qui dubitet: si cogitauerit litteratos non desisse homines esse corpore et anima compositos, eamque ob causam nec posse felicitatis compotes ante reputari, quam ex utraque hac sui parte sint felices. Nisi enim aliquis se hominem, seu spiritum corpore indutum esse ignorat, aut satis febriculose in EPICVRI intermundiis inter umbras et larvas corpore destitutas versari somniat, aut si mauis id sibi videtur consecutus, ut per mortem philosophicam rotus mens factus sit, experiundo intelligit miseram esse sortem suam, neque omnibus numeris absolu-



solutam felicitatem, quam diu corpore, hoc est  
dimidiis aegre laborat. Quare in ipsam huma-  
nitatem, et, quod maximum nefas est, DEVVM  
conditorem iniurii sunt, et fine, ad quem creati  
sunt excidunt, qui infelici ac nefario diuortio  
animum a corpore separant, quae DEVS voluit  
esse coniunctissima, licet irrito satis et longe va-  
nissimo conamine. Arctius enim vinculum est,  
quo animus cum corpore cohaeret, quam vt ille  
recte excoli et perpoliri aut bene se habere pos-  
sit, hoc penitus neglecto et male disposito. Quam  
diu hoc corporis domicilium inhabitamus, non  
potest animus tanta intercapedine a corpore di-  
strahi, hoc est homo a se ipso, vt incommodi-  
tates, dolores et tormenta eius non sentiat, il-  
lisque a meditationibus numquam impediatur,  
aut sine cerebro cogitet. Et quem tandem in  
alium in finem animus eruditur, ac tot scientia-  
rum opes corraduntur, quam vt ad usum con-  
ferantur et in hoc terrarum orbe bene locentur,  
quod tamen, ni totus fallor, sine corpore non  
fiet. Mouit hoc PLATONEM in corpus, illum  
animae carcerem, alias iniquiorem, vt suis au-  
tor grauissimus fieret, ne corpus exerceant sine  
animo, neque animum sine corpore.

Sane quam praeclare cum genere humano age-  
retur, si nulli sapientum nomen gererent, quam  
qui vere sapiunt: verum plerique, qui ultra  
vulgus sapere videntur et suae famae satis securi-  
sunt, in hoc genere admodum inepte sapiunt,

vt



vt memoriam litteris et imaginibus, caput fumo, corpus morbis conficere, quam animum ad rectum veri et falsi, boni malique sensum et corpus ad sanitatem componere malint. Nihil ex cogitari potest ineptius his hominibus, qui sex centas philosophorum et metaphysicorum subtilissimas controuersias rimantur, astronomorum itinera, planetarum orbitas et dimensiones per currunt, antiquitatis exesa monumenta eruunt et in his mirum quantum a se remotis rebus, ne que umquam forte profuturis, vitam consumunt, sui ipsorum oblii, corporis valetudinisque incurii, et eorum quae ad se maxime pertinent adeo ignari, ut nihil supra. Sed satis graues huius insaniae poenas dant, cum diuina vindicta non solum sanam mentem ipsis ademit, sed sui ipsorum etiam carnifices et tortores constituit. Vnde laboriosissimi sunt, et incredibilem industriam ponunt in se ipsis cruciandis et enecandis. Quotus enim quisque est ex hac febriculosorum hominum turba, qui non a serena mente ad obscuritatem et caliginem, ab humanitate ad atram bilem transductus sanis hominibus, licet litteras nulli didicerint, risum et stomachum moueat? Qui non ad molestissimam austерitatem et supercilium et omnes mores ita componat, ut sibi aliisque grauis fiat et intolerabilis? Hi umbratrici homines aut hominum terriculamenta verbo laedantur, ex quavis re lites necunt, quiduis fastidiunt et non solum in angusto capi-

tule



tulo grauissimas turbas fouent, sed cum toto humano genere aut omni potius rerum vniuersitate, adeoque secum ipsis bella gerunt funestissima, ut a delirio et furore proxime absint. Alii acutissimis doloribus, arthrite, calculo, aliisque equuleis exquisite cruciantur, quae pestes magnam litteratorum miseriae partem faciunt.

Conclamandum igitur esset de eruditione, ea que penitus eiuranda et ex hominum societate auerruncanda, si ineuitabilis esset haec fortuna. Verum salua res est. Possunt eruditii haec mala omnia praeterire, si se ipsos cognoscere, quam per alia omnia vagari malunt, et ad sui cogitationem conuersi, corpori curando vel tantillum tempus impendere, quantum inutiles quaedam disciplinae absunt. Quae tamen ad desidiam et effeminatam quorumdam mollitatem colorandam aut excusandam dicta putari, aut ita intelligi nolim, ac si litterati homines cuticulam curare, gulae indulgere, et voluptatibus circumfluere iuberentur. Ab illa *charybde* non magis quam ab hac *scylla* sibi cauere debent litterarum cultores, et media via sobriae et temperantis diaetae ad felicitatem transire.

Longius iter esset, si per singulas huius diaetae partes eundo, ea omnia commemorare vellemus, quae de temperantia, animi tranquillitate, quietis laborisque vicissitudinibus aequatis, potus leuioris abundantia, ceteris dici possent et a sapientis-



tissimis viris dicta sunt. Quam ob rem motum dumtaxat corporis voluntarium, exercitationem et laborem, horum malorum medicinam vnam omnium praesentissimam litteratis commendabimus: qui a plerisque quidem negligitur cum magna valetudinis et sanae mentis iactura, in hac tamen causa maximum momentum trahit. Eric illius ante omnia *necessitas* demonstranda, et a quorumdam contentionibus vindicanda, post etiam *ratio* explicanda et modus brevissime prae-  
cipiendus.

Atque ut inde demonstrationis initium profi-  
scatur, vnde maximum causae praesidium est:  
illae rationes reliquarum agmen ducant, quae  
ex rei natura et corporis constitutione, seu, ut  
philosophi loquuntur, *a priori* desumuntur.  
Quod, aut plane fallimur, aut ita demum legi-  
time fiet, si praemonuerimus, illum nobis homi-  
nem sanum esse, cuius corpus partium solida-  
rum et fluidarum proportionatam quantitatem,  
legitimam qualitatem et debitos motus vitales  
habet, ad commercium animi cum corpore con-  
seruandum, ut anima a corpore in operationi-  
bus suis non impediatur, sed hoc illi ad pera-  
genda sua negotia ex fine creatoris inferuiat.  
Quicquid ad morbos pertinet, et huic sanitati  
contrarium est, vel ex materiae nimia abundan-  
tia, aut peccante qualitate prouenit, vel ex  
motu interno illegitimo. Iam ex hac descriptio-

ne



ne sanitatis motum corporis externum necessarium esse sic argumentamur.

Primo, quia *partium solidarum* motum tonicum, seu fibrarum omnium expansionem elasticam et vibratoriam ac legitimam constrictio-  
num et relaxationum reciprocationem conser-  
uat, qua ad ipsum sanguinis circuitum eiusque  
digestionem, calorem et secretionem, atque ad  
externam sensationem carere non possumus: re-  
missior fit et languidior hic tonus cum incredi-  
bili negotii vitalis detimento; nisi per volun-  
tarium et animalem motum excitatur, stimula-  
tur et augetur.

Secundo loco ab exercitio corporis *partium fluidarum* legitima constitutio pendet: ut quo  
sanguinis a corde per arterias in omnia membra  
profluentis et per venas inde ad cor redeuntis  
circuitus promouetur, et concitator redditur,  
ut non solum per subtilissimos meatus protru-  
datur et nullibi *sætiv* faciat, sed felicius etiam  
et expeditius progrediatur. Nam cum in agi-  
tatione membrorum maior per musculos impe-  
tus, fortiorque illorum compressio mutua fit:  
non potest non sanguis fortius exprimi, citius  
in vasa sua colligi, et ad progressionem propelli,  
quae circulatio si deficit sanguis putredine affi-  
citur, respiratio cessat, et ipsa vita extingui-  
tur. Eodem deinde corporis motu *quantitas* ni-  
mia *sanguinis* minuitur. Licet enim non desint  
qui hoc balsanum vitae nimium corpori inesse  
posse



posse negant: experientia tamen satis comprobatur, ipsam sanguinis copiam abundantiorum morbum esse et matrem multorum morborum foecundissimam. A qua felicius caueri non potest, quam frequentiore corporis motu. Nam intra laborandum transpiratio et insensibilis, et sensibilis nonnumquam per sudorem multum augetur, quae deceffio omnis a sanguine fit, ex quo reliqui humores secernuntur.

Motu praeterea corporis, *qualitas sanguinis* emendatior conseruatur, ne crassior factus corrumpatur. Constat enim tot partibus heterogeneis et a se alienissimis, ad tot diuersissimos fines etiam destinatis, ut vnam massam constitueret et in mixtione debita conseruari non possent: nisi motus continuus circulatorius id efficeret, augendus per externum motum et secretio humorum reliquorum non accederet. Numquam aer per pulmones intromissus cum sanguine misceretur, chylus et lympha cum eodem coirent, grauiores particulae in leuiori fero natarent: nisi sanguis motu continuo agitaretur.

Reliqui tandem *humores* omnes correctiores erunt. Quo melius enim sanguis per corpus distribuitur et per tot diuersissime comparatas glandulas percolatur: eo felicius vbique separantur particulae quibus carere potest, et quae vel ad alios fines necessariae sunt, vel ut superfluae et fine suo iam functae ex corpore remouentur.

P

Succe-



Succedant iam alia argumenta *a posteriori*, ut aiunt, defumta quae ad plurimum forte intelligentiam pertinebunt: cum illa priora cognitionem hominis physicam requirunt. In his primum locum iure occupat diuinum oraculum, quo deus hominum stator et arbiter labore corporis omnibus praecepit panemque in sudore faciei comedendum edixit GENES. III, 19. Egit sapientissimus deus in hac sententia pronuntianda non magis iudicis aequissimi, quam benignissimi patris et medici partes: dum eam homini poenam infligendam decreuit, quae ad corruptum hominis statum esset accommodatisima, et medicinae simul locum sustineret.

Sequitur experientia innumeris in utramque partem exemplis comprobans hanc exercitacionum necessitatem. Ecquis enim fabrorum, rusticorum, hominumque ad operas agrestes factorum, illis morbis conficitur, quibus eruditii alii que homines sedentarii misere vexantur. Quam rara sunt et inaudita inter illos homines vel ipsa plerorumque morborum nomina, quibus diutum, litterariorum et otiosorum hominum aedes personant. Quam robusti sunt ad aeris, cibi potusue et rerum omnium externalium vicissitudines atque incommoda aequa perferenda. Et bone deus! quam contra debilis est, languens trepidans et infirma litteratorum familia, ut vix homines crederes, quam pallidae facies, quam difficilis respiratio, quam incuruata et de-  
pres-



pressior statura, quanta ciborum inedia et indigestio, quae cum malis pluribus ex hac corporis mouendi neglectione enascuntur.

Ipsa natura, quam quo quis proprius sequitur eo sapientior est, huius rei exemplum nobis praeit in tenera infantum aetate, quae a rationis usu longe abest, atque internis instinctibus et sensibus tota regitur, et ipsis animantium catullis, vbi omnia ad motum, tripudia, cursus, vitulantiumque saltationes composita sunt, quibus si pueri interdicuntur, viribus franguntur, et ab alacritate et ipso corporis incremento impediuntur.

Testimoniis quae antiquissimorum pariter quam recentiorum auctorum grauissimorum ingenti numero adduci possent, opus quidem non est, vbi res ipsae loquuntur. Si quid tamen exemplorum valet auctoritas, quae profecto non debet omnino nulla esse: agite, intrueamnr pythagoreos, cordatisimos mortales, de quorum moribus apud STANLEIVM, SCHEFFERVM aliquosque ex IAMBILICO potissimum relatum legimus, eos quotidie aliquot horas corporis exercitacionibus insumisse, neque umquam a studiis ad cibum, aut a cibo ad studia transisse, sed interualla obambulationis, cursus, luctae aliorumque exercitiorum sancte obseruasse. Quae externa ἀσκησις cum incredibili

P. 2

cibo-



ciborum abstinentia et affectuum tempe-  
rantia coniuncta non potuit non ipsis robur ei-  
sanam mentem conciliare. Idem de PERSARVM  
et GRAECORVM antiquorum moribus perhibent  
scriptores illorum temporum, qui iuuentutem  
studiis consecratam in palaestra et multo puluere  
ita exercuerunt, ut ab hac artium *gymnastica-  
rum* cum ipsis litterarum studiis coniunctione,  
ad scholas et litterarum ludos nomen *gymnasio-  
rum* transiret: qua in re ROMANOS habuerunt  
imitatores.

Verendum est ne quis existimet, nimis multa  
de re euidentissima disputari. Sed cum nihil  
dicatur adeo certum et euidentis, quod non,  
his maxime contentiosissimis temporibus in veri  
certique suspicionem adducatur, et argumenta-  
tionibus conuellatur: nemini caussam nostram  
bene egisse videbimus prius, quam obiectiones  
refutauerimus, quibus hanc sententiam dubiam  
facere satagunt viri grauissimi; dum non sine  
contentione opinantur, *tempus perdi* a studiis  
vaouum, quod si vel omne bene locaretur, vix  
ac ne vix quidem ad eruditionem sufficeret,  
artem longam esse, vitam breuem, illam potis-  
simum aeratem in scholis et academiis trasigen-  
dam arctioribus terminis circumscribi, quam ut  
cum sumtuum iactura ad corpus mouendum im-  
pendi possit: *multam* deinde *molestiam* creare, et  
valetudini magis obesse hunc motum quam pro-  
desse, teste multorum experientia, qui ebullien-  
tis



is sanguinis effervescentiam magnamque motuum  
internorum intemperiem, immo dolores vehe-  
mentiores conqueruntur: *occasionem* etiam *de-*  
*esse* ad iuuentutem honeste exercendam, atque  
eruditis laborem accommodatum suppeditan-  
dum, neque opportunitates locorum et officiorum  
quorumuis eiusmodi exercitationes admittere:  
*nouam* praeterea et recens excogitata *esse*  
quorundam medicorum *sententiam*, maioribus  
plane incognitam, inutilem quoque, dum multa  
exempla prostant hominum sine vlo aut cum  
admodum exiguo corporis motu bene et recte  
se habentium: *se* denique *ipos nil incommodi*  
*percipere ex laborum neglectu*, et si vel maxime  
perciperent per negotiorum multitudinem sibi  
haec corporis exercitia non licere. Potiora  
haec sunt licet forte non omnia, quae ad hanc  
motus neglectionem defendendam, aut certe  
excusandam, in medium proferuntur, speciosius  
tamen quam verius. Nam admodum abunde com-  
pensatur illa temporis iactura, alacritate animi,  
qui serenus et excitatus se ipsum mire superat,  
et una hora plus proficit, quam vel decem  
aliis, quibus male dispositus obtusus et infra-  
ctus ad litteras inuita natura cogitur. Neque  
vmbrae sed vitae discere debemus, atque non  
tam de multis scientia in futuram obliuionem cor-  
radenda, quam de sapientia et sana mente labo-  
randum est, quae per omnem vitam maxime  
valet, sine liberali tamen erectioris animi exci-  
tatione

tatione et sano corpore non obtinetur: longior etiam, molestior et periculosior temporis sumtuum et ipsarum denique litterarum iactura fit, si quis intemperie litterarum morbum contraxit, et lecto adfixus in medicorum disciplinam concedit, difficilias tunc cum multo dispendio elicetur hostis, qui longe facilius et felicius arceri potuisset. *Secunda obiectio* ex molliore et volvutu more animo est, vsu, labore improbo et ipso exercitio superanda. Solent rerum primordia multis difficultatibus et molestiis circumsepiam esse, quae superatae faciliorem progressionem praebent: nec desultorie, aut cum impetu fortiori, vnde pleraque illa incommoda enascuntur, sed per graduum successionem corpus ad exercitia subigendum est. Et quam quaeso indefessi sumus in deuorandis molestiis ob leuioris alicuius utilitatis spem: quidni igitur incomparabile et pretiosissimum sanitatis bonum animos stimulare deberet, ad quidvis tentandum, et opportunitates ingeniose excogitandas? quae *tertia* simul *obiectio* erat. Illis quidem, quibus frequentior quaedam iuuentus commissa est, satis curarum et sollicitudinum facebit parare illas occasiones, materiam et opportunitatem sufficere: at si quis de se ipso sollicitus est, non destituetur profecto motione, nisi forte manibus pedibusque destitutus. Quae *quarto loco* nouitas huius sententiae proponitur, et falsa est, et ad inuidiam magis quam refutationem comparata. *Habent singula saecu-*



saecula suos morbos sibi proprios et peculiares quibus propria etiam et peculiaris medicina paranda est. Quare, cum in hac repuerascentis mundi senectute omnia ad mollitatem, desidiam, voluptatem et corporis interitum atque perniciem conspirant: non est cur adeo miremur cordatores medicos admodum commendare hanc corporis exercitationem, quam prisci mortales sua sponte subierunt.

Si quae etiam exempla huic sententiae contraria adsunt: forte saniores essent hi homines quam sunt, aut sibi esse videntur, nam et ignorantia morbi morbus est, aut diutius sani manerent. Neque omnibus una huius motus necessitas est, quo alii aliis facilis carent, et longius etiam, tutissima tamen via feligenda est. Reclus enim praeueniuntur et evitantur haec mala, quam ut cum multo discrimine exspectentur. Quod si quis officiorum religione arcetur a cura corporis, is se utilitati aliorum sacrum esse, et ante diem suum ad interitum celeriorem deuotum existimet. Verum et haec inepta plerumque excusatio mollitiei praetexitur: nulla enim neque humana neque diuina religio esse potest, ad enecandos nosmet ipsos. Multo felicius pruinciam suam quisque ornabit, si integris semper et per curam corporis instauratis viribus ad labores accedet.

Supremus restat actus, ex ordine, quem nobis praecepimus obeundus, ut corporis exercen-

*di modum rationesque explicemus: in quo nobis  
breuissimis esse licebit; quod a vera sapientia  
longissime abest, formularia specialiorque illa-  
rum rerum determinatio, quae a cuiusuis re-  
rum ratione et conditionibus pendent. Quare  
vnam hanc legem statuamus. In quo exercita-  
tionum honestarum et licitarum genere sua quem-  
que aetas, animi inclinatio, viuendi ratio, et  
officiorum conditio exerceri iuber, quantum  
suae quisque constitutioni necessarium intelligit,  
tantum et ita se exerceat. Nam sicut cibi ca-  
piendi, nec quantitas, nec qualitas, nec tem-  
pus, regulis definiri aliis potest, ita et in hac  
re suum singulis integrum esto iudicium. Neta-  
men lectorum spem penitus hic destituamus, de his  
cautionibus illos monendos esse arbitramur: *len-  
tam et moderatam sed longiorem et continuatam  
motionem praestare vehementiore, immodecā et co-  
breuiore: cauendum etiam esse ne a motu sudore  
madidi frigescamus: porro ad instaurandam va-  
letudinem iam fractam plus motus requiri, quam  
ad conseruandam: illos etiam quorum motus in-  
terni difficilius procedunt animique commotiones  
vehementiores et longiores sunt, degrius carere  
motu externo, quam qui tranquilliore et leuiore  
animo sunt: utilem denique motum inutili, gra-  
tum ingrato praferendum esse; ut animus eo me-  
lius recreetur et a cogitationibus seuerioribus  
abstrahatur. Olim eruditī non ita a communi  
homi-**



hominum genere separati fuerunt, ut opifcia et alia manuaria opera, tamquam infra dignitatem suam posita, adeo despicerent: vnde et vietum habuerunt, et animi recreationem, et quod longe maximum est sanum corpus. Et rectius forte omnia inter eruditos se haberent, si haec consuetudo non penitus obsoleuisset. Multa certe inutilia terrae pondera haberent, quo de pane sibi consulerent. In honestas vero exercitaciones, quibus bona mens violatur, animus corrumperetur et ludicus fit, cauendas esse, quam quae maxime quilibet facile intelligit.

Haec omnia si recte considerantur, nemo inanem operam posuisse nos crederet, in iuuentute, quae in hac schola nostra frequens adolefecit, ad corporis pariter atque animi exercitationes et vtrumque puluerem admouenda. Nam quo sanctius illa ab omni ludendi grassandi et circumuagandi licentia interdicitur, et ad continuam diligentiam in litteris stimulatur, quo arctius etiam interclusa tenetur: eo magis etiam nostrarum partium esse duximus prouidere, ne quid detrimenti caperet valetudo ab hac tranquilla, sedentaria et seueriore vita. Curauius hunc in finem ut materia et opportunitas agitandi corpus numquam deesset, et illis maxime, qui motus indigentiores sunt, ordinariae horae constituerentur eadem industria obeundae, qua reliquarum lectionum labores peraguntur. Praeterea si sudum est, per ordines in campum eductur

cuntur, ad liberius circumcursitandum et modice ludendum. Aestiuo etiam tempore, quatuor per hebdomadem diebus duas horas in agros exspatiatum eunt, in certos ordines distributi ut non solum confabulando animum a studiis fessum recreant, sed corpus etiam moueant, et ad labores tempestatemque ferendam confirment. Praeest singulis his ordinibus aliquis moderator, ad intemperiem et petulantiam, quae ab illa aetate et frequentia vix abest, prohibiturus. Neque euentus adhuc de fuit optatissimus, ut huius nos consilii non poeniteat, quicquid imprudentioribus nonnullis pueris contra videatur et parentibus harum rerum ignarisi. Quorum gratia illud argumentum hoc programmate tractandum sumsimus, cum temporis ratio iam postulauit, ut ex more nostro, examinis solemnitas indiceretur, et aliquot classis selectae ciues ad academiam rite dimitterentur. Tres enim erectioris animi adolescentes, laudabili conatu omnem scholasticum cursum conferunt et reliquarum classium stadia emensi in difficiliori hoc puluere, tot praeclara ingenii et diligentiae specimina dederunt, ut optimam de se spem excitarent, et iam digni habeantur qui felicissimis auspiciis ad academiam emigrent. Primus illorum (a) IOACH. LEONHARD. HERMES

in

(a) WERNIGERODEAE corrector meritissimus.

(b)



in hac schola quinque, et in hoc supremo ordine sesqui annum transegit et bonam mentem cum litteris, in quibus praeclare profecit, felicissime coniunxit: (b) IO. LVDOLPH. HOMMEYER in orphanotropheo VI. annos et VI menses, atque in hac classe annum integrum, et GEORG. FR. WEGNER VI menses, ita ambo consumserunt, ut diligentiam morumque integritatem praceptoribus admodum probarent. Hi postremo labore suo scholastico defuncturi ultimos sermones habebunt, et profectuum examen subibunt. Cui solemnitati vt litterarum patroni et fautores, pro sua in nos voluntate, frequentes intersint, et beneuole faueant, officiose et humanissime etiam atque etiam rogantur. Quod reliquum est, DEVUM veneramur supplices, vt non solum tribus his academie candidatis dignissimis studiorum mutationem faustam et felicem esse, atque in utilitatem publicam cedere iubeat, sed ceteris etiam, qui ex prima classe et reliquis ad altiora studia festinant, illum transitum forunet. Faxit supremum numen, ut sana omnibus mens sit in corpore sano.

(b) MAGDEBURGI ad sacrum monasterii b. MARIAE virginis conuentum adlectus.



PRO-

236 PROGRAMMA SCHOLASTICVM VII.

PROGRAMMA  
DE  
PERICVLIS ET MALIS ERV-  
DITORVM  
AD  
EXAMEN SOLEMNE  
IN ORPHANOTROPHEO GLAVCHENSI  
AD D. XVI ET XVII APRIL. cIo Io ccxxxiii.  
INSTITVENDVM.

**N**ascimur hac lege miseri mortales, vt ad felicitatem contendentibus nullum aliud, quam per innumera salutis discrimina, fortunae insidias, et variae tempestatis vicissitudines iter pateat, atque adeo in rebus humanis habeamus vel mediocriter boni parum, perfecti autem et omni ex parte beati admodum nihil. Neque illa miseria alicui aerati, vel ordini soli propria, sed vniuerso hominum generi communis est, qui ad vnum omnes insidiosissimam vitam viuunt, eamque quo splendidiorem eo etiam pericolosorem. Per alios ordines iam latius euagari nolumus, sed quod officii ratio, atque amantissima iuuentutis



tutis nostrae cura postulat, in litteratorum familia subsistemus, eorum pericula et errores commemoraturi, quibus fine suo et utilitate ex litteris capienda, nisi omnino, ex parte saltem excidunt, ut quorum hac tuto transire interest, sciant, vnde sibi parentur insidiae et damna immineant, operaे premium facturi, si vel aliquos cautos et de salute sollicitos reddiderimus. Quia in re hos nobis limites ponimus, vt in tanta periculorum litterariorum multitudine, ea omnia, quae eruditи ut homines cum aliis communia habent, praetereamus, et ex peculiaribus huic ordini grauiora dumtaxat feligamus, quae et frequen-  
tia, et exitioso damno p[re]e aliis eminent, ea-  
que ad duas classes referamus, vnam eorum,  
quae ipsam litterarum culturam impediunt, et  
interna vocari possunt, alteram *externorum*,  
quae ex doctrinae et eruditionis abusu vel lit-  
teratorum vel aliorum culpa consequuntur.

Atque ut primo loco *de internis periculis* con-  
stituatur, quae faciunt, ut homines post impro-  
bos labores multorum annorum exantatos eru-  
ditione tamen et sapientia careant, eruditionis  
vmboram consecuti: dupli potissimum ratione  
peccare videntur, qui litteris operantur, et *in*  
*delectu studiorum*, quibus se immergunt, et *in*  
*tractandi discendique modo*. Sic periculosissime  
errant, qui *in litteris feligendis* inutilia et minus  
olim profutura p[re]ferunt utilioribus et adeo  
necessariis, ut ab erudito seiungi nequeant. Quod  
ab



ab illis fieri solet, qui non ex fine et fructu, sed ex iucunditate, delectatione et, quem ipsi dicere nesciunt, gusto ac naturae impetu litteris suum preium statuunt et operam addicunt, aut otii et voluptatis causa, ad fallendum tempus studia tractant, aut, quod pueri in nundinas sine moderatore delati faciunt, in litterarum mercatu fuco, splendore, praeeuntis turbae confluxu, circumforaneorum clamoribus, ad coemendas merces feruntur. Nefando dolore encentur neesse est, qui post florem aetatis, patrimonium, immo etiam animum corporisque in litteris consumptum, dum sapere incipiunt, animaduertunt, omnia se in spem futurae obliuionis didicisse, tantique poenitentiam emisse. Inaestimabile tempus, pretiosissimos iuuentutis annos, a quibus futura salus pendet, in ornamentis eruditorum transfigere, quae cum ipsa doctrina coniuncta commendant et subleuant quosdam, sola iuuant omnino neminem, aut neglectis studiis, quae hominem vere perficiunt, et sibi aliisque utilem reddunt in subtilitatibus et minutis haerere, quae alii ne intelligunt quidem, tantum abest, ut magni faciant: quid hoc aliud est, quam tempore, sumtibus adeoque se ipso turpiter abuti, ad irreparabile sibi damnum faciendum.

Prope absunt ab hoc periculo, qui utilia quidem et necessaria, sed sine ordine, sine nexu tractant, disciplinas separant natura coniunctissimas,



mas, et toto caelo alienissimas inauspicato coniungunt, a difficilioribus ad faciliora, a posterioribus natura ad priora progrediuntur, aut morae et progressionis impatientes desultorie hinc inde vagantur, et per litterarum prouincias circumuoulant, sexcenta studia commiscent, sine interiesto respirandi otio radium ducunt, PLATONEM et EPICTETVM legunt, ex STRABONE regiones disterminant, pro rostris declamant, pedes numerant, socco et cothurno incedunt, historiam scribunt, longam ratiociniorum et demonstrationis seriem necunt, metalla tractant, antiquitatis monumenta, lapides, nummos, codices exesos rimantur, oracula sacra interpretantur, uno eodemque die eoque vel nondum integro, in CAESARE, ARISTOTELE, PINDARO, EVCLIDE, IVSTINIANO, HERODOTO, VIRGILIO et GALENO sunt, eadem hora CATULLVM et PAVLLI epistolas, CICERONIS oratorem et APVLEI ASINVM atque CORANVM er HESIODVM versant, atque id tandem efficiunt, ut dum spirans et ambulans bibliotheca esse volunt, viuum aliquod et incedens chaos exacte referant. Nolunt multum, sed quod vasto ingenio dignum sit, multa discere, quo fit, ut ex omnibus aliquid, ex toto sciant nihil. Numquam ex cibi potusque intemperie tot morbi enascuntur, quot hi litterarum heluones, dum in doctrinas se ingurgitant hac insatiabili voracitate erudita sibi vitia contrahunt.

Aliud



Aliud litteratis periculum imminet, *ex persuaſa ſtudendi ratione*, qua multi non in ingenio excolendo, et animo emendando, non in ſe ipſis erudiendis, et a ſtultitia ad veram ſapien-  
tiam traducendis elaborant, ſed in memoria exercenda et effarcienda, capite onerando, et ſcientia corradenda. Hi beatae memoriae homi-  
nes litteris onufi a meditatione, veri rectique ſenſu, ratiociniis et deliberationibus alieniſſimi, quid in rebus obuiis ſentiendum dicendumque ſit, ſciunt cum ignariſſimi, quid alii ſenſerint, dixerint, diſputauerint accurate callent, adeo ut quidquid loquantur, ſcribant, diſferant, non ipſi cogitent, ſed recordentur et meminerint. Vnde praeiudicatis opinionibus toti ſcatent, et iisdem ſententiarum limitibus circumſcribuntur, quos illi posuerunt, in quorum verba iurarunt, et a quibus vel latum vnguem recedere nefas ducunt. Vt cunque caſus fert antiqua praefare nouis, noua antiquis, hanc illam philoſophorum, theoloſorumque familiam vera falſa ſta-  
tuere affirmant, negant, in quamcunque partem illi, in quos inciderunt, quos legerunt, au-  
diuerunt, imbiberunt, forte pronuntiasſe no-  
runt. Rectius haec eruditorum mancipia, ſimu-  
acra et machinas loquentes et eruditioñis echo, vnde aliorum voces resonant, diceres quam lit-  
teratos, quam eruditos.

Qui hanc ſcylla effugiunt, in charybdin non minori ſapientiae iactura labuntur, ut imagina-  
tionis



tionis vehementioris aeftu abrepti suo per omnia ingenio abundent. Nihil illi ab aliis discunt, nihil aliunde indigent. Quam primum in disciplinas deueniunt, qua sunt arripiendi facilitate, illas perspiciunt, intelligunt, dijudicant. Non solum omnes litteras, quas perfunctorie tractarunt, vel ut canis ex NILO degustarunt, callere imaginantur, sed iudices longarumque litium arbitri sedent, sententiam ferunt, censores agunt, et nouaturiendi pruritu omnia conuellere, emendare, suis sedibus disturbare conantur. Ita feliciter vigilantes somniant, ut res, quas numquam didicerunt, disputent, doceant, aliisque persuadeant et temere effutiant, aut chartis illinant non quae cogitarunt, et meditati fuerunt, sed quod extemplo furore concitis in buccam venit, aut calamo effluxit. Posset longior census agi huiusmodi periculorum internorum, ut, si qui nimis festinant in litteris, aut taediosissimas moras necunt, inuita *minerua* profitentur artem, a qua natura abhorrent: verum quid horum est, potest id omne ad haec iam commemorata referri, a quibus nisi quis mature sibi omniqe animi prouisione cauet, fieri non potest, ut vere eruditus euadat, et sapientiam vel mediocrem consequatur.

Iam ad alteram classem venimus longe numerosiorem *externa* litteratorum *pericula* complexam, quae non ipsam eruditionem afficiunt, nec solis eruditorum nomen mentientibus pro-

Q

pria



pria sunt, sed vel ex eruditionis tam veras quam  
fictae abusu, vel aliorum ignorantia et malitia  
originem trahunt. Huc pertinet superbia, fa-  
miliarissimus litteratorum supra ignarum vulgus  
sapientium morbus, a quo vel centesimus quis-  
que inter eruditos non immunis est. Nam au-  
ctore PAVLLO, litterae dum caput implet, oc-  
cultam aliquam vim habent inflandi, ut animus  
illis facile tumeat, et efferatur. Hinc erudi-  
oculatores se esse credunt reliquis hominibus,  
quos in tenebris oberrare, se vnos luce frui ar-  
bitrantur. Nec indoctis solum, quos alto super-  
cilio contemnunt, sed etiam inferiorum ordinum  
eruditis se praferunt, qui supra mediocritatem  
sapere volunt: vnde caliginem ante se densissi-  
mam, barbariem et ignorantiam acerbe querun-  
tur; vt viam aliis fecisse, primi faciem omnibus  
praetulisse, et lucem disciplinis affudisse videan-  
tur. Ex quo fonte manat illa incredibilis glo-  
riae, famae, honorum et laudum cupiditas, in-  
clarescendi insania, eruditionis iactatio et impu-  
dentissima meritorum ostentatio, illa contradic-  
tionum impatientia, immoderata dubitandi et  
disputandi intemperantia, vna cum litibus, rixis,  
odiis, conuiciis et digladiationibus litterariis.  
Turpis est et pudenda quorumdam arrogantia,  
qui vel leuissimis rebus superbiunt, in quibus  
quod pueri in faba inuenerunt, laureolam ex  
mustaceo captantes, vel a parasitis et adulatori-  
bus ita sibi imponi patiuntur, vt communis  
patriae



patriae praeceptores, instauratores litterarum, lumina, oracula, dictatores ciuitatis eruditae se ipsos pronuntient, vel sui ipsorum tandem ita obliuiscuntur, vt se homines esse non meminissent, a quibus humani quid et errandi in primis periculum abesse nequeat. Aliorum honestior est gloriae ambitio, qui moderatius quidem, occultius et prudentius, impense tamen et vehementer honorem ex litteris affectant.

Peius longe et periculosius discriminem est, in quod multi litterarum abusu adducuntur, vt profana mente in sacra quaevis, religionem et ipsum sanctissimum NVMEN iniurii fiant. Nam ubi animus semel in admirationem sui conuersus ex nouitate et audacia gloriam sperat: mirum esset, si humanis diuinisque legibus continetur, aut quidquam sibi illicitum et ingenio non peruum putaret, aut adeo verendum, cuius sanctitate arceretur. Quod in humanis scriptis repurgandis, antiquissimis erroribus impugnandis, atque inueteratis superstitionibus debellandis aliis feliciter cessit, et famam peperit, illud nonnulli in religione tentant: in quam confundiendam et exterminandam omnem ingenii, si quod habent, aciem et litterarum arma conuentunt, idque toti agunt, vt sacratissima iura, leges diuinias, fas omne et nefas, mentis immortalitatem, superos, inferos, et malum! ipsam supremam mentem, sacratissimum et inviolabile NVMEN negent, atque vt poetarum figmenta,

Q 2

ani-



aniles fabulas, puerorum terriculamenta, et  
callidas magistratus ad continendam plebem ar-  
tes a sapientibus auerruncent.

Alii laudum incurii, quam omnes flagitiosi  
exoptant impune peccandi licentiam, tunc sibi  
consequuti videntur, si legum poenarum  
que diuinorum fidem dubiam reddiderint.  
Alii elegantia poetarum, oratorum, historico-  
rum ita fascinati, tenentur, ut summi boni,  
quod in delectatione erudita, suisque elegantiis  
et gratiis ponunt, quas soli intelligunt, iacu-  
ram metuant, si vel interdum grauissima mo-  
rum praecepta meditari, ad vitam conferre,  
aut oracula diuina, quae ad PINDARVM, DE-  
MOSHENEM, CICERONEM fordanter, robore,  
numero et elegantia carent, legere debeant.  
Longe hi fuissent feliores futuri, si litteras  
aeternum ignorassent, quas cum virtute, bom-  
mente, ipso DEO, summo bono commutarunt,  
et non ad felicitatem, sed ad perniciem et interi-  
tum didicerunt: litterae etiam haberent, quod  
sibi gratularentur, si ab his nequissimis homini-  
bus intactae mansissent, qui maculam ipsis ad-  
spergunt vix eluendam.

Sequitur aliud eruditorum malum corpori  
magis quam animae, quae tamen ipsa sic peri-  
clitatur, infestum, ut valetudinem debilitent,  
robur et vires infringant, seque ipsi enecent.  
Nam, dum necessaria corporis exercitatione, et  
alterna requie carent, cum diebus molestissimi-

noctes



noctes insomnes coniungunt, et aetatem in bibliothecis, inter mortuos, et antiquas philosophorum animas et umbras agunt; tandem ipsi illis similes euadunt: non homines sed hominum umbrae ex tumulo magicis formulis excitatae, et laruae errantes videntur, pallent, liuent, trepidant et corpus, ac si suum non esset, sed alienum sibi non satis accommodatum aegre trahunt. Chartacei hi homines non solum ad labores externos, ad aerem et tempestatem, ad conuersationem et aliorum commoda inepti sunt: sed ad ipsa studia vegetum robur amittunt, et in flore ante maturitatem marcescunt, aut quod nonnullis accidit, eruditione sua in deliria, furem et feritatem degenerant.

Cum hoc malo arte cohaeret vitae morumque obscuritas, quam vel cum morositate vel leuitate incredibili coniunctam sibi contrahunt, qui id quotidie agunt, ut mentem, cogitationes omnes, et se totos a rebus obuiis ad commune vulgus pertinentibus, immo a se ipsis abstractant et extra se in litteris versentur. Ex umbra et puluere suo ad forum, ad vitam communem euocati in alio orbe peregrinantur, sermone, vestitu, gestibus, gressu ipsoque vultu aliquid peregrinum, singulare et ab aliis hominibus longe remotum referunt: inter quos vel statuae videntur et CATONES, vel ubiuis loquacissime blaterant, suasque nugas venditant, vel declamationibus turbulentissimis ineptiunt et risum

Q 3

omni-



omnibus aut stomachum, vel sorditie fastidium mouent.

Satis frequens eruditorum periculum est eorum maxime, qui vel vere sapiunt cum scientia sua, vel noui aliquid, veri tamen et utile proferunt, ut caninam aliorum inuidiam, vanniana odia et inimicitias ferales incurvant, omnibusque grauissimae noxae, irreparabilis damni et pestis per ipsos litteris, bonis moribus, ciuitati et religioni inferendae suspicionem faciant. Omnis enim veritas odium parit, et citius literati a gloriae cupiditate, homines a se ipsis descendunt, quam eruditii ab inueterata consuetudine suspicionibus insectandi omnes, qui non communem turbam sequuntur, ilisque diem dicendi, qui reliquos errare satis temere et audacter, nisi verbis, re tamen ipsa suoque dissensu asseuerant. Quod ne a sellulariis quidem artibus abest, ut figulus figulum, id inter eruditos maxime inuauit, ut criticus criticum, rhetor oratorem petat. Quam ob rem circumspecte et prouide rem suam agant, qui non, qua itur, sed qua eundum est, aliis litteras praeeunt, et magna multaque cautione sibi de securitate prospiciant.

Neque desunt eruditorum exempla, quibus cum durissima paupertate, et rerum paene omnium, quibus vita trahitur, inopia misere conflictandum est, qui omnibus eruditionibus suis, quas caro coemerunt, vix panem lucratur, et non de fama sed fame solliciti sunt,

qua



qua se et familiam aegre defendunt. Contemtus et despicientia, in qua plerique eruditi apud alios in primis opulentiores sunt, adeo communem periculum est, ut his temporibus pauci id effugiant, vbi litteratorum ordo per homines dubios, nouos, semidoctos et infaustis auibus incivitatem litterariam adlectos ex illo honore, quem olim obtinuerat, iam dudum decidit, et principes, quorum praemiis sustinebantur quondam litterae illas intelligere et aestimare nostra et parentum memoria desierunt. Vnde desperatione quorumdam, qua cum erectiore animo ipsas litteras abiiciunt, illiberalis quaestus et turpis litterarum mercatura, aliaque innumera mala oriuntur.

Plura in hanc rem dici possent, nisi rectius aliunde peterentur et ab instituto nostro remotius dissiderent. Plura etiam in medium profarent ordinis scholae nostrae selecti et primi ciues, qui naturae scientiam, necessariam et utilem pariter ac iucundam disciplinam turpiter a multis magno suo periculo neglectam, et philosophorum iniqua fata, ut exemplum periculorum, quibus eruditio vexatur, proponent.

Verum cur haec operose disputauimus? scilicet, ut homines ab eruditione auocaremus? scholis vastitatem, orbi barbariem imperaremus? ut traducerentur et riderentur homines immortaliter de commodis publicis meriti? ut aleretur qui iuuentuti inest, litterarum con-

temtus? Absit per omnem modum. Alia longe horum periculorum describendorum ratio est, ut omnis iuuentus nostra mature moneatur de legitimo litterarum aestimio, delectu, cultura et usu, ne solas litteras veram felicitatem et summum bonum praestare potent, quae homines, nisi Deus intercedat, reddunt saepe quam infelicissimos, sed ut Deum eiusque spiritum precibus exoratum aliosque prudentiores et viae gnoros homines duces sequantur, de sapientia vera, cuius initium timor dei est, magis quam scientia sibi proficiant, semperque in omni studiorum decursu finem ante oculos propositum habeant. Illis maxime qui iam ex schola in academiam proficiscuntur, haec tabula periculorum proponitur, ut dum vela pandunt a littore in altum vecturi, in pelagus pericolosum immiscent, quas syrtes et praerupta faxa, quos scopulos et vortices praeter nauigare debeant.

Agite igitur, o nostri, carissima nobis pedora, arduum et anceps iter est, quod ingredimini, sollicite vobis vnde cauete, animum vestrum bene instaurate, si quid iam vitii ex litteris contraxistis, sanguine diuino eluite et expiate, Deum gubernatorem vobis adiungite, precibus vestris certo non defuturum, et sic secundis ventis vela date. Nos pro incolumitate vestra vota nuncupabimus, et iter litterarium expeditum vobis tutum, felix faustumque precabimur.

Atque



Atque ut haec profectio solemnior sit, in publica scholae nostrae lustratione dimittentur, qui iam subductis rerum suarum rationibus superiorum auctoritate abitum parant, ultimosque sermones publice habebunt. Quam celebritatem ut, qui scholae nostrae litterisque bene volunt praesentia sua condecorent, humanissime rogamus: neque hoc beneficio et diligentiae incitamento indigni sunt tres adolescentes, qui ex ordine selecto in academiam ritu consueto commigrabunt. Primus illorum (a) IO. DAVID MICHAELIS eruditissimo, et de ipso benemerente patre dignus filius, praecoci diligentia inter aequales profecit, reliquos ordines emensus in suprema classe annum et sex menses laudabiliter transegit, humaniores litteras, ad quas natus videtur, et philosophiam bene imbibit, et ingenium, quo excellit, ita perpoluit, ut omnibus magnam sui exspectationem faceret, quam ut ab excitationum ingeniorum periculis liber, expleat, immo supereret, comprecamur. Secundus (b) CHRIST. JENSEN, ingenuus iuuenis, bonam mentem cum indefessa diligentia raro exemplo feliciter coniunxit, limato iudicio litteras tractauit et ad illam maturitatem prouexit, ut vitam et studia

Q 5

omni-

- (a) Summos nuper in'philosophia honores adsequutus est. (b) FRIDERICOBURGI in SEELANDIA siti sacrorum oraculorum interpres.

Atque



omnibus probaret: fuit sex menses in selecta classe. Tertius CHRISTIAN. FRID. KIRCHNER idem spatium semestre in hac selecti ordinis palaestra consumxit, liberalis adolescens, industrii discipuli partibus ita defunctus, ut non contemnendos progressus faceret. Fäxit supremum numen, ut fauentibus ventis felicitatis portum consequantur.



LIT.

LITTERAE ACADE-  
MICAЕ

AD SOLEMNIA

DISPVINATIONVM PVBLICARVM

- I. SVB PRAESIDIO VIRI SVMME  
REVERENDI  
HABITARVM
- II. ALIIS MODERANTIBVS DE-  
FENSARVM.

LIT-



THEATRUM AGADB  
MUSICAL  
SCHOLASTICUM  
ARITHMETICAE  
GEOMETRIAE  
PRACTICAE  
TRIGONOMETRICAE  
ASTRONOMIAE  
PHYSICAE  
MUSICAE



AD DISPUTAT. THEOL.

EXPLICATIONEM

LOCI DIFFICILIS IO. X. COM. XXXIII - XXXVIII.

ET

**VINDICIAS DIVINITATIS  
CHRISTI**

EX EODEM EXHIBENTEM

QVAM

MENSE AVGUSTO AN. CIC IC CCXXXV DEFENDIT

AVCTOR RESPONDENS

IOACH. FRIDER. (\*) HIZWEDEL  
POTSDAMIENSIS.

RESPONDENTI

S. P. D.

P R A E S E S

**V**ide quantum TVAE dexteritati tribuam.  
Reddo tibi disputationem, quam mihi corrigendam tradidisti sine mutatione eamdem, non, quod limam minus admittere arbitrer, aut argumentum cura-

(\*) Sacra generosae iuuentutis quae regiis impensis BEROLINI armis exercetur, administravit, qua statione praecclare perfunctus iam in aliam FRANCOPVRTVM ad ODERAM prouinciam sacram nuper concessit.



curationi tractatione dignum esse negem: sed ut progressus in litteris et sanctiori doctrina factos sic certius declares, et REGI in primis POTENTISSIMO, studiorum tuorum STATORI, vna cum promptissimo obsequio demonstres. Age igitur, eumdem te in defendenda dissertatione auditoribus proba, quem te in elaboranda praestitisti, alacrem et veri certique studiosum. Gratulor TIBI caussam, quam suscepisti, his nostris temporibus dicendam omnino. Quam si recte diceris, crede mihi obtinebis. Seruatoris O. M. de salute nostra meritissimi maiestatem vindicatum is. Laudo voluntatem, quae iam ipsa in tam praeclaro labore laudanda est, successus felices auguror. Tuere fortiter gloriam IESV DOMINI nostri non hac tantum opera TVA, et velitatione academica, verum omni virium contentione in eo elabora, quoad viues, ut viua eius cognitione imbutus ipsum cogitationibus, sermone, ipsa denique vita concelebres. Ita demum REGI munificentissimo satisfier, qui REGIA liberalitate ad litteras te excitauit et huc transmisit suis sumtibus nutriendum, et ad bonam mentem, solidam doctrinam publicamque coetus sacri utilitatem formandum. Spem REGIAM nondum fefelleristi, sed exspectationem, quam de te habuimus omnes, adhuc impleuisti. Indefessam PRAECEPTORIBVS TVIS operam nauasti, quod mihi maxime innotuit, qui communis te cum domo vtor, teque assiduum lectionum auditio-



ditorem habui. Iuuentutem ex aliquot tempore laudabiliter instituis. Aequales multos proficiendi felicitate anteuertis, in posterum te ipsum superabis. Quod reliquum est, ut dies, quem pro tua in REGEM CLEMENTISSIMVM pietate solemnitati certaminis academici destinasti, natalis POTENTISSIMI REGIS, ipsi indulgentissimo PATRIAE PATRI, familiae regiae, patriae academiae, et tibi sit longe auspicatissimus, ex animo ardentissime precor. Ita in rem tuam vale rectissime.

Dedi in academia fridericana d. IV idus AVGVST. anni c<sup>lo</sup> 10 ccxxxv.

## AD DISPVT. THEOL.

DE

PRECATIONE CHRISTI PRO  
AVERTENDO

CALICE AD MATTH. XXVI. COM. XXXVIII.

QVAM

CAL. SEPTEMBR. AN. c<sup>lo</sup> 10 ccxxxv. HABVIT

AVCTOR RESP.

CHRISTIAN. HENRICVS NEHRING

MORLENSIS MAGDEBYRGICVS.

RESPONDENTI

S. P. D.

PRAESES

Ex



**E**x laudabili diligentia tua, cuius iam praeclarum specimen edis, laetisque studiorum progressibus adhuc factis voluntatem capio singularem, quam his litteris significandam esse putaui, ut simul et tibi de faustis laborum primitiis, et parenti tuo admodum reuerendo de eximiae spei filio publice gratularer. Disputationem, quam proprio marte elaborasti, obseruationum mearum accessionibus amplificare nolui, ut tibi maneret propria. Ne tamen omnino sine symbola discedam, habeto, quae mihi eamdem perlegenti in mentem venerunt, nonnulla. Ad compellationem πατερ μης visus mihi est sanctissimus seruator et aliquem characterem MESSIAE ps. LXXXVIII. 27. praedictum et typum ISAACI GEN. XXII. 7. implere, et in mediis doloribus a DEO immisis, animum veneratione et fiducia plenum atque ab omni indignatione alienissimum contestari, et ipsi denique DEO rationes mouentes audiendarum precum proponere voluisse, imitatus IOBVM c.X. 8-13. Mentione ποτηρίων forte respexit CHRISTVS ad magistrum conuiuii, quem VARRO modimperatorem vocavit, SIRACIDES cap. XXXV. 1. ηγμενον, qui bibendi leges et singulorum mensuram moderabatur, qualem hic in determinanda calamitatum suarum portione DEVVM esse fatetur. Si quis coniecturis locus vacaret, cum hoc ποτηρίω contendenteret rectius aquarum amararum pocu-



poculum NVM. V. commemoratum diris omnibus et imprecationibus refertum, quam mortis poculum cicuta aut alio veneno plenum, quod supplicium IVDAEIS non innotuit. Dummodo ποτηρίου τε ad vehementiam formidinis COMM. XXXVII. expositam referatur, quae inusitata taedii tristitiae et metus conscientia hos ipsi gemitus expressit ad auerruncandum horrorem, vox παρελθετω nullis difficultatibus laborat. Incredibilem hunc terrorem, quo sanctissimus IESVS perhoruerat, ad dolores et afflictiones in consilio diuino sibi decretas pertinere, qua tunc erat imperfectione in exinanitione constitutus, ignorabat, arbitratuſ hunc sibi metum ad cruciatuſ reliquos fortiter ferendos impedimento futurum. Quam ob cauſam dubitanter ita orat ut exemplum praeceat conformandi preces omnes ad voluntatem DEI. I. IO. V. 14. Et hunc calicem ποτηρίου λυπης και αδημονιας cito DEVS abstulit, animum corroborando iterum. Illustrari haec animi ipsius mutatio egregie potest ex ps. XVIII. Conditio addita ει δυνατον non in LVCA solum cap. XXII. 41. explicatur per ει θουλει, verum et in textu per alteram phrasin epexegeticam πλην γχ ως εγω Θελω αλλ ως συ. Qua ratione CHRISTVS verebatur, ut, non quidem per potentiae diuinæ limites, sed per sapientissimam decreti diuini constitutionem liberari posset. At vero manum de tabula. Epistolam scribo, non dissertationem. Quod reliquum est, DEVMO. M.

R

sup-



supplex veneror, vt donis in TE collatis incre-  
menta addat cum perpetuitate, TE sibi totum  
vindicet, atque in litteras et ciuitatem suam  
multum ex TE vtilitatis redundare iubeat.  
Dedi cal. sept. MDCCXXXV.

## AD DISPVT. THEOL.

DE  
DICTIS SCRIPTVRAE SACRAE  
PROBANTIBVS

QVAM

CAL. NOVEMBR. AN. CLO I<sup>O</sup> CCXXXV. HABVIT  
RESPONDENS

MATTHIAS DRVDE

HALBERSTADIENSIS

RESPONDENTI

S. P. D.

P R A E S E S

**R**epte et laudabiliter agis, quod litterarum  
sacrarum stadium academicum, in i-  
nenſi et noſtra bonarum artium ſede  
emensus, domum iam confeſſurus, ſine  
publico diligentiae, et profectuum ſpecimine

(\*) Altera iam praeclarae huius dissertationis, cui  
VIR MAXIME REVERENDVS vltimam retractando  
ma-



plane non discedendum tibi esse arbitraris, ut  
honoratissimae familae, patriae et orbi eruditio

R 2

de

manum admouit, existat editio. Multorum sane  
praepostera probandi ratio, qui pro rostris factis  
sacrorum oraculorum interpretes ac dei hominum-  
que internuntii videri volunt, stomachum saepe  
prudentioribus mouent ab irridendi pruritu ce-  
teroquin alienissimis: praesertim, si explicationes  
ad sententiam quamdam prolatae ad linguam sa-  
cram tamquam lydium lapidem examinentur.  
Cui iuueterato malo medicinam praesentissimam  
VIR AMPLISSIMVS adferendam esse putauit, quod  
proemium disputationi praemissum luculentissime  
demonstrat. Vbi, verum ne mala nostra diffimu-  
temus, inquit, nondum nostratum libri hoc melo-  
carent, licet rectiora profiteamur, eo certe minus  
excusabiles, si nobis cum ipsi pugnamus, et dum  
scripturam sequi per omnia videri volumus, no-  
stras saepe sententias sacrae scripturee verbis et di-  
ctis male eongestis, vestimus. Non solum sermones  
plerique pro concione sacra habiti scatent his  
probationibus, quae si curatius examinantur, nil  
nisi accommodaciones sunt, ut in formulam cesse-  
rint probationes homileticae, verum et ipsa systemata  
satis multa his vitiosis probationibus referta sunt.  
Ex quo simul totius tractationis, quem sibi ipse  
praescripsit ordo intelligitur, argumentum, adiu-  
ciens, ita tractabimus, ut primum generalia quaes-  
dam hic pertinentia discutiamus, deinde ipsas  
naturam dictorum probantium explicemus, et tan-  
dem nonnulla ex tractatione deriuemus scitu non in-  
digna. Secundum momentum; quod primas do-  
ctissimae dissertationis partes summo sibi iure  
vindicat, quinque complectitur requisita. 1) di-  
ctum probans desumendum ex libro canonico §. II.  
2) de-

de tempore, studio et labore non male locato conster. Quam primum huius me TVI consilii certiorem fecisti, insignem ex eo voluptatem cepi, neque honesto desiderio vlla ex parte defuturus, operam meam TIBI addixi, et argumentum, in quo industriam exerceres, viriumque periculum faceres, proposui. Elaborationem, quam mihi exhibuisti diligentissime confectam, ita retractaui, ut argumento facherem satis, et omnia eo digererem ordine, quo hic apparent. Abiturientis festinatio, meique labores, quibus occupatissimus teneor, maiori curae et emendationi obfuerunt: sufficiet tamen, si eumdem TE in ea defendenda exhibueris, quem TE cognoui in elaboranda, ad praeclarum dexteritatis TVAE documentum. Faxit DEVS o. m. ut theologiam ex his sacrarum litterarum fontibus haustam per omnem vitam sancte colas, religiose obserues, doctrina et vita exprimas studiosissime, eius felicitatem certissimam experiris aeternum, et ciuitati DEI fructus feras amplissimos. Dedi in frideriana prid. non. nouembr. cIc I cccxxv.

2) desumendum ex textu authentico §. 12. 3) sit certae et indubiae lectionis §. 13. 4) sit dictum probans sermo ipsius DEI, CHRISTI aut viri PROPHETOU §. 14. 5) sit certae interpretationis §. 15.

LIT.



## AD DISPVT. THEOL.

DE

CHRISTO A IVDAEIS CONSPI-  
CIENDO

QVANDO DIXERINT:

CELEBRETVR VENIENS IN NO-  
MINE DOMINI

AD

MATTH. XXIII. COM. XXXIX.

QVAM

AD D. IV. FEBR. CLO 13 CCXXXVI. HABVIT

AVCTOR RESPONDENS

IO. CHRISTIANVS (\*) GRVNDLER

HALA MAGDEB.

RESPONDENTI

S. P. D.

P R A E S E S

**Q**ui magnam semper ex ingenio et indu-  
stria TVA satis mihi probata, volupta-  
tem cepi, nouo hoc eiusdem speci-  
mine mirifice delector, TIBIQUE feli-  
ces has primitias vere gratulor. Argumentum,  
in quo explicando illustrandoque gnauiter ela-  
borasti, certe non indignum est studiofa discuss-

R 3

fione,

LIT. (\*) Pomeridiana templi maioris LVTHERANORVM fa-  
cra CVSTRINI moderatur.



sione, et ad problemata exegética pertinet, quorum qualiscumque etiam tractatio iis profecto discere non potest, qui suum oraculis diuinis premium statuunt, quantique eorumdem interpretandorum referat plures sententias et coniecturas inter se contendit, non ignorant. Ab emenda-  
da dissertatione TVA, meisque obseruationibus amplificanda et mea me voluntas reuocauit, quod praeclarum hunc diligentiae fructum proprium TIBI omnino relinquendum esse putavi, et laborum multitudo, quibus iam distrahor si magnis admodum, multis tamen concatenatis. Publicum eiusdem defendendae certamen non magis precor quam auguror felix et fortunatum. Atque, ut illum laborem iam subiis et litterariae huius contentionis certissima vtilitate inductus, et clementissimi PATRIAE PATRIS sapientissimo mandato obtemperatus: sic laetissimos TIBI eiusdem fructus et aequos peritosque ingeniorum arbitros opto et polliceor. DEVM O. M. su-  
prenum rerum humanarum moderatorem de-  
precor, ut sua in TE collata beneficia perpe-  
tuet et magis in dies magisque adaugeat, atque do-  
ctrinam TVAM omnemque operam TIBI ac sacrae  
ciuitati salutarem fieri iubeat. Ded. prid. cal.  
febr, an. MDCCXXXVI.

LIT.



AD DISPUTATIONEM THEOLOGICO - MORALEM

DE

## GRADIBVS (\*) PECCATORVM

QVAM

P. III. ID. SEPTEMBR. ANNO CIC CXXXVI.

HABVIT

RESPONDENS

IO. ANDREAS EILERS

BRANDEB.

## RESPONDENTI

SAL. PLVR. DIC.

PRAESES.

**I**n signem mihi voluptatem attulit vtrumque consilium, quod cepisti, et ab academia nostra ante non discedendi, quam specimen publicum ederes tam ingenii, quod a natura eximum habes, quam progressum in bonis litteris factorum, et argumentum disputatio-

R 4

tatio-

(\*) Altera est disputatio, quam VIRO SVMME REVERENDO emendatam atque amplificatam debemus. Ratio differendi ex proemio a doctissimo respondentie disputationi praemisso satis innotescit. Tractatio, inquit, in quatuor partes diuisa est, eo ordine ut prima sectione introductoryia, fundamenta reliqui laboris rite ponantur; secunda ar-

gumen-

tationis diligendi sollicita meditatione omnino non indignum, atque ad doctrinam de peccato pertinens,

gumenta ipsa sententiam nostram probatura commemorentur, tertia vberior explicatio eorum, ex quibus gradus peccatorum aestimandi sunt institutur, quarta denique consecaria potiora quae ex antecedentibus fluunt proponantur. Tertia sectio in primis foecundissimas grauitatem peccatorum aestimandi regulas suppeditat, quarum potiores dumtaxat recensere liceat. Ad quinque nimis classes §. XXX. refertur, quidquid in peccatis occurrit inaequale, et graduum diuersitatem admittit: unde variae non minus quam indubia enascuntur regulae, scilicet:

I. Ratione causarum peccati et quidem

i) Subiecti eiusque

$\alpha$ . Status interni. 1) quo quis praestantioribus animae facultatibus habitibusque aliis antecellit, eo grauius illis delinquit in eodem peccato commitendo. 2) quo quis maiori rerum diuinarum cognitione, eiusque vel obtainendae, vel adaugendae occasione vtitur, eo grauior est peccatorum reatus. 3) quo quis a viribus supernaturalibus instructior est, eo maiorem reatum peccando incurrit. 4) quo quis plus beneficiorum DEO se debere pactisque et foedere solemnius saepiusque initis eidem obligari intelligit, eo grauiori reatu laborat, dum peccat. (§. XXXI.)

$\beta$ . Status externi. 1) Quo quis maiori opportunitate bene agendi gaudet, eo culpatius peccat eam negligendo, vel contrarium agendo. 2) Quo quis maiori dignitate suique exempli auctoritate valet, eo grauius peccat, dum ea vel plane non, vel male vtitur (§. XXXII.)

264

tinens, quam in scholis dogmaticis et moralibus non sine ratione vberius explicare soleo. Non

R 5

defui

γ. Partis peccantis. 1) Peccata externa in se considerata grauiora sunt iisdem intra animum dumtaxat commissis. 2) Quo quis plura corporis membra, animique facultates maioresque utriusque partis vires, atque earumdem fortiorum contentionem peccato impendit, eo grauius delinquit. 3) Peccata ex consuetudine obscuraque impetu profecta grauitate cedunt peccatis ex praesenti determinatione mentis illegitima ortis, ipsae tamen consuetudines et peccata habitualia longe praecllunt actibus prauis transeuntibus. (§. XXXIII.)

2) Motuorum. 1) Peccata, quae cum conscientia erronea, atque multo magis ex eadem peraguntur excusatoria sunt peccatis sine conscientia aut contra eamdem commissis. 2) Seducti ab aliis maiorem excusationem habent iis, qui semetipsi seducunt. 3) Quo leuiora et incertiora sunt peccatorum motiva, eo maiorem culpam incurrint, qui illis ad delinquendum mouentur. 4) qui ob malum adparens peccat, excusatio est eo, qui bonis adparentibus ad peccandum adducitur. (§. XXXIII.)

## II. Ratione obiectorum et quidem

1) Obiecti personalis. 1) peccata, quibus DEVS directe violatur grauiora sunt contra nosmet ipsoe aliosque commissis. 2) Peccata contra nosmet ipsoe perpetrata grauitate excedunt contra alios perpetrata. 3) Quo quis proprius ad Ialios pertinet, aut eos ad se pertinere intelligit, eo grauius delinquit eos laedendo. 4) Quo plures aliquo delicto laedantur, eo est grauius. 5) Quo arctius homines cum DEO cohaerent, eo culpatius laeduntur. (§. XXXV.)

2) Ob-



defui desideriis tuis, sed quidquid partium  
mearum esse existimai, eo contuli, ut TIBI,

PARENTI

2) Obiecti realis. 1) Peccata contra leges naturales grauiora sunt peccatis contra leges reuelatas et positivas commissis. 2) Quo plures leges simul violantur aliqua actione, eo illa est deterior. 3) Quo evidentior est aequitas legum actionum que mandatarum vtilitas, eo indignius violantur. 4) Quo magis frequens, euidens, et solemnis alicuius legis promulgatio et confirmatio facta est, eo cum grauiori culpa migratur. 5) Peccata commissionis grauitate antecellunt peccatis omissionis. 6) Quo sanctior et religiosior aliquis res est, seu cum DEO eiusque cultu arctius cohaeret, eo inexcusatius peccando profanatur. 7) Quo minus aliquis re indiget, quo alii non sine praesentissimo periculo et danno carent, eo grauius peccat auferendo, corrumpendo et abscondendo eamdem. 8) Quo maiori aliquis iure rem possidet, eo maiori iniuria eadem priuatur. 9) Peccata in animam superant in corpus peracta, utraque autem reliqua, quibus facultates et existimatio laeduntur. (§. XXXVI.)

III. Ratione formae. 1) Peccata voluntaria excellunt grauitate non voluntariis. 2) Peccata cum antecedente et consequente consensu peracta grauitate superant ea, quae per delectationem consequentem deum voluntaria sunt. 3) Peccata cum longiore deliberatione motuumque conscientiae suppressione fortiori commissa, grauiora sunt iis omnibus, a quibus haec abfuerunt. 4) Peccata praecepsitiae et infirmitatis grauiora sunt peccatis ignorantiae 5) peccata ex ignorantia commissa grauitate cedunt iis, quae ab ignorantia commissa.



PARENTI TVO plur. reuerendo, lectoribus atque adeo vtilitati publicae satisficeret. Quare elaborationem, quam studiose confectam mihi exhibuisti, ita retractaui, emendataque amplificau, ut argumento in clariore luce ponendo sufficere videretur, plura certe et limatiora forte adiecturus, si per temporis angustias licuisset, quibus me admodum fentio circumscriptum. Age igitur, aestumatissime EILERS, prouinciam TVAM pro virili exorna atque non solum in conflitu

committantur. 6) Peccata letalia praegrauant mortalibus. 7) Peccata aliena proprie et proprius participata grauitate antecedunt propria peccata. 8) Quo quis longius, frequentius, vehementius peccat, aut saepius, fortiusque eodem peccato postea delectatur, eo certe grauius delinquit (§. XXXVII.)

IV. Ratione effectuum. 1) Quo magis gloria DEI obscuratur peccatis, eo sunt grauiora. 2) Quo plura aliorum suspitia iniuriis illatis exprimuntur, eo grauius delinquitur. 3) Quo maiori scandalo cedit peccatum, eograuius euadit. (§. XXXVIII.)

V. Ratione circumstantiarum. 1) manifesta et publica peccata occultis sunt grauiora 2) peccata in locis DEO eiusque cultui deuotis commissa, turpiora sunt alibi peractis. 3) Peccata temporibus, quae DEO colendo officiisque obeundis consecrata sunt peracta reliquis alio tempore commissis praegrauant. 4) Peccata, quae post recens a DEO profectum beneficium cultumque ipsi praestitum aut insignem aliquam gratiae diuinae operacionem praegressam extemplo peraguntur, ea exceedunt grauitate, a quibus haec omnia absunt. (§. XXXVIII.)



fictu litterario strenue tuere argumentum non  
sine certissima victoriae spe defendendum, quam  
TIBI et spondeo et ex animo gratulor, sed et-  
iam, quod longe maximum momentum feret,  
serio ad animum reuoca doctrinam grauissimam,  
omniq[ue] viuendi ratione comproba non sine  
fructu TE ipsius meditationi aliquot horas im-  
pendisse. Sic demum inexcusati errandi pe-  
ricula eorum, qui a tenera aetate ad bonam men-  
tem formati, a rerum diuinarum intelligentia  
instructi, et sanctiore disciplina initiati sunt, ef-  
fugies, et spem illorum omnium, qui DEI be-  
neficia in TE cumulata magnificiunt, TVORVM in-  
primis, atque meam simul, si non male de TE  
meritus videbor, exspectationem implebis, ne-  
que doctrinae quam imbibisti, et operaे in hac  
elaboratione collocatae vñquam TE poe-  
nitibit. Vale rectissime. Ded. in acade-  
mia fridericana ad d. IIII id. sept. ann.  
ciclo ccxxxvi.



AD



AD DISPVTATIONEM

DE

CONCILIO TRIDENTINO

QVANTVM PER ILLVD

MELIOR DETERIORQVE FACTA FVERIT  
ECCLESIA ROMANA

QVANTVMQVE EX EO

NOSTRA ECCLESIA CEPERIT

EMOLVMENTI

QVAM

PLACIDO ERVDITORVM EXAMINI SVBMISIT

AVCTOR DEFENDENS

AD DIEM XXIII. SEPTEMBR. A. C<sup>LO</sup> XXXVII.

GEORG. LVDOV. ROLOFFIVS.

RESPONDENTI

S. P. D.

P R A E S E S.

**Q**uum magnam semper delectationem capio ex praeclaris iuuenum erectiorum studiis, qui litterarum academicarum stadium emensi ex illa animorum contentione non ante discedunt, quam in arenam descen-

AD

descenderint disputatione solemnri specimen virtutis et dexteritatis partae daturi, viresque ad altiora destinatas publice periclitaturi et doctorum iudicio approbaturi: tum singulari plane et incredibili voluptate perfundor, si laborem cogito, quem in edendo hoc profectuum documento collocasti. Nolui illati tacitus apud me continere, quod et utilitatis publicae plurimi interesse putauit tuo exemplo alios ad diligentiam et virtutem inflammari, et hospitii atque amicitiae a parentibus acceptae leges id postulare videbantur, ut publice testatissimum sacerem, qualem te cognitum iudicem, quantique a me fias, non tam amore et consuetudine, quam optimo tuo merito. Quare sic defungar gratulandi, officio, ut rationes simul subducam et laetitiae et spei de te conceptae, atque sic vtramque iustissimam esse demonstrem. Primum laetus et optima quaevis spero de ingenio tuo, quod a natura dei beneficio excellens habes, multaque industria cultum et perpolitum, de flagrantissimo in bonas litteras sacras in primis, ardore, de eximia mentis bene animatae indole moribusque ingenuis et ad honestatem compositis, atque de progressibus in doctrina omnique disciplinarum olim profutarum genere factis. Quae vniuersa tres annos in hac bonarum artium sede peractos, ita omnibus, qui te nouimus et complexi sumus, probasti, ut de laudabili bene agendi studio aequalium TVORVM concederes nemini.

Dein-



Deinde hac TVA elaboratione admodum delector. Postquam enim ipsarum doctrinarum caelestium cognitione imbutus, ad controuersias, quibus impugnantur, et ciuitas DEI misere turbatur, curatius examinandas accessisti, de disputatione publica ante abitum habenda sollicitus, bene fecisti, si quid iudico, quod ex illis argumentum selegisti, ipsa temperis opportunitate et amplissima utilitate gratum omnibus acceptumque futurum, atque cum aliqua necessitate TIBI imposta coniunctum satis multa doctrinae et historiae sanctioris capita studiosius perquirendi. Quanta vero industria in eo explicando versatus sis, ipsam testor dissertationem, quam proprio marte conscriptam sine emendationibus et accessionibus meis TIBI reddere malui, quam profectuum TVRVM ea significandorum fidem dubiam facere. Quam ob rem si quid confirmationis et illustrationis alicubi addendum esse videbatur, illud omne in notas conieci, TVASQUE obseruationes ita auxi, ut ipsa tractatio TVA maneret. Neque dubie spero, quin eudem TE in conflictu praestiturus sis, quem sub celeb. FRATRIS TVI moderamine ante sesquiannum et quod excurrit, pugnantem TE vidi, aliisque exercitiis exploratum habeo. Praeterea summe venerandi PARENTIS, et mea ipsiusmet causa de studiorum hic tractandorum cursu feliciter confecto vehementer etiam atque etiam gaudeo. Ita enim amicitiae et beneficiorum vinculo venerabili



rabili PATRI TVO adstrictum me sentio, vt eius  
fortunam meam paene existinem. Quare quo  
rarior viris de re sacra meritissimis et vltra me-  
diocritatem euectis ea obtingit felicitas, vt filios  
habeant paternae virtutis aemulos et omni fa-  
miliae calamitate careant: eo maioris aestimo et  
pie veneror diuinum fauorem, qui et FRATRIS  
celeb. iam professoris francofurtensis et TVA studiis  
**ex voto felici a et fausta esse iussit.** Mihi vero gau-  
deo, cui ad eo felici esse licuit, vti in TE formando  
curandoque non dicam gratiam referrem, cui num-  
quam par ero, aliquam tamen partem curae a PA-  
RENTE TVO in me olim parentibus orbo iuuando  
ornandoque positae imitarer, filiumque mihi tra-  
ditum a periculis academicis immunem, et sanctio-  
ris doctrinae cognitione instructiorem, laeta mente  
et praeclara quaevis praefagiente redderem. Non  
TIBI magis, mi ROLOFFI, et PATRI TVO, quam mihi  
hanc felicitatem gratulor, DEOQUE acceptam re-  
fero, a quo votorum etiam pro beneficiorum  
in TE collatorum perpetuate et incrementis  
conceptorum me benignissime damnatum in  
confido. Quod reliquum est, suauissime RO-  
LOFFI, quam ingressus es studiorum laborumque  
viam indefessus insiste, DEO TE vindica, de ciui-  
tate sacra bene merere, domestica virtutis ex-  
empla imitare, TVAM rem rectissime age, mei-  
que si meritus fuero, memor viue et vale.  
Dedi in *fridericianæ* die **xiii cal. oct.**

AD



AD DISPUTATIONEM HISTORICO THEOLOGICAM

DE

## PATRVM PRIMITIVAE ECCLESIAE

FELICIORI SVCCESSV

TAM IN

PROFLIGANDA GENTIVM SVPERSTITIONE

QVAM

CONFIRMANDA DOCTRINA CHRISTIANA

QVAM

D. XV. GAL. SEPT. AN. C<sup>I</sup>O I<sup>O</sup> CCXXXVIII. HABVIT

IO. MELCHIOR GOEZE

HALBERSTADIENSIS.

VIRO

MAXIME REVERENDO ET DOCTISSIMO

IOAN. HENRICO GOEZIO

SACRORVM ASCANIENSIVM AD AED. S. STE-

PHANI ANTISTITI ET SCHOLÆ INSPECTO-

RI VIGILANTISS.

SAL. PLVR. DIG.

SIG. IAC. BAVMGARTEN.

Mirari te nolim vir plvr. rev. quod sine  
vlo sermonum vel epistolarum cominer-

S

cio



cio tecum umquam habito primis his a me litteris publice compellaris. Fecit hoc singularis in optimae spei filium Tuum amor meus, ut et ipsum in publicam lucem academicam cum eximio diligentiae ac profectuum specimine, prodeuntem, reditumque ad te meditantem sine aliqua iudicii mei ac voluptatis ex ipso captae testificatione dimittendum, et quanti a me fia excellens ipsius ingenium litteris gnauiiter cultum cuiquam significari rectius quam tibi, non putauerim. Ex quo enim post bonas litteras IENAE feliciter tractatas in nostram disciplinam concessit mihiq[ue] familiarius innotuit: ingenuos mores, eruditorem animi indolem, veri rectique studium et laudabilem proficiendi ardorem deamare, atque praecipua quaevis de ipso sperare coepi. Neque adhuc fefellit hanc exspectationem, sed indefessus in eo elaborauit, ut non solum pericula vitae academicæ praeteriret, verum etiam rem suam recte ageret, doctrinis ad publicam utilitatem olim profuturis imbueretur, et in rerum sacrarum cognitione vterius quam a plerisque fieri solet, progrederetur, atque cum oraculorum diuinorum interpretatione et doctrinarum diuinitus reuelatarum meditatione, quibus princeps ut decet studium ad dixit, et propaedeumata et rerum in ciuitate sacra gestarum, omnisque antiquitatis sanctioris investigationem, quo lumine theologus aegre carebit, sedulo coniungeret. Quam bene ipsi id  
ces-

cesserit dissertationio haec publica testatissimum facit. Argumentum, quod ipse elegit, et proprio studio discussit, cuius facile probabitur, qui cogitabit, quanti referat ad amplificandam rerum diuinarum cognitionem, ipsumque ciuitatis sacrae emolumentum, antiquitatis sanctioris monumenta a pluribus versari, atque in pretio iisdem statuendo media inter duo extrema tam superstitionis venerationis quam supercilii et ambitiosi contemptus via incedi. Malui igitur huic ipsius consilio non deesse et dissertationem nonnullis dumtaxat obseruationibus meis subinde amplificatam integrum ipsi relinquere, quam alia suadere meamque omnino facere, atque sic laudabile scrutandi vetustiores libros, conandique aliquid in diiudicandis sobrie antiquotibus sententiis, studium penitus suppressum, fore arbitratuſ ut primae hae lineae feliciter ductae et ipsi industrio auctori et aliis eas lectoris ad ulteriore monumentorum antiquorum lectionem sint incitamento futurae, quam in tanta studiorum festinatione plerisque hodie sordere mirifice doleo. Habet iam VIR. ADM. REV. quorum te a me certiorem fieri, tua potissimum meaque interesse mihi visum est. Quare diutius te non detinebo, sed scribendi finem faciam, si tribus verbis tibi filium, stadium litterarum academicarum feliciter emensum gratulatus; DEVMDQUE o. M. deprecatus fuero, ut haec dona sua perpetuet, tibique et filio bene omnia et ex voto

S : .

eue-



euenire iubeat. Ita vale VIR MAX. REVER. mihi  
hique faue. Dedi HALAE propter SALAM in  
acad. frideric. d. xv. cal. sept. an. c<sup>o</sup> 10 CCXXXVIII.

## AD DISPVAT. THEOL.

DE

DISCRIMINE EIVS QVOD  
NATVRALE ET MORALE  
DICITVR IN THEOLOGIA

QVAM

D. XV. DECEMBR. AN. C<sup>o</sup> 10 CCXXXVIII. HABVII

AVCTOR

GEORG. FRID. (\*) MEIER

RESPONDENTI

AESTVM ATISSIMO

SAL. PLVR. DIC.

PRAESES

**N**on concedam vt, quod aliis in arenar  
academicam a me deductis praestiti, g  
tulationis publicae officium in TE am  
cissime MEIERE, iam desideretur. In  
enim

(\*) Pro subacto, quo valet iudicij robore lectiones  
in primis mathematicas singulari dexteritate dare  
coepit, summos in philosophia honores strenu  
adsequutus.



enim me obseruasti complures annos, ita mihi approbasti ingenium excellens, mentem bene animatam et virium contentionem, ita mihi singulas muneris publici partes obeuntia assiduus comes adhaesisti vltra lustrum, siue libros diuinatus in litteras relatos interpretarer, siue doctrinas sanctiores docerem, siue officiorum praecepta inculcarem, siue controversias sacras explicarem, siue viam ad sermones solemnes pandemer, siue antiquitates et vicissitudines ciuitatis christianaen arrarem, siue disputationibus, examinibus, elaborationibus scriptis et sermonibus habitis auditores exercerem: vt fidem meam, in quam concessisti, destituere mihi viderer; si te academicarum litterarum stadium iam emensum et in lucem publicam cum eximio profectione specimine prodeuntem non comitarer, aut testimonio virtutis tuae cognitae mihi atque perspectae non prosequerer. Accedit parentis tui admodum reuerendi iucundissima consuetudo, quem tanti facio, vt mihi nihil putem praetermittendum quod illius interset. Quare ipsi filium praecocis doctrinae et optimae spei, tibi insignia dei dona in te collata, tirocinia litterarum praecclare posita, et dissertationem denique hanc tuam laetus et ex animo et vere gratulor. Argumentum quod discutiendum sumisti nemo improbabit, qui offendentes nouerit circa hos terminos technicos olim et recens exortas, aut reputauerit quanti referat, ad fugienda

S 3

bella



bella triumphos non habitura, et puriorem do-  
ctrinam a cauillationibus, insidiis et impugnatio-  
nibus vindicandam, scrupulos etiam varios ani-  
mis eximendos, ut termini, quos in linguarum  
inopia, ad res natura distinctas nobis aliisque di-  
stinguendas adhibemus, vagi nonnumquam ab  
ambiguitate liberentur, eorumque significatus  
suis limitibus circumscribatur. Certe, si quid  
videmus, non adeo haesitatum fuisset a nonnu-  
lis in efficacia et operationibus tam verbi diuini  
quam sacramentorum utrisque naturalibus et mo-  
ralibus admittendis, si ab omnibus recte et satis  
intellecti fuissent hi termini. Quam ob rem mili-  
non displicuit consilium, quod cepisti, eos di-  
stincte explicandi. Elaborationem neque immu-  
taui, neque accessionibus auxi, ut apud omnes  
dexteritatis Tuae iudicium eo rectius constaret.  
Spicilegium, quod huic epistolae destinaueram  
historicum, adiicere supersedeo: quod nimis  
iam excreuit ipsa disputatio, et variis nuoc-  
destineor occupationibus, quae ne horam qui-  
dem vacuam relinquunt. Tribus igitur  
verbis me expediam. Age mi MEIERE,  
in conflictu solemini eumdem te praesta, quem  
ego et commilitones tui disputantem faepius co-  
gnouimus. Tramitem virtutis, quem ingressus  
es, religiose et sancte per omnem vitam deo  
vindicatus decurre. Viribus valetudinis infra-  
etae instauratis rem tuam e re ciuitatis litterariae  
age feliciter, atque si non male de te merebor me

non



non dilige sed ama. Dedi in acad. frideric.  
d. xv. dec. c<sup>o</sup> I<sup>o</sup> ccxxxviii.

---

AD DISSERTAT. THEOL.

DE

ἀναμαρτησία

AB HOMINIBVS IN HAC VITA  
NON OBTINENDA  
QVAM CONTRA AVCTOREM DER VN-  
SCHVLDIGEN WARHEITEN.

VINDICAVIT

PRID. ID. IANVAR. c<sup>o</sup> I<sup>o</sup> ccxxxviii.

AVCTOR RESPONDENS

ERNESTVS FRIDER. KESSELRING

PRVSSVS.

AESTVMATISSIMO

KESSELRINGIO

SAL. PLVR. DIG.

PRAESES.

**G**ratum mihi vehementer fuit consilium,  
quod cepisti, ex disciplina nostra non  
discedendi sine publico tirociniorum  
praecclare positorum documento. Ex

S 4

que

quo enim huc concessisti, mirifice delectatus sum ingenio, quod DEI beneficio a natura habes ad litteras eximum et gnauiter politum, laudabili virium contentione, animo salutarium doctrinarum cupido, iisque in sanctiori eruditione progressibus factis, ut facile constaret, non illois TE manibus, sed propaedeumatibus rite initiatum a praceptoribus, quos in academia patria habuisti prudentissimos, intra sindonem et ad interiora rerum diuinarum sacra admisum fuisse. His fundamentis ita iactis apud nos superstructuro quam bene TIBI cesserit singularis opera scholis exegeticis, moralibus, polemicis et disputatoriis data ad amplificandam litterarum diuinarum copiam, rectius omnino significari non posse existimaui quam disputatione publica. In qua conscribenda breui admodum temporis spatio, nullae fere, exiguae saltem, fuerunt partes meae. Satius enim putaui ad iudicium de profectibus TVIS ab omnibus eo certius facendum TVAS TIBI reddi meditationes, quam multum illas immutari. Quare quam mihi exhibuisti elaborationem quoad per negotia, quibus iam distineor, fieri potuit, ita retractaui, postremam in primis sectionem, ut et TVA maneret, et arguimento succinete differendo satisficeret. Spem meam scribendo non fecelliisti, neque dubito quin expectationem et meam et omnium, quae saepius disputantem audiuerunt in solemnis conflictu nullus sis destituturus. Doctrina,  
quam



quam disputas, ardua certe est, nostrisque temporibus vindicanda omnino ab impugnationibus, quibus varie lacescit. Seditionum bellorumque ciuilium in populo CHRISTI gestorum historia indubie commonstrat, adeo arcte cohaerere hanc doctrinam de corruptione hominum naturali et peccatis inde enatis, cum gratuita iustificatiōe nostra per CHRISTVM, quae arcem purioris doctrinae constituit, vt neutra sine alterius periculo sollicitari vñquam potuerit. Quantum enim de satisfactione seruatoris vñice de nobis meriti detrahitur, tantum nobis gloriaeque nostrae arrogatur, immo vt cum aliqua specie CHRISTI obedientia vicaria minus indigere videamur, de ipsa lege diuina abrogatur, experientia contrarii comprobante verissime PAVLLVM edixisse, vel ipso hoc sensu *legem erigi* et stabiliri *fide* ROM. III comm. XXXI. Nemo itaque vitio vertet iis, quibus sanctioris doctrinae casta puritas curae cordique est, si ex erroribus vel leuissimis primum visis in constituenda peccati natura iustificationi CHRISTIQUE merito periculum imminere suspicantur. Atque haec ipsa ratio facit, vt temporum, in quae incidimus calamitatem doleamus, quibus opinio de *ἀναμηγτησίᾳ* hominum DEO vindicatorum animos multorum peruersit, et late per viscera nostra grastatur. Non vna quidem omnibus, qui in hunc errorem transeunt sententia sedet: ipsi potius, quod errantibus solemne est, in partes discedunt.

S S

dunt.



dunt. Sunt qui solis regenitis post longum iter,  
quod paucorum est, et labores exantatos, con-  
uersionem, sanctificationem, iustificationem  
et renouationem emensis illam vindicant: atque  
in eo periculosius errant, quod omne peccandi  
periculum a regenitis penitus abesse pronun-  
tiant. Alii tamen rationes aliter subducunt,  
omnibusque ad DEVUM sincere conuersis internum  
peccatum eiusque reliquias ita abiudicant, vt  
illis ab externis ad peccandum sollicitationibus  
cauendum esse, simul edicant, ne quod primis  
parentibus accidit, ad legem violandam indu-  
cantur. Viderentur hi posteriores excusati et  
minus periculose errare, atque formulis magis  
quam sententiis a priore oraculorum diuinorum  
doctrina dissidere: nisi ipsa peccati in vniuer-  
sum omnis notio simul conuelleretur, deprava-  
tio naturae ad infantes hac praerogativa praedi-  
torum transmittenda negaretur, atque perpetua  
CHRISTI imputatio ad praegressorum quidem pec-  
catorum reatum delendum necessaria, a peccati  
immunibus certo satis excluderetur. Quare licet  
aduersarius, cui in hac dissertatione proxime ob-  
uiam itur, ad priorem ordinem pertineat: po-  
steriori tamen errori eadem opera satisfit; iis-  
dem enim armis utrimque pugnatur. Exceptio-  
nes et argumenta, quorum nulla in dissertatione  
mentio facta est, facile concident, si speciosiora,  
quae ab hoc aduersario errori praetenduntur,  
discussa fuerint. Neque sanctitatis et pietatis in

DEVUM



DEVM haec doctrina prouehendae praetextu imponisibi temere patientur, qui de salute sua vere solliciti, siue sibi consci nec dissimulare quae sentiunt, nec vocibus ludere voluerint, obseruauerintque numquam felicius secum agi, quam si semetipso indignati peccata quotidiana sanguine CHRISTI apprehenso expiauerint atque ex eodem fonte incitamenta et vires DEVM colendi officiumque peragendi desumserint. Sed manum de tabula! Epistolam scribo, non librum. Ipse DEVS malis domesticis medicinam parabit prouidebitque ne quid, res sua detrimenti capiat. Ego vero ad TE redeo, *amicissime KESSELRINGI*. Gratulor TIBI labores academicos, doctrinam singularem, et ipsam spem, quam omnibus, qui TE norunt, fecisti. DEVM TIBI comprecor praesentem et propitium, ad eam implendam, bonis litteris et utilitat publicae proficuum operam nauandam, TVAMQUE rem, quoad viues DEO vindicatus sancte et feliciter agendam. De me TIBI recipio, numquam officiorum, quae ab homine TVI amantissimo proficiisci possunt, quidquam in me desideratum iri. Ita vale in rem TVAM, meique memor viue. Dedi in acad. frideric. prid. id. januar. anni  
CLO IO cxxxviii.

AD



## AD DISPVAT. PRIMAM

DE

## SCRIPTVRA (\*) SACRA

QVAM

D. III. APR. C<sup>15</sup> I<sup>o</sup> CCXXXVIII. DEFENDIT  
AVG. ADOLPH. FOSGRAFF.

HALENSIS

RESPONDENTI

SAL. PLVR. DIG.

P R A E S E S.

**D**iu admodum detinui patientiam TVAM  
aestumatissime FOSGRAFF ! Aliquot  
enim iam menses effluxerunt, ex quo  
huius TIBI dissertationis conscribendae  
fidem dedi, citius liberandam, si apud me stetis-  
set, tvque eis defensionem publice recepisti.  
Cuius

(\*) Egregiam hanc disputationem indefessae D. BAVM-  
GARTEN eiusque incredibili de ciuitate diuinabene-  
merendi studio totam debemus. Argumentum, cui  
vnica hac disputatione satisfieri non potuit duabus  
in posterum dissertationibus continuabitur. Fi-  
dem illius rei faciunt vltima praeftationis verba:  
*Prima haec de diuinitate sacrae scripturae agit,  
quae proxime sequentur duae idem continuabunt  
argumentum, quo finito, ad inspirationem eius-  
dem progrediemur. Veritas grauissimae huius  
doctri-*

Cuius morae eo facilius et ipse veniam dabis,  
et tecum reliqui commilitones nomen suum  
apud me professi harum disputationum exerci-  
tium subituri, quo exploratius habetis non  
taedium disputandi neque fugam laboris, sed  
negotiorum multitudinem hanc mihi molestissi-  
mam tarditatem imperasse. Nam ut reliquos ex-  
traordinarios labores non commemorem, neque  
mentionem iniciam disputationum ab aliis ela-  
boratarum, quibus ultimam limam admoui, ipsae  
scholae publicae, priuatae et priuatissimae alio-  
rum voluntate non meo consilio hos menses cu-  
mulatae effecerunt, ut raro mei iuris fuerim.  
Fore speraueram interea, ut ferias nactus cura-  
tiore scriptione exspectationis taedium redime-  
rem: sed quum nonnulla et hanc spem frustra-  
tura viderentur, satius duxi laborem accelerare  
imo praecipitare, quam arbiturientem te diutius  
mo-

doctrinae firmissimis quidem, sed domesticis pro-  
ximisque ex theologia potissimum naturali de-  
sumtis stabilitur argumentis. Ab illis nimirum  
VIR SVMME REVERENDVS est alienissimus, qui omnium  
dissertationum primordia semper a principio,  
quod vocant, contradictionis ac rationis suffi-  
cientis capienda esse praepostera sibi ratione per-  
suadent. Testatur illud disp. (§. XXI.) Ab illo-  
rum consuetudine plane abhorremus, inquiens,  
qui haec principia prima (ontologica et logica)  
ubique crepant, eo negligentiores plerumque futuri  
in proximis et domesticis scientiarum principiis,  
quo operosius in remotioribus his doctrinis sibi fa-  
miliaribus et euidentioribus elaborauerint.



morari. Verum haec satis de me. De methodo, quam in disputatione sequutus sum, sic habeto. Operam me dedisse, ut et argumento satisficeret, er lectoribus, quibus proxime destinata est, consuleretur, eamque ob rem omnia naturali ordine disposita explicata et rationibus stabilita sine ambagibus proponerentur. Factum est hoc consilio, ut lemmata aliarum scientiarum eaque paucissima breuissime adduxerim, libris qui eadem demonstrant numquam allegatis, quod obuii sunt, omnibusque satis notis in reliquis etiam testes sententiae meae nusquam excitauerim nisi in argumentis historicis, vbi ad fidem faciendam iis opus esse putaui, et vbi que media via processerim inter prolixitatem excursionibus refertam et breuitatem concisiorem obscuritatem parituram. Bene multa igitur fateor praeterii, sine necessitate lectores late circumductura: plura ad sequuturam tractationem distuli et referuaui, non sine iactura conuictionis hic anticipanda. Discessi subinde ab aliorum sententiis sed modeste propositisque rationibus. Vtrum operaे pretium fecerim, iam alii iudicent, exspectatis tamen duabus saltem disputationibus proximis idem hoc argumentum de diuinitate scripturae sacrae continuaturis, in quibus mihi constabo. Ad TE tandem venio pereximie respondens. Gratulor TIBI et cursum academicum exspectatione felicius confectum, et progressus in sanctiori doctrina factos, et hoc denique specimen publicum



blicum quo dexteritatem scientiamque omnibus,  
qui te audient, ut spero approbatis. Faxit DEVS  
o. m. vt sanctissimam doctrinam, quam defenden-  
dam suscipis, animo foueas, opera tuearis et  
vita exprimas, enixissimo scripturae sacrae stu-  
dio per omnem vitam feraris eique TE totum  
vindices, atque adeo diuinitatis eiusdem et salu-  
taris efficaciae testis ac viuum et spirans docu-  
mentum euadas, DEOQUE propitio fruaris aeter-  
num. Ita vale et age feliciter. Dedi HALAE  
propter SALAM in acad. frideric. d. v. cal. april.  
 anni CIC LO CCXXXVIII.

## AD DISPVT. THEOL.

## PAEDOBAPTISMI

DEMONSTRATIONEM ET VINDI-  
CIAS

CONTRA AVCTOREM

## DER VNSCHVLDIGEN WARHEITEN

EXHIBENTEM

QVAM

IPSIS IDIB. APRIL. AN. CIC LO CCXXXVIII.

AVCTOR

M. IO. FRID. KLEINSCHMIDT

LIPPIA GVESTPHALVS.

CLA-



CLARISSIMO  
 ARTIVM MAGISTRO  
 KLEINSCHMIDIO  
 SAL. PLVR. DICIT  
 P R A E S E S

**P**rolixissimam aduersus te voluntatem meam in angustias redigit prolixior disputatio tua, quae longiorem appendicem aegre ferre videtur. Paucis igitur defungar officio. Gratulor tibi beneficia, quae deo o. m. accepta refers bene multa, excellens ad litteras ingenium gnauiter cultum, mentem eximie animatam, morum suavitatem, doctrinam solidiorem ad omnem vitam et emolumenta publica profuturam, iter academicum caste impigre laureaque accepta confectum, ei hoc denique specimen dexteritatis publicum. Quibus ego adeo delector, ut si a parente tuo, viro maxime reuerendo, discessero, cui merito suo primas defero, de voluptate ex te capienda concedam nemini. Ita te deamare coepi, ex quo incredibile studium in communes litteras mihi approbasti, compertamque habui et exploratam in te diuturniorem virium contentionem, quam quae praecocibus ingenii progressuum factorum consciis inesse solet. Ita me tibi deuinxit gratissimus labor, quem mihi factitauit inexpli-



explebilis TVA selectorumque commilitonum proficiendi cupiditas, cui subinde vix suffeci praeeundo doctrinas publice, priuatim, priuatissime. Facit illa studiorum coniunctio et amor in te meus, ut disputatione solemni scientiam sanctiorem demonstraturum in arenam comitari non dubitem, consuetudini tuoque desiderio satisfaturus magis, quam necessitati consulturus. Facile enim praeuideo, non maiores in publico conflictu partes meas futuras, quam in conscribenda dissertatione, hoc est, exiguae et nullas omnino. Nam in elaboratione relegenda litoris accessionibusque penitus mihi temperaui consulto, ut integrum certumque lectoribus de eruditione TVA iudicium constaret; et quod intellexi, caussam te ita perorasse, ut me consilii dati necdum poeniteat, planeque sperem fore, ut apud aequos rerum arbitros rem obtineas. Age iam, clarissime KLEINSCHMIDI, domum redux, ingenii litterarumque opes DEO consecratae explica, tramitem studiorum, quem ingressus es, decurre per omnem vitam feliciter, et te litterarum, quibus cupio, puriori et salutari doctrinae ad alios transmittendae TE vindica, ad bene merendum de ciuitate sacra enitere, amorisque nostri memor viue. Vale. Dedi in frideric. ipsis idib. april. an. clx i cxxxviii,

T

AD



LITTERAE XII.  
AD DISPVT. THEOL.

DE

POLYGAMIA SIMVLTANEA IL.  
LEGITIMA

QVAM

D. VIII. SEPT. AN. CICLO CCXXXVIII. DEFENDIT

AVCTOR

BENIAMIN CHRISTOPH. HERMANN

GRÜNEBERGENSIS MESO-MARCH.

RESPONDENTI

SAL. PLVR. DIC.

PRAESES.

**D**e disputatione tva et laetor, et doleo,  
et tibi gratulor. Laetor operam in ar-  
gumento arduo feliciter positam, cau-  
samque difficultem e re utilitatis publi-  
cae actam. Hostes enim debellandi in MVHA-  
MEDANORVM castris oppido quaerendi non sunt,  
sed propius imminent. In ipso CHRISTI populo  
non defuerunt, qui se polygamiae patronos  
profiterentur. Ut anabaptistarum monasterien-  
sium furores praeteream, neque HVLDRICI NEO-  
BVLI dialogum de digamia commemorem, qui  
an. CICLO CCXXXI prodiit: primus hoc bellum mo-  
uit cum strepitu BERNHARDINVS OCHINV<sup>s</sup> in dia-  
logo

logo de polygamia, qui inter XXX dialogos italice scriptos et a SEB. CASTALIONE latine redditos XXI est. Breuem libri historiam exhibit PET. BAYLE in lexico sub voce *ochin* lit. k. longiorem obseruationem halensium tom. V. obs. 1<sup>a</sup> auctoris vero tom. IIII obs. XX. Hunc exceptit IO. LYSERVS, qui duobus scriptis vno iterum tertiumque edito sub fictis THEOPHILI AETHAEI, ATHANASII VINCENTII, GOTTLIEB WAHRMVNDI, SINCERI WAHRENBERGII nominibus generi humano polygamiam persuasum iuit. Praegressos superauit LAVRENTIVS BEGERVS, seu ut personatus prodire maluit DAPHNAEVS ARCVARIUS graece verso priore nomine, latine altero, aliquantum tamen immutato ut in appellatiuum boeger transformaretur. Is a CAROLO LVDOVICO electore palatino non iussus solum sed argumentis etiam studiosissime conquisitis instructus, quidquid in hanc rem dici potest, ita exhausit, ut pessimam caussam optime egisse merito videatur. Historiam libri, quo multi admodum sibi imponi passi sunt, narrant IO. FABRICIVS in *histor. bibliothec. tom. V pag. IIII*, IO. KLEFEKER in *bibliothec. eruditior. praecoc. p. XXV*, CHARLES ANCILLON *memoires p. CCCCXXXVI. &c. NICERON memoires tom. IIII pag. CLXXII &c. bibliothec. reimmanian. IIII p. DCLXXXXVI, VINCENTII PLACCHI theatr. pseudonym n. CCXXVII et CCLXXVII, et IO. VOGTI catal. libr. rariorū pag. XXXXI. Apprime igitur doctrinae huic consuluisti, quod litem con-*

T 2

testa-



testatus hunc TIBI aduersarium elegisti. Qui praeter hos trium viros huc referri solent, vel obiter rem tetigerunt, vel de fundamento necessitatis monogamiae, licitaque polygamiae dispensatione disputatione, vel perperam nec sine iniuria eo pertrahuntur. Ad primam classem plures pertinent, quam ut illorum census agi hic comode possit: ad secundam HIRON. BRUCKNERVS in *decis. iur. matrim. controuers. cap. XIII* §. LXI &c. et SAM. FRID. WILLEMBERGIVS cuius controuersiam recenset CHRIST. MATTH. PFAFFIVS in *hist. theol. litter. lib. II* §. X not. zzz pag. CCCLXXXIII et 10: GE. WALCHIVS in *controu. eccles. luther. tom. III* Sect. V. §. XXI pag. CV &c. Neque minus his adscribendus foret IO. BODINVS, si eius sententiae, cuius a CHRIST. BESOLDO de *tribus domesticae societatis specieb. cap. I. n. VII* accusatur, ex locis allegatis reus agi posset, quod pernegatur obseruat. halens. tom. VI obs. II. Cuius litis historicae et hermeneuticae quidquid demum fuerit, ipsa certe sententia de licita polygynia in casu abundantis alicubi insigni numero sexus feminei, rectius non conuellitur, quam hac demonstratione aequalis utriusque sexus hominum numeri. Ex tertio ordine unum dumtaxat nomine MART. LUTHERVM, quem tam ob loca quaedam iniquius intellecta ex tom. I lat. ienens. fol. CCCCLXXXVI &c. tom. II. germ. ien. fol. CXXXXVII &c. tom. III. germ. fol LXXXXV &c quam ob causam



sam PHILIPPI HASSIACII polygamiae propugnatori-  
bus adnumerant plerique pontificii , in primis  
recentiores ANT. VARILLAS in *hist. haeres. lib. XII*  
p. LXXXVII IAC. BEN. BOSSVET de *variat. eccles.*  
*protest.* lib. VI. pag. CCXXVI. et ANT. AR-  
NALDVS *praet. mor. iesuit. part. III cap. XVII*,  
quid quod ipsi obseruatores halenses *tom. II.*  
*obf. I. §. XVIII &c.* qui eumdem cum OCHINO eadem  
sentientem contendunt. Sed prioribus accu-  
sationis momentis satisfecit IO. MOLLERVS in *LV-*  
*THERO defenso cap. VII §. LXVIII &c.* p. LXI &c.  
et in *defensione LVtheri defensi p. CXXXXVI &c.*  
posteriori VIT. LVD. ASECKENDORFF in *commentar.*  
*de LVtheran. lib. III. sect. XXI. §. LXXVIII*  
*addit. III p. CCLXXVII &c.* Verum, quum ra-  
tionibus non auctoritate res efficiatur, bene egisti,  
quod argumentorum delectu habito ea omnia  
explicasti et confirmasti, quae aliquod momen-  
tum trahunt, atque nouum illud ab ae-  
quali hominum diuersi sexus numero desumptum  
euictum dedisti. Cuius recentiores scriptores  
bene multi mentionem quidem iniiciunt, demon-  
stratum tamen nusquam legere memini. Ipse-  
met illud *theol. moral. §. CLXX in obseru.* acces-  
soriis tantum adscripsi, quod instituti ratio lon-  
giorem demonstrationem non admittere videba-  
tur, quam hic a te exhiberi iure laetor. Ha-  
beo tamen quod doleam. Plenior enim prodi-  
tura fuisset dissertatio, si ex proposito mensem  
huic labori destinatum illi impendere, atque scri-

T 3

ptum

Qui  
vel  
ne-  
di-  
sine  
Tem  
hic  
CK-  
II II  
uius  
FIVS  
pag.  
rou.  
XXI  
s fo-  
RIST.  
cieb.  
reus  
lens.  
her-  
certe  
antis  
ctius  
ae-  
Ex  
. LV-  
uius  
XVI  
&c.  
cauf-  
sam



ptum perpolire et, vt aiunt, foerum lambere  
TIBI licuisset, neque inopinata significatio volun-  
tatis illustrissimi patroni, in cuius familiam con-  
cedis, a studiis iuuentutis in spem splendidissi-  
mae gentis et patriae adolescentis futurus, abi-  
tum praecipitari iussisset, atque praesidia histo-  
rica valde multa litteris aliunde expedita interce-  
pisset. Nihilo secius vere TIBI gratulor et labo-  
rem hunc exantlatum, quem lectoribus littera-  
rum gnaris et veri rectique cupidis sine dubio ap-  
probabis, et exopratum studiorum academico-  
rum finem, quae laudabili virium contentione  
in rem TVAM ipsarumque litterarum tractasti gna-  
uiter et feliciter. Conflictui publico interero  
spectator magis quam moderator. Maiores enim  
partes meas non fore arbitror et confido in de-  
fendenda disputatione, quam fuerunt in eadem  
conscriptenda, atque adeo pene nullas. Bonis  
verbis supersedeo. Nec meus in TE amor, ne-  
que virtus TVA commilitonibus explorata satis  
et comperta testimonio indiget. Vale igitur,  
carissime HERMANNE, DEO O. M. ardentissime  
commendatus rem TVAM age rectissime. HA-  
LAE ad SALAM in acad. frider. d. vii sept.  
clos ICCCCXXXVIII.

AD



## AD DISSERT. MORALEM

GRADVS

BONORVM OPERVM  
ET VIRTVTIS  
GENERATIM SISTENTEM

QVAM

PRID. CAL. OCTOBR. AN. CICLO CCXXXVIII.

DEFENDIT

AVCTOR RESPONDENS

SAMVEL DAVID GRÜZMACHER

GLASSOVIA POMERANVS.

## RESPONDENTI

SAL. PLVR. DIC.

PRAESES.

**D**isputationem tuam sine lituris accessionibusque meis tibi reddo integrum. Non tam voluntate id factum est, quam, ut quod res est fatear, necessitate quae penitus mihi limam e manibus extorsit. Ipse iam sarcinas colligis, redditumque in patriam paras, quem cum detimento tuo morari nolui. Ego vero his diebus sic distrahor multitudine magis quam magnitudine negotiorum, quae praeter scholas quotidianas, abiturientium et ad-

T 4

uen-

uentantium ciuium commendationes, et typographorum opera<sup>e</sup> facessunt, vt nulla re magis iam caream otio, quo tamen ad dissertationem studiose retractandam opus esse vnu<sup>s</sup> omnium optime noueris. Satius igitur duxi, laborem TVVM intactum TIBI relinqui, quam centonem confici, quem neuter suum agnosceret. Fini praeterea quem in conscribenda dissertatione praefixum habuisti, sufficere has lucubrations arbitror. Approbabis sine dubio ingenium litteris gnauiter cultum, et progressus in doctrinorum sanctiorum studiis factos omnibus, a quibus haec cognosci et ipsorum et TVA interest. Neque lectorum exspectationem frustraberis, quibus prima stamina et fundamenta exhibes doctrinae, ad omnem scientiam disciplinae salutaris apprime proficuae, quae facile amplificari extendi atque ad casus peculiares applicari poterunt. Conflictum solemnem iure TIBI omnino felicem et vere gratulor. Vnum est amicissime GRÜZMACHERE! quod pro necessitudine nostra rogo vehementer, vt doctrinarum, quas disputas, grauissimarum memor semper viuas, sanctiori spiritus diuini moderamine et auxilio ad veram virtutem eiusque incrementa in dies maiora atque maiora studiosissime enitaris, et quam praceptoribus TVIS in academia spem fecisti de ingenio, studiis et animo TWO, per omnem vitam impleas, idemque studium, quo in imbibendis doctrinis salutaribus elaborasti, enixissimum



rum sedulo conferas, ad earumdem fructus  
capiendos et ciuitati sacrae referendos longe vber-  
rimos. De me caue existimes quidquam mihi  
gratius fore aut iucundius, quam si de felici  
rerum TVARVM conditione certior fieri eamque  
consilio aut opera iuuare potero. Ita vale in rem  
TVAM et publicae vtilitatis. Dedi HALAE ad SA-  
LAM in acad. frider. prid. cal. octobr. an.  
clo 10 CCXXXVIII.

## AD DISPVT. IN AVGVR.

## NOTIONES SVPERI ET INFERI

INDEQVE

## AD SCENSVS ET DESCENSVS

IN

CHOROGRAPHIIS SACRIS OCCURRENTES

EVOLVENTEM

QVAM PRAESIDE

D. CHRIST. BENEDICTO MICHAELIS

THEOL. ET PHILOL. S. PROF. O.

PRO CONSEQVENDIS SVMMIS

IN PHILOSOPHIA HONORIBVS

AD D. XXVI. FEBR. AN. CLO 10 CCXXXV. DEFENDIT

RESPONDENS

ALEXAND. GOTTL. (\*) BAVMGARTEN

BEROLINAS.

(\*) Vide supra p. 189. T f

ALE-



ALEXANDRO GOTTL. BAVMGARTEN FRATRI

S. D. P.

SIGISMVNDVS IACOBVS BAVMGARTEN

S. TH. P. P. O.

Ego vero tibi gratulor honores academicos, ab amplissimo philosophorum ordine decretos, quibus nihil est ad publicum diligentiae T V A E testimonium honestius, et ad praecclare in litteris proficendum, aliisque inferuiendum accommodatus. Pro amore in te meo, hoc quidquid est litterarum ad te dandum esse putavi, ut significarem, quanti a me fias ob bonam mentem et studiorum magis quam sanguinis communionem, quantumque felici industriae T V A E successu delecter, et publice simul te monerem, de litterarum sanctiorum studio, quod a pueritia ingressus es, sancte in posterum decurrendo, quo amplificandi honoris diuini finem consequaris felicissime. Reuoca tibi quaeso ad animum, qua potissimum ratione nonnihil profeceris, quibus viis litterarum iter ad theologiam satis expeditum adhuc habueris, et pleraque progrediendi impedimenta praeterieris, ut DEO o. m. cuius vnius beneficio haec tibi felicitas obtigit, gratias agas, et ab illo tramite per omnem vitam ne recedas, eundem aliis fideli exemplo praeiturus. Incidimus

dimus enim in ea tempora, quibus innumeris  
iuuenes et sua et doctorum culpa cum magna tem-  
poris, laborum et ipsius rationis iactura eas lit-  
teras, quae reliquis fundamento sunt, et quas  
sapientissimi maiores altiorum scientiarum ad  
ipsam vitam et utilitatem publicam pro-  
futurarum propaedeumata vocarunt, vel negli-  
gunt omnino vel ita diuellunt, ut vni pro libi-  
dine totos se immergant, reliquis cum contemtu  
posthabitis, quae tamen omnes et cum cum disciplinis  
superioribus et inter se cohaerent arctissime.  
Quotusquisque iam adolescens in hac  
praecipitorum studiorum festinatione a la-  
tinis et graecis litteris, eloquentia, poesi,  
antiquitatibus, philologia, historia, mathesi et  
philosophia instructus ad theologiam, iurispru-  
dentiam et medicinam properat, aut si quod  
harum litterarum genus deperiit, ita tractat,  
ut eius momento recte aestimato, ex fine et fru-  
ctu inde capiendo, pro usu praestando  
et cum ratione addiscat? Quare postquam a  
pueritia BEROLINI sub fidelissimo moderatore ad  
hanc rationem informatus, ante septem annos  
et quod excurrit in curam meam concessisti, san-  
cte prouidi, ne propaedeumatum et deinde  
theologiae partem aliquam penitus negligeres,  
citius, magis, diutius tractares, quam utilitas,  
nexus et ordo litterarum postulare videbatur.  
Quod si non male tibi in rem tuam cessisse  
comperisti, fructumque in altera propaedeuma-  
tum



tum parte ex altera sedulo tractata, omnium vero in theologia et diuinis litteris percepisti: has leges coniungendi litteras natura sua sapientissimoque numine connexas, ne migres vñqnam, philologiam cum philosophia tracta, omnia tamen ad theologiam ita refer, vt in eius solida et salutari cognitione his etiam subsidiis prouehenda religiosissime semper elabores. Ita demum feliciter ages, ciuitati DEI, et rei sacrae proderis et aeternitati viues. Dabam d. x. febr. MDCCXXXV.

## AD MEDITATIONES PHILOS.

DE

NONNVLLIS AD POEMA  
PERTINENTIBVS

QVAS

AD D. XXIII. SEPTEMBRIS. CIC 10 CCXXXV.

ERVDITORVM DIIVDICATIONI SVBMISIT  
M. (a) ALEXANDER GOTTLIEB BAVMGARTEN  
RESPONDENTE

(b) NATHANAELE BAVMGARTEN

(a) Vide supra p. 189. (b) itidem summos in philosophia honores cum laude obtinuit, neque ita multo post BEROLINVM migravit gymnasii illius correctoris uti vocatur vices subiturus.

FRA.



## FRATRIBVS DISPVTATVRIS

SAL. PLVR. DIC.

SIGISMVNDS IACOBVS BAVMGARTEN,

THEOL. PROF. ORD.

**V**idebimini multis, sui ingenii modulo  
et praesente nescio qua utilitate omnia  
metientibus, inanem operam lusisse,  
in demonstranda poeseos natura et  
praeceptis, cuius equidem litis iudex non sedeo,  
dicam tamen, sententiam rogatus, rationes,  
cur mihi se prober mirifice hic labor vester,  
quas habeo plures. *Vna* est, quod argumentum  
elegistis, in quo, si quid humani passuri fuisse-  
tis, verendum non erat, ne detrimentum cape-  
ret res publica aut ciuitas sacra, quod modestiae  
tribuo. *Altera*, quod humanitati et elegantio-  
ribus litteris atque iucundissimae in primis poesi  
callide satis consultum iuistis, quod officii et  
prudentiae est. Ea enim viuimus tempora, qui-  
bus barbaries imminere, et ipsum scientiarum  
incrementum elegantiis litterarum interitum mi-  
nari viderur, dum scholasticorum lingua in ciui-  
tatem postliminio reuocatur mirum in modum  
locupletata, artes contra, quae omni vitae or-  
namento et praesidio sunt, negliguntur. Forte  
hae litterae magis placebunt, si in saeculum phi-  
losophicum sub pallio deducantur, aut hoc con-  
dimento



dimento saliuam nonnullis mouebitis ad degustandam dulcissimam poesin, quam adhuc pro insipida fingendi et desipiendi licentia habuerunt. *Tertia tandem* est, quod artem et scientiam feliciter satis, si quid iudico, coniungitis, quod ipsum scientiae ducō, et disciplinam in artis formam diu redactam ad scientiam euehere elaboratis. Dudum id desiderarunt sagacissimi viri, ut ars et scientia in disciplinis, quae utramque admittunt arctius coniungerentur et rectius distinguerentur simul, quam quidem plerunque fieri solet. Sicut enim non quaevis scientia, disciplinam ex causis et principiis certis deriuans, ad artem referri potest, quae habitum cum ratione effectivum format, et complexu regulorum ad effectum producendum requisitarum absolvitur, qualis effectus in speculatiis disciplinis locum non habet: potest tamen omnis ars ad scientiam referri, si regulae demonstrantur et ita determinantur, ut exceptio evitetur. Praecipare cum litteris et omni humano genere ageatur, si artibus omnibus illa iam felicitas obtigisset, quod posteritati seruatur, praecarius tamen, si recte vterentur mortales arte et scientia, ut neque tirones et rudiores arte nondum initiatos ad scientiam protruderent, philosophica cognitione disciplinarum imbuerent historica destitutos, neque tamen prouectiores a scientia arcerent, neque aliorum doctores constituerent ultra artem artisque praecepta non eductos, ratio-



tionum reddendarum imperitos omnino, sed  
scientia praeditos, licet eamdem non creparent  
vbiuis. Verum satis iam desideriorum. Vo-  
bis, SVAVISSIMI FRATRES, gratulor disputatio-  
nem eruditorum examine non indignam, mihi-  
que vberioris ex vobis studiisque vestris capien-  
dae delectationis spem certissimam. Fortunet  
DEVS O. M. vestram artis et scientiae iter, idque  
in rem vestram et emolumentum publicum feli-  
cissime cedere iubeat. Dedi xi. cal. oct.  
clio ccxxxv.

## AD DISPVVTAT. PHILOS.

DE

## VERITATE

QVAM AD D.VI.ID.OCTOBR.CI CLO CCXXXV.DEFENDIT

PRAESIDE

M. ERNEST. CAROLO WIGANDO

RESPONDENS

SAMVEL RAYMANN

HVNGARO EPERIENSI COMITATVS

SAROSIENSIS.

NOBILISSIMO ORNATISSIMO QVE

SAMVELI RAYMANNO

S. P. D.

SIGISMVNDS IACOBVS BAVMGARTEN,

S. THÉOL. PROF. P. ORD.

Exi-



**E**ximio tuo et singulari plane bonae mentis ac litterarum studio, eiusque felici successu tantum ego delector, quantum delectari potest TVI amantisimus. Non citius enim innotuisti mihi familiarius ab experientissimo PATRE TWO curae meae traditus, quam liberale ingenium mentemque aduersus litteras egregie animatam deamare, immo non bene solum de TE sperare, verum et confidere coepi, fore ut TVORVM exspectationem impleas et superes longissime. Quam ob rem bellam hanc opportunitatem gratulandi TIBI studiorum tirocinia dimittere nolui, sine aliqua meae in TE voluntatis significatione, et publico incitamento ad virtutis et litterarum stadium decurrentum felicissime. De argumento disputationis vbi primum resciui, ex notissima cogitandi lege incidi in verba PONTII PILATI procuratoris romani IOANNIS c. XVIII. COMM. XXXVIII. obuia: *Quid est veritas?* ad quorum conceptam formulam a plerisque de labore, vestro iudicatum iri opinor. Non iam interpretum diuortiis componendis labore, fateor tamen in illorum me sententiam dudum transivisse, quibus iniquissimus iudex seruatorem optimum, postquam veritatis mentionem fecerat, sibique regnum veritatis vindicauerat, derisurus ita pronuntiasse videtur, ut tam contemtum harum ineptiarum, quas ad forum suum nihil pertinere arbit-



arbitrabatur, quam etiam desperationem de ope  
ipſi ferenda declararet. Nouerat fauerrimus  
homo obſequium amicos, veritatem odium parere,  
eiusque partes ſaepiffime non ſine fortunae iactu-  
ra defendi, a quo mirifice abhorrebat. Impe-  
ditiorem ſimul cognitionem veri ſuſpicabatur,  
quam ut magnum operaे in ea inuestiganda na-  
vandae preſtum laturum ſe ſperaret: quare de  
cauſa ſeruatoris veritatis patroni conclamatum  
eſſe edicebat. Propius ab hac leuiffimi animi  
ſententia abſunt non dicam mortales plerique,  
qui quidquid veritatis eſt, cuius ambitus patet  
latiſſime, fuſque deque habent, verum etiam  
multi qui viṭra plebem ſapere et aequi bonique  
ſtudioſi eſſe volunt, dum veri certique ſunt ad-  
modum incurii, cuius ſtudium niſi noxiūm, ina-  
ne certe ac minus profuturum pronuntiant. Erit  
igitur eo enitendum omnibus, qui vel edocti vel  
experti intelligunt, quanti interſit felicitatis hu-  
manae, veritatem cognosci et amplificari, vt  
prouideant ne quid ex contemtu veritatis cuius-  
cunque demum ordinis illa ſit, detrimenti capiat  
vtilitas publica. Laudo p̄aeclarūm conatūm  
TVVM, ornatissime RAYMANNE, de veritatis na-  
tura explicanda bene merendi, eiusque defen-  
ſionem publicam fuſcipiendi, quam ominor fe-  
licem. Qued reliquum eſt DEVVM o. M. precor,  
vt TE ſpiritu ſanctiſſimo in omnem diuinam veri-  
tatem transducat, in eaque non cognoscenda magis  
quam viuendo exprimenda dirigat: ſtudiorum

in primis mutationem, quam a parente tuo indulgentissimo ipsoque deo non obscuris voluntatis suae indiciis iussus, iam meditaris, ex nostris in medicas scholas concessurus, fortunet abundantissime. Dedi ad d. vi. id. octobr. MDCCXXXV.

## AD DISSERT.

DE  
DIONYSIIS SICILIAE TYRANNIS

QVAM

PRID. ID. IANVAR. CIC IC CCXXXVI.

PVBLICE TVEBANTVR

FRID. GVILIELMVS (\*) ROLOFFIVS  
BEROLINAS

ART. ET PHIL. MAG.

AC

RESPONDENS

AVG. PETRVS BORNEMANNVS.  
SCHOENEBECCA MAGDEBURG.

PRAESIDI CLARISSIMO

S. P. D.

SIG. IAC. BAVMGARTEN.

TH. PROF. ORD.

(\*) Professor historiarum et antiquitatum FRANCOFVRTI  
ad ODERAM celeberrimus. Facit



Facit paterna amicitia, amor in TE meus  
cultus a TE diligentissime, et honoris ele-  
gantissimae scriptionis dedicatione ante  
sesquiannum et quod excurrit mihi delati  
recordatio, atque adeo ipsum grati animi officium,  
ut hanc gratulandi opportunitatem natus aliquid  
ad TE litterarum cum bonis verbis dandum esse  
omnino existimem. Laetissimo enim hoc tem-  
pore two, quo in celebritatem academicam pro-  
dis dexteritatem publice periclitaturus, et gna-  
ris ingeniorum arbitris, prisci litterarum deco-  
ris amantibus, antiquam doctrinam, elegantias et  
humanitatem probaturus mirifice, a me labori-  
bus quidem obruto, litterarum tamen et ami-  
corum non inimemore id certe non impetro, ut  
officio desim, neque significem, quanti a me  
fias, et quam bene cupiam litteris antiquis in  
quibus ornandis, amplificandis, a contemtu et  
interitu vindicandis rarissimo apud nos exemplo  
totus elaboras. Quare ut vniuersum argumentum  
paucis complectar, tibi vere gratulor, bo-  
nis litteris gadeo, academiae bene ominor, et  
fausta quaevis non ex tusca disciplina, sed cer-  
tissimis primitiarum indicis augor. Vnum  
est quod vehementer TE etiam atque etiam oro,  
ut contra malevolorum obscuros insultus virtuti  
et industriae fortiter insistas, utilitati publicae  
DEO et ciuitati sacrae viuas, de litteris humanio-  
ribus deliciis TVIS immortaliter merearis. Ita

mihi prospere omnia, eueniant, vt haec non spero  
sed prouideo, et ex animo precor. Vale rectis-  
sime. Dedi in frideriana ad d. IIII. id. ianuar.  
elio I<sup>o</sup> CCXXXVI.

EPISTOLA  
DE  
VETERVM CONIVNCTIONE  
MATHESEOS CVM PHILOSOPHIA

QVA  
CLARISSIMO DOCTISSIMO QVE  
IOAN. GOTTLLOB (\*) KRVGERO  
SVMMOS IN PHILOSOPHIA HONORES  
D. XVIII. CAL. FEBRVAR. CLO IO CCXXXVII

OBTINENDOS  
AMANTISSIME GRATVLATVR  
SIGISM. IAC. BAVMGARTEN

THEOL. PROF. ORDIN.

CLARISSIMO CANDIDATO

S. P. D.

SIG. IAC. BAVMGARTEN

(\*) Studiosa sane iuuentus cordatiorque eruditorum  
familia, auida iam exspectat dulcissimos ex felici illa  
matheoseos cum philosophia coniunctione fructus:  
nec noua, quam VIR CLARISSIMVS typis iam excuden-  
dam curat physica summam, quam primitiae eius iam  
exspectationem fustrabitur. Off.



**O**fficio deessem, neque ingrati animi maculam effugerem facile, si honores ab amplissimo ordine philosophico in TE conferendos hodie TIBI gratulari negligerem, aut honorifica disputationis TVAE dedicatione condecoratus aliquod voluntatis in TE meae monumentum existare non curarem. Incredibilis enim praeclara hac virium contentione, qua ad bonas artes eniteris, cumulus accessit ad veterem existimationem, illumque amorem, quo non citius TE cognoui quam complecti, et prosequi coepi. Dicam quod res est. Laudabiliter et auspicato agere mihi videris, quod in rebus naturalibus peruestigandis non opiniones, sed ipsam naturam magistrum sectaris, atque in illius recessus experimentis capiendas penetras, eaque radio ita describis, ut matheseos et philosophiae felicissime a TE cultae, fructuumque ex una scientia in alteram redundantiam iam specimen edis, ea honestatis TVAE amplificatione, quam hodie consequeris, longe dignissimum. Facis hoc, non nostrae solum aetatis virorum de scientiis immortaliter meritorum exemplo, verum etiam philosophorum ab hominum memoria antiquissimorum auctoritate, qui scientias distinctas omnino, nec temere limitibus remotis commiscendas, ipsa tamen natura sua arctissime inter se copulatas, coniunctissima opera tractarunt. Primi Lapientes orientis hanc viam

V 3

phi-



philosophandi praeiuerunt, vt non magis ipsius philosophiae et matheſeos, quam vtriusque copulandae primordia ab illis merito repetantur. Quorum vestigia ſollicite legerunt, qui ſcientias in GRAECIAM inuexerunt, nihilque prius etiam quibus habuerunt praeparatione mathematica ingeniorum ad philosophiam formandorum. Italicae ſcholae diſcipulos silentio aliisque exercitiis initiatos PYTHAGORAS mathematicos vocari iuſſit: quod matheſi imbuerentur et ad altiora subigerentur, atque ſic demum ad naturae ſpectaculum dederentur et physici euaderent. Eamdem legem tulerunt quorundam ex iouica ſchola prodierunt philoſophiarum conditores, vt matheſeos ignari a ſcholis suis abeffent. Quod ſicut PLATONEM prouidentiſſime fanciuſſe nemo ignorat: ita celeberrimum quemque philoſophum, licet in doctrinis vel maxime ad alia omnia diſcederetur, ea tamen in re ſecum ſentientem habuit; ne ipſo quidem ARISTOTELE excepto, qui procacissima magiſtrum oppugnandi eiusque doctriṇas laceſſendi libidine induci non potuit, vt hanc conſuetudinem immutandam existimat. Quod et luculentis ſententiis bene multis ut lib. VI. ad NICOMACH. et ſuo ipſiusmet exemplo teſtatiſſimum reddidit. Iure enim meritoque acutiffimis interpretibus exempla regularum in analyticis propositarum non ex matheſi potius quam aliunde deſumturus fuſſe videtur, niſi illa omnibus ad philosophiam admissis eo tempore longe



longe notissima fore putasset. Et quamquam hos secuti philosophi inter se committebantur in ordine disciplinarum constituendo; quum nonnulli post physicam ante metaphysicam mathesin collocarent, plerique autem ab antiquo more ordendi a mathesi recedi nefas ducerent: id tamen inter omnes vnamini sententia constitisse nouimus, mathesin ab his litteris omnino non esse separandam. Quae laudabilis veterum industria dupli potissimum occasione sensim obsoleuit. Vna fuit taedium laboris in hac ingenii præparatione deuorandi: quem veriti homines, temporisque et molestiarum compendium facturi, sine mathesi, imo sine litteris et grammatica in philosophiam inuolare coeperunt. Quam priscae disciplinæ seuerioris turbationem TAVRVS celeberrimus sub ADRIANO philosophus, apud GELLIVM lib. I.c. VIII. acerbe questurus, nunc, inquit, *isti qui repente illos pedibus ad philosophos diuertunt, non est hoc satis, quod sunt omnino αἴσθωτοι, ἀμουσοί, αγεωμέτρητοι, sed legem etiam dant qua philosophari discant, alius ait, hoc me primum doce, item alius, hoc volo, inquit, discere, istud nolo. Accessit altera, maleferiata quarundam mathematicorum audacia, qua animum induxerunt, ut innocentissima disciplina ad astrologiam genethliacam et diuinatoriam, superstitionissimam circumueniendi artem, turpiter abuterentur, ultra puluerem et radium saperent, diuinas res violarent, humanis rebus fatum inferrent atque euentus*

V 4

fu



futuros ex sideribus canerent. Qua re factum est, ut non solum vulgus mathematicos vocaret praeстиgiatores et vates quosuis, ac nobile illud nomen ad nequissimos nugatores transferret: sed mathematici etiam ciuitate pellerentur, apud SVETONIVM in TIBER. c. XIII et XXXVI, VITELL. c. XIII, ac legibus imperatorum contra mathematicos latis, ab ipsorum fraudibus rei publicae caueretur, quae in codice iustinianeo hodieque supersunt, lib. X. titul. XVIII de maleficiis et mathematicis, atque in codice theodosiano lib. VIII. tit. XVI, leg. VII. et XII. de mathematicis vrbe ROMA et ciuitatibus omnibus pellendis et codicibus eorum cremandis. Idem fuit in ciuitate christiana legum sacrarum contra mathematicos rigor quibus libros suos antistiti tradere concremandos iubebantur, vt sic fierent christiani, quas PHOTIVS in nomocanone tit. VIII c. XXV recenset complures, et WILH. BEVERREGIVS in synodico eccles. graecae exhibet tom. I. pag. CCCCLXVIII et tom. II. part. II. p. DCLXXIII. Quorsum et veterimorum ciuitatis sacrae doctorum querelae et inuestigiae contra mathematicos referantur necesse est, quales apud TERTULLIANVM deprehenduntur de idolatria c. VIII et in mosaicarum ac romana- rum legum collatione tit. XV de mathematicis et manichaeis, et apud PRUDENTIVM lib. II contra SYMMACHVM v. CCCCLXXVIII et DCCCLXXXIII. Quae sine dubio 10. SARESBERIENSEM mouerunt, ut honori ipsius matheſeos ab his abusibus purgatae

con-



consulturus, non sine mirifica graecarum litterarum ignorationis testificatione, duplarem vocem graecam fingeret, *matheſin*, cuius penultima breuis esset, quam probandam existimat, et *matheſin* cum penultima extensia quam improbat, POLITICAL lib. I. c. XVIII. Euenit hac nominis ambiguitate, ut satis diu contemta haberetur *matheſis*, et ad suspicionem magiae, beneficii ac profanae impietatis paene sufficeret vel leuis rerum mathematicarum peritia. Sed vereor ne, si longius excurrerem, prolixior fierem quam hae litterae amoris in te mei significandi cauſa datae patiuntur: in primis quum probe intelligam, tibi huius felicissimae coniunctionis vtriusque scientiae utilitatem experto nec rationibus nec auctoritatibus admodum opus esse, atque multo minus commendatione mea. Quare scribendi finem faciam, si unum hoc addidero, me plane etiam atque etiam tibi gratulari, mihi academiae et bonis litteris gaudere, excellens ingenium, enixissimum scientiarum studium, bonam mentem in te plurimi facere, felicissima quaevis non tam augurari et sperare quam preuidere, DEVVM ardentissime rogare, ut vberrimos ex his litteris a te fructus et capi et ad utilitatem publicam ferri iubeat, atque de me denique recipere, nullum me officii tempus praetermissurum, neque commissurum umquam ut in te amando, iuuando, exornando, si qua fieri a me poterit, quidquam desideres. Dedi in frideric. postridie id. Ianuarias an. clo Ia ccxxxvii.

V 5

AD



AD DISSERTAT. IN AVGVRAL.

DE

## PARONOMASIA SACRA

QVAM

PRAESIDE

CHRIST. BENEDICT. MICHAELIS

THEOL. ET PHIL. PROF. ORD.

PRO SVMMIS IN PHILOSOPHIA HONORIBVS  
AC PRIVILEGIISAD D. IX. SEPT. AN. CL<sup>O</sup> IO CCXXXVII. EXPONIT

IO. CHRISTOPH. (\*) DECKER

VCAROMVNDA POMERANVS.

CLARISSIMO  
CANDIDATO

S. P. D.

SIGISM. IAC. BAVMGARTEN.

**E**t si nec meam in te voluntatem obscuram  
tibi aut dubiam esse arbitrabar, nec  
industriam tuam in bonis litteris collo-  
catam et tirocinia laudabiliter posita  
cuiusquam atque omnium minime meo indigere  
testimonio existimabam: committendum tamen  
esse non putaui, ut laetissimo hoc tempore tuo,  
quo summis in philosophia honoribus condecor-  
atus

(\*) Totus huc usque fuit in eruendis eiusmodi sacri  
codicis deliciis, nec paucis veritatum caelestium ae-  
stimatoribus probauit.



ratus in celebritatem academicam admodum honorifice prodis, unus ego amicorum Tvorvm filerem, aut inter aliorum gratulationes nullum mei erga te amoris et voluptatis ex felicitate tva captae monumentum publicum existaret. Quare hanc tibi dignitatem brevibus quidem et familiariter, at vere et ex animo sic gratulor, ut et amicitiae satisfiat, neque officiosissimi tui in me amoris immemor esse videar, et restatisimum apud omnes faciam, quibus potissimum rebus studia tva adeo mihi probaueris effecerisque ut profectibus tuis tantopere delecter. Ita enim rerum tvarvm rationes subduxisti ex quo tempore in hanc bonarum artium palaestram concessisti, ut sanctiorem doctrinam, cui te vni consecratum esse gaudeo, cum propaedeumatibus studiosissime copulares, neque haec inter se coniunctissima diuelleres, sed pro eo, quo et inter se et cum ipsis sacris litteris cohaerent vexu mutuo, arctissime coniungeres, atque adeo non solum in singulas diuinorum doctrinarum partes animo enixissimaque virium contentionе incumberes, verum etiam philosophia, mathesi et linguarum in primis sacrarum cognatarumque scientia te erudiendum curares, sancteque caures, ne quid bonarum litterarum ad publicam utilitatem profuturarum in te defideraretur. Cuius rei fructus iam cepisti, opinor, atque in posterum capies, si quid iudico, aliisque feres longe uberrimos, neque vanum me tibi vatem fuisse

LIS  
BVS  
NIT  
am  
nec  
lo-  
ita  
ere  
en  
vo,  
O-  
us  
co-  
ne-



fuisse intelliges, qui quam primum me auctorem  
in litteris tractandis sequi coepisti, ita dudum  
praeuidi saepiusque praedixi. Age igitur clari-  
ssime candidate, macte hac virtute esto, TE  
ipsum iam sequere, aliis viam eruditionis  
exemplo et doctrinis sancte p[re]aeito, teque DEO  
et sanctiori disciplinae deuotum esse memento.  
Facies hoc omnium rectissime, et multa tempo-  
rum nostrorum pericula securus transibis, atque  
inxcusabile sacrarum litterarum fastidium, quo  
multi iam vel ipfi earumdem studium professi  
in transuersum abripiuntur, effugies, si ab  
illo tramite, quem ingressus es, oracula diuina  
in deliciis habendi, ac diurna nocturnaque manu  
versandi numquam recedes, neque in patentis-  
simum linguarum scientiarumque campum ex-  
curses, quin quicquid ad ea illustranda per-  
tinere videbitur sollicite conquisitum eo trans-  
ferre studeas. Quam exspectationem eo certius  
impletum iri confido, quo laetioris ominis instar  
habeo, quod eiusmodi specimen eruditionis pu-  
blicum iam edendum statuisti, cuius utilitas ad  
diuinis litteras penitus intelligendas maiorisque  
faciendas redundans vehementer me delectavit.  
Multos enim non imperitos elegantiarum arbitros  
magnificentius iudicaturos fuisse arbitror de eo-  
rum, quae viri sacri diuinitus scripserunt, praef-  
stantia, et ipsa librorum diuinorum eloquentia  
admiranda plane et incomparabili, si figuræ,  
flores et colores ad delectandum mouendumque  
com-



comparatos, quibus referti sunt, rectius per-  
spexissent: quod tamen sine linguarum sacrarum  
notitia datum est nemini. In quibus quum  
non postrema sit iucundissima paronomasia: ope-  
rae omnino pretium facis, quod eius copiosio-  
rem pertractionem publicandam defenden-  
damque suscipis. Scatent enim, crede mihi,  
oracula diuina occultis eiusmodi allusionibus ad  
facta praegressa, mores gentium et ritus antiquos,  
ipsas etiam, quod proprius huc pertinet sonorum  
similitudines et vocum ac nominum maxime  
propriorum deriuationes. Quod ultimum allu-  
sionum genus inter viros diuinos, qui graece scri-  
pserunt, a PAVLLO potissimum, ubi familiarius agit,  
visitatum fuisse, constat. Ut praeter euidentis-  
simam paronomasiam ad nomen ONESIMI in epi-  
stola ad PHILEM. com. X. XI. XX. obuiam, ipsae  
blandissimae compellationes PHILEMONIS, visce-  
rumque, amorum, hospitii et amplexuum comme-  
morationes in iisdem ad illum datis litteris com-  
probant: quibus PAVLLVM PHILEMONI aurem  
vellere, ipsumque nominis sui commonefacere  
voluisse interptetes obseruarunt. Ad ipsum  
autem PAVLLI nomen non solum ipse i COR. XV  
COMM. VIII EPH. III COMM. VIII verum etiam qui-  
busdam non improbabili ratione DAVID ps. LXVIII  
COMM. XXVIII respexisse visus est. Nec forte  
falleretur, qui idem in nomine TIMOTHEI et ONE-  
SIPHORI factum fuisse existimaret i TIM. III COMM.  
VII cap. VI COMM. XI i TIM. I COMM. XVI. XVII.  
XVIII.



XVIII. Facit etiam maior harum allusionum ratio habita, ut ciuitatis christiana primi doctores, quos patres vocare solemus, latini aequi ac graeci et felicius intelligantur et a suspicione ignorantiae in vocum originibus ac significacionibus liberentur, quam nimio allusionum et paronomasiarum studio excitasse videntur. Quod luculentissimis exemplis confirmari posset, si epistolae ratio permetteret, quam prolixissimus in TE amor meus iam longiorem reddidit, quam quidem destinaueram. Quam ob rem ne animo indulgeam, scribendi finem faciam, si TE hoc unum rogauero, ut de me sic statuas, omni occasione vel data vel captata operam me daturum, ne quid tibi a me desit officiorum studiorumque, quod ab homine proficiisci poterit TUI quam amantissimo. Ded. in frideric. ipsis non. sept. an. clo 10 ccxxvii.

AD DEMONSTRATIONES  
AD  
**EBRAEORVM GRAMMATICAM**  
PERTINENTES

QVAS

AD D. VIII. OCTOBR. CLO IO CCXXXVII.

PRAEVIDE  
**M. IO. CHRISTOPH. DECKER**

DEFENDIT  
**GOTTHILF IO. LVDOV. (\*) DIENEMANN.**

BEROLINAS.

(\*) Gymnasii Islebienfis Rector.

ORNA



ORNATISSIMO  
DIENEMANNO SVO

SAL. PLVR. DIC.

SIGISM. IACOBVS' BAVMGARTEN.

**Q**ui PRAESIDI TVO clarissimo nuper admodum disputationem solemnem et summos in philosophia honores gratulatus sum, atque amicitiae officiorumque fidem dedi, ad publicam iam a TE, amicissime DIENEMANNE, vobiscum pugnam prouocor. Suscipe has partes, hostemque simulabo, quoad per amorem et temporis angustias, quibus labore, fieri poterit, ita ut et ipsi PRAESIDI, cui plurimum volo, fidem studiumque comprobem, et TIBI significem quanti faciam ingenium, mores, industriam, litteras, omnesque illas virtutes, quas in TE iam aliquot annos cognitas mirifice deamaui. Disputationis argumentum omnibus, qui linguarum studiis bene cupiunt, si quid prouideo, apprime placebit: mihi certe gratissimum fuit, qui non solum linguis, quod profiscine dixero, multum delector, earumque incredibile ad omnem sanctiorem doctrinam praefidum esse quotidie intelligo, verum etiam in sententiarum de linguis addiscendis diuortio ad neutras partes concessi, neque illorum, qui omnem hanc operam grammaticorum regulis mirum quantum multiplicatis absolui pronunciant, nec eorum,



eorum, qui leges grammaticas abrogari, igno-  
rari saltem et ex scholis omnino prescribi, lin-  
guas vero exercitio et usu comparari iubent,  
sed medium inter has sententiam profiteor, ut  
paucis philosophandū esse arbitrer. Nam ut  
grammaticam disciplinam linguarum philoso-  
phiam esse existimo, sic illos maxime sector qui  
ad pauca, foecunda tamen et sufficientia princi-  
pia has leges reuocant, atque efficiunt ut ars  
grammatica a scientia proxime absit. Quam  
praeclarā operā iam diu fatis et in nostra aca-  
demia et alibi ab eximis viris, quibus hae lit-  
terae multum debent, datam esse, eorumque  
vestigia in hac dissertatione premi, optimo iure  
impense laetor. Defensionem solemnem feli-  
cēm vobis futuram et spero, et praesentio, et  
gratulor: licet ipse sim inferior ex conflictu  
discellurus. TV vero, amantissime DIENE-  
MANN E, quidquid suscipies id velim D E V S  
O. M. approbet atque salutare esse iubeat. Mea  
in TE studia et officia semper constabunt. De-  
di in frideric. ipsis nonis octobr. an.  
cl̄o I C CCXXXVII.

AD



## AD OBSERVATIONES

AD

## REM ATHLETICAM PERTINENTES

QVAS

PRO OBTINENDIS MAGISTRI HONORIBVS

PRAESIDE

IO. HENR. SCHVLZE

PHILOS. ET MEDIC. DOCTORE ELOQVENTIAE  
ANTIQUIT. ET MEDIC. PROFESS. P. O.A. D. XII. OCT. CI<sup>o</sup> IO CCXXXVII.

PLACIDO ERVDITORVM EXAMINI SVBIECIT

NATHANAEL (\*) BAVMGARTEN  
BEROLINAS.

NATHANAEI BAVMGARTEN,

FRATRI

S. D. P.

SIGISMVNDS IACOBVS BAVMGARTEN.

**E**go tibi, mi frater, non gratularer disputationem solemnem et honores academicos? Difficulter, mihi crede, id facio, non quod exiguum iis pretium statuam, aut illis te indignum iudicem, aut dignitate tua mediocriter, ne dicam nihil omnino delecter:

X

sed

(\*) Vide supra ep. XV. p. 300.

sed quod ipse TE omnibus, qui litteris volunt,  
satis commendas; quod frater es, de quo quae-  
cunque a fratre dicantur vel verissima et ab af-  
fentionis specie remotissima amori magis et  
confuetudini tribui putantur, quam rationis iu-  
dicio et merito TVO; et quod in TE bene formando  
hos docem annos et quod excurrit, nonnihil  
operae posui, cuius exoptatos fructus tacitus  
percipere malim, quam ambitiose praedicare.  
Longe tamen difficiliori et inexcusatori taciturni-  
tate, quae sentio apud me cohiberem. Nae  
ipse mihi viderer vel litterarum bono non gau-  
dere, vel frater fratri deesse, vel mihi ipsi non  
satis constare, si quem lateri meo adhaerentem  
tam diu habui, iam in lucem academicam non  
sine consilii mei auctoritate prodeuntem bonis  
verbis destituerem, atque publica amoris ad-  
uersus TE mei et laetitiae, speique a TE factae,  
testificazione non comitarer, neque precibus  
prosequerer. Praeterea ingratus forem in DEV  
o. M. cui id acceptum refero, atque in maximis  
beneficiis, diuinitus profectis, colloco, quod  
paterno testamento me non tam curarum fratri-  
bus insumendarum, quam voluptatum ex vero-  
que fratre capiendarum haeredem scribi iussit,  
si gratiis ipsi agendis supersederem, et vota  
concepta olim iam non persoluerem. Quare ex  
animo et vere TIBI gratulor, mihi gaudeo, ad pae-  
clara quaevis TE hortor, et pristinorum votorum  
reus noua pro TE nuncupo. Gratulor et litteras,

quas



quas imbibisti, tam seueriores, quam elegan-  
tiōres, usui, ornamento et delectationi, quoad  
viues futuras: et honores, quibus iam conde-  
coraris, a TE, si quid auguror, non magis ca-  
pessendos et sustinendos, quam ornandos: et  
opportunitatem confirmandi animum illis doctri-  
nās, quas alios docebūs, atque adeo bene me-  
rendi de bonis litteris. Laetor operam qua-  
leūcunque meam, et consilia, quorum si quem  
ūmquam TE certe obtemperantem habui, bene  
cessisse, neque TE solum non fecellisse, verum  
impleteuisse et superasse spem, quam dudum mihi  
feceras, multumque a TE fratrem a me proxi-  
mum aemulaturo, curas et labores meos suble-  
uatum iri laetus praesagio. Hortor TE, mi  
frater, ut felicissimam bonae et religiosae men-  
tis cum litterarum studiis, harumque inter se  
coniunctionem per omnem vitam p̄ae TE feras,  
sanctoris semper disciplinae, qua initiatus es,  
memor viuas, exspectationem bonorum omnium,  
quam TIBI grauem aduersariam constitutam ha-  
bes, non minus, quam DEI beneficia in TE cu-  
mulata quotidie cogites et inter media pericula  
aeternitati TE vindices. DĒVM vero indulgentis-  
simum familiae statorem supplex veneror, ut  
suis in TE donis faueat, felices laborum successus  
praestet, studia et lucubrationes fortunet, mihi-  
que sic omnia prospere euenire iubeat, ut in TE  
amando, iuuando, ornandoque nemini con-  
cedam. Dedi in frideric. d. III. id. octobr.  
an. cl̄o Iō cccxxvii.

AD DISSERT. IN AVGVRalem MEDIC.

QVA  
**PRAEIVDICATAE QVAEDAM DE  
 VENAE SECTIONE  
 OPINIONES EXPENDVNTVR**

QVAM

PRAESIDE  
**D. IO. HENR. SCHVLZE**

MEDICINAE ELOQV. ANTIQV. ET PHIL. PROF. P. C.

PRO GRADV DOCTORIS

A. D. XIII. IVN. CLO 10 CCXXXVII.I

PVBLICE DEFENDIT

AVCTOR

**SAMVEL (\*) RAYMANN**

EPERIESSINO - HVNGARVS.

CLARISSIMO  
**SAMVELI RAYMANNO**

SAL. PLVR. DIC.

**SIGISMVNDVS IACOBVS BAVMGARTE**

S. THEOL. PROF. P. ORD.

(\*) Tam enucleate, certe, atque euidenter praeclaram illam de venae sectione doctrinam vi clarissimus exposuit, argumentisque philosophi



ui ante tres annos ingenii et diligentiae specimen, quod disputatione publica de veritate habita edebas, ex animo TIBI gratulatus sum, iam nequaquam committendum esse putaui, vt in celebriori hac dignitatis TVAE amplificatione amoris in TE mei et officii desideraretur quidquam. Plures enim easque sat graues habere mihi videor rationes voluptatem non mediocrem ex TE capiendi, praeclara quaevis de TE sperandi, et rebus TVIS optime precandi. Primum impense laetor de eximio veri rectique studio, quod in hac bonarum artium fede bonis omnibus abunde approbasti. Deinde mirifice delector felicitate, quae TIBI diuino beneficio contigit plane singularis, ita

X 3

eme-

cis, mathematicis, physicis, stabiliuit, vt medicina, si ceterae eius partes eadem felicitate forent absolutae, a scientia prope abesse videretur. Observauit atque laudauit tam rarum medicae doctrinae exemplar *illustr. HOFFMANNVS* singulare academiae nostrae decus, cuius domus totius pene EVROPAE oraculum iam dudum esse coepit, in litteris ad clariss. respond. datis, placuit, inquiens, scribendi genus planum, tersum et perspicuum: magis placuit ratiocinium iustum, et rerum quas tractas naturas omnino accommodatum, aut potius ex eis deductum, colligatum, connexum - - - Sic decet omnino res medicas tractare, vt duo ista, quae cognoscendi principia sunt, RATIO et EXPERIENTIA, amica inter se copula iungantur, et altera alteram illustret, altera instruat et firmamentum praebeat.

emetiendi stadium studiorum academicorum, ut  
non solum ab illius periculis TIBI caueris, verum  
etiam laudabilis industriae in bonis litteris et sa-  
lutiari in primis arte collocatae insignes fructus  
feras, supremis honoribus academicis condecora-  
ratus. Mihi ipse denique gratulor TIBIQUE gra-  
tias ago, quod spem, quam de TE et concepe-  
ram ex quo curae meae traditus huc concessisti,  
et aliis, feceram, non fefelleristi, sed superasti potius,  
ipsoque iam euentu vera fuisse demonstras, quae  
de felici laborum TVORVM successu non ut vates  
diuinaui, sed ex egregia mentis indole et inde-  
fessa virium ad virtutem enitentium contentione  
satis diu prouidi et praedixi. Age igitur, ami-  
cissime RAYMANNE! macte esto laude TVA. Red-  
ditus parenti experientissimo, cui plurimam  
meis verbis salutem dicas velim, TIBI, patriae,  
vilitati publicae, multorum saluti, aequae adeo  
aeternitati viue feliciter, doctrinarum, quas  
apud nos imbibisti, et amicorum qui TIBI hic  
admodum cupiunt numquam immemor. Dedi  
HALAE ad SĀLAM in fridericana postridie id,  
jun. an. MDCCXXXVIII,

AD



## AD DISSERT.

QVA

ANTIQUITATEM CODICIS  
ALEXANDRINI

PRAESIDE

D. IO. HENR. SCHVLZE

MEDICINAE, ELOQUENTIAE ET ANTIQV. PROF. P.O.

A. D. VIII. APR. AN. CLO IO CCXXXVIII.

PVBLICE VINDICAVIT

AVCTOR

IO. AVGUSTIN. DIETELMAIERVS.

NORIMBERGENSIS.

HONORATISSIMO AMICISSIMO QVE

DIETELMAIERO

SAL. PLVR. DICIT.

D. SIGISMVNDS. IACOB. BAUMGARTEN.

Oportunitatem diu desideratam, laetus  
 arripio, aestumatissime DIETELMAIERE,  
 publice significandi, quanti a me fias  
 optimo merito tvo. Effecerunt enim  
 et animi dotes, quas a natura, liberalique edu-  
 catione DEI beneficio habes eximias, et singula-  
 ris doctrina, eiusque amplificandae ardor incre-  
 dibilis, et officiosissimus in me amor tuus, et

PARENTIS TVI maxime reuerendi benevolentia,  
ut amicitiae leges migrare mihi ipse viderer, si  
quam occasionem, solemnius TIBI gratulandi,  
praestandique officium praetermitterem. Quam  
ob rem non solum publicam oppositionem con-  
tra disputationem TVAM in me recepi lubens,  
verum etiam hoc, quidquid est litterarum, ad  
TE dandum esse putaui. De priori poteram am-  
bigere, et quod lectis aliquot dissertationis pi-  
ragraphis facile perspexi difficultatem oppugnan-  
di cum veri specie doctrinas, de quibus idem  
sentio, in primis si solide euictae sunt, et extrin-  
telorum iactum posita, et quod animo TVI aman-  
tissimo vis inferenda videbatur ad partes aduer-  
sarii vel aliquantum sustinendas. Vicit tamen  
desiderium TVVM, cui difficilis esse nolui, e:  
ipsa in TE voluntas mea, ad difficiliora paratis-  
sima. Comparebo igitur et nonnulla proponam, ut  
habeas in quibus discutiendis, doctrinam litte-  
rasque a quibus TE instruissimum esse noui,  
publice explices, omnibusque approbes. Epi-  
stolae huic destinaueram breuem narrationem de  
fatis GRABII anglicanis, ea, quorum mentionen-  
fecisti in dissertatione, illustratram, quod nuper  
admodum libellum posthumum GRABII, quo loca  
scripturae sacrae et patrum de diuinitate CHRISTI  
a detorsionibus WHISTONI vindicata, nactus ex  
praefatione historica, longe amplissima GEORG.  
HICKESII LXX. paginarum, quam libro xxx. pagi-  
narum praemisit, multa comperi, alibi non obuia:  
vnde



vnde de aduersitatibus, controuersiis, suspicio-  
nibusque, quas litteratissimus homo habuit et  
fecit, rectius iudicari potest. Veritus tamen,  
ne vel concisior expectatione vel prolixior fie-  
rem, quam fini, quem praefixum habui, con-  
uenit, mutaui consilium. Quare ad TE redeo,  
ornatissime DIETELMAIERE. Vere TIBI gratulor,  
enixissimum studium in bonas litteras, progres-  
sus in sanctiori disciplina factos, ornamenta do-  
ctrinarum, quae interpretem voluntatis diuinae  
mirifice iuuant a multis neglecta, et laudabilem  
operam tam libris diuinis rite interpretandis,  
quam antiquitatis sacrae veterimorumque ciui-  
tatis christianaे doctorum monumentis datam.  
Gratulor tirocinia laborum eruditorum prae-  
clare posita atque hoc in primis temporis aca-  
demici diligentissime collocati documentum.  
Gratulor tandem amplissimam Isphem, bonorum  
qui TE norunt, omnium, quam DEO fauente  
implebis, quum superari nequit. Vale! DEO,  
patriae, reis sacrae, litteris, parenti, amicis, mihi  
denique si meruero, viue feliciter! Dedi in  
academ. frideric. postridie id. april. anni  
ciclo 10 cccxxxviii.

AD



AD DISPVT. INAVGVR.

QVAM

**SOLOECISMVS GENERIS  
A SYNTAXI  
SACRI CODICIS EBRAEI DEPELLITVR**

QVAM

PRAESIDE

**D. CHRIST. BENED. MICHAELIS**

THEOL. ET LING. GR. ET ORIENT. PROF. ORD.

**PRO GRADV MAGISTRI CONSEQVENDO**D. D. XXV. APR. A. C<sup>16</sup>I<sup>o</sup> CCXXXVIII. DEFENDIT**GEORG. FRID. (\*) MEIERVS**

AMMENDORPIENSIS - MAGDEB.

CLARISSIMO

**PHILOSOPHIAE CANDIDATO**

SAL. PLVR. DIC.

**SIGISM. IACOBVS BAVMGARTEN.**

**Q**uem ante paucos menses in cathedram  
theologicam deduxi defensumque  
iui, parum licet opis ferenda*indigum*, eundem ego iam oppugnarem  
et publice lacefferem? Ita sane est. Ipse certe  
a me tui amantissimo illud non impetrassem,  
quod tua voluntas facile impetrauit. Volenti

igi-

(\*) Vide supra epist. VIII. p. 236.



igitur nulla fiet iniuria. Habebis me aduersarium ita TE petiturum, vt quum ex philosophorum formula REACTIO ACTIONI AEQVALIS SIT, virium TVARVM documentum inter omnes constare possit. Non tamen in gratiam TECUM redibo. Eodem TIBI obliuctabor amore, quo in TE semper animatus fui, operamque dabo, vt omnes intelligent, quam velim honoribus TVIS, quibus ab amplissimo philosophorum ordine condecoratus in celebritatem academicam iam prodid, commilitonibus doctrina et dexteritate profuturus. Nouum profectuum specimen philologicum eo TIBI lubentius gratulor, quo magis rationes suas mihi semper probarunt, qui in tractandis docendisque propaedeumatibus altiorum disciplinarum, plures scientias feliciter copulant, atque philosophiam solidiorem cum linguis, historia, litterisque in vniuersum omnibus, quae ab humanitate nomen habent, coniungunt, aut natura communique fine iunctas non separant. Neutra enim, si ab altera doctrinarum specie diuellitur, temporum felicitati consulitur, et barbariei obuiam itur. Quam ob rem philosophiae cum philologia felicissimam coniunctionem in TE impense laetor, eoque certius fore spero et plane confido, vt labores academici TIBI aliisque e re litterarum cedant, atque sic omnium rectissime mutuas suspiciones nugarum tricarumque et praeterreas et effugias, quas tam philosophia abstractionibus, distinctionibus et demon-

stra-



strationibus, quam philologia analysi, regulis, emphasisbus vetustatibusque vna alteri facere solet. Pluribus te non morabor. De me paucis recipio, quidquid ab homine meae fortunae ingeniique officiorum et studiorum proficisci potest, eius tibi nihil umquam defuturum, eademque fide, industria et voluntate me usurum in te ornando, colendo, dataque opportunitate iuando, qua in te formando litterisque tuis prouehendis elaborare studui. Vale, DEO vires valitudinis omnemque felicitatem suffecturo ardentissime commendatus, mihi que faue. Dedi in acad. frideric. d. XII. cal. mai. an. cl<sup>o</sup> I<sup>o</sup> ccxxxviii.

## AD MEDITATIONES MATHEM.

DE  
NONNVLLIS ABSTRACTIS MA-  
THEMATICIS

QVAS  
ERVDITORVM DIVDICATIONI SVBMISERVNT  
AD D. VIII. OCTOBR. cl<sup>o</sup> I<sup>o</sup> ccxxxviii.

M. GEORG. FRIDER. (\*) MEIER

ET  
IACOB. HENR. SPRENGEL  
REZINENSIS VCKARO - MAR CHICVS.

CL<sup>A</sup>.

(\*) Vide supra ep. VIII. p. 236.



CLARISSIMO PRAESIDI  
NOBILISSIMOQVE RESPONDENTI

SAL. PLVR. DIC.

SIGISM. IAC. BAVMGARTEN.

Tanta mihi vobiscum necessitudo est, amicissimi disputantes, multis officiis vestris et meis mutuis constituta, ut vestra caussa omnia velim, neque ipsa litterarum, quas disputabitis, a studiis meis diuersitate a vobis diuelli patiar. Inuitasti me ad oppugnandas theses examini publico propositas, quod mihi valde honorificum duco, curaboque, ut vobis euadat proficuum. Licet enim a puluere et radio, meis olim deliciis, dudum discesserim, et experiundo satis didicerim, quam facile nouis cogitationibus obducantur, et situm contrahant litterae continuo tractari desitae: nihil tamen secius discrimen subibo, excutiam veterem supellecilem, expediam arma obsita et adesa, vobisque obluctabor, non, ut victoriam dubiam, sed minus gloriam reddam, si imperium tuleritis hostemque debellaueritis pugnantem. Prouidebo certe, ut et amicitiae voluntatisque aduersus vtrumque vestrum, quos in meis habeo, et officii nuper admodum, quum disputationem de gradibus virtutis moderarer, mihi praestiti immemor videar nemini. Argumentum dissertationis haud difficulter omnibus appro-



approbabitis, qui scientiis, cupiunt, neque praeter sua, et ex scholis suis hausta nihil non improbant. Permagni enim interest ad litterarum incrementa, ut de primis scientiarum principiis, ipsisque terminis, quos technicos vocant, sollicite philosophemur, eorumque rationes subducamus sedulo. Quare diligentiam in hac re positam et laudo vehementer et VOBIS vere gratulor. Sed quoniam ad gratulationes venio, plura habeo, quae utriusque gratuler. TIBI, clarissime PRAESES, auspicia laborum academicorum, hanc aestatem feliciter exantlatorum gratulor, auditorumque prefectus, gratulor valedudinem aliquantum confirmatiorem, quae ab ipsis laboribus virium incrementa cepisse videatur, gratulor mentem praecclare et modeste animatam, suo se suaque modo metiri solitam, gratulor denique bonorum bene multorum fauorem, ipsumque maleuolorum stomachum, et impotentiorem inuidiam, indiuulsam virtutis et industriae comitem. TIBI vero, aestumatissime SPRENGEL, ingenium gratulor ad litteras natum formatumque, incredibilem virium contentionem, progressus eximios, non solum in sanctioribus doctrinis, quibus TE consecrasti, verum etiam in reliquis litteris, quae ciuitatis sacrae doctorem perficiunt et exornant, factos, atque egregiam spem, quam excitasti, atque, si qua coepisti, via perrexeris, non implebis tantum, sed superabis. Quod reliquum est, quidquid ab homine offi-



officio, sibi constante VESTRIQUE amantissimo  
exspectari potest, ita de me recipio, ut maiore  
studio, magisue ex animo polliceri nequeam.  
Vos operam date, ut bene valeatis, et rem ve-  
stram rectissime agatis, e re vtilitatis publicae.  
Hoc mihi gratius facere nihil poteritis. Dedi  
HALAE ad SALAM in academ. frideric. d. iii. id. oct.  
cl<sup>o</sup> I<sup>o</sup> CCXXXVIII.

## AD DISPUTAT. INAVGVRAL.

QVA

## SOLOECISMVS CASVVM

AB

EBRAISMO SACRI CODICIS DE-  
PELLITVR

QVAM

PRAESIDE

D. CHRIST. BENED. MICHAELIS

THEOL. AC LINGG. GR. ET ORIENT. PROF. ORD.

PRO CONSEQVENDIS MAGISTRI HO-  
NORIBVSAD D. XX. SEPTEMBR. CL<sup>o</sup> I<sup>o</sup> CCXXXVIII. DEFENDIT

SAMVEL ZORN

THALENA-MAGDEBURG.

CLA-



## CLARISSIMO CANDIDATO

SAL. PLVR. DIG.

D. SIG. IAC. BAUMGARTEN.

**D**isputaturo TIBI publice gratulandum esse putau, non otii abundantia, sed amoris erga TE mei et vetustioris et a TE ita culti, ut quae in aliis voluntatis fuerit, illius significatio, in TE certe officii esse videatur. Quoties enim TE cogito, in mentem venire solet laboris scholastici, quem semper meminisse iuuabit. Nec vñquam sine voluptate recordor assidue operae et studii, quo me litteras humaniores et philosophiam praeerunt prosequabar, ex quo in disciplinam meam concesseras. Cuius industriae tirociniique fructus vt TIBI confiterint, et in posterum aliis aequo ac TIBI constent, non precor magis quam spero et confido. Seuerioribus deinde sacris initiatus in decurrente stadio doctrinarum sanctorum idem lateri meo adhaesisti comes induul-  
sus, singulasque theologiae partes non salutasti solum, sed sedulus obiisti, et pericruratus es. Neque postea BEROLINVM delatus atque huc redux factus a TE discessisti, sed aliquot annos rationum consiliorumque TVORVM omnium me participem esse voluisti. Effecerunt haec studia TVA, ut iam vadimonium deserere mihi viderer, si a TE amando, ornando, et si qua



qua fieri posset, iuuando deficerem. Habeo  
tamen praeterea, cur te amem, rationes alias  
complures, ingenium excitatum et laborum  
patientissimum, studiorum maturitatem, quam cu-  
pere paucis, attingere paucioribus datum est, mo-  
rum pudentissimorum suavitatem, animi mode-  
stiam, ipsamque prodeundi in lucem academicam  
cunctationem, quam diuturniorem aegre tulisse.  
Accedit tandem ipsa haec disputatio solemnis, a  
qua me abesse, noluisti, quum aduersarii hostisque  
publici partes mihi detulisti, in usitato alias deuinci-  
endi amicos vinculo denuo me obligaturus. Com-  
parebo igitur, oppugnabo te, periclitabor non  
amorem in me TVVM aut aduersus te meum,  
sed victoriam, de qua eo certior te securum  
esse iubeo, quo minorem telorum armorumque  
spem relinquit et ipsa dissertatio eximia, et otii  
ad ea fabricanda summa his diebus penuria. En-  
amicissime ZORNI! voluntatis tesserat. Si quid  
in posterum a me in te proficiisci poterit non  
beneficii, quod in me non cader, sed operaे  
officiique, mihi constabo TVI amantissimus. Vale  
et rem TVAM age rectissime e re littera-  
rum publicaeque utilitatis. Dedi HALAE pro-  
pter SALAM in acad. frideric. d. x. cal. octobr.  
clo I CCXXXVIII.

Y

AD



AD DISSERT. IN AVGVRalem

DE  
PVNCTORVM EBRAICORVM  
ANTIQUITATE

QVAM

PRAESIDE

D. CHRIST. BENED. MICHAELIS

THEOL. AC LINGG. GR. ET O. PROFESS. ORD.

PRO IMPETRANDIS MAGISTRI HONORIBVS

AD D. III. OCT. A. C<sup>o</sup>I<sup>o</sup> CCXXXVIII. DEFENDIT

AVCTOR RESPONDENS

IO. DAVID MICHAELIS

HALENSIS.

CLARISSIMO CANDIDATO

SAL. PLVR. DICIT

D. SIGISM. IAC. BAVMGARTEN.

**B**ellam hanc opportunitatem nactus voluntatem in te meam publice significandi, nolui amicitiae nostrae atque adeo mihi ipse deesse. Aliquid certe litterarum ad te dandum esse existimauit; non quod meum in te, tamenque gentem studium cuiquam obscurum et dubium esse credam, aut mea te laude, testimonio et commendatione indigere aut or-  
nari

nari admodum posse mihi persuadeam. Haud paullo plus in me quam in TE iniurius forem, si horum quidquam in mentem venire paterer. Sed quod moris iura id exigere videntur, et mea magni aliorumque non omnino nihili interesse arbitror, ut quas leges secter in feligendis amicis, pretioque litterarum cultoribus, carissimis mihi capitibus, statuendo inter omnes constet. Nam crede mihi, amicissime MICHAELIS! non coeco impetu aut fortuito per nescio quid abreptus in TE deamandum incidi, sed iudicio eo deueni, rationibusque subductis TIBI volo, TE, TVAMQUE rem et dignitatem amplector. Parentem TVVM venerandum, de academia litteris et me optime meritum, non commemorabo, cui vni quidquid in me sit aut fuerit potius linguarum orientalium peritiae, debere gratus fateor, ut quem in litteris syriacis, arabicis aethiopicis doctorem, rabbinicis vero auctorem fidum habui: licet paterna amicitia familiaritatis nostrae fundamenta iecerit omnino. Verum ea producam, quae TIBI propria magis sunt atque in hac re potissimum momentum trahunt. Vbi a puluere scholastico ordiendum est, in quo primum mihi innotuit excellens quod DEI beneficio a natura habes ingenium, et laudabilis proficiendi ardor, quem pae TE ferebas. Dici non potest quantam ex illa virium contentionе, morum sedatorum suavitate,

tate, laborum monitorumque patientia et officioso amore tuo cum voluptate spem de te conceperim, quoties inter reliquos curae meae concreditos mihi offerebaris. Quam te postea non fecellisse impense laetor. In academia enim tantum abfuit, ut diuelleremur, ut potius litterarum, animorum et sanctioris disciplinae societate arctius copularemur. Ex quo tempore mentem in te suspexi diuinitus animatam, et inusitatam in illa aetate sollicitudinem severiora religionis et litterarum sacra ita coniungendi, ut illis primas semper deferres, his numquam nuntium mitteres, imo subinde instauratis viribus operam addiceres. Cuius rei non erit ut te umquam poeniteat. Accedit iam noua laborum academicorum consociatio, quum honores philosophicos disputatione habita publice capessis, alios bonas litteras docturus, quod tibi academie et mihi gratulor. In quibus solemnibus me quoque comparere iussisti ad opponendum honorifice invitatum. Argumentum dissertationis vehementer etiam atque etiam laudo et probo. Nondum enim haec caufsa, quam tuendam suscipis, ita perorata est, ut nouis patronis opus non habeat. Sed de his coram. De studio meo in posterum plura reciperem, nisi haec fieri quam scribieret dici mallem. Hoc tamen de me tibi persuadeas valde velim, si quid umquam aut ad voluntatem aut ad commodum aut ad digni-



gnitatem tuam pertinere videbitur, sedulo me  
prouisurum, ut non alios magis quam me ipsum  
superem. Ita vale DEO ardentissimis precibus  
commendatus, mihique, si merebor, faue,  
Dedi in acad. frideric. prid. cal. octobr. an.  
cīc 15 CCXXXVIII.

## AD DEMONSTRATIONEM PHILOS.

DE  
AFFECTIBVS

QVAM

PUBLICAE ERVDITORVM DISQVISITIONI  
SVBMISERVNT

A. D. XI. OCTOBR. cīc 15 CCXXXVIII.

M. GODOFREDVS (\*) PROFE  
AMPL. FACULT. PHILOS. ADIVNCTVS

ET

AVCTOR RESPONDENS

IO. CONRAD DANIEL HOYOL

IVR. VTR. CVLTOR.

NOBILISSIMO DISPVTATIONIS AVCTORI

SAL. PLVR. DIC.

D. SIG. IAC. BAVMGARTEN.

(\*) Nuper admodum professoris matheseos partes  
suscepturnus ALTONAVIAM concessit.

Dupliciter delectatus sum disputatione TVA, et quod laudabilem in TE proficiendi ardorem satis mihi iam ante probatum, felicesque in bonis litteris progressus factos denuo perspexi, et quod TVAM praesidisque praeclarissimi in me voluntatem ex publica oppositione mihi demandata intellexi. Neutrum, crede mihi, sine singularis laetitiae sensu percepvi. Quum enim ad temporum felicitatem magni intereste existimo, omnium ordinum studiorumque litteras solide tractari, haud mediocrem voluptatem capio ex erectiorum iuuenum contentione non solum sacris litteris initiatorum, quorum peculiarem curam ad me pertinere puto, verum etiam reliquarum disciplinarum studiis consecratorum. Inter quos, qui iam hic litteras colunt, quorum mihi innocentia indefesa in tractandis legibus industria sine neglectu studiorum, quae iustitiae sacerdoti et ornamento et usui sunt, quem TIBI praeferrem, noui omnino neminem. Cognitam exploratamque habui hanc sollicitudinem TVAM nihil prætereundi quod e re litterarum, quibus TE addixisti, fore arbitraris, quum priuatissimis schoulis meis historiae CHRISTIANAE et antiquitatum sacrarum iuri canonico profuturarum, vna cum generosissimis commilitonibus, quibus illi labores destinabantur, assiduam operam dares. Atque haec ipsa dissertatio a TE conscripta satis com-



comprobat, quam feliciter philosophiam cum iure addiscendo coniunxeris. Argumentum, quod disputas, ex psychologia desumtum dignum sane est, in quo curatius explicando demonstrandoque elaborares, mihi autem mirifice placuit, idque eo magis quo diuturnior gratiorque fuit eiusdem rei meditatio, quae me hos dies in reuidendo edendoque elegantissimo WATTSII libro theologico, de pretio affectibus statuendo, usque eximio in religione, occupatum tenuit. Onus oppugnandi te publice quod mihi imposuisti, graue dicerem et difficile planeque detrectarem, si per amicitiam liceret officiumque patetur. Non tibi magis quam mihi ipse deesse, si hanc amoris in me TVI significationem non amplecterer foueremque et oblatam opportunitatem negligerem publice testificandi et quam cupiam ingenio Tvo, de quo praelata omnia spero, et quantum velim studiis meritisque clarissimi praefidis TVI, mei dudum amantissimi. Comparebo igitur, congregiar vobiscum licet unus omnium optime prouideam, quam sim inferior ex conflictu discessurus, qui si vel maxime voluntate viribusque pugnandi non destituerer, otio tamen ad excogitandas obiectiones vestra dexteritate non indignas nunc quidem penitus careo. Pluribus te non morabor. Gratulationem  
quam



quam mereberis nondum occupabo, sed co-  
ram expediam. Officiosissimum amorem non  
bonis verbis sed ipsa re declarabo. Vale.

Dedi HALAE ad SALAM in acad. frideric. prid.  
id oct. cl<sup>e</sup> CCXXXVIII.

F I N I S.



ERRATA



# ERRATA.

Pagina Linea

- 27 12. pro: erfurdenſi lege erfurtensi
- 31 5. pro: tranqwillitas lege: tranquillitas
- 32 1. pro sagaque lege: sagoque
- 38 15. pro: fecundo lege: foecundo
- 46 6. pro: quicum lege: quocum
- 49 9. pro: inferias lege: in ferias. lin. 21. pro pre-  
cemini lege: precamini
- 60 18. pro: HAMBERGERVM lege: HAMBERGERVM
- 65 5. pro: transeat lege: transfeant
- 73 27. pro exolendum lege: excolendum
- 80 20. pro: anni versariae lege: anniuersariae.  
1. 30 pro: ROD lege: RVD.
- 81 23. pro: transitus lege: transitus. 1. 28 pro:  
tritentini lege: tridentini
- 82 7. pro: alicubiter lege: alicubi ter. 1. 27  
pro: CRYSTOMI lege: CHRYSOSTOMI
- 83 6. pro factum lege: factum
- 84 2. pro: Ἡλίου lege: Ήλίου. 1. 29. pro: di-  
ctoris lege: directoris
- 86 29. pro: missone lege: missione
- 87 12. pro icddunt lege: reddunt. 1. 17. pro: nul-  
libi lege: nullibi
- 88 7. pro: si- lege: si
- 89 15. pro: πάσας lege: πάσας lin. 1. pro:  
ὅσῳ lege: ὅσῳ
- 90 5. pro σοναγοῦσαν lege: σοναγοῦσαν. lin. 6.  
pro: pafha lege: pascha.  
lin. 12. pro: besterna lege: hesterna. lin. 16.  
pro: illustantes lege: illustrantes
- 91 18. pro: surrit lege: surrexit
- 92 3. pro: si lege: sic. lin. 18. pro: ut lege: vt
- 94 6. pro: IESY lege: IESV. lin. 15. pro: CHRISTYM  
lege: CHRISTVM lin. 18. pro: divinam lege:  
diuinam. 1. 20. pro: vendi lege: uendi.
- 95 1. pro: transiru lege: transitu
- 98 4. pro: circum ferimus lege: circumferimus



- 104 9. pro dici lege diei  
 106 21 pro: LICHTFOOTO lege: LIGHTFOOTO  
 108 6. post: ordinandis deleatur (:). vel 1. 5. post:  
       panderetur deleatur (;).  
 123 14. pro: tenore lege: tenere. 1. 27. pro: cæ-  
       sariensem lege: caesariensem. 1. 29. pro:  
       inep. lege: ine. littera (p) ad sequentem li-  
       neam missa.  
 124 25. post: pellucet deleatur (,) 1. 26. pro: inte-  
       reat lege: intererat  
 125 20. pro: imposturae lege: impostura. lin. 8 pro:  
       marmorae lege: marmoreae.  
 126 6. pro: te lege: de  
 127 16 pro: HIPPOLITVM lege: HIPPOLYTVM  
 130 28. pro MAR. lege: MART.  
 134 13. pro: soluberrima lege: saluberrima  
 135 12. pro: vniuersam lege: vniuersam  
 140 16. pro: similitudinem lege: similitudinem  
 142 1. pro: transiisse lege: transiisse  
 147 14. pro: ἀγιωσύνης ἀγιωσύνης  
 148 30. pro: erit. lege: crit.  
 152 1. pro: penhentiae lege: pendentiae  
 154 28. post: coniungit pro: (.) lege: (;)  
 155 14. pro: desinitionem, lege: definitionem  
 158 28. pro: ἴστοῦ lege: ἥτιστοῦ  
 160 21. pro: cap. XXVIII lege: com. XXVIII  
       lin. 22. pro: cap. VII lege: com. VII  
 161 1 pro: nus: lege: minus lin. 17. pro λεγό-  
       μενος lege λεγούμενος  
 162 23. pro: THOM. lege: THEOD.  
 163 28. pro not. d. lege: not. e.  
 176 11. pro: recepo lege: recepto  
 190 3 pro: OHNNES lege IOANNES  
 191 5 pro: SELIGENTIS lege: SELIGENDIS  
 207 18. pro: uem lege: nem  
 208 14. pro: m te lege: mite  
 224 30. pro: balsanum lege balsamum  
 234 11. pro: de fuit lege: defuit  
 237 5. pro: hac lege: haec

240. 26. pro:




- 1  
ost:  
cæ.  
pro:  
n li-  
nte-  
pro:  
  
III  
I  
Y0-  
  
ro:  
  
240 26. pro: acra lege: lacra  
244 25. pro: allud lege aliud  
259 21. pro: eongestis lege: congestis  
269 34. pro: laedantur lege: laeduntur  
272 10. pro: ad eo lege: adeo  
273 6. deleatur: TAM  
278 21. pro: destineor lege: distineor  
285 18. pro arbiturientem lege: abiturientem  
286 4. pro: er lege: et  
292 8 pro: comode lege: commode  
295 11. pro: GLASSOVIA lege: GLASOVIA  
297 4. pro felici lege: felici  
299 3. pro labornm lege: laborum  
300 2. pro: littteris lege: litteris  
301 21. pro: litterarnm lege: litterarum  
303 8. pro: vestram lege: vestrum  
305 2. pro: fauerrimus lege: vaferimus  
306 5. pro: abundantissime lege: abundantissime  
313 13. pro: inteligam lege: intelligam  
315 3. pro: grarulationes lege: gratulationes  
316 17. pro: quicquid lege: quidquid  
317 23. pro: interpretet lege: interpreter  
319 21. pro: profiscine lege: praefiscine  
322 7. pro: docem lege: decem  
329 4. pro: expectatione lege: exspectatione.  
334 1. post: Scientiis deleatur (.)  
336 23. pro: petscrutatus lege: perscrutatus









Landesbibliothek Oldenburg

Bauingart  
Angm.

Theol I  
D  
86

